

НАЗАР ЭШОНҚУЛ

**ШАМОЛНИ
ТУТИБ БЎЛМАЙДИ**

Қисса ва ҳикоялар

Тошкент
Алишер Навоий номидаги Ўзбекистон
Миллий кутубхонаси нашриёти – 2005

*Назар Эшонқул ўтган аср 80-йилларнинг охириларида
агабиётга кириб келган авлогра мансуб. Сизнинг эътиборингизга
ҳавола этилаётган асарларида шу даврга хос туйгу-кечинмалар
билин бирга анъанавийлик ва авангардликнинг синтезлашуви акс
этган. Бу сўз қўллаш, мураккаб биримали жумла куришдан
тортиб, воқеликка, метофарага, тасвир ва ифодага
муносабатгача сезилади. Ўйлаймизки, бу асарларни ўқиётганда
сиз ҳам бадиий мушоҳода кенгликларини ҳис этасиз, ҳаётга,
инсонга қарашингиз кенгаяди, дунёнинг ғанимат эканини, уни
мазмунли ўтказиш зарурлигини яна бир бор английсиз.*

**Нашрга тайёрловчи ва масъул муҳаррир:
Жаббор Эшонқул**

**Муҳаррирлар:
Малика Рустамова,
Гулноза Сатторова**

ISBN – 973 – 10 – 11 – 05

**© Назар Эшонқул. Шамолни тутиб бўлмайди. Алишер
Навоий номидаги Ўзбекистон Миллий кутубхонаси
нашиёти – 2005**

ШАМОЛНИ ТУТИБ БЎЛМАЙДИ

Юз йилдан бери терсоталикларнинг гуури ва фахри бўлиб келган, замонавий қилиб қурилган рафоқли уйлар қаршисида юздаги чипқондек қишлоққа кўримсизлик ва кексалик бағишлаб турган, номаълум ва мудҳиш синоатларга тўла қадим қўргонни эслатувчи Байна момонинг уйини худди унугтишига ва йўқ қилишга маҳкум этилган хотирадек ниҳоят бузиб ташлашга киришиши: темир тирноқли булдозерлар уйнинг деворларини қулатар эканлар, уй билан қўшиб, ўзларининг ҳам нималаринидир бузиб, вайрон қилишаётгандек, терсоталиклар бир чеккада жимгина кузатиб туришар ва нақ эллик йилча тақдирнинг бешафқат ўйинига қарши кураша – кураша дунёдан ёлғиз ва изсиз ўтиш азобини кўтариб келган, ҳаёти ўзларига ҳамон тушуниксиз ва мавҳум туоладиган Байна момони эслаган аёллар кўзларига ёш олиб, болаларини бағирларига босганча, олис ва ғамгин хотираларга берилиб, мунғайган алфозда ўтирадилар.

Байна момо тириклигига гарчи бу аёлларни, эрининг полвонлик лаш – лушлари ва кийим – кечаклари ётган, полвонинг ўлимидан сўнг ҳечқачон чироқ ёнмаган, туйнути шуваб ташланган ана у ҳужра каби қоронғу мусибат тўла уйи ичкарисига киритмаган бўлса – да, улар қаҳр ва ғазабини ситам билан ичига ютиб келган бу кампирни ҳурмат ва эҳтиром билан эслашарди. Бу уй Терсотада қурилган биринчи уйлардан эди ва Райим полвоннинг отаси Шукур оқсоқол бундан бир аср муқаддам тугилажак фарзаңдларига кенг уй ва йилдан – йилга кўпайиб бораётган йилқиларга отхона солиш мақсадида Терсота сойининг офтобрўясига қишлоқнинг биринчи пойдеворини қурганди. Райим полвон эса отасининг ишини давом эттирди: уйнинг орқасида боғ барпо этди ва отхона ёнида қирга туташтириб, ёзинг жазирамасидан гўшт ва ёғларни, қимиз ва айронларни

асраш учун кенг ертўла, уйнинг олдига тошдан баланд супача, от кириб чиқадиган узун, устундор айвон қурди. Байна момо эллик йилга яқин ёлғизлик даврини ана шу айвондаги устунларга суюниб ўтказди: у эри ва ўғлиниң жудолик азоби қийнаган пайлар шу устунларни қучганча йиғларди. Кейинчалик кўз ёшлари ҳам тутаб қолгач, ҳаётида гўё суюнчиғи ва орқасидан йиғлаб қоладигани йўқлигини одамлардан яшириш учун ёки энди йиллар силсиласига дош беролмай путурдан кетаётган уйни буткул вайрон бўлишдан асраб қолмоқчидек, елкасини устунга суюган ҳолатда хотирасининг синиқ парчаларига тикилиб, кўзларини юмганча ғамгину мустағриқ ўтиради.

Райим полвоннинг ўлимидан кейин туғилган ва у ҳақда кейинчалик буткул эсларидан чиқиб кетган чўпчаклар – нигина эшитиб улғайган авлод уйларини равоқли ва пишиқ гиштдан қура бошлигач, бир пайлар Терсотанинг кўрки ва ғуури бўлиб турган бу уй бирдан кўримсиз қиёфага кирди ва энди Байна момо каби уй ҳам қишлоқдаги уйлар олдида ёлғизланиб қолганди: фақат бири – бирини босиб – туртиб кириб келаётган шошқолоқ йиллар бу авлоднинг саркаш қалбига қандайдир олис хотирани ёқиб қўйиш учун беҳуда уриниб, уй деворларига маҳзун битиклар ёзар, бекаси билан бирга бу макон ҳам аллақачон ўзининг олдинги қудрати ва виқорини йўқотиб бўлган, унут ва ташландиқ масканга айланганди. Терсоталиклар энди аэропланлар ҳақида гаплашишарди. Улар замоннинг алғов – далғовларига фарқ бўлган, ҳаётларида юз бераётган янгиликларни ҳазм қилиб улгурмасди. Йиллар билан бирга ҳамма нарса ўзгарар, фақат Байна момогина уни сезмас, гўё унинг учун вақт ўша ҳолича қотиб қолгандай, уни ҳамон ўша эллик йил олдинги – эри ва ўғлиниң ўлигини аскарлар тепкилаб ўтишган устун олдидан топиш мумкин эди.

Миршаб ва аскарлар уйнинг ҳар бурчагидан ёпирилиб келишганда Байна момо эрининг мурдаси устида туради. Райим полвонни қўлга туширолмай юрган Замон отбоқар уни уйидан чиқаётганда отиб ўлдирган, энди полвон ростдан ҳам ўлганми, йўқми миршаблар билан пусиб – пойлаб, айвонга яқинлашиб келарди. Бироқ шу пайт яна ўқ овози жаранглади ва Райим полвондан кўз узмай келаётган аскар

оёғини қучоқлаганча бақириб йиқилди. Байна момо меҳмонхона эшигидан чиқаверишда отасини отиб ташлашганини кўргач, уйга югуриб кириб кетган, қўлига отасининг милтиғини тутиб турган ўғлини кўрди – ўғлининг кўзларіда ҳам эриники каби fazab, телбалик ёнарди. Байна момо ўғлини огоҳлантиришга улгурмади. Бирданига бир неча ўқ овози унинг қулогини битириб қўйди ва ўғли отасининг устига юзтубан йиқилди – йиқиларкан, энди сабза урган мўйлови титраб кетди, онасига бир зум қўрқув ва ҳижолат аралаш тикилди. Замон отбоқар югуриб келиб, унинг бошига тепди ва милтиқни бир четга ўлоқтириди. Қишлоқда аскарлардан бошқа ҳеч ким кўринмас, одамлар гўё сувга чўккандай ғойиб бўлган, фақат деразаларга тортилган қора пардалар бу мудҳиш жиноятта лоқайд ва бефарқ боқиб турарди. Байна момо терсоталикларни кечира олмади – кўкраги илма – тешик бўлган ўғлига қаратса Замон отбоқар яна бир неча бор ўқ узаркан, у мадад излаб, ўйларнинг туйнукларини ёлиб турган қора пардаларга бир – бир кўз тиқди, бироқ у ердан совуқ сукутдан бошқа ҳеч нарса кўринмас, зулматга чўккан туйнуклар бу мисли кўрилмаган қотилликни жимгина томоша қилиб турарди. Миршаблар Райим полвон ва ўғлининг ўлганига ишонч ҳосил қилишгач, отларига миниб жўнаркан, Замон отбоқар эри ва ўғли мурдаси устида чўкка тушган Байна момонинг елкаси оша қамчи тушириди:

—Энди хору зорлиқда ўлиб кетасан, – хириллади у. – Молингни топшир, деганда эринг қўлига милтиқ ушлаб биз билан сичқон – мушук ўйнади. Мана, энди унга ҳеч нарсанинг кераги йўқ.

Миршаблар Райим полвоннинг қўрадаги подаси – ю отларини ҳайдаб кетишиди. Замон отбоқар отларни қувиб кетаркан, бир йўла отаси билан унинг қасосини олиши мумкин бўлган ўғлини ҳам отиб ташлаганидан хурсанд эди – у шу кетиши билан қишлоқнинг кўп нарсасини ҳайдаб кетди – энди қишлоқ бирдан минораси қулаган шаҳардек гарип ва нотавон кўринарди. Ўн беш йиллардан сўнг Замон отбоқар қишлоққа қайтиб келганда қишлоқдан файз кетиб, одамлар яна ҳам ожиз ва ҳуркак бўлиб қолгандилар. У Райим полвондан сўнг ташландиқ ҳолатта келиб қолган сой

бўйидаги боғга кенг қилиб уй қурди: у боғда уй қуриш учун ҳеч кимдан рухсат сўраб ўтиргади. Энди у ўзи бу қишлоқقا олиб келган замон ҳавосидан яйраёттган қишлоқдошларини кўриш учун отда изидан бир тўда ов итларини эргаштириб айланиб юраркан, қоя остида елкасига ўтин кўтариб келаёттган Байна момога дуч келди. Байна момо қариб қолган, аммо ҳали ҳам кўзлари худди ўн беш йил аввалгилик қаҳрли ва нафрат тўла эди.

— Сен менга бундай қарама, — Замон отбоқар қамчисини ҳавода силкитар экан. — Эринг бу ерда бўлмаса бошқа ерда барибир ўлган бўларди. Сен эса хавотир олма, ўлсанг итларим кўмади. — Шундай деб у бўрибосарларни кўрсатди.

Аммо у Байна момони бу сафар урмади. Байна момо ҳам унга бир оғиз ортиқча гапирмади. Умуман эри ва ўғлининг ўлимидан сўнг камгап ва одамови бўлиб қолганди. У Шукуроқсоқол ўз феълига яраша кенг — кенг қилиб қурган хоналарда худди бир нарсасини йўқоттан каби мақсадсиз кезиб юрарди: у энди бу алғов дунёда ёлғиз ва қаровсиз қолганди: лекин ўзининг ожизлигини ҳеч қачон билдирамас, ўзидан кўнгил сўраганларни ёмон кўрар, гўё ҳаёти ҳеч ким қиё боқа олмайдиган дахлсиз салтанатдек у ёқча бирон кишини, ҳатто сўзи билан ҳам, киришга йўл қўймасди. Эрта баҳордан то кеч кузгача саҳармардандан олдига беш — олти қўй — қўзи, эчки — улоқ ҳайдаганча дарё бўйидаги юлғунзорга тушиб кетар, ў ердан қуриган шоҳ — шабба териб, қоронғу тушганда уйига қайтар, бир йилда икки — уч марта тегирмонга буғдой кўтариб бораради. Унинг буғдой кўтариб юришидан ори келган Олломурод тегирмончи Байна момони инсофга чақириди:

— Сиз бундай овора бўлиб юрманг, — деди у. — Бирон эркақдан бериб юборсангиз, тортиб, ўзим уйингизга олиб бориб ташлайман.

— Бу қишлоқда эркак йўқ, — деди Байна момо зарда билан, сўнг елкасидаги буғдойни тегирмонга кираверища туширди. Гапираёттганда овози титраб кетди. Тегирмончи тилини тишлаб қолди. Байна момо бир пайтлар фақат қишлоқ эмас, бутун тоғли ҳалқнинг орини кўтарган, номини чиқарган Райим полvonни қулоқ дея таъқиб қилишларига, сўнг итдай хор қилиб отиб ташлашларига йўл қўйгани ва

ўғли билан эрини замоннинг эгаси, бир пайтлар Райим полвоннинг малайи Замон отбоқар ихтиёрига бериб қўйгани учун қишлоқдошларини кечиролмас, уларга бўлган нафрати сусайиш ўрнига, йиллар ўтиб, ота – бола ўлдирилган оқшомдан узоқлашган сайин кўпроқ ўрни ва қадри билинаётган, ўзини ҳаётнинг барча қувончидан бир йўла маҳрум этган, ёлғизликнинг кўр мусибати аро тобора авжланиб, Байна момонинг кексалиги билан бирга инжиқ ва йўриқсиз бўлиб борарди. У баъзида қишлоқдошларини очиқ масхара қиласади: «Э, сенмисан, Салом чавандоз, хотинингнинг иштонини кийиб юрибсанми дейман», «Ҳаким отчопормисан, бунча урроchi байталга ўхшаб қийшанглайсанг...» «Бу қишлоқнинг аёллари энди фақат хезалак тугади». Бу масхара ва нафрат йиллар ўтиши билан Байна момони қишлоқдошларидан бутунлай ажратиб қўйди. Энди у ёлғиз ва кимсасиз қолди. Уни ойлаб бирор йўқламас, фақат эрталаб эчкиларини юлғунзорга ҳайдаб бораёттанидан, кечқурунлари қишлоқни тутган қайнаётган сут ҳидидан ҳали унинг тирик эканини билишарди. Байна момо ўз ёлғизлиги ва мусибатини ҳаётнинг бадбўй, забун, хор этилган ҳидлари анқиб ётган йиллар даҳлизидан етаклаб ўтди. Қишлоқдошлари баҳор келиши билан эски яйловларга кўчиб чиқишар ва ер шудгорлар, ҳар ким ўз ташвишига берилиб кетарди: қишлоқда қолган Байна момо эса бу пайтда ёлғизлик даштини шудгорлар, у ерга ҳар йили Замон отбоқар ҳукумат одамлари билан келиб, эри ва ўглини отиб ташлаган оқшомни экар ва сўнг ёлғиз ўзи ҳосилини йигиб оларди. Байна момо ҳар кеча кўз ёшлари билан тўлган қайиқда йиллар қоялари орасида қолиб кетган эри билан ўглининг илма – тешик бўлган мурдаси ва Замон отбоқарнинг музaffer қамчиси ётган қонли ҳалқоб билан тўлган айвонга сузиб борар, эрталаблари ҳўл бўлиб кетган ёстигини худди қадим аждодларнинг унут яловидай уйининг олдидаги – орадан йиллар ўтгач, уйини бузаёттанилар қўпориб ташлашга кучлари етмагач, ковлаб олишга мажбур бўлган – баланд толга осиб, офтобда қуритарди. Қиши пайтлари ғамлаб қўйган ўтини етмаган кунлари у кўрпага оёғини тиққанча хотирасига исиниб жон сақларди. Ражаб чўпон қариндошлиги қўзиб, бир неча йил олдин ғамлаб берган ўтини омборхона

ортida, тахлаган жойда таҳи бузилмай туради — уни Байна момо қазо қилганда маъракага яратиши ва барча терсоталиклар Райим полвон тириклигига ҳамманинг маслаҳатгўйи бўлган, уйи ҳамиша меҳмонлар ва полвонваччалар билан тўлиб — тошадиган бу аёлнинг бунчалик нафрати ва тавқи лаънатига сазовор нима гуноҳ қилишганини бир умр билолмай ўтишиди. Байна момо қишлоқдошлиарига кўз — кўз қилмоқчидай, бу уйнинг эркаги ва орияти ўлмаган дея таъкидлаёттандай эри ва ўғлининг полвонлик яктакларини ҳар ойнинг охирида шусиз ҳам ҳамманинг кўзига ташланиб турадиган уйнинг шаппаттайига осиб қўйарди: яктаклар ҳам бора — бора йиллар ҳовурига ҳамда ҳар ойда қайта ювадиган нафрат тўла чанглаларга дош беролмади: Замон қассоб ўлимидан бир кун оддин яктаклар торда увада — увада бўлиб осилиб туар, улар энди кийимдан кўра кўпроқ қабрлар устига илиб қўядиган лаҳтакка ўхшаб қолганди.

Замон отбоқарнинг ўлими ҳам Байна момонинг қалбини юмшата олмади: унинг ўлими тўғрисидаги хабарни келтиришганда Байна момо ўз ҳужрасида келинлилк сандиги ёнида чўкак тушганча мусибату фамга кўмилиб ўтиради: унинг шу туриши азоб — уқубатнинг бир тўплам уюмига ўхшарди. Ҳужрага бош суққан Розия момо унга Замон отбоқарнинг ўлими ҳақидаги хабарни етказди. Барча аёллар ҳозир қувончдан ҳаммани бир — бир қучиб чиқади деб ўйлашганди. Аммо Байна момо хабарни маликалардек хотиржам қабул қилди: у бу хабардан ажабланмади ҳам, ўтирган жойидан остонаядаги аёлларга бурилиб ҳам қарамади — ҳайкалдай, тошдай қотиб ўтираверди. Фақат унинг бармоқлари қалтираб туар, хонага қон ҳидидай нохуш ҳид ўтириб қолганди. Аёллар ундан жавоб кутиб, узоқ ўтиришиди. Орадан анча вақт ўтгач, Байна момо уларга ўтирилиб ҳам қарамай, гўё уларни кўришдан ижирғангандай ва жиркангандек алфозда «Боринглар, ўликларингга йигланглар» деди. Унинг қаҳр тўла товуди кўпдан буён одам қадами етмаган ҳужралар ичига сингиб кетди: у ердан йигирма етти йиллик чангу ғубор гўё зардали овоздан қалтираб кетгандек жойларидан бир қимиллаб қўйди, сўнг яна ҳужраларга бу хонадон бошига тушган фам — андуҳдай

абадий чўқди. Шундай дея Байна момо мусибат ва ғам адо қилган, йилдан — йилга кичрайиб, қариб бораётганидан ва юзини тилим қилиб ташлаган ажинларидан уялгандај фаслма — фасл ранги ўзгариб, худди бекаси каби туссиз, рангсиз кўринишга келиб қолган ва ҳеч қачон елкасидан тушмаган желаги билан юзини аёллардан тўсиб олди; шу билан у терсоталиклар ва одамлар билан ўрнатилажак барча мулоқотлар эшигини тақа — тақ ёпди ва фақат ўзигагина маълум, бошқа ҳеч ким аংглай олмайдиган, бошқа ҳеч ким аংглашга қодир бўлмаган ўз дунёсига кириб кетди.

Байна момо сўнгти нафасигача ўз нафратега содик қолди. Замон отбоқарниңг ўлимидан сўнг ҳам қишлоқдошлари билан илакишиб кетолмади. Умрининг охирида бу ўжар кампир барибир ўзлариникига кўчиб бормаслигини сезгач, синглиси билан күёвенинг ўзлари кўчиб келишди: аммо бу пайтда Байна момо бутунлай оёқдан қолган, фақат кун узоғи кўзини шифтта тикканча чўзилиб ётишга яради.

Байна момони эри ва ўленинг қабри ёнига қўйиши: эмлик йил аввалги қабрни осонгина топиши; қабр деярли ҳар ҳафта тозалаб турилганидан бошқа қабрлардан якқол ажралиб турар ва ундан мискин бир андуҳ анқирди, Унинг Райим полвондан сўнг деярли янгиланмаган, ҳатто уларга ҳам мусибат ва ёлғизлик ҳиди ўтириб қолган кўйлакларини ҳалқ лапарларини йигиш учун келиб, қуриб кетишган ва ўша талаба қизлардан сўнг бирон марта фойдаланилмаган торга узоқ жанглардан сўнг мағлуб бўлган қўшиннинг ўзларига ўлжа қолган туғларини осиб қўйишгандек ва қишлоқдошларидан эмлик йил нафрат қилган аёл устидан ниҳоят ғалаба қилишгандек бирма — бир осиб қишиши. Талаба қизлар ўшанда Замон отбоқарнига йигилган, пишириқ — мишириқни бошлашган аёллар қий — чув қилишаётган оқшомда келишганди. Уларниңг келиши билан Замон отбоқарникида бошланган тўй ташвишлари қўшилиб кетди. Бироқ қизлар қишлоқ иримларини назарига ҳам илишмади. Байна момоникига кела — солиб, кир ювишга тушдилар — улар ичкўйлақ, рўмол, яна Байна момога ғалати кўринган шимларини шундоқ ҳаммага кўз — кўз бўладиган жойга бемалол осиб қўйиши — улар Мели ўқитувчининг «қишлоқдаги энг кекса аёл» деган бир оғиз гапи билан

Байна момоникига келиб ўрнашиб олишган, афтидан, ҳали—
бери кетишмоқчига ўхшамасди. Байна момо улар билан
очилиб гаплашмади ҳам. У кечқурун эчкиларни соғаркан,
қизлар ҳайратдан қий—чув қилиб юбордилар: уларнинг
биронтаси ҳам эчки соғишини кўрмаганди. Қизларнинг бир—
иккитаси Байна момога яқинроқ келиб, унинг эчки елинига
бориб келаётган қоқсуяқ қўлларига қарадилар: кейинчалик
миршабларнинг ҳафсаласини пир қилган, худди уйнинг
девори каби йиллар уқалай—уқалай жимитдек қилиб қўйган
гавдасини сал олдинга эгиб турганидан унинг ўзи ҳам қари
ва озғин эчкига ўхшаб қолганди.

—Агар ўғлингиз бўлганида мен сизга жон—жон деб
келин бўлардим, — деди қизлардан шаддодроғи Байна
момонинг эчки соғишидан завқи келиб.

Байна момо унга ўқрайиб қаради ва кўзларида бирдан
алам ёнди: қизлар қўрқиб кетишиди: кўз олдиларида Байна
момонинг бутун танаси бирдан тутаб жўнагандай туюлди.
Қизлар дуд ҳидини аниқ сезишиди. Байна момо ўрнидан
турди—да, қўлидаги қадини супага қўйиб, ичкари кириб
кетди ва шу киргани билан эртасига эчкиларини юлғунзорга
ҳайдаб кетмагунча қайтиб чиқмади. Чошгоҳ пайти
эчкиларини ҳайдаб кетар экан, қизларга бир оғиз ҳам
гапирмади. У худди ойпарастга ўхшаб кетиб борар, эчкилари
юлғунзорга эмас, Пўлат чолнинг бедапоясига қараб
кетаёттанини ҳам сезмай, юлғунзор тарафга йўл олганди.
Пўлат чол қорни шишиб кетган эчкиларни ҳайдаб келганда
Байна момони уйдан тополмади: у алламаҳал, ой атрофни
сутдай ёритганда шарпадай кириб келди ва уйга кириб
кетиб, то, миршаблар сўраб келмагунча уйдан чиқмади.
Қизлар бир ҳафта унинг оғзини пойлаб овора бўлишгач,
бирон нарсага эришолмай қайтиб кетишиди. Улар уй олдида
пайдо бўлишлари билан уйнинг таназзулга юз туттани
бирдан билиниб қолди. Улар навқирон ва гўзал эдилар,
уйдан ва Байна момодан чиркинлик ва мусибат ҳиди келар,
навқиронлик олдида бирдан уй ҳам, Байна момо ҳам
кексайиб қолгандай эди. Улар бу уйга ўрнашиб қолган
ёлғизлик ва мусибатни чўчитиб, сўнг қувиб юборишмоқчидай
тинмай хохолашардилар. Талаба қизларнинг очиқ—
сочиқлиги ва лорсиллаган таналарини кўз—кўз қилиш учун

кийиб олган тор шиму кўйлаклари, калта соchlari – ю ғалати, оппоқ пайпоклари ҳам табиатан текин томошани яхши кўрадиган терсоталикларнинг эътиборини тортолмади: уларнинг шаҳар атири уфуриб турган ноз ва таманинолари сирли тарзда ўлдирилган отбоқарнинг азаси орасида кўзга ташланмай қолди. Узоқ вақт фарзаандизлик азобини торттан отбоқарни қирқдан ошиб дунёга келган уч ўғлига бирваракайига дабдабали тўй килиш учун казоларни шахсан ўзи айтиб келиш мақсадида шаҳар тушиб кетгандан икки кундан сўнг эрталаб дарё бўйидаги юлғунзор ичидан чавақланган ҳолда топиб олишганда аллақачон тўй қозонлари қурилиб, узоқ манзиллардан баъзи меҳмонлар кела бошлаган эди. Узоқ йиллар ўзларига суюнчиқ бўлиб келган отбоқарнинг ўлими худди душманларидан ўзларини асрар турган қўргонлари қулагандек терсоталикларни бирдан мунғайтириб қўйди – улар қарийб чорак аср раҳнамо ва пешволари бўлиб келган одамнинг ўлимидан қаттиқ қайғуга тушдилар. Эртасига етиб келган миршаблар қишлоқдаги ҳар бир эркак билан гаплашиб чиқишиди, сўнг улар Байна момоникига йўл олдилар – улар йигирма етти йил муқаддам отбоқар туфайли эри ва ўғлидан ажралган аёлни тўсатдан эслаб қолишганди. Бироқ улоқлар ичидан улоқдан ҳам кичик жуссали, юзига йилларнинг бешафқат муҳри босилган ҳамда ёлғизликка маҳкум этилган, ҳар бир сониянинг мусибату андуҳи асорати порлаб турган кичкина, жимитдай, соchlari оппоқ бўлиб қолган кампирни кўришгач, негадир ботинишолмади – улар қаршиларидағи рамақижон кампир билан девдай Замон отбоқарни қиёслашиб, ўз шубҳаларидан уялиб кетишиди, чоғи, индамай изига қайтдилар. Улар, гарчи Байна момони сўроқ қилганларида ҳам ҳеч нарсага эриша олмасдилар – у кейинги йилларда бир оғиз ҳам гапирмаган, сўзлар ва уларнинг маъноси унинг хотирасидан чиқиб кетгандай ёки ўз моҳиятини йўқотгандай, ўз қайғу ва азоби билан кунларни зўрга енгиж яшаётган эди. Замон отбоқар итдай ўлим топганди. Жасаднинг шу туриши аввал ўзи, кейин тенаси қулаб тушган улкан минорни эслатарди – кийимлар пора – пора йиртилган, аврати узиб ташланган, ўнга бармоқнинг ҳаммаси кесиб олинганди...Барибир бармоқни излаб топишюлмади.

Жасадни бармоқсиз кўмишга тўғри келди: бутун қишлоқ нақ қиёмат майдонга айланганди: аёллар уввос солиб йиғлашшар экан, энди соchlари қордай оппоқ, деярли арвоҳга айланган, қишлоқдошларининг хотирасидан ҳам чиқиб кетган Байна момо том устида Райим полвонни итдай отиб ташлашларидан бир неча дақиқа олдин отини эгарлаш учун олиб чиқаёттиб, ўқда дучор бўлган, йиллар пора – пора қилиб ташлаган жабдуқ устига чўкак тушганча тўй деб келиб, аза устидан чиқаётган меҳмонларни, тўй бераман деб, энди аза берадиган қишлоқдошларини кузатиб, худди қутлуғ бир вазифани ўтаб, энди дунёда армони қолмагандек, йиллар фижимлаб ташлаган юзида бир жунунваш ифода қотиб қолган ҳолда терсоталиклар ҳаётига йигирма етти йил соя соглан тош ҳайкал каби қилт этмасдан ўтиради.

Ниҳоят бу кампирнинг ҳам ситамгар китоби ўқиб бўлинди – лайлатулқадр куттилаётган оқшом ёғоч ва кўп йиллик андуҳлар ҳиди ўтириб қолган, содиқ қўшиндай эллик йилнинг бирон куни ҳам тарк этилмаган ғамнок ва аламли салтанати – келинлик тўшагида жимгина жони узилди – фақат ўлиши олдидан синглисини чақириб йигирма йилдан бўён очилмаган, олтмиш етти йил олдин тераклилик Кўр Сафар уста ясаган, ярим вайронга сандиқча имо қилди ва бир сўз демай тўшакка бош қўйиб жимгина жон берди. Уни эртасига тушга яқин чиқаришди. Удумга кўра азага Ўранинг барча қишлоғидан одамлар терилиб келишди – амир замонларини кўрган, нариги асрнинг сўнгти ёдгори бўлган қишлоқдошларини сўнгти йўлга кузатиш учун барча кекса – ю ёш йигилди. Йигилганлар орасида Райим полвон билан ўғлини ҳимоя қилолмай, Байна момонинг бир умрлик нафратига дучор бўлган, ўша пайтда навқирон, энди шарти кетиб, парти қолган чоллар ҳам бор эди. Улар орадан эллик йил ўттач, бу унут ва музтар гўшага биринчи бор қадам қўйишишган ва тобут ортидан гуноҳкорона бўйин эгиб боришарди.

Мурдани ювиш олдидан сандиқни очишиди. Аввал ўлимликка аталган кийим – кечакларни, кафани олишди, сўнг дастаси қорайиб қолган қамчи, сопига гавҳар ўрнатилган ханжар, эркак кишининг тер ҳиди келиб турган калапуши, кўкракка тақадиган зебигардон, кампирнинг

Бўлида ҳеч қачон кўринмаган келинлик билагузути, этаги
каштали, ёқасига тасма урилган кенг кўйлак, ангишвона ва
сағайиб кетган қуръонни олишди. Энг охирида сандиқдан
богичини чирк боғлаган, каптарнинг юрагидек кичкина,
матоси зар сим билан тикилган, кўп йиллик қон қотиб қолган
тумор ва тиги занглаган қайчи, кўп йил турганидан бўғин –
бўғин бўлиб, фақат суккенинг ўзи қолган, у ҳам қорамтири
тус олиб, нақ кукунга айланиш арафасига келган, чорсининг
йиртиғига пала – партиш ўраб ташланган ўнта одам бармоғи
ҳам топилди...

ЯЛПИЗ ҲИДИ (Туркум ҳикоялар)

I

САРОТОН

Дам олиш куни хонасида китоб ўқиб ёттан Самандарнинг диморигига бирдан ялпиз солинган шўрва ҳиди урилди ва саккиз яшарлик пайти баҳор кунларининг бирида ҳаёт¹ ларининг бурчагидан отасининг бир қучоқ ялпиз териб келгани ва онаси кечқурун ялпиз шўрва қилгани эсига тушди – ю, китобни ёлиб, ҳавони бурнига торта бошлиди. Сўнг ўрнидан туриб, дераза пардасини сурди ва у ердан кўриниб турган, ҳали тўла сарғаймаган дараҳтларни кўриб, кўнгли чўқди. Бўғта ҳафсаласизлик билан кўз юргутириди. Боғдаги дараҳтлар сийрак, лекин сершоҳ эди; қаровсиз қолганидан боғни чириган чакалаклар босган, айни саратонда бў манзара нохуш таассурот қолдирар, кўп йиллардан бери қуёш кўрмай касал бўлиб ётган шол кампирнинг қўлидек қуруқ ва кўримсиз эди. Самандар улардан нигоҳини дарров олиб қочди. Шоҳларнинг синиб, сарғайиб, мунғайиб ётишини ортиқ кўргиси келмади. Негадир юраги ғаш бўлди. Деразага яқин иккита дараҳт узун маржон шаклида мева қилган, меваси ҳали ғўр ва дараҳт тусига нисбатан яшилроқ ва ялтироқ эди. Дараҳтларнинг остида ботаётган қуёшнинг тангача шуълалари ўйноқларди. Боғнинг ярми жўка, дуб ва Самандар ҳали номини ҳам билмайдиган дараҳтлардан иборат эди. У шаҳарда ҳар қадамда учрайдиган бу дараҳт

¹ Ҳаёт(шева) тоғли қишлоқларда ҳар хил экинлар экиладиган томорқа.

турларини бир – биридан зўрга ажратарди. Жўка дарахтини узоқ йили озғингина боғбондан билиб олганди. Боғбон ҳам боғдаги дарахтларнинг кўпчиллигининг номини билмасди. У фақат шарқона дарахтларнигина қийналмай санай оларди. Самандар эса ёшлигидан таниш бўлиб қолган олча, олма, шафтоли ва ёнгоқ дарахтларнигина таналарига қараб ажратиб берарди. Бироқ боғга дарахтлар аралаш – қуралаш экиб ташланган ва у боғдан кўра алланечук қаровсиз хиёбонга ўхшаб кетар, мевали дарахтлар деярли йўқ эди. Самандар деразага яқин, ҳали меваси қизарар – қизармас боғ ичидан ўтаётган мактаб болалари талаб кетадиган олча дарахтини ва панжара тўсиқда қаватма – қават экилган, лекин ҳеч қачон ёлчитиб мева қилмайдиган жийдани ётириарди. Олча дарахтининг танаси кексаларга хос ғадир – будир, сершоҳ, сермева эди. Жийда эса баҳор пайтлари бутун шаҳарни ўзининг ҳиди билан тўйдириарди. Самандар деразадан кўринаётган олча дарахтининг осмонга тулашиб кеттан юқори қисмидаги баргларининг сарғая бошлаганини кўрди. Шоҳда барглар қатор тизилганди ва Самандарга яқин бўлгани учун осмонни тилимлаб турган дастасиз ҳанжарга, барглари эса осмон саҳнида улкан мовий кўлга бир – бирининг тумшуғидан боғлаб, қатор териб қўйилган кичкина қайиқчаларга ўхшарди. Бу ҳозир Самандарга боши оғриб тургани учун ёқимли манзарадек бўлиб туюлди. Ҳатто баргларнинг қайиқчаларга ўхшашини кашф этганидан хурсанд бўлиб кетди. Баргларнинг худди денгиз тўлқинида солланиб турган қайиқлардек тебраниб турганини ва осмоннинг жуда ҳам мовий, боғнинг бўм – бўш, дарахтларнинг сукутда экани бир зум жуда ноёб гўзалликдай бўлиб туюлди. Ҳозир Самандарнинг қулоғига нарироқдаги катта йўлдан трамвай ва троллейбусларнинг тақа – туқлаб ёки гувиллаганча ўтиб бораётгани ҳам, машиналарнинг сигнали ҳам, болалар боғчасидан келаётган шовқини ҳам кирмасди: у ҳозир мана шу ноёб гўзалликни бутун онгига, шуурига сингдирмоқчилик, фақат боғ ичида дарахтлар ва барглар шитиригагина бутун зътиборини жалб этганди. Жўка дарахтининг қуёш тегиб турган қисми сарғиш, бошқа қисмлари қорамтирип – пистоқи тусга кирганини англаб қолди. Жўка дарахтининг сербарг

новдалари орасида унинг шохлари деярли кўзга ташланмас, дараҳт у турган деразадан ярми қора, ярми сариқча бўялган эски гумбазга ўхшаб кўринарди. Самандар бир ҳафтача один К. майдонидаги хиёбонга борганини эслади. Хиёбонда ҳали ҳамма нарса ям – яшил, гўё баҳор ҳали кетмагандек, гуллар очилган, арчалар хушбўй ҳид таратган, майсаларда намчил тафт бор эди. Хиёбон шу даражада гўзал, рутубатли, ҳар хил рангта беланганд ажиг бир манзарага эга эдики, айниқса, қуёш ботган маҳали бу манзара яна ҳам гўзаллашар, кўзларини яшнатиб, юракни қитиқларди. Бироқ баҳри – дилини очиб юборадиган бундай гўзалликда қандайдир ясамалик бор эди. Самандар бу гўзаллик ўзига юқмаганини сезди. Ҳар хил шаклга солиб экилган гулзор ва майсаларнинг жозибасини ўзига сингдиролмади. У майсалар ичиди ёки арчаларнинг доимо соя тушганидан зах бўлиб қолган жойларида биронта ҳам бегона, ёввойи, ўз ҳолича ўсиб ётган ўтларни кўрмади. Ҳатто кўм – кўк бўлиб оқаётган хиёбон ичидаги кичкина жилғачанинг атрофи ҳам жуда эътибор билан тозаланганди тартибга келтирилган эди. Тўрт бурчак шаклидаги майдонда майсалар кулф уриб яшнаб ётарди. Майсазорда фақат майса, гулзорда фақат гул ўсган, улардан одамнинг юзига роҳатбахш салқин ҳаво уфурар эди. Ўша куни Самандар худди ҳозиргидай қишлоғининг чеккасидаги доимо сув сизиб ётганидан нақ чанглзорга айланганди тартибга келтирилган эслаганди. Тўқайда майсалар товон урар, ҳар хил гуллар аралаш дасталари сувга қониқиб, бутун бир тўқайнин ҳиди билан маст қилиб турган, тарсиллаган ёввойи ялпизларни, печакгул ва шамакгулларни, тўқайдаги юлгун, зирк ва харсанглар соясида офтоб тегмаганидан сарғиш тусга кирган қоқигулларни эслаганди. Негадир болалигида унга қадрли бўлмаган тўқайдаги ўша анвойи гуллар, энди ҳатто ўсимликлари, гуллари ҳам тартиб билан ўсадиган шаҳарда унга алланечук ардоқли бўлиб туюларди.

У балким бир ҳафта один қишлоғининг четидаги тўқайдада ўсадиган бўлиқ ялпизларни эслаган ва сўнг унуган учун ўша куни юзага чиқар – чиқмас, яна яширинганди – ҳали ўзи ҳам нима деб аташни билмаган ботиний туйгулари ва хотиралар бугун китоб ўқиб ётганида ўз – ўзидан шуурини

банд этиб, бир зум сувга яширинган пўкақдек хаёлига лип этиб қалқиб чиқдану, унга ялпиз солинган шўрва ҳидини эслаттандир? Ҳар қалай, Самандар ялпиз солинган шўрва ҳидини қўмсарди. Шу сабабли бўлса керак, уйнинг орқасидаги болалар боғчасига қарашли қаровсиз боғ унинг кўнглига яқинроқ эди. Йўқ, у қарийб саккиз йилдан бери шу ерда яшаёттани учун бу боғ қадрдан эмасди, балки, ўша, ҳатто одам тушунтириб бера олмайдиган, майсалар билан гуллар ўртасидаги ҳали буткул чегара ўрнатилмаган, ўсимликлар ўз эркича ўсиб ётган, баъзи кунлари деразани очиб, ишлаб ўтирганида ялпиз ҳиди келиб қолгани учун мана шу қаровсиз боғ Самандарнинг кўнгли ва хотираларига яқин эди.

Ўшанда у биринчи синфни тутатаёттанди. Ёнгир эндиғина ёғиб ўтган, боғдаги майсаларнинг кафтларида маржон – маржон томчилар жилвалана, отқулоқлар баргида ҳовуч – ҳовуч томчиларни кафтларига олиб, кўз – кўз қилиб турганга ўхшарди. Отаси билан ҳаётнинг отхона жойлашган қисмига боргунча кичкина этиги худди яп – янгидаёт ялтираб қолган, бундан суюниб кеттан Самандар ҳаётдаги ўтларга этигини тобора кўпроқ ишқаб ялтиратган, узун чопонининг жиқда ҳўл бўлгунча ўтлар ичиди мастона – мастрона ағнаганди. Ўшанда отаси отхона девори остидан бир қучоқ ялпиз териб олган ва онаси кечқурун ялпиз баргларини солиб шўрва қилганди. Ялпизларнинг дастаси бўлиқ ва серсув эди. Самандар ўша кунги шўрва таъмини бошқа ҳеч қаерда туймади ва жуда кўп қўмсади. Ялпизли шўрванинг қурут солинганидан бироз тахир таъми ўша куни унинг оғзида бир умр ўрнашиб қолди. Онаси кейинчалик ҳам ялпиз солинган шўрва қилиб берган, лекин ҳеч қайсиси ўша кундагидай Самандарга хуштаъм туюлмаган ва дарров эсидан чиқиб кеттанди.

Самандар олдинлари ҳам ўз хотиралари билан қаровсиз боғ ўртасида қандайдир уйғуналик борлигини кўп марта ҳис қилганди. Лекин бу қандай уйғуналик ва қандай ўхшашлик экавлигини ўзи ҳам билмасди. Боғнинг қаровсиз экани – ю, ўзининг доимо иккиланиб, шаҳар ҳаётига кўниколмай яшаёттани ўртасида қанчалик мутаносиблик борлигини ва нима учун бу ташландиқ боғга бунчалик кўнгил қўйгани –

ю, боғ нима учун ўзига азиз ва мўътабар туюлишини билмасди. Лекин кейинги ойлардан боғ унинг бирдан – бир ҳамдарди, унинг сўзсиз сұхбатдошига айланди. Кўнгли қачон ёлғизликни ёки қишлоқ хотираларини қўмсаб қолса, Самандар боғга кирап ва қаровсиз дараҳтларга қараб, болалик пайтларини эсларди. Самандар дараҳтлардан анқийдиган чиркин ҳидни түяр экан, новдаларга, шоҳ – шаббаларга, ҳазон уюмларига тўлиб ётган, дараҳтлари бўталаб кетган бу боғ унга ҳар қандай сўлим ва бежирим хиёбонлардан гўзалроқ туюларди. Куз ёки баҳор пайтлари шаҳарга адашиб кириб қолган довуллар, боғдаги кекса дараҳтларнинг шоҳларини, қасир – қусур синдирап экан, Самандарнинг кўнглида ҳам нималардир қасир – қусирлаб кетарди. Шундай пайтлари уйқуси учиб, туни билан безовта бўлиб чиқар ва эрталаб бекатта чиқа туриб, довулга дош беролмаган шоҳларнинг мағлуб ботирнинг синган найзасидай ерга осилиб турганини кўради; шундай лаҳзаларда дараҳтларга азбаройи раҳми келганидан, бу йилдан бошлаб боғга боғбон тайинлашларини сўрайман, деб аҳд қиласди. Жиккаккина боғбон эса уч йил олдин қазо қилганди. Ундан кейин боғ ўз ҳаражатини қопломагани учун ташландиқ бўлиб қолди. Лекин баҳор келиши билан боғ ёввойи гулларнинг ва ям – яшил дараҳтларнинг нафис – муаттар ҳиддлирига тўлиб кетар экан, Самандар ҳамиша ўз аҳдини унугиб қўяр ва боғнинг гўзаллигига мафтун бўлиб қоларди. Дараҳтлар шу даражада зич, тарвақайлаб кетган эдики, синган – чириган новдалару ям – яшил барглар, ранго – ранг гуллар ичида дараҳтнинг ўзи кўринмай қоларди. Баъзан бу ердан бир иккита адашиб чиқиб қолган ялпизни ҳам топиш мумкин эди. Боғда ёввойи гуллар кўп эди. Самандар ялпизни кўрганида ҳамиша ҳаяжонга тушар, ютоқиб ҳидлар, кўнглида жўш урган хотиралар чўғига шу билан сув сепмоқчи бўларди. Бироқ ялпизнинг ҳиди у куттандай диморини куйдириб юборадиган даражада ўткир бўлмасди. Аксинча, ялпизда кўпроқ заҳ ҳиди ўрнашиб қолган эди. Шунда Самандар беихтиёр отаси отхона девори остидан териб келган ялпизларни ва ялпиз солинган шўрва ҳидини эсларди ва кечки пайтлари боғда сайр қилишни яхши кўради. Шоҳлар тарвақайлаб кетганидан боғ ичидаги

йўлаклар ҳам ёпилиб қолган, Самандар бофни айланиб нариги томонга ўтарди. У томондан бофнинг ичига кирадиган йўл очиқ эди. Боф ўз кексалиги ва ташландиқ эканлигини одамлардан яшириш учун атрофни шох – шабба билан ўраб ташлагандек эди. Бу ерда йўлак бўйлаб, тифиз қилиб пўстлоғидан ҳамиша рутубат анқиб турадиган тераклар экилган, йўлак орқали боф тўрига кириш ва болут дараҳти остида ўтириб бемалол хаёл суриш мумкин эди. Самандар ўтиргичда соатлаб китоб ўқир экан, гоҳ жийда, гоҳ дубдан таралаётган сокин кўклам ҳиди ёки ёввойи гулларнинг анвойи ҳидини сезарди. Бундай пайтлари чиркин шох – шабба ва хазонларнинг ҳам ҳиди хушбўй бўлиб кетарди. Дараҳт шоҳларида мунҷоқдай – мунҷоқдай ёмғир томчилари баргларнинг қорачиқлари каби ўйнаб, ялтираб турарди. Баъзан томчилар баргларига сирғалардай осилиб оларди. Самандар бу ерда ўзини эркин ҳис қилар, ҳар қандай хушту – хаёлларига эрк бера оларди. Гоҳида унга боғдаги гўзаллиқда ҳам қандайдир нуқсон бордай бўлиб туюларди. Бу қандай нуқсон эканлигини унинг ўзи ҳам билмасди. Самандар қишлоқдан шаҳарга келган пайтларини, у пайтдаги туйғуларининг нақадар поклигини ва ҳаётта завқ – шавқ, ҳайрат билан қараганини армон билан эсларди. У ишга борар, вақтида қайтарди, мана етти йилдан бери худди шу аҳвол эди. Маълум тартибга тушган: вақтида ишга борар, иш тугаши билан қайтар, дам олиш кунлари китоб ўқир ёки бирон дўстиникига бораарди. Етти йиллик таржимаи ҳоли мана шу битта жумладан иборат эди. Кейинги йилларда ўзидан норози бўла бошлаганди. У ўз ҳаёғидан қониқмас, умрининг кун билан туннинг ўзғаришидай бир хил эканлиги уни тобора ҳафсаласиз қилиб қўйган, тез – тез қишлоқ хотираларига бериларди. Хотираға берилиш билан тезда гул этиб ялпиз солинган шўрва ҳиди димоғига урилар ва беихтиёр ҳапқириб кетарди. Шунда бирдан юрагида ҳар хил туйғулар галаён қилиб қолар, у ерда изнисиз довуллар бошланар, тўрт томони ҳам девор бўлган каталакдек уйда юраги сиқилиб кетар ва секин боққа чиқарди; оқ, ҳарир гулбаргларнинг худди қушнатидай учиб тушишларини ва сўнг жажжи қушлар каби оҳиста ерга қўнишини кўриб, бу бир лаҳзалик гўзаллиқдан кўнгли завқ – шавқда тўлиб кетар,

умрининг беҳуда ўтаётгани ҳақидағи ўй – хаёлдан аста – секин форигланиб бораради. Балки, мана шу сабаб боғ билан Самандарни бир – бирига яқин қилиб қўйгандир?! Боғ ҳам Самандарнинг назарида унга ўрганиб қолгандай эди. Уч йилдан бери у билан суҳбатлашар ва Самандар ўзи енгил тортгани сайин боғ ҳам ташландиқлигини унугтаяпти, менга дардларини айтиб бераяпти деб ўйларди. Чунки у кирганда дараҳтлар унга нелардир деб, шивирлай бошларди ва унинг кўнгли ҳам овозсиз шитир – шитирларга, чаҳ – чаҳларга тўлиб кетарди. Шундай лаҳзаларда Самандар боғ билан ўзининг қалби айнан бир нарса эканлигига сира ҳам шубҳа қиласади.

Самандар отасининг отхона девори тагидан ялпиз териб келганини ва ўзининг барра гул бедага то чопони ҳўл бўлгунча ағнаганини, майса қулогидаги ёмғир томчилари унинг бўйнидан ичига тушиб, қитифи келганини орзиқиб эсларди. Бедага ағнагани худди ялпиз солинган шўрва ҳидидай унинг эъзозли хотираларидан бири эди. У бошқа, ҳеч қаерда, ҳеч қачон ўша кунгидай завқ билан, шодлигидан қийқириб, ўзини батамом баҳтли ва эркин ҳис этмади.

Талабалик йиллари тоққа чиқиб, майсаларни кўрганда болалиги тутиб кетган, майсаларга мастона – мастрона ағнаганди, лекин бу ағнаш унга бедага ағнаганчалик завқ бермаганди. Боғдаги майсаларнинг қулф уриб яшнаб ёттанини кўрганда Самандарнинг ёшлик хумори тутиб кетар, лекин у энди бола эмас эди, атрофдаги баланд – баланд бинолардан аёллар ва эркаклар эрмак учун шунчаки боғни томоша қилиб ўтиришар ва эснаб қўйишарди.

Мана энди бу манзаралар у одатдагидай дам олиш кунларининг бирида китоб ўқиб ётганида, булат ичига яширинган қуёш каби хаёлига балқиб чиққан ва бутун хотираларини ёритиб юборган ҳамда гоҳ болаликка, гоҳ отаси ялпиз териб келган олис оқшомга, гоҳ қаровсиз қолган боққа ўхшаб кетадиган ажиб бир хотиранинг торини чертиб юборганди. Самандар бу торнинг кўнглида борлигини илгарилари ҳам сезганди. Энди эса бу ўйчан ва ҳазин оҳаннта қўшилиб, ўзи ҳам саркашлиқ ва ўйинқароқлик билан ўтган, лекин ҳозиргига қараганда мазмунлироқ ва баҳтлироқ

бўлган болалик кўчаларига ва ўша олис оқшомга мана бу ташландиқ боф орқали ўтиб борарди. Боф энди унга фақат хотиралар макони эмасди, балки, умрининг бир қисми ҳам эди, ким билади, эҳтимол умрнинг айнан ўзи ҳамдир.

II

ҲАЗОНРЕЗ

Куз қандай келганини Самандар деярли сезмай ҳам қолди. Мезон ойининг бошларида сафарга кетди – ю, ўн кунлардан сўнг қайтиб кедди. У қайтиб келган куни шаҳарга ёмғир ёққанди. Ёмғир шу дараҷада енгил ёғандики, гўё кимдир бутун шаҳар устига ҳўл рўмолчасини бир силкитиб олгандай эди. Шаҳардаги дараҳтлар ҳали ўз рангини йўқотмаганди. У кечқурун боф айлангани чиқди – ю, тонг қолди: бу ерда куз аллақачон бошланган, қуриган новдалар чирт – чирт узилиб тушарди. Энди боф ёздагидан ҳам кўра аянчли тусда эди. Ёмғир тафти аралаш ер ҳиди келаёттан бўлса – да, Самандар кўпроқ куйинди ҳидини сезарди. Бу ҳид фаррош аёл болалар боғчаси атрофини супураётганда боғдан учиб борган хазонларни ёқиб юборган жойдан – кекса ёнгоқ дараҳти тагидан келаётганди. Самандарга бу ҳид ноҳуш нарсадан дарракчи бўлиб туюлди.

Бир ҳафталардан сўнг столида уч дона номозшом гулининг сўлиб ётанини кўрди – ю, ногаҳон куз келганини ва бунга ўзининг ишонгиси келмаётганини англади. Гулларни уч кун олдин қизи болалар боғчасидан – гулзордан узиб келганди, сўнг отасига мақтаниб кўрсаттан эди: қизи гулни ҳадеб искарди. Самандар ҳатто ақли етмаган гўдак ҳам гўзалликка бунчалар шайдо бўлишини кўриб, ҳаяжонланиб кетганди. Қизининг юзи ҳам эндиғина очилган гунчадай яшнаб турарди; қизи унинг китоблари билан овора бўлиб, гули стол устида унугиб қолдирган, у келтирганда гулларнинг сарғиши гулбарглари ҳали сўлим эди. Самандар уч кунча олдин гулларни столида кўриб, ухлаб ётган учта гўдакка ўхшатганди; энди эса, қовжираб қолганда улар болаларга яна ҳам кўпроқ ўхшар, фақат уларда ҳаётдан

асар ҳам йўқ эди. Гуллар қуриб, малла тусга кирганди. Самандарнинг уларга кўнгли ачишди – ю, столи устидан олиб ташлагиси келмади; гулларнинг биронта ҳам барги тўкилмаганди, улар ўлим билан мардонавор жанг қилганди. Бу йил куз, унинг назарида, бошқача келди. Энди тўкилаёттан хазонларни у кузнинг тириклик ва ўлим ҳақидаги қасидаси деб эмас, балки ҳарир кўйлак кийган, хаёлидаги ва боғдаги мусиқага мос рақс тушаётган фаришталар деб ўйлай бошлади. Самандар кечқурунлари ишдан қайтар экан, троллейбус деразасидан баргларнинг қандай тўкилаёттанини кўриб, юраги орзиқар, уларнинг бунчалик тез тўкилаёттанидан ҳайратта тушарди. Автобус ва троллейбус шарпасидан йўл бўйидаги дараҳтларнинг барглари дув тўкиларди. Кечки қуёш шуъласида Самандар баргларнинг қандай ялтираб кеттанини ва ҳавода узоқ пирпираб турганини кўрганда, бир пайтлар қандайдир кинода кўрган денгиз чағалайлари эсига тушарди. Чағалайлар ҳам қўм – кўк денгиз устида оғирликларини гоҳ у – гоҳ бу қанотига солиб учар ва тонги қуёшда уларнинг оппоқ қанотлари жилваланиб кетарди. Тўкилаёттан барглар эса қандайдир улкан идишдан узлуксиз тўкилиб турган тафтсиз митти юлдузчаларга ўхшарди ва ҳавода узоқ пирпираб туриб қоларди. Самандар шунда таниш ёш шоирнинг куз ҳақидаги сатрларини эсларди ва хаёлан бу сатрларни такрорлар экан, шеърдаги ташбеҳдан ҳамиша ҳаяжонга тушарди.

Баъзида деразадан саратонда ўзи бир – бирига тумшукларини тираб, боғлаб қўйилган қайиқларга ўхшаттан шох энди шип – шийдам бўлиб қолганини кўриб, қайиқлар денгиз бўйлаб қаёқсадир сузиб кеттан, кўрфаз бўшаб, энди фақат феруза денгизгина қолди деб ўйларди. Бу денгизда ҳам тез – тез бўронлар бўлиб турар, уни қоп – қора довуллар қоплар, қийқирганча тўда – тўда булувларни қайгадир қувиб ўтиб қолар, жала пайти эса боғдаги хазонлар ростдан ҳам қайиқчалар каби қаёқсадир оқиб жўнарди.

Самандар кўнглига оқиб кираётган шу тахлит кечинмалардан ўзини маст бўлиб қолгандек сезарди. У бу туйгулар қалбига оқиб кирган сайин мулоҳазалироқ, мулоийим, дилгир бўлиб бораёттанини англарди ва ҳозирги ҳаёти аввалги ҳаётидан мазмунлироқ туюларди. У авваллари

йиллаб бирон марта ҳам чин юрақдан гуссага тушмаганини. ҳайратланмаганини таажжуб билан эсларди. Ваҳоланки, ўшанда ҳам шу боғ бор эди. Куз ўшанда ҳам худди шундай сирли туюларди. Сабабини ўйларди – ю, тагига ета олмасди, лекин менинг бунчалик хазонришта бўлиб қолишимиға ўша саратондаги ялпиз солинган шўрва ҳидини эслаганим сабабчи бўлди, бўлмаса, мен бу оламда ғафлатда ўтиб кетардим, бу гўзалликларни сезмай қолардим, деб ўйлай бошларди. Баъзида эса куз ҳам, боғдаги сукунат ҳам, хазонларнинг рақсга тушаётгани ҳам, кўнглидаги кечинмалар ҳам ва ўзи ҳис этаёттан ботиний гўзаллик ҳам – ҳаммаси кўнглидаги ўша тутанмас қўшиқнинг давомидай бўлиб туюлар ва ўша қўшиқ кўнглини энди тобора забт этиб олаёттанини сезиб қоларди. У кузнинг аста – секин ўйига ҳам бостириб кираётганини дафъатан сезиб қолди. Бир ойча олдин хазон боғнинг ўзида ўйилиб ёттанини кўрганди. Бир неча кундан сўнг эса хазон уй билан боғни ажратиб турган панжарарадан ўтиб, йўлкага ҳам сирғалиб ўттанини кўрди. Бир ҳафтадан сўнг эса кечаси довул бўлди. Эрталаб у ишга отланаёттанида даҳлизда иккита хазон ёттанини кўриб қолди ва шунда куз ҳатто ўйга ҳам бостириб кирганидан хурсанд бўлиб кетди. Хотини эса унинг кечаси деразани очиқ қолдирганидан норози бўлиб, хазонларни супуриб олди – да, ахлат чеълакка ташлаб юборди, сўнг худди юқумли касалликнинг жойини тозалаёттандек даҳлизни яхшилаб артди. Самандар шунда бу хазонлар боғдан менинг ўйимга мадад излаб учиб келган деган ўйга борди. Лекин бу ўйини хотинига айтиб масхара бўлишдан кўрқди.

Самандар бир кечаси дераза қаттиқ тақиллашидан ўйғониб кетди. У ёттан жойидан шошиб турди – ю, гарангсиб деразани ва юпқа ёғоч тўсиқни очди, юзига ёмғир ҳиди, сўнг томчилар урилди. У зим – зиё тунда деразани қоқкан кишини қидириб аланглади, лекин ҳеч ким йўқ эди. Шунда у дераза менинг хаёлимда тақиллаган деб ўйлаб, хотиржам тортди. Бироқ эртасига яна кимдир деразани шошиб қоқди. Самандар деразани очиб ҳеч кимни кўрмади. Яна ёмғир аралаш хазон ҳидини сезди ва энди ўзидан хавфсирай бошлади. Фақат учинчи кунгина «безори»ни тутишга муваффақ бўлди: бу – деразаси ёнида ўстган кекса ўрикнинг

шохчаси эди. Шамол турганда шохча силканиб деразани тақиллатарди. Самандар шохчани ушлаб кўриб, унинг гадир — будир, совуқ эканини сезди: шохчада ҳаёт асари сезилмасди. Азбаройи шохчага раҳми келганидан унинг бандини бир — икки силади — ю, шохчага тегинмади. Унинг назарида куз ўзини безовта қилишга ҳаққи бордай эди. Шохча ўзини эслаганидан хурсанд ҳам бўлди. Бир куни ишдан қайттанида шохчанинг узиб олинганини, қора чирик пўстлоғи қўли кесиб олинган енгдай осилиб турганини кўрди — ю, бу хотинининг иши эканини билди. Эргалаб хотини бир ҳафтадан бери дераза тақиллашидан ухлай олмай чиқаёттанидан нолинган эди. Самандар шунда хотини билан ўзи орасида катта жар пайдо бўлаёттанини англади: бу жар тобора катталашиб борарди, назарида хотини ҳеч қачон ўзини тушунмагандай туюлиб кетди. “Гўзалликни бўғиб қўйиш ҳам, гўзалликка нисбатан куч ишлатиш ҳам ер юзидан ҳаёт илдизларини сугуриб ташлаш билан баробардир”, — дей ўйлади Самандар қандайдир китобдан ўқиган сўзларини хотирлаб. Самандар шу кунларда бутун вужудига қайдандир келаётган ҳазин оҳанглар сингиб бораёттанини сезарди. Бу оҳанглар қаровсиз боғдан тараалаёттандай эди.

Самандар вужудида қандайдир таранг тортилган торлар бору, торлар боғдан келаётган оҳангларга акс — садо бераёттандай туюларди. Баъзан торлар гўё танбур торларидан гўнгиллаб кетарди. Баъзида эса ёмғирнинг бофни ҳафсала билан чўмилтираёттанини деразадан томоша қилиб турар экан, ёмғир ўзининг кўнглидаги губорларни ҳам ювиб кетаёттанини ҳис этарди.

Октябрнинг иккинчи ҳафтасида кун бирдан исиб кетди. Ердан, айниқса, боғдан буғ ва ҳовур кўтариди. Ҳовурдан чирик ҳазон ҳиди анқирди. Ҳатто одамлар кўйлакчан юра бошлишди. Бу мавридсиз ҳароратта алданган бофнинг чеккасидаги майсалар яна қайтадан ям — яшил бўлиб бош кўтарди. Самандар ишдан эртароқ қайтаркан, қуёш ҳали ботмаган, майдалаб ёмғир ёғарди. Бутун шаҳар рутубат қўйнида эди. Самандар ишхона ёнидаги хиёбон оралаб кета бошлиди. Хиёбон ўртасидаги фаввора атрофида одамлар гавжум эди. Ёмғир томчилари бошқа кундагига нисбатан бутун негадир одамларнинг завқини қўзғатиб юборганди.

Томчилар юзлардан оқиб, ёқаларининг ичига кириб кетаётган бўлса ҳам негадир ҳеч ким жунжикмасди. Ёмғир томчилари илиқ ва роҳатбахш эди. Самандар фаввора ёнида томчиларга кафтини тутиб турган яшил ёмғирпўшли етти – саккиз яшар боланинг бошида тождай порлаб турган камалак ёйини кўриб, ҳайратланиб бир зум йўлак ўртасида тўхтаб қолди. Камалак боланинг бошида тождай ярақлар ва томчилар фонида товус патидай жимиirlаб кетар эди. Бошида тож борлигини боланинг ўзи ҳам билгандай, юзида, кўзларида гурур ва ҳайрат жилваланарди. Қўли билан ёмғир томчиларини қучоқлаб олмоқчидаи шахти бор эди унинг. Салдан кейин бола катак – катак соябон кўтарган онаси билан зинадан кўтарилиб кетаётганда камалак ёйи боланинг белига осилиб қолди. Бу гўзал манзара эди. Бола ҳам ёмғир томчиларига юзини тутиш учун бир зум тўхтаганда камалак боланинг ёмғирпўши билан уйғуллашиб, яхлит бир сурат ясади. Энди камалак боланинг белида қиличдай осилиб турарди. Бола эса онасининг тортқилашларига қарамай ҳамон юзини осмонга тутиб турар, белида эса рангин шамшир ўйноқлар, бола ҳаракатига мос қилич бир йўқолиб, бир пайдо бўларди. Самандар токи бола зинадан ғойиб бўлгунча унга маҳдиё бўлиб қараб турди. У кўпдан бери бундай манзарани кўрмаганди. Кўрган бўлса ҳам парво қилмаганди; олти ойча оддин табиат инъоми бўлмиш ҳар бир манзарада инсонни покладиган қандайдир синоат бор дейишса, у ўша кишининг устидан мазах қилиб кулаган бўларди; ҳозир эса ташландиқ боққа қараб, ўзини кашф этар экан, гафлатда бунчалик узоқ қолиб кеттанига ҳайрон бўларди. Камалак энди зинанинг ўзида қолган ва енгил ҳилпираб турарди. Самандар хиёбондаги фаввораларда пайдо бўлган яна бир неча камалакка кўзи тушди. Фавворалар юқорига отилар экан, ёмғир томчиларига урилар, ёмғир томчилари эса ўзидан ранг – баранг камалакларни таратарди. Қуёш қия ботаётганидан Самандар турган жойдан фаввора устида ловуллаб атиргуллар очилгандай бўлиб кўринди. Фақат бу атиргулларнинг гулбарглари турли рангда эди. Фаввора атиргулули ёмғир томчиларини енгиб, бир юқорига кўтарилилар, шунда атиргулнинг яшил гулбарглари кўпаяр,

бир пасга солланиб эгилар ва қизил гулбарглари ловуллаб кетарди. Самандар бир неча сония қотиб турди ва юраги ҳалқириб кетди, назарида фаввора устига осмондан қучоқ – қучоқ атиргуллар ёғилаётгандай бўлди. Хиёбондаги майсалар яшил кўйлак кийган болалардай завқ билан юзларини чайишарди.

Самандар бекат томон борар экан, яна икки марта бурилиб фавворага қаради. Энди у ерда камалак жилваланмасади.

Самандар кейинги кунларда ҳам шу манзаралар таъсирида юрди. У баҳорда ёки саратонда эмас, айни бутун борлиқ хазон бўлишга, чиришга, сўлишга юз туттан фаслда ўз қалбидағи фаввора устига тушаёттан гулларни кўрганидан курсанд эди.

III

БАҲОР ГУЛЛАРИ

«Буюклик ва гўзаллик ҳамиша ёнма – ён турса керак», деб ўйлай бошлиди Самандар шаҳарда ўриклар гуллаб, йўлакларни оқ – қизғиш гулбарглар қоплаб олган ва кўнглида ўзидан кўра улугроқ бир шижоат уйғонаёттанини анлаган, ҳар бир гўзаллик бутун таровати ва фусункорлиги билан кўнглига оқиб кираёттанини ҳис зетан пайтлар. Бое баҳор келиши билан бирдан ўзгача яшилланиб жўнаганди. Самандар ҳатто ўтган йили қуриб ётган дарахтларнинг қовжираған шохларида ҳам куртаклар ўсиб чиқаёттанини кўрганди. Гарчи чиркин ҳиди ҳамон таралиб турган бўлса – да, энди боғдан кўпроқ кўкат ҳиди келарди; бир ёввойи гурур билан очилиб яшнаган анвойи гуллар ҳам боғта ўзгача фусункорлик багишлаганди. Гулларни, айниқса, ялпизни кўрганда Самандар завқланиб кетарди. Ялпизлар ҳам бу йил ҳар йилгидан кўпроқ эди. Болалар боғчасидан оқиб келиб, боғнинг этагини айланиб ўтадиган ариқча атрофида бир қулочча жойда ялпизлар гуриллаб ўсиб чиқсанди. Бу жой кекса жўка дарахтининг орқасида, кўздан пана жойда

бўлгани учун ялпизни бу йил ҳеч ким юлиб ташламаганди. Самандар боғдаги гўзалликдан руҳи тини қлашиб бораёттанини сезарди. У кўнглида уйфонаёттан туйгуларнинг булоқларини боғдан топгандай эди. Энди у ҳар куни боғта чиқар ва ярим соатча боғни айланар, кўнглида бирдан ҳеч кимга айтиб бўлмайдиган кечинмалар пайдо бўлаёттанини ҳис этарди; бу кечинмалар шунчалик нафис эдикি, Самандар бу нафисликни бехосдан йўқотиб қўйишдан қўрқанидан боғ ичиде оҳиста қадам ташлар; кўксидә жуда нозик гуллардан терилган гулдастани кўтариб юргангага ўхшарди.

Самандар ўз хаёлидан ва боғдан таралаёттан олам билан уйғунлашиб борар, уйғунлашган сайин қалбида кўпроқ ташналикини ҳис этарди. Самандар бир неча ойдан бери зариф туйгулар билан яшарди, у бу туйгуларни қайта йўқотиб қўйишдан қўрқар ва шунинг учун ҳар лаҳза қаршисидағи қаровсиз боғнинг битта гўзал томонини кашф этар ва тобора у билан уйғунлашиб борарди.

Бир куни ишдан қайтиб, хотинига хонасининг боғта қараган деразаси олдига жой қилдирди: столни таҳтлаб бўлгач, оромкурсига чўқканча, боғни томоша қила бошлади.

Хотини чой олиб келди; изидан ўзи ҳам курси келтирди – да, эрининг ёнида ўтирди. Тўсиқ – панжара билан қатор қилиб экилган, лекин қаровсизлигидан шоҳлари панжара – лардан ошиб тушган гуллар улардан атиги бир неча қадам нарида яшнаб ётарди.

— Гуллар негадир бу йил бошқача очилди, – деди хотини унга қарамай. – Негадир бу йил кўнгилга жуда яқиндек туюлаяпти.

— Ҳар йили ҳам шундай очиларди, – деди Самандар, – фақат биз эътибор бермасдик.

— Билмадим. Ҳар қалай, бу йил жуда бошқача, – деди хотини, – қараб турсанг, ҳар бир гул панжаралардан бошини узатиб қараёттан қизалоқларга ўхшаб кетади.

— Тўғри, улар билан болалар ўртасида қандайдир ўхшашлик бор, – Самандар хотинининг топқирлигидан завқланиб кетиб, унга кулиб қараб қўйди. Хотини унинг гапини деярли эшитмади ҳам. У ўзининг таассуротларини бирдан гапириб қолишга ошиқарди, чоғи.

— Қараб турсангиз, гуллар ҳам бир — бири билан жуда берилеб гаплашаётганга ўхшайди; — деди яна хотини, — қулогингта қиқир — қиқир кулгандари эшитилгандек бўлади, агар бирон гул тебраниб қолса, ҳаммаси бирга қўшилиб тебранишади.

— Гуллар ҳам худди биз каби яшайди. Тўғри, бизга қарагандага қисқароқ, лекин яшайди. Олдинлари гулни маъшуқа қизга ўхшатишган. Қаранг, қандай гўзал.

Самандар аруздаги икки байтни бармоқ оҳангига солиб ўқиди.

— Бу кимдан? Бизда одамни гулга ўхшатмайди, шекилли, — деди хотини, — мен одамни гулга ўхшатишни қандайдир япон ёзувчисидан ўқиганман.

— Бобурдан. Мен ҳам илгари шундай ўйлардим, — деди Самандар ва хотини бир пайлари ўзи билан адабиётларга муносабат масаласида ҳеч келиша олмаганини эслади. — Лекин тўқиз ой олдин Навоийни ўқий бошлагач, бу фикримдан қайтдим.

— Одам гулни кўрганда кўнглида нимадир туғилади — ю, сўнг дарров йўқолади, афтидан, у йўқолмаса керак, бизнинг ўзимиз унутсак керак, — деди хотини яна гулзорга қараб.

Самандар хотинига ҳайратланиб қаради.

— Баъзида гулни кўрганда кўнглинг шундай яшнаб кетадики, бирдан яшариб қолгандай ҳис этасан ўзингни. Шунда ўзинг — ўзингта хунук кўриниб кетасан, бирдан бошқача яшагинг келиб қолади.

Самандар хотинига баттар ҳайратланиб боқди. Чунки хотини унинг кўнглида кечайдиган, у бир неча ойдан бери тушуниб етолмаган нарсаларни жуда содда қилиб тушунтириб берган эди.

Бирдан хотини билан ўзи ўртасида жар кўрган ўша куз оқшомини эслади. Балким, ўша жар уларни айрича қилиб яқинлаштиргандир? Жар кўп нарсаларга тўсиқ бўлган — у, лекин уларнинг айнан бир нарсани ҳис этишларига, айнан бир нарса ҳақида бир хил фикрга келишларига йўл очиб бергандир? Ҳар қалай, Самандар ҳозир ҳижолат тортди.

— Ростдан ҳам, оқ атиргул гўзал бир қизга ўхшайди, — деди у ўзининг қизариб кетганини хотинидан яшириш учун.

— Қаранг, ана у гулбарглари — қат — қат сочлари, қизғишироқ ялифи бор гулбарг эса юзи... Соч юзни оҳиста ҳовучлаб турибди... гўзал бир ҳикоя чиқаркан... Нима дедингиз? Сўзга уста бўлсам, ўзим ёзардим.

Хотини унга яйраб тикилди. Самандарнинг ҳаяжони унга ҳам кўчганди, юзи қизил туман чангланиб кетгандаин, кучсизгина қизарди.

Қизи эшиқдан югуриб кириб, ўзини онасининг қучоғига ташлади.

— Ойижон, мен оламушук қўйдим, — деди у тилини ясаб, эркаланар экан. Онаси унинг бошини силади. Лекин гулзордан кўз узмай:

— Гулларнинг номини жуда тоғиб қўйишади — да, — деди, — тутмагачагул, гулибеор, қирқоғайнин, оққалдирғоч... ростдан ҳам қалдирғочга ўхшайди. Ёшлигимда менга нуқул оққалдирғоч совға қилишса, деб орзу қиласдим.

— Мен эса атиргул совға қилганман, — эслатди Самандар, хотинини илк бор оспоқ кўк гулли кўйлақда учраттани кўз олдига келди. «Ростдан ҳам ўша пайт оқ қалдирғочга ўхшарди», ўйлади у дафъатан.

— Тўгри, — деди хотини, унга бир кўз ташлади — ю, уялиб, олиб қочди. — Карамга ўхшаган улкан атиргул эди. Лекин ҳиди ҳалигача димофимдан кетмайди, ўша гулни эсласам, негадир анови атиргуллар кўримсиз бўлиб қолади. Балким бу ёшлик хотираси бўлгани учундир?

— Анови гуллар қуёшчаларга ўхшайди, — деди қизчаси, дераза рапига осилганча, қўли билан панжара ағнаб ётган жойдан кўринаётган гулларни кўрсатиб. У отаси билан онаси нима ҳақида гаплашаёттанини дарҳол англаб олган эди ва унинг чарос кўзлари ҳам ҳайрат, ҳам гўдаклик аралаш порлаб турарди.

Самандар қизи кўрсатган томонга қараб, сариқ мойчечакларни кўрди.

Мойчечаклар митти қуёшчалар каби яшнаб турарди ва ҳозир Самандарнинг кўзига бу митти қуёшчалардан таралаётган нурлар бутун боғни чароғон нурларга тўлдириб юборгандай бўлди.

У қизнинг гапидан энтишиб кетиб, уни қаттиқ қучиб олди. Ўзининг ҳаяжондан ёшлигантан кўзларини хотинидан яшириш

учун кўзларини оҳиста юмди. Бирдан кўз олдини ялтираб турган ўргимчак уясидек тўр қоплаб олди; тўрнинг ҳар бир катагидан яшил шуълалар тараларди. У қобоғини озгина ҳаракатта келтириши билан яшил шуъла алвонлашар ва бутун кўз олди қип – қизил рангта тўлиб кетарди. Бу унинг юзига тушаёттан қуёш нурларининг киприкларида акс этаётган жилвалари эди. Хотини унга худди энди кўраётгандек қараб турар, қуёш нурлари эрининг юзини оппоқ атиргулдай яшнатиб юборганидан дафъатан ҳайратта тушганди. Самандар кўзларини очганда хотини ўзига тикилиб турганини кўрди. Кўнглини хотинининг кўзларидан таралаёттан ҳайрат ва фароғат эгаллади. Ўзи ҳам хотинига ҳайрат билан боқди. У ҳеч қачон хотинининг кўнглини ўзига шу дақиқадагидек ҳамоҳанг ва яқин ҳис этмаган эди.

У дераза олдида юзини сўнаётган офтобга туттанча ўтиради. Хотини билан қизи ошхонага ўтишди. У ердан қизининг қандайдир кўшиқни хиргойн қилаёттани эшитилди. У курсига яхшилаб жойлашиб олди.

Ҳавода кўкат ҳиди аралаш гул ҳиди бор эди.

Қуёш уфқ ортига яширинди. Уфқ алвон рангта беланди: ҳозир феруза осмон фонида бу ранг жуда тиниқ ва равшан эди. Феруза рангдан ҳам алвон рангдан ҳам мусаффолик тараларди.

У уфққа қараб ўтирган куйи беихтиёр бир йил муқаддам курсдошлари билан бир дўстининг қабрига боргандарини эслади. Марҳум тенгдошлари ичидағи энг ювош ва келишган йигит эди. У машинасида тўсатдан фожиали ҳалок бўлганди. Сабоқдошлари билан етиб борганде марҳумни энди чиқаришаётган экан. Марҳумнинг барваста гавдали отасининг йигиси Самандарнинг юрак – бағрини эзиб юборса ҳам негадир у йиглай олмаганди. Бу хабар бутун тенгдошларини тўсатдан эсанкиратиб қўйганди. Улардан ҳеч ким йигламади. Ҳамма бошини эгиб тураверганди. Бу бошқаларга шумшук қўринаёттан бўлса – да, йиглашаёт – ганлардан кам қайғурицмаганди.

Самандар марҳумни кўмишаётганда оппоқ кафанинг ичидан унинг юзини кўргандек бўлганди: юзи ҳам оппоқ эди. Кейин кўмиб бўлишгач, кимдир қабр бошига бир тувак сариқ атиргул қўйди. Самандар ўша куни гулга

унчалик эътибор бермаган эди. Бироқ эртасига яна сабоқдошлари билан қабрга боришганда, кечаги гулларнинг ичида фақат биттасигина бир кечада қовжираб қолганини кўрди. Бошқа гулларнинг гулбаргларида ҳам сўлғинлик акс этса – да, улардан ҳали ҳаёт нафаси уфуриб турарди. Қуриб қолган гулнинг барглари ҳам тўкилиб, қабр атрофига сочилиб кетган эди. У ўша куни гул билан одам бир – бирига жуда ўхшаш эканлигини ҳис эттанди. Бир кун олдин қўйиб кетган гуллардан бири қабр бошида бир кечада тўкилиб бўлгани унинг хаёлидан ҳеч кетмади. У марҳумни эслаган сайин кўз ўнгига унинг оппоқ, келишган юзи келар ва ўлимига ишонгиси келмасди. Лекин у марҳумни эслави билан ҳаёт ва ўлим ораси бир қадам эканлигини ҳис қиласи, ўзини ҳам қовжираб бораётгандай сезар ва ваҳимага тушарди. Сўнг у бу туйғуга кўнишиб қолди. Қачон гул билан қабрни ёнма – ён кўрса, ҳаёт билан ўлим ораси бир қадам эканлиги эсига тушар, гул ва қабр, марҳумнинг юзи ҳеч хаёлидан кетмай қоларди. Унинг хаёлида аста – секин гул, қабр ва марҳумнинг оппоқ юзи ўйғуналашиб кетди: назаридা аввал марҳум гулдай қовжираб тўкилган, изидан эса гул тўкилганди. Қабр билан гул орасига атиргулнинг сариқ гулбарглари тўкилиб тушарди. Ўша пайдада у сариқ атиргул билан қабр ўрасидаги бу қадар мутаносиблиқдан ҳайратта тушганди.

Бу манзаралар мана ҳозир у худди уфқа тикилиб тургандай, хотиралари деразасидан унга муралаб турарди.

Ҳозир ҳам у марҳумнинг юзини эслави билан хотирасига лип этиб гул ва қабр қалқиб чиқди. Шунда у ўлимнинг бир қадам нарида турганини ҳис этди – ю, умрнинг бунчалик қисқа эканлигидан бирдан вужудини титроқ босди. «Бу иккаласининг ораси бунчалик яқин, – деб ўйлади у, – одам бир марта тўйиб нафас олишга ҳам ултурмайди». Сўнг уфқа қараб хотирасидаги ва кўнглидаги ваҳимани қувмоқчи бўлди. Бироқ ловуллаб ёнаёттан уфқда ҳам сариқ атиргул ва қабр пайдо бўлди. Сариқ атиргулнинг гулбарглари оҳиста тўкилар, ловуллаб ёнаёттан уфқдан қип – қизил чўтга айланиб ерга учиб тушарди. У хаёлидан гул ва қабрни ҳайдаш учун кўзларини юмди; бироқ гул ва қабр кўз олдидан кетмади; аксинча, уфқдаги қип – қизил олов

бирдан асов шамол гирдобига тушган қип – қизил лолаларга айланди; лолалар у ёқдан бу ёқса тебранар экан, бир зум қоқ ўргада турган сариқ атиргул ва қабрни ютиб юборар, яна гул ва қабр қалқиб чиқаверарди. Самандар бундан ларзага келди: бу манзара хаёлида энди узлуксиз давом этишини англади ва кўзларини яна қаттиқроқ юмиб олди; шу дақиқада бу манзарада қандайдир ҳузурбахш гўзаллик таралаёттанини, кўнгли бирдан ҳамма нарсадан холи ва айни дақиқада ҳамма нарсага алоқадор, ўзи, вужуди билан кўз олдидаги манзаранинг бир бўлаги эканлигини, буни ҳис этиш қалбида тараҳҳум ва зариф туйгулар уйғотаёт – ганини ҳис этди.

«Ҳар бир инсон қалбида олам билан уйғунлашишга ташниалик бор, – дея ўйлади Самандар, – бу ташниалик хунуқлик ва турмушнинг кундалик туманлари ичида гарчи йўқолиб кеттандай туюлса – да, у бор, унинг борлигини билиш учун инсон ўз қалбини излаб кўриши керак; инсон умрининг мазмуни аслида ана шу ташниалиқдадир...».

Осмон бинафша рангта кирган эди; боғ устида сариқ атиргулнинг бир дона гулбаргида ой қалқиб турарди.

Самандар буларнинг ҳаммасида теран бир умумийликни англади; у ҳамон қаровсиз боғни – кўнглини тинмай кузатарди.

У кейинги қунларда ўзини ҳам гул деб ўйлай бошлади; буни аввал у боғдаги панжара орқасидаги қаровсизликдан шохлаб кетган атиргулнинг ҳиди димоғига урилганда, кўнглида ҳам қандайдир бир нарса яшнаб очилиб кетганини сезган пайтда ҳис эттанди; кейин бу ўхшатиш унинг миясида чарх уриб айлана бошлади ва Самандар ўзининг ҳам гул эканлигига энди шубҳа қилмай қўйди. Ўзини гул деб ўйлаш энди унгà бачканга ҳам, беўхшов ҳам туюлмасди. Аксинча, бу ўхшатиш жуда табиийдай эди. Ҳатто у ўзининг қалбида қандайдир гул пориллаб очилганини, бутун танасига қучоқ – қучоқ ҳид тарататёттанини сезгандай бўларди. Бу гул унинг назарида лолага ўхшарди. Лоланинг гулбарглари ҳовучида бир томчи шудринг ўйноқларди; шудрингдан тонгнинг мусаффо ҳавоси таралар ва Самандарнинг вужуди бу гўзаллик қарисида мадорсиз бўлиб қолар, танаси ҳузур қилар, гул эса тобора яшнаб борар, кўксида пора – пора

чайқалар, бутун вужуди шу гулнинг нозик гулбаргларидек, оҳиста титраб кетарди.

Бошқа бир куни у панжара ортидаги атиргулни узиб оди – да, хонасига жўнади. Қизи ҳали боғчадан қайтмаган эди. Хотини унинг қўлидаги гулни кўрди – ю, тувак келтириб берди.

— Умиданинг хонасига қўя қолинг, – деди у кўзлари яшнаб гулни ҳидлар экан.

Самандар бош чайқади; ўзи ҳам гулни шунинг учун келтирганди. Гулни қизининг хонасига тувакка қўйди – да, қизининг қароватига ўтириб, уни томоша қила бошлади.

Қизининг гулни кўриб, қанчалик қувонишини ўйлаб, кўнгли яшнаб кетди.

У жилмайиб қўйди.

Юрагининг қуюқ туманлари орасидан – қаровсиз боғдан бу кўримсиз гулни топиб олганидан хурсанд эди.

Гул ёлқинланиб, хонани безаб юборгандай туюлди.

«Қизимга бу гулни сўлитма, дейман – дея ўйлади у, – ва гулни қандай парвариш қилиш кераклигини ўргатаман».

Самандар гулга қараб эгилиб олган, хотини эса эшиқдан гўё хонадаги иккита гулни томоша қилаётгандай гулга ва зрига ҳайрат аралаш тикилиб турарди.

БЕВАҚТ ЧАЛИНГАН БОНГ

I

Посёлкада биринчи марта пайдо бўлганда унинг юзида ҳали навқиронлик шамлари ўчмаган, бадани ва серажин бўйнига чириган ёғоч иси ўтиришиб қолган, димогидан ёқимли тамаки ҳиди келиб турар, гарчи ўткир ва азобли кўзларидағи ёввойи мушукдек ёт мунг уни одамлардан четта тортиб турса – да, очиқ истараси ва салтисувай суни – сумбати кишида танишиш ва суҳбатлашиш истагини туғдиради. Лекин у одамлар билан илакишиб кетолмади. Ким унга ўзини яқин тутса, у шунчалик ўз қобигига ўралиб, олам ва одамларга қоронгу бўлган ҳаёти каби бурчакдаги қуёш нури тушмайдиган пастаккина ҳужрасига кириб кунбўйи чекиб ўтиради: ҳужрага ҳам терчил бадан ҳамда тамаки ҳиди ўрнашиб қолган, ўзи эмас, галати осойиштагилик ва жимлик билан кунузоги шифтда сузиб юрадиган ҳидлар унинг ёлғиз ва сўққабош ҳаётини тўлдириб, бу бесаришта ва ипириски хонага тириклик бағишлиб тургандай эди: зотан унинг кўникмага айланган сокин ва ёлғиз ҳаётини бу йилларда ҳеч ким буза олмади, – бу эшиги қайси томондалиги номаълум бўлган тўзиган қўргонга ҳеч ким киролмади.

Баҳорнинг чувоқли кунлари котиб уни балиқ овига олиб борар, одамлар бегим кунлари тонг пайтлари тамадди тўла рўзгор халтасини зўрга кўтарганча кўлга қараб кетаётган қоровулни ва узун эгма қармоқларни елкасига ташлаб, хас шляпани олифталарча чаккасига қўндириган котибни кўриб қолишарди: найнов, даққи бўлиб кўринган қоровул бутун инон – ихтиёрини унинг қўлига бериб қўйгандай котибнинг изидан борар, унга ақалли қаёққа кетишаётганларининг ҳам қизиги йўқдай бошини эгиб, қўнжи қайтарилган қизил этикнинг пошналарига қараб йўлни топар ва секин

лўқилларди. Улар одатда кўлнинг ялангликка туташ жойини танлашарди; бу ерда қуёшнинг аёвсиз жазирасидан асрайдиган иккита тасодифан ўстан ёввойи жийда дараҳти бор эди. Котиб ҳамиша қармоқ олдида бўларди. У эса ўчоқ бошида куймаланаар, яқин орадан тезак териб, пуфлар, ачишган кўзларини котибга маҳрамона эҳтиром билан тикиб қўярди. Тамадди пайтлар улар деярли гаплашишмасди, еб—ичиб бўлишгач, ов зериктирганидан жийда остида ёлғиз ўзи ичкиликни давом эттираётган котиб, нарироқда пўкакка юрак ҳовучлаб тикилиб турган қоровулга қараб, қаҳ — қаҳ қотиб юборарди; у эса ўзини янам ношуд ҳис этар ва беўхшов жилмаяр, лекин нега жилмайганини ўзи билмасди.

— Сени яхши бир аёлга уйлантириб қўяман, мана кўрасан, ҳали онаси ўпмаганига, — дерди котиб унинг елкасига худди қари отни қамчилагандай қарс — қарс уриб.

У индамас, ёш боладай хўмрайиб оларди. Бироқ пир — пир учайтган киприклари ва ёйилиб бораётган лаблари унга бу таклиф ёқиб тушганини фош қилиб туарди. Кечқурун ови юришмай жаҳли чиққанидан тўйиб ичиб олган, хурмачаси тўлиб қолган котибни у суяб, судраб меҳмонхонага олиб келар, котиб эса уни қучоқлаб ўпар ва қўшиқ хиргойи қиласидан тушарди; диванда ярим ёнбошлаб аёллар билан бўлган ишқий можароларини гўлдираб айтиб берар, ора — сира ўзи билан бирга ўқиган олис юрглик қизга уйланолмай доғда қолгани, шунинг аламида ичишини, ундан қизни бутун дунёни ҳам ахтариб топиб бўлмаслигини қайта — қайта тъкидларди.

— Сен билан бизнинг дардимиз бир, — дерди котиб уни чўлл — чўлл ўпаркан. — Шунинг учун сени яхши кўраман. Сен менинг... жигарим — м — сан, йўйқ, акам — м — с — сан, ке — л, яхшилаб ўпай. \

Қоровулнинг йиглагиси келар, лекин йигламасди. Баъзида худди ёш болага ўхшаб қоладиган бу одамга нисбатан кўнглида меҳр пайдо бўларди. «Иккаламиз ҳам баҳтсизмиз, иккаламиз ҳам сарсонмиз», деб ўйларди қоровул кўзларини четга олиб қочаркан, ростдан ҳам котибни худди ўз жигаридай тўйиб — тўйиб қучгиси, худди гўдақдай оғушига олиб овунтиргиси келарди.

— Мана бу ерим аламга тўлиб кетган, — дерди котиб кўкрагига муштлаб. — қанча аёлни қўлимдан ўтказдим, лекин ундаини тополмадим. У оламда битта.

— Оламда битта, бошқа ҳеч жойда йўқ, — дерди у ҳам котибнинг гапини тасдиқлаб. — қани, ечиниб ётинг.

Сўнг у котибнинг кийимларини ечишга ёрдамлашар, музхонадан қатиқ олиб ичирар, бошини боғлаб қўяр, шундай ҳам тинчимай кечалари уч — тўрт марта хабар оларди.

— Сиз ишга кетаверинг, — дерди эрталаб котибга у қусуққа боттан полни ва гиламни артиб олар экан, — ўзим ювиб қўяман.

Котиб қилган ишидан энди уялаёттандек тунд қиёфада чиқиб кетар, ювиб қўйилган ич кийимларига эса худди шундай бўлиши керақдай эътибор ҳам бермас, индамай кийиб оларди.

Баъзан котиб унга атайлаб шаҳардан яхши навли тамаки ёки пиво кўтариб келганда унинг чеҳраси ёришиб кетарди.

— Бу нимаси, овора бўлибсизда, — дерди юзаки хижолат билан, бироқ ичиди ўзича фурурланиб қўярди, у котибнинг калондимоғ одам эканлигини билса ҳам унинг шутантилигини жуда ҳурмат қилас, гапини икки қилмай бажаришга уринар, калласи қизиб қолган котиб оғзидан боди кириб, шоди чиқиб, уни «қўтири тана» деб сўкса ҳам сира хафа бўлмас, аксинча, қийшайиб қолган оғиздан вишиллаб ғиқадиган бу сўз уни котибга яна ҳам яқинлаштирас, эртасига у худди ҳеч нарса эшитмагандай хонага маймоқланиб кириб келарди.

II

«Онаси ҳосилотнинг ўйнаши бўлган»... У қулоқларига ишонмади; янгиш эшитмадиммикин деб ўлади. Лекин эшик орқасидан котибнинг, овози жуда аниқ — тиниқ эшитилиб туради. У котибнинг чиройли, хумор кўзларини, бадқовоқ юзини кўз олдига келтирди; диванга ярим яланғоч чўзилганча; ўзига айттириб, изидан «Окаси, жонидан» дея бақиришлари эсига тушди. Сўнг худди тутиб бўлмайдиган кўзёшдай котибни бекатда илк марта кўргани, эгнидаги оқ мўйнадан тикилган пўстини эсига тушди —

у котибни айиқдай бефаҳм одам бўлса керак деб ўйлаганди. Лекин бундай бўлиб чиқмади – котиб унинг ўтмиши билан қизиқмади. Кейинчалик инспектор келиб огоҳлантиргач ҳам у бунга эътибор бермади, уни янги қурилган меҳмонхонага қоровул қилиб қўйди. У кўп йиллардан бери ўз ўтмиши билан қизиқмаган одамни биринчи бор учратиши эди ва улар тезда иноқ бўлиб кетиши.

Посёлкада ҳали янги уйлар бўлмагани учун котиб меҳмонхонада яшаб қолди, кейинчалик уй биттач ҳам у негадир оиласини олиб келмади – ойнинг бошларида уч – тўрт кун йўқ бўлиб кетар, сўнг яна қаҳрли, тунд ва ҳўмрайган қиёфада пайдо бўлар, посёлкада у кетиши билан тўхтаб қолган ишлар яна жонланар, пахтазорда улоқиб юрадиган сигирлар боғланар, дўконлар ўз вақтида очиларди. Котиб одамшаванда киши эди, тезда қоровул бунинг гувоҳи бўлди. У шеригига бироз такаббурона тикилар, лекин ҳар қандай кишининг кўнглига йўл топадиган улфатижон йигит эди: «Агар бу дунёда мурувватли ва қалби тоза йигит бўлса, у мана шу котиб» деб ўйларди қоровул.

Котиб бир сўзли одам эди – у қоровулга берган ваъдасининг устидан чиқди; инспектор ва райондагиларнинг харҳашасига қарамай, меҳмонхона қоровуллигида олиб қолди; уч йил бадалига унга бирон марта ёмон гапирмади; котибнинг бор алами ичида эди, шунинг учун деярли ҳар куни иchar ва қоровулга ҳам ичирап, сўнг то эрталабгacha қотиб ухларди.

III

Ичкаридан хўрсиниқда ўхшаш йиги овози келарди; қандайдир аёл кимдандир ноҳақ ҳақорат эшитаёттандай ўксиниб – ўксиниб йигларди – у эса аста – секин лойқаланаётган дарё ёки дағдага ва ваҳима билан бошланишдан олдин гўё бу қари ва кекса дунёни бир боллаб лақиллатмоқчилик бирдан осойишта бўлиб қолган бўрон ёки эндиғина ҳилпирай бошлаган байроқдек ичида нимадир тошиб, ҳапқириб келаёттанини ҳис қилганча торлари узилган тижжак каби сассиз, садосиз қотиб турарди – у барваста,

мушакдор, қиргийбурун, юзи рақами ўчиб кеттан тангачадек кўримсиз, ичкиликнинг ва қачонлардир бошидан кечирган мусибатларнинг асорати бўлиб газак олган ярадек гезарган, узун қўллари энди бу дунёда ушлаб оладиган нарсаси қолмагандек ёки қандайдир номсиз мусиқани ҳеч кимга эшиттирмай чалаёттандай билинар — билинмас қалтираб турарди. У чорак соатча олдин котибнинг ёпгина бригадир қиз билан меҳмонхонага кириб кетганини кўрган эди — салдан сўнг доим қулфлоғлик турадиган ва баъзи — баъзида келиб қоладиган эътиборли меҳмонларга мўлжалланган хонанинг қалитини сўраб келганда, котиб унга маънодор кўз қисиб қўйди — унинг юзи ҳирс ва дағаллиқдан қизариб кеттан эди.

— Ёки сени киритиб юборайми? — деди котиб ичкарига ишора қилиб. У ёйилиб кулди. «Бизларга йўл бўлсин, сиз турганда дегандай елка қисди. Сўнг уларга ҳалақит бермаслик учун боғ эшигини занжирлаб, ҳужрасига кирган жойида бирдан ичкаридан аёл йигисини эшитиб, тақقا тўхтаб қолди — у беихтиёр даҳлиз бўйлаб ўнг тарафдаги хонанинг эшиги олдига борди, у менинг бирон ёрдамим керак эмасмикин деган хаёlda эди. Ичкарида йиги аралаш котибнинг сал қизишган жазавали товуши эшитиларди. У қизга ниманидир уқдирар, тўғрироғи, нимадир деб овунтиради; қоровул эшикни итармоқчи бўлди, лекин бирдан қўлинни тортиб олди.

— Ҳамма шундай қилади, — деди котиб палағда овозда.
— Бошқача йўли йўқ. Шуни билки, бўлмайди ҳам. Бунинг учун ҳеч ким сени айбламайди, сен қўрқма, ҳаммасига ўзим жавоб бераман.

Қиз, афтидан, йиги аралаш котибни жеркиб ташлади. Ичкарида нимадир тарақлаб қулади: у «курси ағанади» деб йўлади, сўнг шундоқ эшикнинг тагида котибнинг ҳансирашини эшитиб, даҳлиз орқали кичкина айвонга чиқиб турди — бироқ эшик очилавермагач, яна узалиб даҳлизга қаради; полининг бўёғи кўчиб қолган, қалин баҳмал парда осилган деразадан ойнинг хирагина шуъласи тирқираб тўқиларди. Ой ҳам онда — сонда меҳмонлар ташриф буюргандагина очиладиган бинонинг дид билан безатилган хонасида нималар бўлаёттанини ўз қўзлари билан

кўрмоқчилик қалин парда орқали даҳлизга хомуш мўралаб турарди.

Котиб меҳмонхонага кўп аёлларни бошлаб келганди, бироқ биронтаси ҳам йиглаганини ёки ортиқча шовқин кўтарганини қоровул эслолмасди.

Қиз тез – тез, жеркиб – жеркиб гапирап ва ора – сира пиқиллаб қўярди. Унинг йигиси меҳмонхонанинг жисп деворидан зўрга сирғалиб ўтиб, айвон орқали боқда ўрмалаб чиқар ва ўзидан салқин ҳаво тарататётган ҳовуз атрофидаги дарахтлар орасига сингиб кетарди.

У қизнинг сўнаётган гулхан каби ожизгина йигисини айвоннинг бир четида устунга суюнганча тинглаб турар ва котиб қурғур худди айғирга ўхшайди – я, деб ўйларди. Хона эшиги икки – уч марта қаттиқ – қаттиқ урилгач у яна даҳлизга мўралаб қаради, бошқасига журъат қиломай айвон бўйлаб у ёқдан – бу ёққа юра бошлади. Сўнг бояги жойига бориб устунга суюнди – да, гўё тун китобининг зулмат тўла варақларидан нима қилиш зарурлигини ўқиб билмоқчилик ухлаб ёттан боқса тикилиб қолди.

IV

Ўшанда йигитларнинг ҳаммаси ичиб олган эдилар – улар орқаворотдан «Ота безор» деб ном олган бу янги посёлканинг илк қўналғачилари эди; оталари билан гап талашиб ёки мўмайроқ пул топиш илинжида Терс отани ташлаб келган, чўлнинг шавқсиз ва жазира ҳаётига ўрганиб қолган ва шундан бошқача ҳаётни тасаввур ҳам қилишолмайдиган, ҳатто, болаликларини ҳам худди бир пайтлар ўқиган, лекин номидан бошқа ҳеч нарсаси эсларида қолмаган дарсликдек эринчоқлик билан элас – элас эслайдиган танбал ва ҳали мутлақо бўз йигитлар эди – улар бири қўйиб, бири олиб, ундан посёлкадан чиқиб кетишини талаб қилишар, йўқса тушига ҳам кирмаган ҳангомаларни кўришини, ўзларининг ҳеч нарсадан қайтмасликларини дўқ – пўписа аралаш таъкидлашар, улар бу ерга кимнингдир йўриғи билан келганинни, афтидан, унчалик яширгилари ҳам келмай меҳмонхонанинг одд зинасигача бостириб келишган ва мўътабар меҳмонлар учун

атайлаб қурилган бу ҳашамдор бинонинг зинаси уларга номаълум ва қоронғу бўлган бошқа дунёга бошлиб борадиган йўлақдек зинага чиқаверишда таққа тўхтаб қолишган ва у ердан ҳатлаб ўтишга ботинолмай устунга суюниб ўзларини синовчан хўмрайиб кузатиб турган ундан ва нақ кираверишдаги пештахтага осиб қўйилган, кечки шабадада салобат билан ҳиллираётган алвондай байроқдан бироз ҳадиксираб туришарди.

У эса йигитларнинг худди хўқиз етаклаб келишаёттандай биткўз йигитни олдиларига солиб туртиб, итариб келаёттанини кўрган дақиқадаёқ нима гаплигини англаган ва ўзини иложи борича хотиржам тутишга қарор қилганди.

— Қишлоқдан чиқиб кет! — бақиради бошига қалин исқирип шляпани бостириб кийиб олган қоп — қора йигит. У қандайдир пўписа тўла хатни ўқиб бераёттандек қисиниб — қимтиниб, айни пайтда ўзини дадил тутиш учун димогини ҳаддан ташқари юқори кўтариб олганди. — Бу қишлоқда сен билан бирга яшашни истамаймиз!!!

— Яхшиликча чиқиб кет, — дерди бошқа бир жириллаганроги. — қанча тез чиқиб кетсанг ўзингта шунча яхши. Биз аяб ўтирамаймиз.

— Тўрт томонинг қибла, котибнинг ялоқхўри! — пихиллаб гапиради бошқа бири — тўпланганларнинг ичида ёши каттароги ўша эди -- унинг кир-чирга боттан соқоли ичида чувак юзи зўрга кўринарди — у боплаб гапирдимми дегандек ҳамроҳларига бир-бир қараб оди, лекин ҳамроҳлари бу зўр гапга унчалик эътибор беришмади. Унга қайрилиб ҳам қараашмади — ҳаммаси лўнда ва кесиб — кесиб гапириш учун зўр бериб кучанишар, шу сабабли бир — бирларининг гапларини деярли эшишишмасди.

— Яна бизни қўрқаяпти дема, — деди биткўз йигит. — Сен у ёқса ўтириб келган бўлсанг ҳам аямаймиз... умуман, биз сендан қўрқмаймиз, шундай, келган ерингга даф бўл!!!

Бу гали билан йигит уни «у ёқда ўтириб» келганидан чўчиб турганини сездириб қўйди.

— Когибнинг ювиндисини ичиб жуда керилиб қолди, — деди озғироқ, юзи қув йигит. — Ўзини бизларга хўжайин деб ўйлаяпти.

- Бугун сигарет сўради, эртага бошқа нарса сўрайди,
- деди бояги юзи чуваги ҳамроҳларига кўз ташлаб оларкан.
- Бизни менсимай қўйди.

У йигитларнинг ўзларини ҳурмат қилишдан ҳамда шу кичкина посёлканинг хўжайнлари деб эътироф этишдан бошқа ҳеч нарсани талаб қилишмаёттанини ва агар ҳозир «Мен бу ерда сизларнинг борлигингизни билмабман, узр, посёлка сизларники, энди такрорланмайди, қуллуқ» деса, ҳамма «Ҳа, шундай бўлсин, кўз каттароқ очиб юрилсин», деб тўнғиллаганларича, худди бу ерга келиб кўп иш қилиб ташлагандай ўзларидан миңнатдор бўлиб тарқаб кетишини англади, бироқ у йигитларнинг чанг – губор босган, парвариш кўрмаганига ҳам анча вақт бўлган юзларига зидан синовчан тикилди: у бу жанжал беҳуда чиқмаганини, кимdir уюштирганини биларди, зотан жанжалга сабаб бўладиган бирон айб иш қилганини ҳам эслай олмасди. Посёлкадагилар билан деярли олди – берди қилмасди, совхозга кираверища – посёлканинг бир четида жойлашган меҳмонхона ва боғдан деярли чиқмасди. У ўз умрининг чалкаш сўқмоқларини кезиб юргандек ҳар куни куз ва қиши пайҳон қилиб ташлаган боғда кезиб юрарди – уни шу дақиқаларда кўрган одам у мана шу пайҳон ва чиркин боғ қўйнида қаңдайдир азиз нарласини йўқотиб қўйгану энди уни излаб дайдиб юрибди деган ўйга борарди – гоҳида эса тўсатдан бошланган зилзиладан қулаг тушаётган иморатлар каби омонат ифодалар унинг заҳил ва сўлғин чеҳрасини буткул эгаллаб оларди; шундай лаҳзаларда унинг афти тутаб ётган гўлага ўхшаб кетарди.

Одамларга, унинг олдинги ҳаётию уруғ – аймоги номаълум эди, посёлка инспектори – сал довдир ва олифта йигит – уни посёлкага хавфли ва ишончсиз одам қилиб танитганди. «Бу одам анақа рўйхатларда туради, отаси бутун қишлоқни қириб ташлаган. – дерди ў ҳар сафар сартарошхонага кирганда. – Бунинг устига ароқхўр, ароқ деса онасини сотади. Шунинг учун хотини ташлаб кеттан, бу одам жамиятимиз учун хавфли кишидир».

Бу хабардан сўнг совхоздагилар у билан эҳтиёткор бўлиб муомала қиладиган, иложи бўлса умуман яқинига

йўламайдиган бўлишди, унинг ўзи ҳам унчалар одамшавандга эмасди.

Фақат баъзи – баъзида уни қишлоқ ошхонасининг бир четида ифлос кружкада пиво ичиб ўтирганини кўриб қолардилар. У гўё атрофидаги дунё билан аллақачон алоқасини узгандай ва фақат ўзигагина маълум ўзга оламда яшаб юргандай, сара қўшинилар қўриқлаб турган ўтиб ва забт этиб бўлмас девордек одамни ҳеч қаҷон ўзига яқинлаштирмайдиган ҳуркак ва ёт бир мунг чўкиб ёттан кўзларида тошдай қотиб қолган дилгир бир қайғу ёниб турарди.

Инспектор уни қаттиқ қистовга олди ва посёлка ошхонасида пиво ёки бирон ичимлик ичишни ҳам таъқиқлаб қўйди, бироқ у ҳар куни кечқурун ошхонага пиво ичгани келар, дуд ва чанг қоплаган бурчакда кўкрак тутмалари ечиб қўйилган, бир – бирига тинмай бақиришаёттан, кўзларида ҳаётнинг чигал ва тушунксиз саволлари қолтан, худди умрлари каби жизғанак ва тўзонли саҳрода ўзининг улуғ гулханларини бир – бир ўчираёттан кечки шафақ остида исқирт курсиларга мук тушган, саҳро офтобига ўхшаб жizzаки бўлиб қолган одамларга бир сўз демай кружкани ютоқиб хўплаб ўтиради – унинг кўзларини юмиб олиб, хузур қилиб хўплашига қараб туриб, у дунёдаги ҳамма нарсани мана шу кружкадаги салтанатта алмаштириб юборган ёки адолат излаб бутун дунёни кезиб чиққану ниҳоят мана шу салтанатдагина адолат боқий ва муқаррар деган хуносага келган дея хаёлга бораарди – худди Рим қўшинлари ўликка айланган Искандарияга ҳеч бир қаршиликсиз кириб келгани каби инспектор беш – олти ёш – яланг пиво ичиб ўтирган ошхонага шаҳдам қадамлар билан кириб келди ва қоровулнинг қаршиисида тўхтаб унинг қўлидан кружкани тортиб олди.

— Сенга бу ерда ичиш таъқиқланган, — деди кружкадаги пивони бир четта сепиб юбораркан. — Умуман, сенга одамлар орасида юриш таъқиқланган.

Қоровул аввал инспекторга, сўнг пиво тўкилган жойга қаради ва секин ўрнидан турди ҳамда бир оғиз гапирмай, яна пиво олиб келиш учун буфетта қараб йўл олди.

— Ташқарига! — Бақирди инспектор, унинг қайсарлигидан жаҳли чиқиб, олдини тўсаркан, тирсагидан ушлаб олиб,

ташқарига судрай бошлади, бироқ бир қадам ҳам босмай тўхтаб қолди.

Қоровул инспекторнинг қўлларини озғин, қалтироқ, кучсиз панжалари билан ушлаб олган, кўзлари жаҳддан каттариб кетганди; ундан худди шу вазиятда ҳар нарсанни кутиш мумкин эди – инспектор буни сезди ва унинг тирсагини қўйиб юборди.

— Сизнинг ҳаққингиз йўқ, — деди қоровул унга бироз қалтираган товуцда. Унинг гапида алам, азоб ва мусибат оҳангি бор эди. Сўнг индамай хонадан чиқиб кетди.

Инспектор бари бир унга ошхонада пиво ичишни таъкидлаб қўйди. Бироқ котиб уни пивосиз қолдирмас, баъзан меҳмонлардан қолган ҳали бир қултум ҳам ичилмаган шишани олиб чиқиб берарди. Инспектор қоровул билан зимдан олиша бошлади – совхоздаги икки ўғирлиқда ҳам аввал унинг ҳужраси тингтиб чиқиљди. Инспектор бу ишни ошкора амалга оширди, зеро у посёлкадагиларнинг ичида қоровулни энг ишончсиз кимса деб билар ва ундан тезроқ қутулиш учун одамларни унга қарши киши билмас гиж – гижлай бошлади. Терсotalик ёшларнинг қизиқён ва жizzаки, гуппи йигитлар эканини яхши биларди. Посёлка йигитлари қоровулни кўрганда неларгадир тайёрланиб турадиган бўлиб қолишли, бироқ у мутлақо бефарқ эди, уларга ҳатто эътибор ҳам бермас, можаро излаб унинг оддини намойишкорона тўсаётган йигитларнинг қаршисидан индамай ўтиб кетарди.

Аммо бир куни биткўз йигитнинг олдидан – у бу йигитлар қаердан эканлигини, нима иш қилишини – қаерда яшашини ҳам билмасди, бу уни қизиқтирмасди ҳам – ўтиб кета туриб, бир дона сигарет сўради; тамакидони хонада қолган, йигитни кўриб жуда хумор қилиб чеккиси келанди. Биткўз нима деярини билмай шошиб қолди. Яқин атрофда жўралари кўринмасди – қўлидаги сигарета қолдигини бир чеккага улоқтириб, қайларгадир лапанглаганча югуриб кетди. У йигитнинг хатти – ҳаракатига эътибор ҳам бермади. Ҳали ҳужрасига ҳам кирмаган эдики, изидан ўн бешга яқин йигит тўғри боққа талмовсираб, пала – партиш бостириб келишиди: улар афт – ангорларидан кимнидир қуваётганга эмас, нимадандир қесиб келаёттанларга кўпроқ ўхшарди.

Терсоталиклар уни боплаб дўппослаб кетиши. Уни котиб энди қизара бошлаган анорзор остидан несту забун ҳолда топиб олди. Ҳужрага олиб кириб бир пиёла ароқ тутди. Пешонасидаги ёриқ узоқ вақтгача тузалмади. У энди боғдан деярли ҳеч қаёққа чиқмай қўйди. Дўппослангани ҳам тезда эсидан чиқиб кетди. Котиб шундай қилдики, жанжални бошлаган жўрабошилар пиво кўтариб келиб у билан яраш битимини тузиши; ювош ва беозор, сифинди ва найнов, қилиқлари телба – тескари бу одамни нима учун калтаклашганларига уларнинг ўзлари ҳам унчалик тушунмасдилар.

«У менга жой берди, ўзи билан тенг кўриб, одам ўрнида қабул қилди, мендан бурнини жийирмади, унинг қўнгли нурдай тоза, бундай улуг одам яна қаерда бор?!» – ўйларди у. Меҳрибон ва одампарвар, тантни ва нурафшон қалбни – котибни у худди қораҷўғига думалаб тушган марвариддай асрарни истарди. Унинг ҳазонга айланган қизғалдоқ баргидек бу жазира чўл қўйнига, ёввойи ва телба одамлар орасига учиб тушган умри давомида топган мушфиқ ва муруватли, суюнч ва раҳнамо бўладиган ёлгиз одам мана шу марварид эди ва ўзининг омадсиз несту мустар ўтмишини ҳеч қачон юзига солмайдиган, унинг умр йўлидаги ҳазон ва ҳасларни супуриб, ўзига ҳаёт ва умид сари йўл очишга дадил ва қатъий ундаган соҳибкарам ҳам мана шу марваридда мужассам эттанди, унинг қалбида шу раҳнамо туфайли уйғонган эҳтиромга чулғанган ҳислар узра унинг бутун вужудига ёғду ҳам мана шу марварид эди. Бу сиймо ҳар нарсага қодир ва камтарин, хокисор ва шафқаттўй, тантни ва мағрур эди, бу сиймо қиёфасида жилваланаётган шамс қўнглини хушнуд этадиган кўп юлдузли бодадан сўнг уни саодатли ва хушбахт, эзгу ва орзуманд қиласдиган, хаёлининг кўпдан буён қуёш тегмаган зах ва тойгоқ унгурларини иситадиган хулё офтоби каби мунаввар ва серёғду эди.

Бу талъат адашган инсониятта ҳақ ва најжот йўлини кўрсатишга мустаҳиқ этилган, ўқтам ва сергайрат, лошидан ҳоки туробигача ёғудан иборат, қуёш ва ой бир – бирини мангуб қувлаб юрадиган, умид ва хаёл саҳросида жизғанак бўлиб қолган мана шу хиёнат ва жаҳолат зулмати гарқ қилган заминга тириклиқ ва яшнаш уругларини сепиш учун

юборилган, қўлида зафар ва шижаат сўхуфлари бор, ўзи дунёга келмасдан минг йиллар олдин нури яралган, дунёда зўрлик ва адолат ўртасига девор ўрната олган, мағлублик ва матлублик ва ундан ҳамиша ўзини олиб қочган шоншавкат ва шафқат тулпорини миниб туғилган ўша Халоскорнинг айнан ўзи эди.

— Мен хароб бўлган одамман, — бақиради у котибнинг илтифотидан талтайиб кетиб, пиёлани зарб билан сипқораркан. — Мени хароб қилишди. Мен тамом бўлдим. Мени ўчириб ташлашди...

Сўнг пиқиллар ва бирдан — бир ёлгиз ва ёрқин, ҳали ҳеч кимга айтмаган хотираси — онасини ҳосилот қандай урганини ва ўзининг музлаб қолган қулоғини ушлаганча яланг оёқ қор кечиб қандай чириллаб йиғлаганини, тиши синиб тушган онаси қандай қилиб уни этаги остига яширгани, оғзидан оқсан қон идорадан то уйларигача оқиб келгани ҳақида сўзлар ва йиғларди. Ўшанда ҳосилот онасининг қорнига тепган, нимадир деб сўккан эди, афтидан... «Боласи отасига ўхшаса, туғилмай ўлгани яхши» деганди...

— Улар уч киши эди, иккита солдат ҳам бор эди, — пиқилларди у пешонасини столга қайта — қайта ураркан. — Биз ун сўраб боргандик... уч кун туз тотмаган эдик.

— Улар қишлоқни ўраб олишди, сўнг дуч келганини ота бошлиашди, — у бошини эгиб олар, котибнинг юзига қарамасдан юрагини эзиз ётган хотираларни ютуғи аниқ бўлган қартадай бир — бир очиб ташларди. Зеро унда ҳеч ким забт этолмаган, ҳеч ким ҳукмронлик қилолмаган, ҳеч ким топтай олмаган, кўп йиллар оша ўзидан бошқа фуқароси бўлмаган ёлгиз мамлакат ҳам шу эди. Бу мамлакатта ёт қишилардан биринчи бор котиб кириб келди ва худди азобга ўхшаш узун кўчаларидан ўтиб борди, шу билан кўпдан буён осойиш ётган салтанат ҳам забт этилди. Бироқ у котибга кўз ташлашга қўрқар, кўз ёшларидан уяларди.

— Бутун қишлоқ дарё бўйига қочиб чиқди. Аскарлар дарё бўйини ўқса тутишди. Мени акам тўсиб қолганди — унинг ичаги титилиб кетганди, қишлоқда икки — уч аёлдан бошқа тирик жон қолмаганди... Қайси қишлоқча нон сўраб борсак «Босмачининг боласи, бари бир босмачи бўлади,

нон берманглар» деб ҳайдашарди. Охири онам ҳосилотнинг олдига борди... Улар онамни кўз олдимда калтаклашди...

Котиб унинг пиёласини тўлдириб қуяр ва ўзи устма – уст босиб ичарди, кейин унинг елкасига ҳамдардона урганча:

— Улар аблаҳ одамлар, — деб бақираварди. — Уларнинг ҳаммасини отиб ташлаш керак эди.

Бу гап қоровулга мойдай ёқар, ийлар аро юрагини ёқиб ётган алам шу бақириш билан босилгандай бўлар, кўнглидаги гапни айтгани учун жасур ва мард котибга тўйиб – тўйиб қарар, шунда ўзи болалиқдан орзу қилган, ўзини тирикликнинг оч панжасидан қутқариб, саодат бахши этадиган ўша осмондан тушгувчи илоҳ котибнинг қиёфасига кирап ва вужуди нурдан бўлган котиб олов сочаётган қасос қиличини кўтарганча кўз олдида намоён бўларди.

Кейин ҳаммаси ўрнига тушарди, эргалаб у тамаки ҳиди билан бирга субҳидамнинг мусаффо ҳавоси кезиб юрган бесарипта ҳужрасида кўз очар, хира зулматни тилимлаб дарчадан оқиб кираётган тонгнинг симобдай бир тутам ёғдусини узоқ томоша қилиб ётар, қишлоқнинг ичкарисидан хўрзининг бўғиқ қичқириги эшитилар, ёғду эса ҳали эркак кўзи тушмаган қизнинг яланғоч баданидай гўзал ва жозибали бўларди. Бу лаҳзалар чўл қўйнида қурилажак котиб айтган янги ҳаётнинг илк онлари ёхуд ул олис шамснинг илк шуъалари каби яширин ва хушанишин эди.

V

Посёлкага келганининг учинчи йили унинг ўтмиши одамлар учун бироз ойдинлашди; йигим терим тугаш арафасида совхоз босқони Омон Жуманинг хонасига музофотнинг нариги четидан бир аёл ўн беш – ўн олти яшар боласини етаклаб кириб келди: аёл қирқлардан ошган, чиройли юзида ҳали сўлимлик ва эҳтирос сўнмаган, кўзлари ўйчан, ўзини тутишидан мулоҳазали ва ақлли аёл эканлиги кўриниб турарди. Бола эса гаранг эди. Аёл Омон Жумага совхозда эри ишлаётганини ва уни уйга қайтаришга ёрдам беришини сўради.

— Неча йилдан бери уйга қадам босмайди, — деди у курсига ўтирмаёқ. — Кунини ичиб ўтказади. Сизга бир

она сифатида мурожаат қиласяпман.

Аёл йиглашга тушди ва ўғлини кўрсатиб:

— Бу худо қарғаган болани ёлғиз ўзим катта қилдим, энди чарчадим. Бунга ҳам ота керак, — деди.

Аёлнинг йифисидан таъсиранган Омон Жума қоровулни қанчалик қистамасин у аёл билан бирга кетишдан бош тортиди.

— Бекорга овора бўлманглар, — деди бошимни эгтан кўйи қатъий қилиб: — Биз аллақачон эр — хотинликдан чиқанмиз.

У аёл билан болага қайрилиб ҳам қарамади. Омон Жумани танг қолдирганча — боф ичига кириб кетди ва у ерда шохлаб кетган тутларни хотиржам бутай бошлади. Аёл унга томон журъатсизгина интилди — ю, сўнг жойида тақса тўхтаб қолди — унинг умид ва ишончсизликдан қизариб кетган қўзларида эса Омон Жумага ҳам, бу чўл одамларига ҳам ва чўлга ҳам номаълум бўлган саргузаштларнинг кўланкаси порларди; уни бу ерга бошлаб келган умид ва эрининг юзидағи ёт бир важоҳатдан туғилган ишончсизлик бир зум иккилантириб қўйди, сўнг у боласини етаклаб боғдан шитоб билан чиқиб кетди.

Ўзининг дўқ — пўписаларини ишга солиб ҳам инспектор қоровулни кўндиrolмагач, ойлик машиидан юбориб туришга ваъда қилиб Омон Жума аёлни изига қайтариб юборди. Бу пайтда котиб посёлкада йўқ эди. Қоровулнинг хотини келиб кеттанини эшилдию: «Тўгри қилибсан, улардан қанчалик узоқ юрсанг, шунчалик эркин бўласан, ҳозир дарахтни силкитсанг хотин ёғилади. Ўзим уйлантириб қўйман», деди ва қоровулга кечқурунги бош оғриқ учун беш сўм пул берди. Бироқ посёлкадаги ҳар бир одам миши — мишини ўзича изоҳлашни истарди: бу тунд ва ароқхўр қоровул ҳосилдан чарчаб чиқсан чўлқуварларнинг қиши бўйи эрмаги бўлди.

Аёл эрини олиб кетиш учун иккинчи марта келганда (унинг эгнида бу марта тўзғиган ёмғиргўш осилган, ўзи ҳам устидаги кийим каби афтодаҳол, бир йил олдингига қараганда жуда тез қариган, юзларидаги малоҳат шамлари сўна бошлаган эди) участка инспектори ўзининг яқин танишидан бу оила ҳақидаги жамики сиру асрорни билиб олишга улгурганди.

У қиши кунларининг бирида сартарошхонада пайдо бўяди. Навбат кутиб тураркан, ҳар доимгида ўзи билган янгиликлардан одамларни огоҳ этишни лозим деб билди.

—... Онаси ўлгач, у узоқ йиллар чойхонада дастёрлик қилиб юради. Чойхоначи номи қора бўлган қизини унга қўшади — ю, бир эски уй сотиб олиб беради. Шу билан тинчийди. Ўзи сал овсарроқ бўлгани учун хотиннинг кўз пардалари йиртилиб кеттанига унчалик зътибор бермайди. Орадан икки — уч йил ўтгач, хотинини ёт эркак билан тутиб олиб, паншаха санчиб ўлдириб қўяди ва узоқ йилга қамалиб кетади. Қамоқдан қайтиб келганда хотини кимдандир бола орттириб ўтирган бўлади. У маймоқ ҳаммасига қўл силтайди — да шаҳарга кетади, у ерда ароқ учун одамларнинг қора ишини қилиб юради. Дайдиб — дайдиб, шу ерга келиб қолади. Котиб уни арзимас пулга меҳмонхонага қоровул қилиб қўйди. Хуллас, худо қарғаган чофи, боши ҳозиргача маломатдан чиқмайди. Бор гап шу.

Қизиги шундаки, инспектор бу марта негадир қоровулга анча хайрҳоҳ оҳангда гапирди.

— Бошига қийин савдо тушган экан, — деди Тоғай муаллим бош чайқаркан, оғзига кирган соч толасини туфлаб ташлади.

Инспектор аёлга бу можарога аралаша олмаслигини ва бу ўта шахсий масалалар эканини рўйи — рост бўйнига олди.

— Биз одамнинг хоҳиш — истагини ҳурмат қиласиз, — деди у хонасидан чиқар экан, қўлига фуражкасини олди: унинг юзи кўп гапирганидан бўғриқиб кеттан, семиз бўйни тердан пўрсиллаб қолганди, — мен уни мажбур қилолмайман.

— Сиз оилани сақлаб қолишингиз керак, бу сизнинг бурчингиз, — аёл унинг изидан ташқарига чиқар экан, инспектор гапирган оҳангда сиёсат қилди. Лекин инспектор пинагини ҳам бузмади: эшикни қулфлаб, зина орқали пастта тушди ва ўзини дараҳт соясига олиб, ниманидир ўйлаб турди — да, — Менинг кучим етмайди, — деди, сўнг пивохонага қараб кетди.

Аёл бу сафар узил — кесил рад жавобини олди. Ўзи ҳам узилган оила риштасини қайта боғлай олмаслигига, эри билан яшаган ўтов аллақачон куйиб кул бўлганига қўзи етди шекилли, яна ёлғиз қайтиб кетишга мажбур бўлди.

Уч ойлардан сўнг меҳмонхонага янги қоровул тайинланди – бу қоровул ҳам мўмингина одам эди, уни шахсан инспекторнинг ўзи тавсия қилганди. Меҳмонхонанинг кичкина боғида куз ва қишининг ўзаро олишуви бошланган, ёмғир суви янгиламаганидан яшил тоб тусга кирган ҳовуз саҳнини чириган ўт – ўлан босиб кетган эди: узун йўлакнинг ўзи эса ҳазонлар билан тўлганди, ҳовуз бўйидаги гулзорда ҳам тўзғоқ барглар ва сўнгти мезонлар учиб юрар, боққа кираверишдаги ялангликда қарғаларнинг ноҳуш қагил – лашлари эщтилар ва баъзи – баъзида қарғалар нақ бое устида тўпланиб шубҳали йигинлар ўтказишарди. Меҳмонхонанинг пештоқига илингандай байроқ ҳам тўзиб бўлган, ёмғир ва саратон шамоли ҳуда – беҳуда ҳилпира – вериб унинг рангини номаълум тусга киритиб қўйган, шундай бўлса ҳам у пештахтада ҳамон салобат билан ҳилпира бурунди: бироқ на қувраб – қовжира бўклилган бое, на тўзиган байроқ деворларига дабдабали чақириқлар илиб ташланган меҳмонхонанинг ҳашамига ҳеч бир гард етказа олмаган, унинг узун дахлизига қимматбаҳо поёндоz тўшалган, хоналари ҳамишадаги дик шинам ва тоза эди: ўртадаги хонанинг гилами янгиланган, деворлари қайта бўялганди: хонада кичкина кийим жавони, иккита курси бор эди ва стол устига аввалгисига қараганда каттароқ ва бежиримроқ шиша сувдон қўйилганди. Бу сирли ҳашамлар сари таллинган ташқи дунёни ва ёруғликни тўса – тўса чарчагандек, ҳорғин тебраниб турган қалин парданинг ранги униқиб, гуллари учиб кетган, диван эса ҳамон тажовузкор қиёфада ўргада қад кериб турар; у кирган ҳар бир одамни енгилтак аёлдек бағрига чорлар ва уларга неларни дир ишора қилиб, ўзи билан содир бўлган қандайдир гаройиб бир воқеани эслатмоқчи бўларди. Фақат кираверишдаги ҳужрада бесаришта ҳол ҳукм сурарди: кийимлар ва тўшак ўша куннинг эртасига ёк милиционерлар томонидан титиб ташланган ҳолича бетартиб қалашиб ётарди: хонани чанг ва губор қоплаган, тўшакларни ва шифтни қурум босган, пол тахталарининг ораси хонага кириб келганларнинг устидан кулаёттандек қадам товушларига жавобан норози

бўлиб, ғичирлаб қўярди: дераза ёнидаги миҳда қоровул терсоталик йигитлар билан пиво ичган куни кийиб юрган фижимланган коржома осилиб турар, шим эса ерда ётарди; ҳужрага куйинди ва тамаки ҳиди билан бирга одамларга алланечук шубҳали бўлиб туюлган кишининг ҳиди ҳам ўрнашиб қолган, ҳужранинг ўта бесаранжомлиги ва торлигига қараб туриб, у мана шу иприсқилар ичида. Уч йил мобайнида бирон кимса қадам босмаган, одамлар ёдидан қўтарилиган шу кичкина бошпанада қотиллик қилиш учун ўзига куч тўплагандай ва уни қотилликка мана шу куйинди, губор, тамаки ва сўққбош эркакнинг ҳиди анқиб турган, унинг ўз умри каби хароба ҳужра ундаландай таассурот қолдиради.

VII

Котиб хуфтон пайти меҳмонхонага ҳар доимгидаи индамай, бироз ҳўмрайиб кириб келди: унинг қизарган кўзларидан ва кўпчиган юзидан ичиб келгани аниқ эди – у ичган пайтлари жуда мулоим бўлиб қоларди; унинг касби чўлқуварликка ҳеч бир алоқаси йўқ, табиатан қўрс, қўпол муомаласи билан чўлга келиб ортирган манманлигига такаббурлик қўшилиб уни одамлардан бездирib қўйган – у, вазифасига кирмаса ҳам ҳар бир ишга бурнини тиқаверар, ўзича кўрсатмалар берар – туман саркотиби келганда далаларни Омон Жума эмас, у бирга қўшилиб айланар, негадир саркотиб олдида ўзини жуда эмин – эркин тутар, ҳатто ҳазил – ҳузул ҳам қилиб қўярди. Уни олис шаҳардан мана шу жумард ва жанжалкаш одамларга йўлбошчи қилиб жўнатишганди; посёлкадагилар ичида саркотиб билан қалин эмиш, уни шахсан ўзлари тарбиялаб, бу ерга олиб келганимиш, яна қандайдир қариндошлилик томонлари ҳам йўқ эмас эмиш, агар уч йил режа кетма – кет бажарилса, уни Омон Жуманинг ўрнига ёки ҳеч бўлмаса янги ҳўжаликлардан бирига босқон қилиб сайлашармиш, фалон эмиш, писмадон эмиш, хуллас, суюги тоза эмиш деган гап – сўзлар юрар, исқирт қоровул билан ғалати яқинлиги обрўсига бироз соясолса – да, ундан Омон Жуманинг ўзи ҳам ҳадиксиар, бу уни яна ҳам салобатли ва муҳтарам қилиб қўйганди.

Котибнинг изидан озгингина, лекин истараси иссиқ қиз ҳам келарди — у пахталик кийиб олган, котибнинг шляпаси чанг, кўзлари ҳорғин эди — улар тўғри даладан келишаёттан эди, чамаси, эгни — бошидан пахта ва губор анқиб турарди.

— Менга ўрта хонанинг қалитини бер, — деди котиб.

Котибнинг орқасидаги қизни у дарҳол таниганди. У қизни олти ойча оддин байрамона тусда ўтган сайлов тантанасида кўрган ва гарчи танимаган, кўрмаган бўлса ҳам қўлидаги сайлов қоғозини индамай қутига ташлаганди: сайлов одди йигини мактаб биносининг кенг ва шинам залида ўтган, қиз эса котиб билан раиснинг ўртасида қисиниб — қимтиниб ўтиради. Ўшанда у бўй — бастига қараб бу қиз ҳали мактаб ўқувчиси бўлса керак деб ўйлаган ва нега айнан шу қизни сайлашаёттанига ҳайрон бўлганди. Лекин, қиз йигирма учга кирган, фаол ишбоши, фирмә аъзоси ва ҳоказо эканлигини кейин билди. Котиб қизни шундай келиштириб таърифладики, уни сайламасдан бошқа илож қолмади ва шундай ҳам бўлди: қиз юз фоиз овоз олди. Унинг озгин, қотма суқи — сумбати, бугдойранг юзи, таъсирчан кўзлари одамда қандайдир яқинлик уйғотар, истараси иссиқ ва сулувгина қиз эди.

— Биз бу чўлни бўстонга айлантирамиз, фақат баҳтли ва ззгу ниятли одамлар яшайдиган янги ҳаёт қурамиз, янги ҳаётни мана шундай ёшлар қуради, биз эса фақат уларга йўл кўрсатамиз. Хуллас, сизларни уялтирмайди, фақат пахтани эмас, одамни ҳам яхши тушунади, халқпарвар. Баъзида, — котиб қизга қараб кулимсиради, — биз билан ҳам тортишиб қолади. Камчилигимизни шартта бетимизга айтади. Мен уни ана шу мардлиги учун ҳурмат қиласман.

Қоровул ўша кунни ва котибнинг юзидағи ифодани яққол эслаб қолганди ва ўша куниёқ қизнинг қопқонга тушганини, котиб айёр айғирлардан эканини, у кўп йиллик тажрибасидан билар ва негадир бундан гурурланганди. Котиб уни кўриб, кўз қисиб қўйди. Қоровул ҳам унинг ёришиб кетган юзига боқиб тўймас, гапираётган худди ўзининг жигаридай, ҳар гапга ёйилиб жилмайиб қўярди. Сайлов тугагач, котиб уни бир четта тортиби ўн сўмлик берди:

— Бугун менинг номзодим ютиб чиқди. Мен учун тўйиб ич, — деди.

Кечқурун кўп ичганидан боши қизиб, боғда хиргойи қилиб юрган қоровул зўрга юриб келаётган, юзи қизариб кетган котибга дуч келди, оғзи қийшайиб қолганидан қоровул унинг тайёр бўлиб келаётганини билди, суюб хонасига олиб кирди, ечинтириб қўйди; котиб гўлдирап, уни чўлп – чўлп ўпар ва «Юракни бир титиб юбор», деб бақиради.

Қоровул хириллаб қўшиқ айтар, гарчи бу хиргойи қувурнинг куруллашидай хунук ва ярашиқсиз бўлса ҳам, котиб шавқ билан қичқириб қўяр, кимларгадир, афтидан, хотирасининг бир бурчагида қолиб кеттан кимгадир «окаси жонидан» деб бақирад, қоровул эса бу худбин, олифта, ўзбошимча, тийиксиз ва танти одамни шу лаҳзаларда қандайдир зил – замбил оғриқ эзаётганини билар ва кўпроқ кўнглини олишга ҳаракат қиласади, баъзан котибнинг файрати унга ҳам ўтиб, у ҳам котибга тақлидан «о – каси, жонидан» деб хириллар, худди котибдек пиёланни кўзларини юмиб бир сипқоришда ичиб юборар эди. сўнг котибга монаңд томоқ қириб қўярди, баъзан эса унга котибнинг ёш, навқиронлиги юқиб ўзини, бутун вужудини – энди ўзларини ҳеч ким безовта қилмаслигини кун ўтган сайин тобора кўпроқ англашаётган ажинлар ва чаңдиқлар уюми қийқириб ётган пешонасига, ўтаётган кунлар аста – секин ўз муҳрини босаётган ва тобора шалвираб, куйган чармга ўхшаб бораётган кўказак юзига, бу дунёда ҳеч бир из қолдирмай ўтаётганидан атрофидағи оламдан ва қоқ тепасида жуфт – жуфт бўлиб учиб юрган қушлардан уялгандек кир ва жулдур кийимлар ичига яна ҳам кўпроқ ботиб бораёттан қадди – қоматига ва очиқ қолган китоб янглиғ унинг барча сиру асрорини ҳар дақиқада ошкор этиб турадиган кўзларига, гўё ўзи босиб ўтган бутун ҳаёти давомида еча олмаган умр сири яширингандай ёки беҳуда ва бесамар ўтган кунлари учун кимдандир ўч олишни истаб, ғазаб билан қисиб олингандай доимо асабий тутилиб юрадиган муштларига битилган пайҳон этилган умр ҳақдаги бу тўзғоқ ва шалдироқ ҳатни фижимлаб ташлашни истаб қоларди.

VIII

У даҳлизга яна бош суқиб қаради – ичкаридан таниш гўнгиллаш эшитиларди.

— Менга қара, ноз қилсанг, қилмасанг бу ердан соғ чиқмайсан, барибир ҳеч ким эшийтмайди. Агар анави қари тўриқдан нажот кутаёттан бўлсанг, овора бўласан. У менинг одамим. Агар унга бир шиша ароқ берсам, қизини қўйнимга солиб қўяди. Бир ҳовуч ун учун ҳосилот онасини ўйнаш қилиб олган. Ишонмасанг, ана ўзидан сўра, бир қултум қўйиб берсам, буларнинг ҳаммасини ўзи сенга гапириб беради. Ё чақириб берайми?..

Қиз нимадир деди, сўнг ноchor пиқиллади — унинг овозида ўчаётган шамнинг яллиги каби заифгина қаршилик бор эди ва бу йиги унга таниш эди...

Юрагига муздай нимадир сирғалиб кирди ва вужудида гўё лойқа сув қўпди; у ерда мактаб болаларини ўз бағрига чорлаган тонғти қўнғироқдек нимадир жаранглаб кетди ва бу бевақт жаранглаган бонг садоси боқувдаги от каби қўпдан буён пайт пойлаб ётган унинг ёввойи бир ғурурини ва олис хотирасини уйғотиб юборди — мактаб ҳовлисига болалар қийқириб киргани каби у энди бир умр ташлаб кетдим ва у ерларга энди қайтиб бормайман деб юрган ва кимсасиз орол каби олисларда қолган ҳаётининг навқирон адирларида қолиб кетган нелардир унинг юрагига ҳам ҳайқириб кирди — кўп йиллар бурун хотинининг ўзини оқлаш учун ичкаридаги қиз каби ноchor ва ожиз аёлга айланиб йиглаганини, юзини тимдалаб ташлаганини эслади. «Булар бунчалик калтафаҳм бўлишмаса, — ўйлади у негадир бирдан хотиржам тортиб, — ҳаммасининг усули бир хил!»

У ялангоёқ, ялангбош қаҳратон қиш кунида ўзларини қишлоқдан ҳайдаб чиқаргандарига ҳам, онасининг совуқ, кимсасиз ҳужрада қон қусиб жон берганига ҳам ўзини қўникирган эди, кун ўтказиш учун чойхоналарда исқирут ва қора ишларни қилишга, одамлар «етим», «ўғрибачча» деб атасига, чойхоначининг онасини ўрта қўйиб сўқишлирига, кейинчалик ёш, сулув хотинининг «ислиқи» дея жаврапшлирига, қамалиб чиққач, қўлларини бигиз қилиб кўрсатишларига, ҳар бир ўғирликдан сўнг тинтуб қилишлирига, ҳужжатларини бош чайқаб, елка қисиб қайтариб беришлирига, ичиб, кўчаларда ухлаб қолганда болаларнинг устига пешоб қилиб уйғотишларига — ҳаммасига кўниккан эди, буларнинг барчасини тақдирни

азалга йўйган, қандай тўгри келса, шундай яшаб кетаверган эди, гоҳо онасининг ўн йиллар бошидан тушмаган қора шол рўмоли ўша олис йилларнинг ва ўзлари босиб ўтган аянчли қисматнинг байроғидай тез – тез кўз оддида ҳилпирай бошлар, у ўз ҳаёти, онаси ва отаси учун кимлардандир ўч олишни жуда истаб қоларди, бироқ бу туйғуга ҳам ўзини кўнниктирганди. Туйгулар, хотиралар, дарду армонлар тошиб келганда у хилватда бекиниб тошиб кўпириб ичар, сўнг ҳамма нарсани унутар, ҳужрасининг бир четига ўтириб жимгина йиглар, эртасига тонг маҳали яна ҳеч нарса кўрмагандек котиб билан балиқ овига жўнарди.

У яхшилаб чекиб олди, ёнини пайпаслаб кўрди. Сўнг эшикка тикиланча узоқ туриб қолди.

У аста – секин эмас, бирдан ҳаммасига тушунгандай бўлди; хотинининг кўзларидағи тундликка ҳам, котибининг «окаси жонидан» деб қийқиришига ҳам, унинг чиройли кўзларига ҳам, ўзининг нима учун бу ерларда юрганига ҳам, нима учун сарсону саргардон бўлганига ҳам ва ўзи каби одамларнинг нима учун саргардонликка маҳкум этилганига ҳам. Унинг бирдан хўрлиги кеҳди. Ахир ҳаммаси кундай аён – ку, нега шу пайттacha фаҳмламади экан? У ўзининг болалигини, баджаҳл отасини, хотинининг эгнидаги хориж камзулини, онасининг қора шол рўмолини эслади – у зинадан кўтарилаёттандай хотиралардан сирли ва мавҳум юксаклик томон бир – бир кўтарилиб борди: у кўтарилган жойдан ҳаммаси яқъол кўринарди ва шунингдек ҳаммаси тушунарли эди.

У барча саволларнинг жавоби яширинган тилсим бўлиб қаршисида иддао билан қад кериб турган юмшоқ чарм қопланган эшикка қараб юрди, сўнг худди ақлдан озгандек икки йирик мушти билан тўсатдан эшикни ногорадек ура кетди. Анчадан сўнг ичкаридаги овозлар тиниб қолгач ва шивир – шивирлар бошлангач, эшикнинг қулф эканлиги эсига тушиб қолди ва орқага ўзини олиб ром ва қулфни зарб билан тепди, – эшик иккинчи тепкига дош беролмади – салдан кейин у ўзини серҳашам қилиб безатилган, ўргадаги столда гўшт қолдиқлари ва арақ шишаси турган, жунбуш ва тер ҳиди қоплаган хонада кўрди.

Котиб эшикка яқин келиб турарди – унинг костюми ерда ётар, тўзиган диванда эса эси оғандай серрайиб қолган, юзи ҳаддан ташқари оқариб кеттан, сайлов арафасида у ўқувчи қиз бўлса керак деб ўйлаган нимжонгина қиз ўтиради; у ҳансираб турган кўзларида жунун ўйнаган қоровулни кўриб ўрмонда адашиб қолиб, ногоҳон ўзини излаб юрган отасини учраттан ва ўпкасини босолмай йиглаб юборган арзанда қиз каби бирдан тирналиб қолган юзларини бекитиб, ҳўнграб йиглаб юборди.

Котиб эса хона ўртасида ўзининг азми иродасидан бирор марта четта чиқмаган, ўзи айттанидек хонаки тўриқ, каби ювош, фаҳмсиз, ислиқи ва ароқхўр, қулдай итоаткор қоровулга ғазаб билан қараб турарди, унинг кўзларида ўлжасидан айрилган бўриникидай очкўз ва қизганч бир ифода ёнарди; лаблари ғазабдан титрат, тутгмалари узилиб тушган кўйлаги остидан эса дўппайган қорни оҳиста кўтарилиб тушарди – унинг чеҳраси ҳозир ўзи турган бинонинг пештахтасида ҳилпираб турган байроқдай таҳдили қизариб кеттан, гёё байроқ пештахтада эмас. жizzакилик ва қийиқлик билан ёнаёттан унинг чеҳрасида ҳилпираёттандай эди.

— Сиз менинг онам ҳақида гапирдингизми, — сўради қоровул худди қарз сўраёттандай бироз тутилиб мулоим ва заҳарли оҳанга.

— Хўш, гапирсам нима қилибди, — деди котиб унинг кирга боттан бўйнига қараб афтини бужмайтиаркан гапни беписанд кесди. Кейин кўйлагининг тутмасини ўтказа бошлади.

— Бир пиёла қуйиб берсам ўз оғзи билан айтиб беради, дедингизми? — сўради қоровул яна ҳам ювош тортиб олга интиларкан.

— Нари бор. — Бақирди котиб орқага тисарилиб. — Бўлмаса пушаймон бўласан.

— Чакки айтдингиз шуни, — деди қоровул, — онам ҳурдай аёл эканини яхши билардингиз... мен сизга минг марта айтганман. Чакки қилдингиз шуни...

У аста – секин гаранг ва караҳт қиёфада котибга яқинлаша бошлади, тўсатдан қўллари ўрнида қон истаб жаранглаган қиличлар ўсиб чиққандек, ҳамда кўзлари битиб,

ўрнида ачимсиқ гўр ҳиди келаётган лаҳм ичига ёқиб қўйилган бир жуфт кўртақир шам пайдо бўлгандек, у дароз, найнов, тутоқдан ҳолда маймоқ юриш билан котибга тобора яқинлашиб борар, олдида ўзига ҳамон менсимай, қаҳр билан такаббуrona қараб турган одамни ушлаб олиб, бир ямлаб ютиб юборадигандай важоҳатда эди – котиб унга бир муддат беписанд тикилди, кейин орқага чекинди, нимадир излаб стол устини пайпаслади – да, сўнг суви ярим бўлиб қолган графинни олиб, чоғланганча, гўё бир уришда бу сўлақмондай гавдани парча – парча қилиб юбормоқчилик қулочкашлаб, тўғри унинг юзига отди...

IX

Ақлдан озгандек сочи ва кийимлари бир ҳолатда тўзиган, қўркқанидан юзлари кўкариб кеттан қизнинг алмойи – алжойи сўзларидан нима гаплигини зўрга англаб, ҳар эҳтимолга қарши таёқ туттан уч – тўртта одам, қўлига ҳеч қачон отилмайдиган тўппончасини қисиб ушлаб олган инспектор ва бош ҳисобчи меҳмонхонага чўчинқираб бостириб кирганимида даҳлизда ҳамон ой шуълалари ўйноқларди, жуда яқин кишиси кетаётган кеманинг изидан маъюс термулиб бандаргоҳда қолган алвон кийимли аёл каби ёки бир неча соат олдин бу хонадан, бу даҳлиздан, бу содда ва жоҳил одамлар орасидан киши ақли ҳам, шуури ҳам етмас қайларгадир қандайдир бир кема бош олиб жўнаб кеттану унинг ҳарир ва алвон елканига ҳасад қилиб, ўзи ҳам қайларгадир сузиб жўнамоқчи бўлаётган пардани дераза тирқишидан оқиб кираётган шабада оҳиста ҳилпиратар, пол тагида чигирткалар бири қўйиб, бири олиб тинмай ҳуштак чаларди, – бурни қонаган одамдек қулфи ва роми титилиб кеттан эшик қўпдан буён бизларни кутиб тургандек ланг очиб қўйилган, хонада эса қонга беланган қўлларига графиннинг бир парча синигини ханжардай тутиб олган, тўсатдан бошланиб, ҳамма нарсани остин – устун қилгач, ўзидан кейингиларга чанг губор қоплаган даланию шоҳ – шаббалари синган дараҳтлар билан тўзиган хазонларни қолдириб сўнгган бўрондек юзида телбалик ва жазава тўниб қолган қоровул диванда ҳорғин ҳам мағлуб

алфозда ўтирар, хонани қон ва тер ҳиди туттан, қон гиламдан сизиб ўтиб, бурчакдаги очиқ жойда ҳалқоб бўлиб тўпланиб қолган, унда чироқнинг акси липиллар, графин синифи бармоқларини тилиб ташлаган қоровулнинг юзида эса бир неча сония олдин қилган қотиллигининг муҳридек бир томчи қон қотиб қолганди.

Ўртада эса бир муддат ухлаган – у, ҳозир уйғониб қоладигандек чап тирсагига омонатина бош қўйганча, ўзига ўхшаш ва ўзиdek яшаб ўтган, яшаёттан минглаб, миллионлаб одамларга умрни қандай якунлаш кераклигини бир кўрсатиб қўймоқчилик ёки ўзи кўтариб оққан умр жилгаси ойлар оша, йиллар оша қайлардадир адашиб, улоқиб сузиб юргану, ниҳоят ҳавосида ҳамон жунбуш ва наҳснинг дўй – дўй мароми сақланиб қолган чўл ўртасидаги мана шу овлоқ, бинода елкасида кўтариб юришдан ниҳоят чарчаган, уни ўнгайсиз мағлуб ҳолича ташлаб, ер остига буткул сингиб кетгандаи лабининг бир четида бир вақтлар изидан ўзиdek ўсмир ва такасалтсанг йигитларни эргаштириб, кўчаларда жанжал ва тўполон қилиб юрган пайтларида орттирган тириқ орасидан ўзига қўрқув ва ваҳм билан тикилиб турган остононадаги одамларнинг ҳамда ўзини сўқир тиламчилик аввал болаликнинг офтобруя кўчаларидан, сўнг йигитлик – нинг турли машмашалари ва гуноҳ дараҳтлари гуллаб ётган ўрмонидан ва ниҳоят бир сакраб ўтилган ботқоқ каби қисқа уфунотта фарқ ақл – идрокнинг фаразга ботган тўшагидан етаклаб ўтган ва ўзининг ўлими учун аянчли саҳна тайёрлаган қисматининг устидан боплаб кулаёттандек оғзининг бир учидаги заҳарханда табассум қотиб қолган ва ўнг қўлига гўё умр бўйи интилиб етишган нарсаси шундай тер ва кирга ботган сарғиш соч толасини чангаллаб олган котибининг совуган жасади ётарди.

ОЧИЛМАГАН ЭШИК

*Сенга қандай жаннат яратиб
берардим, билмайсан!*
Ф.М.Достоевский

Келинчак ўз эрини мураккаб ва сийقا бир китобни ўқиёттандай машаққат билан баъзан адашиб, гумонсираб, рашк қилиб ўқирди. Бироқ охир – оқибатда ҳаммасига қўл силтаб лоқайд ва бепарво бўлиб қоларди: эрини энди истамай, безиллаб, бундан ҳам бешбаттар юраги совиб кетишидан кўрқиб, хижил ва ланжлик билан ўқирди. Ким билади, у балки бу сирли ва чигал китобда эрининг бегона аёл билан бўлган саргузаштини ҳам гўё ҳар куни кўриб юрган ҳодисадай, гўё ўзига мутлақо алоқаси йўқдай, гўё юз марталаб ўқилган сийقا бир хатни ўқигандай, гўё шундай бўлиши табиийдай хотиржам ва бепарво ўқиб чиққандир? Балким кўнглидаги рашк, алам ва ўзга аёлга ҳасад туйғуси эрининг юзидан бу саргузаштини бутун сиру – асрори билан ўқиб бўлгачтина йўқолган ва ўрнини номаълум, ўзига ўхшаш муштипар, эрининг хушомадларига осонгина асир тушган аёлга ачиниш ҳисси эгаллагандир? Келинчак баъзи – баъзида ўзига «кундош» бўлган у аёлни хаёлан тасаввур қилар ва кўз олдида дунёда энг гўзал аёлнинг сиймоси пайдо бўларди. Эрининг назари тушган аёл бундан ўзгача бўлиши мумкин эмас эди. Аёлни хаёлан тасаввур қилар экан, ўзи хаёлида яраттан бу илоҳий суратта баъзан ўзи мафтун бўлиб қоларди ва бундай аёлни севмаслик, унинг кўнглини қолдириш ҳеч кечириб бўлмайдиган гуноҳдай туюлар ва эри шундай аёлни севганидан фахрлангиси ҳам келарди. Кўнглига яқин келинчакларга бу аёлни ялмоғиздай догоули, жодугар, эримни макр – ҳийлалар билан домига илинтирган деб қарғар, оғзига келган сўзлар билан ҳақорат қилар, ўлимини яраттандан ҳам, яратмагандан ҳам тун бўйи

тилаб чиқарди. Эри унинг бирдан – бир хазинаси эди. У эридан қачон бўлмасин, ажралишини хаёлига ҳам келтирмас ва бу хазинанинг фақат ўзиники бўлишни истарди. Щу ёзнинг ўрталарида хазинасини иккига ажратиб ташлаган қилич унинг қалбини ҳам иккига бўлиб ташлаган, унинг иштиёқи – ю, ҳаётини муаллақ қилиб қўйган эди.

Келинчак ҳар кечада ўзи турган қирғоқча бир муддат қўниб ўттандан сўнг, яна узоқ сафарга отланган кемадек ўзидан кундан – кун узоқлашиб, номаълум манзил сари кетиб бораётган эрини, унинг сўнгги пайтларда пайдо бўлган терс, қўпол, жizzаки феъл – авторини, бир вақтлар эри билан жуфт қанот бўлиб учиб ўтган, ҳозир эса узоқ – узоқларда ташлаб кетилган ўтвовек кўринаётган баҳтли ва осойишта кунларини эслаб то тонгтacha йиглаб чиқарди: тонгда йигидан қизариб кеттан кўзларини арта – арта оғир кетмонни ҳолсизгина кўтариб, руҳсиз ва афтода алфозда ишга жўнарди ва кун узоги яна ўша эрининг эс – ҳушини ўғирлаган аёл билан хаёлан мунозара қила – қила, аёлнинг эрига қўйган тузоқлари, макрлари ва жодуларини ҳамда умрининг гулгун лаҳзаларини бегона ўтларга қўшиб, чопиб қайтарди. Келинчак ҳамиша ўзини шаҳарлик аёлга қараганда ожиз ва хунук бўлсан керак деб ўйлар, эрининг ақлини олган аёл назаридан ўзидан гўзалроқ, меҳрибонроқ, ишвалироқ, жозбалироқ ва нафосатлироқ бўлиб туюларди. Ўзига қараганда кўпроқ билади, ўқимишли, эрининг кўнглидан чиқа олади, тоза ва озода кийиниб юради, ўзидек қатиқ билан бош ювмайди, баданидан тер ва гўза ҳиди келиб турмайди, ўзига қараганда ёш, юзи қуёшда куймаган, соchlари сарғайиб кетмаган, қўллари ҳам ўзиникидек дағал, қўпол эмас, тафтли, ҳароратли, майнин, нозик – бундай қўлни ушласа эрининг бир йиллик ҳордиги чиқиб кетади: шундай пайтларда келинчак ўзига ўзи бечораҳол, бўшанг, уқувсиз, инжиқ ва йиглоқи бир келин бўлиб кўринарди.

Баъзан у ўзига ҳеч алоқаси бўлмаган, гоҳида изтироб, дикқат, фаромушлиқ, гоҳида шиддат, жўшқинлик, хушбахтлик чулғаб оладиган эрининг тунд юзидан қуюқ туман ичидаги секин сўнаётган гулхан янглиғ ўзига аталган ва аста – секин изсиз сўнаётган заифгина эҳтиромни кўриб қоларди.

Келинчак тўрт йилнинг чанг – губорлари, ёмғир – қорлари остида қолган, бу уйга энди келин бўлиб тушган пайтларидағи эрининг эҳтиросли муҳаббатини худди ўт – ўланлар орасидан йўқолган игнасини ахтараётгандек, эрининг қув кўзларидан баъзан саргашта бўлиб излаб қоларди. Лекин сувга чўккан тошдек, бу муҳаббат қаёққадир ғойиб бўлган эди. Баъзан келинчак ёнида ётган совуқ ва тунд эркакка қараб ногаҳон эрининг күёвлик пайтлари эсига тушар ва шунда ўша навқирон ва қувноқ күёвболага ҳеч алоқаси йўқ ёт бир эркак билан ётгандек, бирдан сесканиб тушар ва ёнидаги эркакни қаёққадир ташлаб кетган шўх – шодон, қувноқ күёв болани излаб сигирини ахтариб юриб, қуюқ ўрмонда адашиб қолган эртақдаги ўтай қизчадек эрининг худбинлик ва заҳархандалик билан қизариб турадиган юзини, одиста билинар – билинмас ажинлар қоплаётган пешонасини, темирчининг омбуридай совуб қолган лабларини секин пайпаслаб излаб қоларди.

— Бу нима қылганинг, — жеркиб юзларидан қўлларини силтаб ташлади уйғониб кетган эри унга зарда билан тикилар экан: — Ҳалиям ёш болага ўхшайсан. Ўзингни сал босиб олсанг – чи.

У юзини тескари ўтириб одди – да, яна пишиллаб беозор уйқуга кетди, келинчак эса бўғзига тошдай тиқилиб турган йигини босиш учун тишларини қаҳр билан бир – бирига босиб турар, агар тишларини қўйиб юборса, бўғзидан бутун уйни, бутун ҳовлини, бутун қишлоқни, бутун дунёни бошига қўтарадиган аянчли йиги отилиб чиқишини англар, бироқ юзидан ёш томчилари сим – сим тўкилиб бўйинлари орқали бир эркалашга, бир ардоққа интизор бўлиб сўлиб қолган кичкина, заиф кўкракчаларининг ҳовучига бориб қўйилаёттанини сезмас эди.

— Эрингнинг сендан кўнгли совуганига сабаб – бефарзандлигинг, — дерди кўнглига яқин келинчаклар, унинг гўзалар орасида кетмонни қучоқлаб худди оқ фалакка чалинган бир туп гўзадек мунгайиб, сўлиб, тушкун ва умидсиз юм – юм йиглаб ўтирганини кўрган пайтлар, – битта бола туғиб берсанг, сенга парвона бўлиб қолади.

Келинчакнинг ўзи ҳам шундай ўйлар эди. Лекин айб кимдалигини ҳам, нимага шунча йилдан бери бола

кўрмаёттанини ҳам, нима учун бошқалардай пешонаси ёруғ эмаслигини ҳам, ўзига оналик шодлигини нима учун раво кўрмаёттанини ҳам билмас эди. Бунинг учун эри ҳам, ўзи ҳам сабабчи бўлиб туюлмасди – сабаби ўзидан ҳам, эридан ҳам ўзга хилқат бўлиб туюлар ва ўша хилқатдан баъзан баҳт ва дориломон кунларга қўшиб, бола ҳам сўрар эди. У ҳам она бўлишни истар, у ҳам қорнини қаппайтириб кўчалардан бошқаларнинг ҳавасини ва ҳасадини келтириб керилиб ўтишни орзу қиласди.

Эри эрталаб бир даста калитларни олиб, бир ҳафтадан буён очилмаётган омборга қараб кетди. У ердан асабийлашиб, хўмрайиб қайтиб келди.

— Ё қулфдан воз кечиш керак, ё эгтиқдан, — деди у ўзига — ўзи гапиргандек. — Ҳеч очиб бўлмаяпти. Қулф ёмғирда очиқ қолиб, занглаган. Бирон нарса билан ўраб ўйишга эса сенинг ақлинг кўплик қилган.

У «етмаган» демади, айнан «кўплик қилган» деди. Унинг хунук бўлса ҳам жуда мустаҳкам қулфга ичи ачиётган ва буни яширмай таъна қилаётган эди.

— Қандай қилма, бари бир очилмайди, — дея тўнғиллади у ва уйнинг орқасига ўтиб кетаркан. — Пулни кўкка совуришни биласизлар фақат. Сизларни ҳамиша бирор тергаб туриши керак.

У томорқа тарафда ҳам яна узоқ нималардир деб жавради. Келинчак эрининг бу марта шаҳардан жizzакироқ кайфиятда қайттанини келган куниёқ сезган эди. Балким, шаҳарлик аёл билан оралари совугандир, эҳтимол, бошқа сабаби бордир? Келинчак чин дилдан биринчи сабаб юз беринини истар эди. Шу сабабли эрининг овга бориб, қуруқ қайтган овчидаи бузилиб қайтиши ёзнинг бошларида келинчакларнинг маслаҳати билан хамиргуруушга игна қадаб ташлаганининг каромати дея ўйларди. У муштдай хамирга игна қадаб сувга оқизиб юборганди. У эрининг шаҳарлик аёлдан кўнгли совишини, уни ўшлигиданоқ сифинишига, гуноҳлари учун тавба қилишга ва бошига кулфат тушганда мадад сўрашга ўргатишган, ўша сирли ва ҳеч қачон қиёфасини тасаввур қилолмаган ҳилқатдан ёлвориб сўрар, ҳар бир нарсадан илинж, чора, мадад излар, ҳамма иримларга қаттиқ риоя қиласди.

Қачонлардир келинчак ғалати туш кўрганди ва эри ёнида ётган пайтлари негадир ўша тушни кўп эсларди. Тушида эри худди қайсиdir бир кинода кўргандек бағоят сулув ва ловуллаб турган қип – қизил, ҳарир кўйлак кийган аёл билан кенг лолазорда бир – бирига жилмайиб тикилганча кетиб боришарди. Эри аёлнинг елкасидан оҳиста қучиб олган: унинг юзида маҳрамона ифода порлаб турар, аёлни куладириш учун нимадир гапирава олдин ўзи хохолаб кулар эди. Аёл эса эрига қараганда фироги баланд, кибрли ва келинчакка чиройли юзи бир оз совуқ бўлиб туолганди. Улар қўлларида бир даста лолани силкиттанча гулбарглари тўкилаётгандан бехабар ўзаро суҳбатлашиб, узоқда кўринаётган қир томон кетиб боришар, уларнинг изидан учиб тушаётган гулчамбарларни териб ёшгина бир қизча ҳам бораради. Қизча жуда ёш, озғин ва пучуқ эди. Қизча улар тўккан гулчамбарларни битта қўймай териб олар, эри эса сўлиб қолган лолаларни аёлнинг қўлидан олиб, изига қарамасдан боши узра орқага улоқтирава аёлга янги лола узиб бериш учун дамодам эгилар эди. Улар пучуқ қизчага деярли эътибор ҳам беришмасди. Келинчак эри аёлни қип – қизил лолалар ичига секин ўтиргизганда ва сўнг лолалар ичида улар кўринмай қолиб, аёлнинг қип – қизил кўйлаги лолазорда ҳиллираб учиб кетганда ҳамиша димиқиб ва хўрлиги келиб уйғониб кетарди. Қизча эса аёлнинг кўйлагини тутиб келаман деб шамолнинг изидан югуради, гоҳида қизча аёл ётган жойга қўрқа – писа мўралаб қарап ва кўнгли рашқдан азобланиб ҳўнграб юборарди. Келинчак ногаҳон пучуқ қизчанинг ўзи эканлигини англаб қолар, ҳўл бўлиб кеттан ёстиқни қучоқлаганича уйғониб кетарди.

Келинчак эри аёлнинг алвон ҳарир кўйлагини қўлида узоқ айлантириб отиб юборганини, сўнг эри билан аёл қизғалдоқлар орасига сингиб кетганини, қизчанинг эса шамол олиб қочаётган алвон кўйлакни тутаман деб, югуриб бораётib йиқилиб тушганини кўриб турар эди. Назарида кимдир қизчанинг юзини оҳиста эркалаётгандек бўлди. Сўнг кимнингдир бадбўй иссиқ нафаси юзига урилди ва юзида нам сезди. Келинчак уйқу аралаш секин жилмайиб қўйди. Ўзини қучаётган, эркалаёттан, сўнг ўзига билинтиrmай ечинтираётган қўллар эриники эканлигини сезмаслик, ўзини

билмасликка олиш учун фафлат уйқусида қоттандек ғингшиб қўйди ва туш аралаш йиқилиб тушган қизчанинг ўрнидан тураман деб туролмаёттанини, қандайдир оғир куч устидан босиб турганини элас – элас илгар эди. Сўнг қизни ҳам назарида ечинтиришаёттандек бўлди: келинчак уйқу аралаш ўзини ечинтираётган қўлларни секин ушлаб, ноз қилаёттандек сўлгин жилмайди ва ногаҳон қўлларнинг эриникидай юмшоқ, ингичка, силлиқ эмас, дағал, яра – чақа босган катта эканлигини сезиб қолди – да, юзига кимдир бир коса муздек сув сепиб юборгандай, сесканиб кўзини очди. Аввал тепасида чарақлаб турган қўёшдан кўзлари қамашиб кетди ва ўзининг қаерда ёттанини, атрофини гўза ўрмони ўраб олганини тўсатдан англаб қолди. Кўзларини тик қўёшдан пана қилиб иргиб турди – ю, қандайдир бир зарб билан яна жойига ётиб қолди ва ўзининг ярим ечинтирилганини, таниш тракторчи ўзини қайта ётқизиш учун зўр бериб елкасидан босаёттанини, ёввойи айғирдай пишинаёттанини кўриб қолди ва қўрқиб кетди: иккала оёғи билан тракторчининг оғзи ва бурни аралаш тениб юборди. Тракторчи «их» деди – да, қўлларини қўйиб юбормади, унинг уйғонганини кўриб жон – жаҳди билан қўпол ҳаракат қила бошлади. У бурнидан оқаёттан қон келинчакнинг очилиб қолган сонига тушаёттанини сезмасди ҳам: келинчак ўз шаънини зўр бериб ҳимоя қиласади. Кийимбошию бутун вужудидан бадбўй дори ва керосин ҳиди келаёттган тракторчи эса уни охиригача ечинтиришга уринар эди. Аёл чайир ва чаққон эди. Тракторчи кучли ва найнов эди. Ўзларини кўмиб турган гўзалар ҳам уларнинг ўзаро жангини томоша қилаёттандек нафас чиқармай қотиб қолганди: узоқдаги шийпондан аёлларнинг тушлик овқат устидаги қувноқ кулгулари токи улар олишаёттан қартагача ёпирилиб кирап, лекин улар бу қулгуларга эътибор бермас, ҳар бири ўз мақсади учун ёниб тиришиб курашар эди. Эркак кучини беҳуда ишлатиб чарчаб қолгач, бирдан умидсиз ва тажанг оҳанга шивирлаб, хушомад қила бошлади:

— Ахир эрингнинг шаҳарда аёли борлигини ҳамма билади – ку?

Келинчак унинг гапидан сесканиб тушди, номус ва аламдан ларзага келди, бирдан қўлидаги қилични бирор уриб

туширгандай bemажол бўлиб қолди. Худди хазина яширинган горнинг тилсимли жумласидай бу жумлага унинг барча мудофаа аъзолари бирин – кетин асир туша бошлади: у эркакнинг қўлларига ортиқ қаршилик қилмай, гўё яшашдан энди умид узгандай, ўзининг ихтиёрини унга тоширганини билдиргандай кафти билан юзини тўсиб, ҳўнграб йиглаб юборди. У тракторчига ёқар эди. Иккаласига икки хил қисмат, йўл, пешона ва юлдуз берган тақдирға тоҳ – тоҳида енгил, оғзининг қулфи – қалити йўқ, хунук хотинининг етмиш яшар кампирницидай маза – матрасиз жаврашларидан, инжиқликларидан тўйиб кептан пайтларида хўрсиниб – хўрсиниб лаънат ўқирди. У хўрланган, алданган ва ҳали ўн гулидан бир гули очилмай баҳтсизликка маҳкум этилган, бир пайтлар ўзининг хаёлидан кетмайдиган қизнинг – келинчакнинг умидсизлик билан ўксиниб йиглаб ётишига қараб турйб, вужудидаги жунбуш секин сўна бошлади: у келинчакнинг тақдиди ўзиникидан ҳам аянчлироқ, эканлигини англаб турарди, унга ачингиси, ёрдам бергиси, эркалагиси келарди. Бироқ, келинчакнинг бутун далани тўлдириган йигисига қулоқ солиб туриб, ўзининг келинчакнинг дарду аламига ёт, бегона эканлигини, бу сирли ва азобли қалбни ҳеч қачон тушунолмаслигини, ўзининг эркаловчи ҳар бир сўзи унинг баҳтиқаролигини тасдиқловчи садодай бўлиб жаранглашини сезди.

Келинчак токи боши оғриб вужуди бўшашиб қолгунча тракторчининг асов эҳтирос билан ўзини кесакка қўшиб эзғилаб ташлашини кутиб, ингичка товуш билан аразлаган ва хўрланган алфозда йиглаб ётди. Сўнг боши оғригач, йигидан тўхтаб, бир нафас ён – атрофга ғамбода ва ҳайрона кўз югуртириди: ёнида энди ҳеч ким йўқ, згатлар ичига жосусдай шарпасиз енгил шабада ўрмалаб кирган, қуёш эса унинг оёқлари учига ўтиб, худди ўз аксини кўрмоқчидаид згатни тўлдириб оқаётган жилгадек тўлғониб ётган, муқаррар ҳодисани кута – кута чарчаган оппоқ сонларини ва кичкина қоринчасини берилиб, завқ билан томоша қиласиди.

Эри ҳали қайтмаган, қайноаси нариги уйда ухлаб қолган бир кечаси келинчак ётоқقا ўғридай сирғалиб кирди ва эшикни маҳкам занжирлади. Ойна олдига келгач, қошу

кўзини синчикалаб кузата бошлади. Назарида ўзига ўзи бил — бинойи, ҳар қандай аёлдан гўзалроқ кўриниб кетди. У шаҳарлик аёлда бор ҳислатларнинг ҳаммаси ўзида ҳам борлигини англади. У секин кўйлагини ечиб, ўзини ойнага солди: ногаён кўзгудан ўзига тикилиб турган қип — ялонғоч, ҳурдай шарини кўриб қолиб уялиб кетди ва ердан кўйлагини олиб, секин кўкракларини тўсди: сўнг орқа ўтириб, ён томондан ҳараб, ўзининг силлиқ ва сўлим қоматига ўзи маҳлиё бўлиб қолди; кўйлакни яна қайта ерга ташлаб энди ҳеч нарсадан сесканмай муштдай кўкракларини оҳиста ушлаб кўрди: кўкраклар уясидан бошини чиқариб турган мурғак палапонлардай, дафъатан яланғочликдан жунбушга келиб безовта титраб турар эди. Кўкраклари ҳам, қоринчаси ҳам, улкан қоядан тўклилаётган шаршарадек селкиллаб турган қалин, тарам — тарам соchlари ҳам ҳеч қандай аёлникидан қолишмайдигандек эди. Келинчак эрининг шаҳарлик аёлдан ўзида йўқ яна нима топганига ҳайрон бўлди, шаҳарлик аёлнинг ўзидан ҳеч қандай ортиқча ери йўқдай эди. Ҳатто ўзининг сийналари у аёлникига қараганда дуркунроқ эди. Келинчак кийиниб бўлгач, болалигидан қолган одати бўйича бу ўлик чиқандай ҳувиллаган уйдан, бу зуғумли дунёдан қайларгадир учиб чиқиб кетмоқчилик, қўлларини қанотдай ёзиб, силкиб — силкиб қўйди. Унинг худди қушдай учгиси келарди. Учиб — учиб ўзи қизлик пайтлари хаёлида яраттан оппоқ эртаксимон дунёга бориб қолишни, у ерда маликалардай баҳтли ва осоишта кун кечиришини, бири — биридан гўзал, мард, паҳлавон шаҳзодалар туғиб беришни орзу қиласади. Бу хаёлий, лекин унинг учун ягона таскини дунё эди. Бироқ у учиб кетиш учун қанотларини силкиттан сайнин, тобора кўпроқ бу сокин ва хиёнаткор ҳаёта қоришиб борарди.

У қозоннинг тагини узоқ шуфлади. Гутундан кўзлари ачишиб кетди: кўз олди шуъланиб милкларига ёш қалқиб чиқди. У қоракуя теккан бармоқларига зътибор ҳам бермай, кўзларини уқалади, пешонасига тушган сочни бир чеккасига танғиб қўйди. Сўнг гугурт олиш учун уйга кирди. Эри қандайдир журнال варакларди. У худди ўз умрини вараклаётгандай, журнални имиллаб — эринчоқлик ва ҳафсаласизлик билан варакларди. Эркак унга бир қаради —

ю, кўзларида ўт порлаб кетди ва зарда аралаш тагдор қилиб жилмайди.

—Пешонангни қора қилиб қўйибсан, — деди ним табассум билан, сўнг ўзининг сўз ўйинидан ўзи завқланиб ёйилиб жилмайди ва нимадир эсига тушиб, юзига бирдан қаҳр югурди. — Нима бунча ивирсиқ бўлмасанг, бирон нарсани эплолмайсан, доимо шу — исқирт кир — чирга ўралашиб, бева хотиндай шалвираб юрасан. Бундай ўзингта қарасанг бўлмайдими?

Келинчак эрининг гап оҳангидаги таҳқирии сезиб, кўксида нимадир сингандай қулоги шангиллаб кетди. Сочиқ билан пешонасидағи бармоқ изларини артди — ю, бўтзидағи ранжу — аламни ютиш учун секин ўчоқ бошига қайтиб чиқди. Эрининг дағаллигидан хўрлиги келиб ўчоқда, лопиллаб ёнаётган оловга фаромуш тикилди. Олов ўчоқда эмас, ўзининг кўксида ёнаётганда ва бу қоп — қора, ишлатилавериб хароба бўлиб қолган ўчоқ эмас, ўзининг юрагидай оловга мафтун бўлиб тикилиб турди: орқасидан қайнонасининг вазмин қадам товушларини эшитиб, ўрнидан иргиб турди — да, қайларгadir учишга чоғланган хаёлларини пиёзга қўшиб қозонга ташлади ва шошилиб қовура бошлади. У шундагина кўп йиллардан бери ўзининг хаёллари қозон устида пиёзга қўшиб қовурилганини, аввал ўтгай укалари ва меҳмонлар, энди эса эри ва қайнонаси ўзининг бу зерикарли ҳамда серкулфат турмушдан халос бўлиш учун озод қуш каби эрк ва ҳурлик истаб юксак — юксакларга учиб жўнайдиган, бироқ охир — оқибатда яна барибир қозонга келиб тўкиладиган хаёлларини еб қўйишганини дафъатан англаб қолди.

Ёзинг охирларида эри уни ўзи ишлайдиган, иморатлар пала — партиш, ҳам тартибли қурилган катта шаҳарга олиб борди. Келинчак шундагина эри ўзи билан юрганидан жуда ҳам ҳижолат бўлаётганини сезиб қолди. Эри танишлари учраганда қизариб — бўзариб кетар ва унга зарда билан қараб — қараб қўярди. Улар қандайдир бинога кириб навбатта туришди.

Уларни худди ички дунёларини ўқиб олишмоқчилик, турли асбоблар билан обдон текширишди. Сўнг эртасига яна боришиди. Яна текширишди. Оқ ҳалатли нўғай аёл эрига нималарнидир узоқ тушунтирди. Эри унинг олдидан юзи

қизарыб, умидсиз қиёфада чиқди. Токи уйга қайтиб келгунларича чурқ этмади. Келинчак эрининг юзидағи ва күнглидаги ўзига аталған сўнгти тор ҳам энди буткул узилганини сезди.

Шу кечаси келинчак биринчи марта эрининг олдида ўзини тута олмади. Ноҳақ хўрлангандек узоқ йиглади. Унинг йигиси тўхтаб – тўхтаб учайдан бесаранжом қўнгиздек, бутун уйни тўлдириди. Ёзинг чангига ўрнашиб қолган дераза тирқиши – ларидан ҳовлига ўрмалаб чиқди: у ўқсиб – ўқсиб, ноз билан, ишва билан, дилбарлик ва араз билан йиглади: эри эса уни овуттиси ҳам келмай шифтта тикилганча нималарнидир ўйлаб ётди.

— Энди фойдаси йўқ, — деди у кимга гапирганини ўзи ҳам билмай. — Ахир бир умр шундай ўтолмаймиз – ку?

Келинчак кўксидаги эрига нисбатан шу вақттacha асраб юрган эҳтиром пиёласи жаранглаб синганини эшилди ва оғриқни ҳам билмай, алам ва умидсизлик билан бармоқларини тишлаб ташлади.

Келинчакнинг китоб ўқишига на вақти, на қунти бор эди. У бир варақ китоб ўқиса, уйқуси келар, шу сабабли китоб ўқигандан кашта тўқиган афзалроқ эди. Бироқ у гоҳ – гоҳида, туш пайти, шийпонда дам олиб ўтиришганида, шунчаки эрмак учун аёллар журналини ўқиб турар эди ва у қачонлардир эри синглиси билан ўйнашиб юрганидан номуста чидай олмай, ўзини ўлдирган аёл ҳақидаги қандайдир мақолани ўқиган эди. Эрининг шаҳарлик ўйнаши ҳақида ўйлар экан, бу воқеа бот – бот эсига тушарди. Шунда ўзининг синглиси йўқлигидан, гарчи синглиси бўлган тақдирда ҳам эри бундай пасткашлиқ қилмаслигини билса ҳам, ўзини дунёга келтирас – келтирмас ўлиб кеттан онасининг ягона қизи эканлигини эслаб, ич – ичидан хурсанд бўлиб кетарди. Гоҳида эса ўтай онасининг ёшлигига «Илоё, баҳти қаро бўл, илоё қирчиллама ёшингда қайрил, илоё баҳтинг очилмасдан бева қол», деб ер муштлаган қарғишларини эслар экан, мени қарғиш урмадимикан деган ўйдан ваҳимага тушарди. Балким уни баҳти қаро қилган – онасидир? Чўлоқ, укувсиз ўтай онаси ўзининг қўлидан бир иш келмагач хаёлпараст ўтай қизини бутун қўшилоқ эшигадиган қилиб қаргаб юрарди, унинг хотирасида болалиқдан бирон нарса эсида қолмаганди; эсида

қолганлари уни уззукун таъқиб этиб юрадиган қарғишлар эди. — У бу қарғишлардан, катталарнинг сассиқ ва қўланса дунёсидан қочиб, ўзини нима ҳимоя қиласа, ўша ерга бекинарди: бироқ худди ялмоғизнинг супургисидай қарғиш уни гоҳ молхонадан, гоҳ сомонхонадан, гоҳ улоқлар орасида писиб ўтирган жойидан топиб олар ва бўйнидан ушлаб, қишизил тили бутун қишлоқ устида чархпалақдай айланаётган маймоқ онасининг олдига етаклаб чиқарди. Баъзан эса бола қалби билан у ўтгай онасининг эргакларда айтилгандек унчалик жоҳил эмаслигини, эркалашни билмагани туфайли ҳам эркалаш, ҳам етимлигини билдирамаслик учун ўзини қарғишини англаб қоларди. У болалик дунёсидан катталар дунёси томон деярли сакраб ўтган эди. Энди кўзини очишга, ақдини йигиб олишга ҳам имкон бермай бошига тош каби ёғилаётган маломатлардан, хўрликлардан ўша болаликнинг хилват бурчакларига, — қарғишларининг зич ва қуюқ ўрмонига ўзини яширап эди.

Келинчак қандайдир журнал варақдай туриб қошу кўзи тимқора, қўгиричоқдай ораланган, соchlари ёйилган, тунгти камзулдаги аёлнинг суратига кўзи тушганди. Аёлнинг соchlари елкаси оша, салгина бўртиб турган кўкраклари оша тўкилиб турарди. Сурат остида аёлларнинг орастга бўлиш, эркаклар кечаси аёлларнинг соchlарини ёйиб, эркалаб ётишига мойил бўлишлари, аёлларнинг ҳамиша ёқимли, ёш, ҳамда сўлим бўлиб қолишлари учун нималарга эътибор беришлари тўғрисида каттагина мақола бор эди. Келинчак мақоладаги кўпгина сўзларга тушунмаса ҳам қизиқиб ўқиб чиқди. У суратдаги аёлнинг тиниқ ва гўзал чеҳрасига ҳавас билан тикилиб турар экан, шаҳарлик аёлларнинг ҳаммаси мана шундай бўлса керак деб ўйлади.

Эри ҳали меҳмондорчиликдан қайтмаган эди. У тошойна олдига ўтириб олиб, соchlарини ёйиб таради, сўнг кўзига қора сурма сурди. Лабини беўхшов қилиб бўяди, кўкрагини яrim очиқ қолдириб, камзулининг ёқасини қайтариб қўйди: юзига билинار — билинмас упа — элик сурди: қорамтири, бугдойранг юзида пардоз ола — була бўлиб қолса ҳам унчалик эътибор бермади ва журналда ёзилганидек, бўйнига, лабларига, сочига атири сепиб, икки кишилик тўшакнинг бир четига ўтириб, эрини маҳтал бўлиб кутга бошлади.

Эри алламаҳалда қайтди. Чироқни ҳам ёқмай ечинди. Келинчак кўзидағи ёшларни артиб, уйгоқ эканлигини билдириш учун секин хўрсаниб қўйди. Бироқ эри ўрнига чўзилди – ю унга тескари ўтирилиб олди. Келинчак узоқ жим ётди. Сўнг эрининг ҳали ухламаганини билгач, елкасига секин бош қўйди. Эри унга ҳайрон бўлиб тикилди – да, ўтирилиб ётди ва истамайгина соchlарини силай бошлади. Келинчак эрининг кўкрагига бош қўйди. Эри унинг юзини ҳовучига олиб шаштини қайтармаслик учун секинлик билан лаб босди.

— Бу нимаси, — келинчакни силтаб ташлади у тўсатдан, ифлос нарсани тишлаб олгандек, бир четта туфлар экан, ёнидаги тун чирогини узалиб ёқди ва хотинини газаб билан кўздан кечира бошлади.

— Бу нимаси, — деди у яна, — нима бу? Худди кўча аёлларига ўхшаб бўяниб олибсан?

Келинчак юзига тарсаки тортиб юборгандай, бир зум серрайиб, эрига чўчинқираб тикилиб турди – да, югуриб ташқарига чиқиб кетди: у сўнгра товоқда турган сувга ашил – тапил юзини чайди, сўрининг бир четига ўтириб чорпоя теграсига суянганча пиқиллаб йиглаб юборди. У онаси ноҳақ, урган қизчадек узоқ йиглади, йиглаб – йиглаб боши оғригач, гарангсиб ўрнидан турди, секин эшикни оча туриб ўзига ҳайрон бўлиб қараб турган ҳилолни кўрди, туннинг эркаловчи қўшиғидай жилдираётган ариқчадаги сувнинг маҳзун навосини эшилди; оёқлари остида тўшалиб ётган бепоён тун, миллионларча юлдузлар, минглаб чигирталар – нинг чиридоқлари, қурбақаларнинг масхараомуз нағмалари, итларнинг безовта ҳуришлари, шовуллаётган дараҳтлар ва сокин ухлаб ёттан уйлар орасида ўзининг ёлғиз эканлигини дафъатан ҳис қилди. У бу туйгуни ичкарига киритмоқчи эмасдай, югуриб кириб, эшикни занжирлаб олди.

Эри хотиржам ухлаб ётар эди. Келинчак унинг андак солқи юзларига узоқ тикилиб турди. Эрининг лашкарлар қўриқлаб турган қароргоҳда бамайлихотир пинакка кеттан шоҳдек ухлаб ётиши унга эриш туюлди – эрининг сокин уйқусига ҳаваси келди. Бир йил муқаддам эри ўзини мана шу баҳтиёрлик ва осойишталик қароргоҳидан бир умрга ҳайдаб чиқарганини англади, эри билан ўзи бошқа – бошқа

дунёning одамларида туюлиб кетди. У тўшакда шифтга ҳолсизгина тикилиб ётар экан, ташқарида қолдириб, ўзи қочиб кирган ёлғизлик туйгусининг эшиқдан сирғалиб кириб ўzlари ётган тўшакни, худди ўзининг келинчак пайтидагидек иффат, ҳаё билан тебраниб турган дарпардани, эри билан ўттан осойишта кунлар ва қизлик дунёсининг ҳиди келиб турган ёстиқларни, эрининг хушнуд ва баҳтиёр чеҳрасини, ўзининг яқингинада синиб биттан баҳтли лаҳзалари яширган чиройли кўзларини ва бутун уйни қийналмасдан забт эттанини ҳис этди ва кўм – кўк осмон қўйнида улоқиб учиб юрган қузғундек олдинги осойишта ҳаётидан узилиб, энди ўзи ҳам қаёқладир, манзилсиз томонларга учиб жўнаганини сезди. Ва умрида биринчи марта ўлим ҳақида ўйлади. Шу кечада тушида ҳам ўзининг жизғанак бўлиб ёттан саҳро узра бепоён осмонда ёлғиз учиб бораёттанини, учиб бораёттанини, учиб бораёттанини кўрди.

Келинчак айвон ойнасидан эрининг омборнинг қалитини бураб, аччиқланган қиёфада қулфни силтаб ташлашини кузатиб турар экан, негадир у омборда ўзининг шу кунлардаги гумонлари, шубҳалари, аламлари, қалбини тобора эгаллаб бораёттан, эрига нисбатан ишончсизлиги ва тоғталган орзулари солиб қўйилгандай қулфнинг очилишини сира ҳам истамай қолди. У эрининг ўзини тушунадиган пайтлардан энди жуда йироқлашиб кеттанига шубҳа қилмади.

У энди ҳар куни туни билан йиглаб чиқар, кўзёшлари унинг кўнглидаги ишонч, садоқат ва муҳаббатни секин ювиб бораарди. Гумон, шубҳа, ранжу – аламлар оқими эса уни номсиз томонларга оқизиб кетмоқда эди.

Эрининг феъли кундан – кунга айниб бораарди. Келинчак энди эрининг ўзидан бутқул совиб кеттаниллигини англади. Келинчакнинг кўнглида рашқ ҳам, қизғаниш ҳам йўқолган, аксинча, эрининг хатти – ҳаракатларидан ғаши келарди. Эри ҳам унга таъна билан тикилиб – тикилиб қўяр, худди дарёning тубидан бир кўриниб ўтган ва тангачалари қуёшда ялтираб кеттан кичкина балиқдай унинг тунд юзига ғоҳида қандайдир сирли ифодалар у ёногидан бу ёногига билинار – билинмас югуриб ўтарди. Эри кейинги пайтларда шаҳарда

ҳафтагалаб қолиб кетарди. Келинчак сўрамаса ҳам иш кўпайиб ётиб қолишга тўғри келаяпти, деб қўярди. Баъзан ҳар куни келиб турар, у эрининг ўзига нимадир демоқчи бўлиб, айтолмай кетаёттанини сезарди. Шу билан бирга эри нима демоқчилигини ҳам билар, гарчи энди йўлни йўқоттан йўловчидаи қаёқда юришини билмай ора йўлда қотиб турган бўлса ҳам ўзини эрининг у сўзларини эшигишга, масалани у ёқа ёки бу ёқда буришга тайёр деб сезмас, буни тирик туриб эътироф этгиси келмас эди.

— Тезроқ берақол, — деди эркак унга зарда билан тикилар экан.

Келинчак қўлидаги икки жуфт қатламани узатар экан, гўё эрига ўзининг сўнгти қувончлари ва шодликларини узатаёттандай бўлди. Бир пайтлар ўзининг баҳтини олиб бориб топширгандай эрининг бу патирларни ҳам ўша шаҳарлик аёлга олиб бориб топширишини ич — ичидан ҳис қилди: ким билади, аёл унинг қанчадан — қанча патирларини еганикин. Унинг патирларига егани ўзига ўлим тилагандир? Эрининг ўзини кўпроқ яхши кўриши, қишлоқни унудиши учун патир қилган қўйларни атайлаб, қичиқ қилиб мақтагандир: эри эса ўзига ойда ҳам бир марта раво кўрмайдиган ширин сўзларини унга сахийлик билан, юзи — кўзи, сочи, лаблари, қомати ва бутун уйи тўлгунча айтавергандир.

У эрининг кейинги пайтларда ифлос бўлган лабларини қандайдир кераксиз латтага артгандай хуморсиз, истамайгина ўшишларини эслади; у тўсатдан бир неча ойдан бери шаҳарча ўпинчлардан, турли хил мушк — анбарлардан, упаю бўёқлардан, номаълум гўзал аёлга қилинган ялтоқона хушомадлардан ифлос бўлган исқирт лабларни артиш учун ўзи билиб, кўриб туриб латта бўлиб хизмат қилганини англаб қолди ва бутун баданини жирканч, шилимшиқ нарса қоплаб олгандай, ҳаром билан харишнинг фарқига бормайдиган аёлга айланиб қолгандай ҳис этди ўзини. Келинчак кўксидаги йигини босиш учун гилт этиб ютинди, эрига ўзини курсанд кўрсатиб кузатди.

Қайнонасини қўшнисиникига жўнаттач, у уйига кириб ичидан бекитиб олди. Тўй куни кийган оппоқ кўйлагини кийди, сўнг ўзига атир сепди ва кишини абадий баҳтиёр

қиласынан да қайсицидир китобда шундай деб ўқиган, қоғозга
ўроғлиқ оғуни стаканга солди ва чойнакни сирқитиб қуиди.
Худди узоқ сафарга отланаёттандай, бир зум тек қотди:
стаканга бир нафас даҳшат ва ваҳима билан тикилиб турди:
сүнг кўзларини чирт юмди – да, стаканин бир кўтаришда
ичиб юборди. У бўғзини, сүнг кўксини куйдириб ўтган ўтдан
ҳолсизланиб борар экан, парчаланиб кетаёттан гира – шира
онгида шаҳарлик аёлнинг кибрли чеҳраси ва унга тинмай
лола териб бераёттан эрининг маҳрамона турқини кўз оддига
келтириди ва улар ўтлоқ ичига секин чўзишишар экан,
келинчак бу манзарани ортиқ кўрмаслик учун мажолсиз
қўлларини қанотдай силкитиб, ердан оҳиста кўтарила
бошлади ва гарчи энди бутун танаси ҳаракатдан тўхттай
бошлаган бўлса ҳам, ўлжасига шиддат билан отилган
қарчигайдай охирги кучларини йигиб, тез – тез қанот қоқа
бошлади ва ўзини ҳарир, камалак нусха, чимилиқ янглиғ
шоҳи пардалар ичидан учиб ўттанини ҳис этди – сўнг эса
қизлик пайтлари орзу қиласынан да бу илтифотсиз оламдан
бир умр излаб ўтган баҳтта ўхшайдиган жилвадор, хаёлий
ва алланечук оппоқ дунёга сингиб бораёттанини, сингиб
бораёттанини, сингиб бораёттанини элас – элас илғаб қолди.

A Ж Р

«...Сен қўшиқ айт, Зубайда, ёниб – ёниб қўшиқ айт – ўзинг кўрмаган бу дунёнинг ранглари ҳақида, офтоб нури, булоқ суви, дараҳт гуллари, чечаклар ва қизғалдоқлар ҳақида қўшиқ айт; сен йиғлаб – йиғлаб хиргойи қил – у, бу қўшиқ мени мана шу тўқайдаги қоқи гулига, ҳечқурса ёвшонлардан бирига айлантиrsин, мен сени кўриш ва мудом бирга бўлиш учун токи шу юлғунзорда қолиб кетай, сенинг оёқларинг тагига қовжираб тўкиладай, майли, губорга айланиб соchlаринита қўнай, фақат сенинг бўйнингдан уфураёттан гул ҳидини ҳидлаб турсам бўлди, сенинг баҳту муҳаббат истаб титрат турган кўкракларингта боқиб турсам бўлди...

Мен сени овута олмайман, Зубайда. Сени қушлар туғури, қандай очилишини сен ҳали кўрмаган гуллар, сенинг шивирларинг каби ер юзига бодраб чиқсан майсалар, соchlарингни соғинган шабадалар, жимир – жимир ёғаёттан ёмғир, тоңти шафақ овутсин...

О, нафақат сен, назаримда яраттан ҳам унутиб қўйган бу тўқайга қуёшнинг бир парчаси синиб тушган, йўқ, йўқ, сени парвардигор юлдузлар ичидан топиб олган. Сенинг оғушинг офтобнинг ёғогига ўхшайди, баданингдан беҳишт ялпизининг бўйи келади, кўкрагингдан олма ҳиди анқиб туради...

Мен сенинг кўзларингта термулиб – термулиб ўтиргим келади, сенинг кўзларингдаги кўлга чўкким келади. Сен бу зулмат дунёда сакраб – сакраб ўйнаб юрган нурсан, бу тубанлик шоми чўккан дунёнинг бағрига тушиб турган ёғдусан. Ҳали бу мудҳиш дунёга қувилмасдан олдин, чечаклар гул – гул очилган ва дараҳту кўкатларга, ҳашароту ҳайвонларга ҳали исм қўйилмасдан бурун, ҳали ўлим ва ҳаётни касб қилиб олмасларидан олдин одамзотнинг фаришта бўлгани тўғрисида фалакнинг бир туйқус иқрорисан сен... Сен жамики тириклик ўлатдан қирилиб

кеттан, жамики ўсимлик қувраб – қовжираф қолган, қип – қизил бўлиб жизғанаги чиқиб ётган саҳрова, қарғиш теккан бу биёбонда очилган бир тўп нафармон гулсан.

Кўзларингда фаришталар чўмилган қора туннинг бир парчаси қолиб кеттан, йўқ – йўқ, сенга шайдо бўлганларни ҳибс этиш учун фалак сенинг кўзларингда зиндан қурган. Лаънатта йўлиқкан биёбондагиларни огоҳ этиш учун эса сенинг кўкракларингда бу дунёга бир жуфт машҳар қўнгирогини жўнноттан, неларга қодирлигингни кўрсиналар деб, сени – беҳишт гулини қабр устига қўйгандек бу олам остонасига ташлаб қўйган, йўқ, йўқ, борлиқ сенинг қаршингда чала туғилган гўдақдай хунук бўлиб қолишини билган фалак бу аянч дунёни кўрмасин дея сенинг кўзларингни боғлаб қўйган...»

...Атрофга сиёҳранг тун чўккан эди. Йўл дала узра олтин калавадек чўзилган – ҳаво дим ва теварак жизғанак бўлиб куйиб ётарди, юлдузлар липиллай – липиллай сўнардилар – ҳаводан куйинди ҳиди келар ва қоқ ўртасидан ёлғизоёқ йўл кесиб ўттан дала тутаб ётарди. Йўлда ялангоёқ кетаётган барваста гавдали одам тутуннинг аччиғидан ўпкаси узилаёттандек тез – тез ва пўк – пўк йўталарди. Унинг этнида жуда оҳорли камзул осилиб турар, кўйлагининг зарҳал тутмалари сўнаёттан юлдуз шуъласида ярқиллаб кетарди. Унинг елкасида, патак соқолли, беқасам чопон кийган, жиккаккина чол оёқларини осилтириб ўтиради.

Кеч тушганига анча бўлганига қарамай, тупроқ иссиқ эди, барваста одам ҳансираф – ҳансираф, зўрга кетиб бораради.

— Эсингдами, — дерди чол ўғлининг ҳарсиллаб қолганига юраги ачишаёттандек ва атрофдаги мудҳиш сукунатдан чўчиёттандек шивирлаб, — ўн йилча олдин шу йўлни туш кўрган эдинг. Айнан шу йўлни. Ўша тушни сен билан бир кечада мен ҳам кўрган эдим — ахир қонимиз бир — да! Ўшандәёқ сенга раҳмим келган эди, ҳам багрим манави даладай тутаб кеттанди! Анави тепалик ҳам кирган эди, эсингдами, ўзинг ҳам бир ҳафтагача ўша тушни эслаб, жуфтон бўлиб юргандинг. Ҳар қалай шу тушингни сотиб емагандирсан? Ё, уни ҳам бирон нарсага алмаштириб

юбордингми? Йўл, дала, тутун, ўкириклар, йиги – сифи – зингдами?

— Эсимда, — хириллади ўғил, — ҳаммаси эсимда.

— Ўшанда мен ҳам бир неча кун ухлай олмаган эдим, бу йўлдан қандай ўтarkanсан, деб. У туш эмас, ёзиқ эди. Ўша кечасиёқ сенинг пешонангта ёзib қўйилганди. Мен шундан қўрқан эдим. Сен ахир у пайтлари пешонангта ёзилгани шу деса кулар эдинг – да. Сизлар бу дунёдаги ҳамма нарсанинг оёғини осмондан қилиб ташладиларинг. Ҳамма нарса муаллақ бўлиб қолди. Қаёққа қарама, ёвуз ниятни кўрасан. Сизлар қилган ва қилаётган ишларни кўриб, одамзод ҳамон яшаб келаёттанига ишонмай қоламан. Ахир сизларнинг кўнгилларингизда тирноқча эзгулик қолмаган бўлса, бошқа қандай хаёлга бориш мумкин. Оддинлари одамлар ишонишарди, яхши кунлар келишига, болаларига, қўшнисига, бир – бирига. Сизлар мана шу ишончни ўғирлаб қўйдиларинг. Энди одамлар ҳеч нарсага ишонмайди, ё тавба, ҳатто боласига ҳам. Орият, номус қолмади одамларда. Сизлар уларни иштон кийган ҳайвонга айлантиридиларинг. Қандай иснод! Тўрт кишига бошлиқ бўлиш учун хотинини қўшиб қўйишдан ҳам тоймайди булар. Ҳаммаси сенга ўхшаганларнинг касофати. Ё гапим ёлғонми, а?!

Ўғил индамади – икки – уч марта ич – ичида инграф қўйди. Қаериdir чидаб бўлmas даражада оғриёттандек кўзларини юмиб очди. Пешонасидан оқиб тушган тердан кўзи ачишарди. Дармони қуриган, йиқилай – йиқилай деб кетиб борарди. Теварак – атрофга қулоқ битиб қоладиган даражада бир неча сонияга сукунат чўқди, гўё тун ҳам, тутаб ётган дала ҳам, гоҳ – гоҳида қайдандир эшитилиб қоладиган бўриникига ўхшаш увиллашлар ҳам ўғилнинг иқрорини эшитиш учун бир зум тин олгандай эди. Ҳар қандай савол ҳам жавобсиз қолмаслигини, эртами – кечми, барибир жавоб топилишини, фақат саволга жавоб бергани, уни ошкора тан олгани одамнинг юзи чидамаслигини, бироқ кўнгилнинг бир чеккасида бу саволдан алангаланган жавоб бутун юракни куйдириб туришини чол ҳам, ўғил ҳам сезар, шундай бўлса ҳам ўғил миқ этмас, гўё гапирса йиқилиб тушадигандай ҳансирар ва шип – шип эттан товушдан бошқа сас чиқмасди ундан.

Сукунатни яна отанинг товуши бузди.

— Ҳеч нарса деёлмайсан! Қайси юз билан гапирасан?!

Сендейлардан туғилмасларингдан олдин воз қечиш керак зди. Лекин, афсус, сизлар туғилдиларинг, униб — ўсдиларинг, сўнг униб — ўсган ерларингга тупурдиларинг, униб — ўстирган одамларнидиларинг. Яна кўкракларингга муштлаб «халқпарвармиз, ... парвармиз» деб даъво қилдиларинг.

— Бўлди... — ингради ўғил. — Бўлди, бас... қирқ йилдан бери шу бир гапни такрорлайсиз... Чарчаб кетдим. Бас!

— Мен — чи, мен чарчамадимми? — Чолнинг товуши зорланиб чиқди. — Менга осонми?!

— Ахир қирқ йил бўлди! Қирқ йилдан бери шу савонни такрорлайсиз... қирқ йилдан бери шу гап, шу таъна! Адоғи борми бу йўлнинг?! Мен ҳам одамман ахир..

— Оз қолди. Жуда оз қолди. Елкангдан тушаману мен ўз ўйлимга кетаман, сен ўз йўлингга... Бошқа қайтиб кўришмаймиз... Кўришмаганимиз ҳам тузук. Мен ўзим ўстирган теракнинг қандай ёнаётганини кўришни истамайман. Мен ўша, сен билан охирги марта юрган қоя остидаги форга кетаман, менинг у ерлардан бош олиб кетишим мумкин эмас, менинг қоним тўкилган у ерларга. Ўша қоя эсингдами? Сен мени Бухородаги табибга кўрсатиш учун олиб чиқдан эдинг, эсингдами?

— Эсимда! — хириллади ўғил. — Ҳаммаси эсимда! Нега бунча эзасиз?

— Хайрият, — деди чол, — ақалли шунга ҳам шукр. Ҳар қалай ўша кунни сотмабсан, шунга ҳам шукр. Ёки бунинг — ислиқи бир чолнинг ўлими тўғрисидаги хотиранинг ҳеч кимга кераги бўлмадими? Ёки сотишга, ўзингни ошкор этишга қўрқдингми?! Майли, шунга ҳам шукр, баъзан қўрқоқлик ҳам имонни асраб қолади. Майли, шукр...

Сиёҳранг тун қуюқлашиб борар эди. Тутун кўзни ачиштиар, димогни куйдирар, ўғил тинмай йўталарди, теваракка пала — партиш ташланган яланг оёқларинг бесаранжом саслари тараларди. Ҳаво дим ва бўғиқ, йўл эса бениҳоя эди.

— Сизларнинг катта хатоларинг шуки, Уни таъқиб қилдиларинг. Унга қўшиб, ҳамма нарсани таъқиб қилдиларинг. Аслида ҳамма нарсанинг бошланғичи У эди. Чунки У дунёning исми эди, У бу азалий дунёга исм берган, зеб берган уста эди. Дунёни Ундан ажратиб олиб бўлмасди... Сизлар буни тан олмадиларинг...

— Чарчадим, — деди ўғил астагина. — Бунчалик оғир бўлмасангиз? Елкам эзилиб кетди. Оёғимда дармон қолмади.

— Буни мен эмас, сенинг ўзинг истагансан... Ўзинг мени шунга ундалинг. Ўша куни бу менинг хаёлимда ҳам йўқ эди. Сендан ҳатто миннатдор эдим — касал отасини кузатиб бораётган шундай ўғлим бор деб... Бу йўлни сенинг ўзинг танлагансан.

Ўғил ихраб — ихраб кетарди. Унинг пишнаши демаса ҳамон ваҳимали сукунат ҳукм сурарди, фақат атрофда қандайдир сассиз шарпалар айланиб юрар, улар жуда кўп эди, афтидан. Бутун дала бўйлаб югуриб юришар, лекин қадам товушлари эшигилмас, баъзан йўлга яқинроқ бостириб келишар, сўнг ҳансираш ва пишнашни эшигиб орқага чекинишарди.

— Ўшанда мен харсанглар орасидаги ташландиқ форга кириб кетдим, — давом этди чол, — кун совуқ эди, ундан кейин бирор менинг шарпамни сезиб қолишидан қўрқардим. Биринчи кунлари жуда зериқдим, атрофда гаплашадиган ҳеч ким йўқ эди; кундазлари тогма — тог сакраб тог эчкиларини қувиб юрардим. Токи онанг хабар топгунча, мен шу ҳолатда ёлғиз яшадим. Бир куни кечқурун форга онанг кириб келди — худо раҳмат қиласин, у жуда яшариб кетган эди, у ҳаммасини кимдандир эшигибди, шу сабабли мендан ҳеч нарса сўрамади, фақат «қоядан нарироқ, юрсангиз бўларди — ку, ахир унинг бир куни шундай қилишини билардингизку?» деди. Шўрлик, қанчалик қилмишингдан эзилмасин, сени ногаҳон қарғаб юборищдан қўрқарди; иккаламиз ҳам тилимизни тиярдик, ўша кунни эсламасликка ҳаракат қиласдик, агар озгина қарғасак ҳам у дунёю бу дунё куйиб кетарди. Онанг ўша кезлари ҳар куни келиб турарди, у ёқларда қаёқдан келяпсан деб сўралмайди, бунга ҳожат йўқ, ҳамма марҳумларнинг борар ва келар жойи бигта. Биз форда тошга бош қўйганча сенинг

қандай туғилганингни, қандай той – той бўлганингни, чўтга қўлингни қандай босиб олганингни эслаб ўтирардик: у ёқларда фақат хотирагина кишига ҳузур беради, бошқа ҳеч нарсанинг мазмуни қолмайди; мен сенга ачинаман, сен ахир бу дунёдаги қилган ишларингни қандай қилиб эслайсан – эслашинг билан арвоҳлар қузгуни бошингга балодай ёпирилади. Сенга ачинаман... сени ҳеч ким аямайди... бир неча кундан сўнг кечаси форга қилич – қалқон тақдан отлиқ кишилар кириб келишди; улар уч кунгача форда қолиб кетишли, негадир форда мени кўриб ажабланишмади; улар бу форда ҳар хил қўноқларни учратишга одатланиб қолгандилар чоғи, бизнинг тилимизда, сал бураб гапиришарди, дубулгачиларнинг бири оқсоқ эди; менинг форга келиб қолиш саргузаштимни эшитишгач, сейдан жуда ғазабланишиди, ҳатто оқсоқроғи ҳозир бориб чопиб ташлайман деб иргиб турди, лекин мен кўнмадим, ўғлим айбдор эмас, ўзим йиқилиб тушдим деб алдадим. Дубулга кийганлар мен билан уч кунча яшашди. Улар ҳам менга ўхшаб ўз ажали билан ўлмаган эдилар, гапларига қараганда бири жангда, бири суиқасдда, бири касал бўлиб ўлганди. Отлиқлар юз йиллардан бери бир вақtlар ўzlari забт этган мамлакатларни айланиб юришаркан ва ҳар йили қиши тушиши олдидан Чинмочинга юриш уюштиришар ва ҳар доим мағлубиятта учрашаркан. Кейин улар мени ўzlari билан олиб кетмөқчи ҳам бўлишди, бироқ оқсоғи кўнмади, афтидан, у менга ишонмади. Бир қанча вақт ўттач, яна юриш уюштириш учун ўzlarinинг ўликлардан иборат лашкарларини йигишга жўнаб кетишли. Мен форда яна ёғиз қолдим. Фақат кунора хабар олгани онанг келиб турар, менга сен ҳақингда ва шотирларинг ҳақида ҳикоя қилиб берарди; мен унинг гапларига ҳеч бир ажабланмасдим, шусиз ҳам сенинг қилмишингдан хабардор эдим; ўхў, сен қанчадан – қанча одамларга жабр қилмадинг, қанчадан – қанча бегуноҳларни қамаб ёки отдириб ташламадинг. Сен қилган ҳар бир иш учун мени уларнинг ота – боболари қистовга олишарди, мен эса ўша ёқда энди ёвуз ниятингнинг навбатдаги қурбони ким бўларкан, унинг марҳум қариндошлари кўпмикан деб, юрак ҳовучлаб турардим. Сени қанчадан – қанча арвоҳлар қарғамади. Сен одамларнинг

ўзингдан қўрқишини, зор титраб туришини орзу қиласдинг, уларнинг ожизлиги ва ноchorлиги сенга ҳузур багишларди. Улар ҳаётда ўз ташвишларидан ҳам муҳим нарсалар борлатгини хаёлларига ҳам келтирмасди, сен буни билардинг, билиб туриб қиласдинг барча ярамасликларни. Сендан ёвуз одамни бу тоғлар ҳали кўрмаган... туф... Энди ҳам кўрмасин... Сен охиргиси бўл! Сенинг қилаётган ишларингта қараб туриб ҳар доим ўлик сенми ёки менми деб ўйлардим, тани ўлгандан сўнгтина одамнинг ўлик ёки тириклиги маълум бўлади. Хомтама бўлма, лекин сен фанода бирор марта ҳам тирикларга хос иш қилганинг йўқ, сен нимаики қилган бўлсанг, ўзинг учун қилдинг. Шундай! Ўлим – мангу тириклик! Сен ўликлар орасида қайта тирилар экансан, ҳатто оддийгина, «нима учун яшадим? Деган саволга ҳам жавоб беролмайсан. Сени ҳатто оддий ўликлар ҳам ўз сафларига қўшмайди, сен қум қуюни қоплаб олган саҳрода ёлғиз ўзинг абадий кезиб юрасан, абадий! Бу саҳро ҳеч қачон тутгамайди; ойлар, йиллар, авлодлар тутгайди, лекин бу саҳро ҳеч қачон тутгамайди; ана шунаقا. Ҳу, ана, қорайиб кўринаётган фор – ўша саҳронинг эшиги... Йўлинг сени тўгри ўша ёқса олиб боради. Яқинлашиб ҳам қолдик. Мен сени ўша ергача кузатиб қўяман. Дадил бўл. Ҳечқурса фордан ўтаётуб мени уялтирма, шусиз ҳам менинг юзим шувут бўлиб қолган...

— ... Анави қиз ким? Нега тўқайзорда ёлғиз ўзи юрибди?
Қадам ташлашлари ҳам беко.

— Неъмат чўпоннинг тўнгич қизи. Ҳар доим шу тўқайда қўзи боқиб юради.

— Нега қўлини олдинга чўзиб юради?! Кўриниши абор, нима, эси пастроқми?

— Эси – ку жойида, унда балоннинг эси бор. Лекин у баҳтиқаро бўлиб тутғилган. Ҳамма бало шунда. Бўлмаса бундай сулув қиз бу ўртада топилмайди. Унинг кўзлари басир. Чиппа кўрмайди. Она қорнидан шундай бўлиб тушган. Шунинг учун ҳам қўлларини олдинга чўзиб юради...

— У ҳеч кимнинг кузатувисиз юрадими?! Шу ҳолида – я?!

— Э – э, уни ким ҳам кузатиб юрарди. Отасининг бундан бошқа олти қизи бор, ташвиши шусиз ҳам етарли... Бу эса

отасига қўзи боқиб беради. У қўзиларни исидан танийди. Қўзилар уни ҳеч қачон ташлаб кетишмайди, шу атрофда ўтлаб юришади. Кеч бўлгач, уйга ўзлари қайтади. Ана шундай у қиз...

Эшикни ямоқ тўн кийган ўрта яшар одам очди. У ичкарига қўрқа – писа назар ташлаб, ўзига қаттиқ тикилиб турган қўзларни ҳис эттач, секин ичкарига кирди. Изидан эшик секин гичирлаб ёпилди.

— Хўш, нима гап? – деди ичкаридаги овоз.

Тирқишдан сирғалиб кираётган хирагина ой нурида унинг чарм камзули ялтираб кетди. Кирган одам остоноадаёқ тиззалаб ўтириб олди. Гап бошлишдан олдин камзулли одамнинг авзоини билмоқчилик, унга зингил солиб қаради. Бироқ шиллиқ қўзлари барваста шарпа устида қалқиб турган хумдай қорадан бошқа ҳеч нарсани кўрмади; унинг назарида ичкаридаги одамнинг на юзи, на кўзи, на лаби бор эди, фақат чуқур горда ёқиб қўйилган бир жуфт шамдай иккита кўз ўзига қадалиб турганини ҳис этар ва ўнгайсизланарди.

— Нима гап? – деди яна ичкаридаги овоз.

— Мен... мен... – Келган одам қоронгулик қаърига тикилди, лекин бояги шайтоннинг соясидай шарпадан бошқа ҳеч нарсани илғамади, – мен пастки чорбоғда ўт ўраётгандим... бу йил беда эрта қувраб кетди.

— Хўш, гапир...

— Шундай йўлнинг бўйида. Ой ёргутида ҳам ўрақолай деб ҳали уйга кетмагандим.

— Бу ерда нега келдинг? – ўшқирди ичкаридаги овоз.

— Сенга бу ерга келма дегандим – ку?

Остоноадаги одам чўчиб тушиб, гапини йўқотиб қўйди, тили оғзига косовдай тиқилиб қолди, уни ҳаракатта келтириш учун хийла қийин кечди, бир неча бор қизариш ва қалтирашдан сўнг бўғзидан дафъатан отилиб чиқдан товуш ҳеч қандай маъно ифодаламади.

— Шу... шу... ўраётгандим... Кейин бирдан... – Ўзини тутиб олди у охири. – Кейин бирдан ов... овозидан танидим. Йўлда Бегмат полвон билан Ҳасан чўлоқ ўтиб боришаёттан экан. Улар эрталаб Кўкабулоқ – Сори Ҳайдарникига таъзияга ўтиб кетишганди, ўз кўзим билан кўргандим. Улар бир – бирига шивирлаб гаплашиб боряпти экан...

— Нимани? Эшигдингми?...

— Ҳа, сизни... сизни, отасини ўлдирган, падаркушлик қилган дейишлягти...

Ичкаридаги одам шуъла тушиб турган деразани айланиб ўтиб, бурҷакка бориб келди. Яна аввали жойига келиб деразага орқа ўтириб туриб одди. Ўттага бир зум сукунат чўқди.

— Туҳмат қилма! Зангар!!!

— Туҳмат бўлса тош боссин. Ичкаридаги одам бошини қуий эгиб одди. Орага яна жимлик чўқди. Унинг нафас олиши оғир ва хирилдоқ эди. Бу сукунат нақадар хатарли эканини сезган остонаядаги одам безовта бўлиб, қимирлаб қўйди. Ичкаридаги одам унга эътибор бермади, тиззаларига тикилганча узоқ туриб қолди.

— Мулла Хидирникида нима гап? — деди у сўнг мутлақо бошқа оҳангда.

— Пойлаб юрибман. — Остонаядаги одам бирдан енгил тортиб жавоб берди. — Сайфул эшон билан Шукур қизил келиб кетди. Лекин нима олиб келганини кўролмадим, ичкарига кириб кетишиди.

— Майли, сен энди боравер, лекин бундан бўён кела кўрма, керак бўлсанг ўзим олдингта бораман. Мулланикини яхшилаб кузат. Ким, қатон, нима олиб келди, ҳаммасини билиб ол. Агар бирон кори хол бўлса, ўзинг қулогингни ушлаб кетасан.

Остонаядаги одам итоаткорона бош ирғади. Эшикни очар экан, қайрилиб яна ичкарига қаради, яна барваста шарпадан бошқа ҳеч нарсани кўрмади. — Бу ўзи қандайдир шарпага ўҳшайди, — ўйлади ичида у. — Чироқ ёқиб ўтиrsa нима қиларкин? Ё ёргуликдан қўрқармикин.

— Самад ўзинг гуноҳингни бўйинингта ол, шундай қилсанг, жазонг ҳам енгил бўлади.

— Менинг ҳеч қандай гуноҳим йўқ. Ахир буни сенга неча марта айтдим.

— Ўйлаб кўр. Балки эсларсан.

— Ахир ўн кундан бери эслолмадим. Мени бу ерга нима учун олиб келишди, ҳеч билолмаяшман.

— Гуноҳсиз кишини бу ерга олиб келишмайди. Яхшилаб эслаб кўр.

— Йўқ эслолмайман, каллам шишиб кетди. Ё мени отиб ташла, ё қўйиб юбор. Ортиқ бу азобга чидай олмайман. Мени шарманда қилма.

— Буни жиноят қилмасдан олдин ўйлаб қўриш керак эди. Энди кеч. Яххиси, ўзинг бўйнингта ол. Тавба қилиб келди, деб ёзиб қўямиз

— Айбим бўлса, шартта айту, жазоимни бер. Нега менга азоб берасан! Ҳар нарса тўгрисида ўйлайвериб адойи тамом бўлдим.

— Шукур қизилникида қўшиқ айттанимидинг? Нима деб айттанинг эсингдадир?

— Айттандим. Нима, қўшиқ айтиш мумкин эмасми?!

— Мумкин, мумкин. Сизларга мумкин.

Барваста одам бир уюм қофозлар ичидан бир варак қофоз олиб, Самад баҳшига узатди.

— Мана бу қўшиқ сеникими?!

Баҳши қофозга кўз югуртирирди:

— Мен ўқишни билмайман.

— Ўқиш шарт эмас. Дарров эсингта тушди. Ўзинг мугомбирлик қиляпсан. Отасини ўлдирган, ғам – андуҳга тўлдирган ким экан?! Биз эмасми?! Сен бу ерда бизни назарда тутмаяпсанми?!

Самад баҳши чўчиб хамроҳига тикилиб қолди.

— Бу қўшиқни бизнинг ота – боболаримиз тўқиган.

— Лекин сен айттансан...

— Мен бундай демоқчи эмаслигимни сенинг ўзинг билласанку?!

— Нега?! Масалан мен худди шундай деб ўйлайман. Кейин буни мен эмас, ўша тўйда бўлган ҳушёр одамлар етказишган.

— Ёлғон! Ҳеч ким бундай демаган.

— Ўкирма, бу ер отангнинг уйи эмас. Тўйда қатнашганларнинг ҳаммасини бир – бир чақирдик. Ўн етти киши буни тасдиқлади. Мана, кўр. Улар айнан шундай тушунишган. Хўш, энди тан оларсан кимга сотилганингни?!

— Мен ҳеч кимга сотилмаганман.

— Унда ўзинг бузгунчи экансанда?! Майли шундай деб ёзиб қўямиз.

— Нега энди билиб туриб зугум қилаёттанингни мен тушуна олмаяпман.

— Тезда тушуниб оласан. Сен күп ақлли бўлиб кетдинг. Ҳар қўшиғингда қандайдир отасини ўлдирганлар тўғрисида жаврайдиган бўлиб қолдинг. Энди ақлингни пешлаб кел. Сен қўрқма, Сибирга жўнатмайман, сен чўлга борасан, чўлни ўзлаштирасан. Агар онгли равишда ўз хатоингни ювсанг, қайтиб келишга рухсат беришади.

— Мени шарманда қилма. Тўртта болам бор, уларнинг қарғишига қолма!

— Болаларинг тўғрисида қайгурмай қўяқол.. Ўзимиз ғамхўрлик қиламиз. Агар сенинг ёнингда бўлса, уларни ҳам душман қилиб тарбиялайсан.

— Кўзингни оч! Бу туришда яқинда бутун қишлоқ ҳувиллаб қолади.

У яна нимадир демоқчи эди лекин хонага кирган икки киши уни олиб чиқиб кетди.

— Биз йўлимизга ким тўсиқ бўлса, ҳаммасини йўқотамиз, ҳеч кимни аямаймиз, — бақирди унинг изидан ичкаридаги одам. — қишлоқ бўшаб қолса, бошқа одамларни кўчириб келамиз...

«Бу қўллар эмас, сени ногирон қилиб яраттан дунёning бағрига санчилган ханжарлардир, Зубайдা. Киприкларинг у осмон шоҳининг тасбеҳидир, о, йўқ, бу кўнгил қушларига кўйилган тузоқдир...

Мени сендан тортиб олишадигандек бўйнимдан қучоқлаб йиглаганингда, бу овлоқ тўқайни пичир—пичирларинига тўлдирганингда, лабингда тушуниксиз саволлар қотанида, бу сирли оламга ёриб чиқиб ва сенинг оғушингда ётган мени сенга ҳам ишонмай ўз кўзлари билан кўриш учун жажжигина юрагинг кўксингнинг қафасларига гурс—гурс урганида, бу дунёдан бахт излаб чўзилган қўлингнинг қон ҳиди тутган соchlарингни силаганида сен уни топдингми, Зубайда?!

...Кел, мени қучоғингта ол, офтобни кўмгандай мени оғушингта кўм. Майли, кўзларинг қўргонига қамаб қўй, майли, киприкларингга боғлаб қўй, фақат бу дунёning қарғишлиаридан мени соchlаринг қатига, лабларинг қаърига яширсанг бўлди.

Мен сени излаб бу ерга ҳар кун келгим, бу тўқайга умр ўтовини тикким келади, сенинг босган изларингта ўзимни кўмгим келади. Кел, панжаларингни кўзларимга саншиб қўй, тошлар тилган оёқларингни кўкрагимга экиб қўй, шивирларингни қулогимга қоқ. Сен менинг излай – излай топиб олган баҳтимсан, сен менинг тўқайзорга қадаб қўйган туғимсан. Майли, ҳамма юз ўтирун, майли, ҳамма ташлаб кетсин, фақат сен мени ташлаб кетма, сен ташлаб кетма... ташлаб кетма...»

«...Сенинг зилол сувларинни ичганимда, кўрпа бўлиб тўшалган кўкатларинг устида яйраб ётганимда ҳаётта қайтадан келгандек бўламан. Мен сенинг тупроқларингдан яралганиман, бу улуғвор қоялар ҳам, ундаги харсанг тошлар ҳам, илон изи ёлғизоёқ сўқмоқлар ҳам менинг таним. Мен улар билан бирга нафас оламан. Кўрагон тогидан майин шабада эсяпти, кўкатларнинг ҳиди димоқни қитиқлади. Қандайдир қушлар сайраяпти. Ҳойнаҳой, мода какликлар бўлса керак...»

«Афтидан кўклам келганга ўхшайди. Димоғимга олма гулининг ҳиди келяпти. Пастдаги тўқайда болалар шовқини эшитилмоқда. Улар чиллак ўйнаётган бўлса керак, ҳар – ҳар дамда қайсисидир ғувиллаб югурди. Унинг оёқларининг шитири менинг суякларимни яиратади, мен бу товушдан ҳузур қиласман, мен унинг майсалар ялаган, шабнам ювиб қўйган жажжигина товоnlаридан ўпсам дейман, ёттан жойимдан тепага – уларга мўралаб қарагим келади. Улар оёқлари тагида одам суяклари қақшаб ёттанини, заҳда чирсиллаб синаёттанини, чириёттанини, энг қизиги, менинг уйғоқлигимни, уларни кузатиб турганимни, товушларини эшитаёттанимни билишармикан? Агар менга у дунёдагидай овоз ато этишганда мана шу гўримда туриб, уларга қаратса: «Сизлар ғафлатда қолманглар, ҳушёр бўлинглар! Боболаринг руҳи уйғоқ, уйғоқ!» дея қичқирган бўлардим...»

«Нариги қабрнинг атрофини кимдир супуриб – сидираяпти, супурги шитири эшитилаяпти. Менинг ёнимда

ётган болакай уйқу аралаш ҳиринглаб кулиб қўйди; кимдир туш кўрди, шекилли, балким тушига онасининг маммалари киргандир; юқоридагилар унинг қуалгусини эштишиди – микин?!.. Ер ости дунёси нақадар бепоён! Бу ерга одам ҳайта ўлмаслик учун келади. Бу ерда у дунёдаги умр кўз очиб юмишдай гап. Яшайверасан, яшайверасан, бу яшашнинг, қани, охир – ниҳояси бўлса. Фақат сен шу зим – зиё қўргондагина ер билан абадий бирга эканингни англайсан...

...Менинг ён томонимдаги қиз яна хўрсиниб – хўрсиниб йиглади. Ошиқ йигити билан топиб олишган акалари уни нақ қоядан улоқтиришган. У дунё нақадар мудҳиш. Одамлар устида ҳамиша ёвузлик ҳукмон бўлади...

...Уҳ яна қандай шовқин?! Нақ устимда қиёмат қойим бошлади чоги. Ниманинг товуши бу?! Мунча ваҳимали?! Э – э, булар мозористонни бузишпти – ку! Ақддан озишибди у дунёдагилар... Ҳа, аниқ, бузишпти, яна, ўша мудҳиш қиёмат товуши тобора яқинлашиб келяпти. О, сен, она еrim, момо еrim, мана энди улар мени сендан жудо қиласдилар, суюкларимни ағбор қиласдилар. О, ярамаслар, ҳаромилар, падаркушлар!..»

— Ўртоқ бошлиқ биз Неъмат чўпонни олиб келдик.

— У нима гуноҳ қилибди? Нега уни боғлаб ташлади – ларинг?

— У катта қизини мана бу болта билан чопиб ўлдирибди. Қизи кимдандир бола орттирган экан. Боласини ҳам чопиб ташлабди. Бу ўша – биз тўқайда кўрган қиз. Унинг қоқ пешонасидан болта урибди. Тили бир қарич чиқиб ётибди...

Ўғилнинг силласи қурий бошлаган эди: унинг пешонасидан реза – реза тер оқар, юзи тобора бўғриқиб, кўкариб борарди, оёқлари чалишиб кетарди. Лекин йўлнинг адоги ҳали бери кўринмасди – бутун борлиқни тун шоҳи тимқора чодири тагига яшириб олган эди.

Йўл нақ жаҳаннамга олиб бораётгандай ҳарорат тобора кўтариларди.

— Биз ҳеч кимга ҳеч нарса қилмаган эдик, – дерди чол ўғлининг жимиб қолганидан ва бу кимсасиз саҳрода ёлғиз

кетаёттанидан бир оз чўчиб. — Биз ҳеч кимнинг ерига бостириб бормадик, биз ҳеч кимга зуғум қилмадик. Тинчтина яшаб юрган эдик: қўш ҳайдардик, буғдој янчардик, тириклик тошини секин тортиб юрувдик. Биз эмас, улар бостириб келишди, тинч ҳаётимизни улар бузишди. Сизлардай ақлимиш ўткир эмас эди, ҳар нарсани ҳам дарров тушунмас эдик. Биз фақат эски осойишта ҳаётимизни қуролли кишилардан қурол билан қайтариб олмоқчи эдик. Бор гуноҳимиз шу эди, бошқа ҳеч нарса! Эшитяпсанми, бошқа ҳеч нарса.

— Биламан, — деди ўғил. У гилт этиб ютинди. Юзи кўм — кўк ганч ҳайкал рангига кирганди, товуши бўғизидан эмас, гўё ер остидан, нақ жаҳаннамдан гулдираб чиқаёттандай эшитилди.

— Биласан? А? Демак, отангни билиб туриб ўлдирган экансан. Қойил. Сизлар кимдан таълим олдиларинг, билмадим. Отасининг гуноҳи йўқлигини билиб туриб, атайлаб ўлдирган эмиш? Отам тирик турса, ўша шалоқ курсимга ўтиrolмайман, бошлиқ бўлолмайман деб қўрқдингми, а? Шундан қўрқдингми?

— Бўлди, — инграб юборди ўғил отасини силкиб, ўнгариб кўтарар экан, — бўлди деяпман...

— Тўғри, шундан қўрқдинг. Отанг тирик турса, сенга нозик жойларни ишониб топширмасди, парвозинг баланд бўлмасди, ҳар икки дақиқада отанг учун сўроқ бериб туришинига тўғри келарди. Сен буни жуда яхши англардинг. Отангни деб, сенга ғанимларинг тинчлик бермасди. Ўлиб кетса ҳеч ким нотайин одамни суриштирмасди ҳам. Сен шундай деб ўйлагандинг. Афсус ўша куни — деди қоя орқали олиб ўтаёттанингда буни сезмаган эдим. Сен ҳаммасини осонгина ҳал қилиб қўяқолдинг. Қоя устига келганимизда менинг остимдаги отта қамчи босдинг. От ҳуркиб, олдинга ташланди, мен ҳатто нима бўлганини билолмай қолдим, фақат қоядан тошдан — тошга урилиб учиб тушаёттаним эсимда. Сўнг мен бир зум зулмат ичида қолдим, қайта тирилганимда сен менинг жасадим устида йиглаб ўтирадинг ва нарироқдаги иккита чўпонга нималардир деб тушунтирадинг. Сен жуда қўрқоқ эдинг, қилган падаркуплигингни бирор билиб қолмаслик, шубҳаланмаслик учун оғзингни саситиб сўкинганингда, гўё аламдан ақлингни

йўқоттандай, оғзидан қон келиб, ихраб ётган отни ҳам отиб ташладинг. Сен отдан ҳам қўрқдинг, отаркансан, унинг жавдираган кўзларига қарай олмадинг... Мен эса ҳаммасини кузатиб турардим – шундоқ олдингда, ёнингда кузатиб турардим. Ҳатто икки марта маузерингни олиб, нишон қадалган кўкрагингдан отиб ташлагим келди. Лекин бизга бундай ҳуқуқ беришмаган. Мен жасадим ортилган аравани Кўкциягача кузатиб бордим – да, сўнг форга қайтдим. Лекин, сен менинг жасадимни қандай кўмганингни кўриб, сезиб турардим. Сен бошлиқларинг олдида бир томчи қузёш тўқмадинг. «Отам ёт одам эди, ўз ўлимини ўзи топди» дединг. Сенинг аҳволингни кўриб улар ҳам ич – ичидан кулди – ахир уларни ҳам ота яраттан – да. Агар йиғлаганингда ҳам ҳеч ким ҳеч нарса демасди. Фақат сен устаси фаранг одам эдинг. Унсур отасининг устида йиғлаганди деган гапни қўтаргинг, келажагингни ҳавф остига қўйгинг келмади. Сен йиғламадинг, йиғлармикансан, тавба қиласмикансан, деб мен уч кунгача уйинг атрофида айланиб юрдим. Йўқ, йиғламадинг. Сендайлар асли йиғлашмайди. Одамларнинг ўлимидан роҳатланишади. Қандай уят?! Ҳали бизнинг ажоддомизда ожизага зуғум қилиш ҳодисаси бўлмаган. Сен эса ҳеч нарсадан тал тортмадинг. Мана, оқибати... Ана кўряпсанми, изингдан қанчадан – қанча арвоҳлар бўридай эргашиб юрибди, ёлғиз қолсанг, талпа босишади. Улар жуда қутурган... Ўша совуқ юрглардан сени деб қайтиб келишган. Энди ҳар кеча йўлингни тўда – тўда бўлиб пойлаб ётишади. Ҳар бирининг сен билан ўз ҳисоб – китоби бор... Сенга ачинаман, бироқ начора бу йўлни сен ўзинг танлагансан...

— Ота, эсингдами мен ҳали жуда – жуда ёш эдим, мишиқиси аримаган қизча эдим, ҳаммаси қўрқинчли тушдек элас – элас эсимда, сен фоз қотиб турардинг, йўлдан эса арава – арава одамлар ўтарди, йўллар тиқилиб кетарди, худди чумолилар инига шошаётгандек аравалар қайларгадир имиллаб борарди, одамларнинг эса ранги қочган, сенга гоҳ сездирмай, гоҳ ошкора адоват билан тикилиб – тикилиб қўярди, сен эса пинак қоқмай тураверардинг, аравалар ҳеч тугамасди, турна – қатор бўлиб тонгдан шомгача, шомдан тонгтacha ўтаверарди, ҳатто яrim кечалари ҳам йўлдан араванинг фийқиллаган товуши,

зорланиши эшитилиб турарди, уларни қандайдир аскарлар қўриқлааб боришарди, сен эса ўша ерда қотиб тураверардинг, икки кунми, уч кунми вақт ўтиб, аравалар яна кунчиқар тарафга қараб йўл олишарди, йўлдан бирин – кетин ўтишарди, аравачилар ҳам бошларини эгиб олган, атрофига қарашдан қўрқандаи, уялгандай отларини қичаб ҳайдаб боришарди, аравалар гийқилларди, аскарлар сўкинарди, тўда – тўда аравалар кунчиқарга йўл олишарди, лекин бўм – бўш бўларди, бу аравалар, ота, худди кераксиз тошларни қайгадир, хилватроқ жойга тўкиб қайтишаёттандай, аравалар бўм – бўш бўларди, яна бир неча кундан сўнг арава – арава одамларни олиб қайларгадир жўнарди, сен эса, ўша баҳайбат харсанг олдида гоз қотиб тураверардинг, ўша одамларни қайга олиб кетишарди, ота? Нега уларнинг кўзлари сенга бунчалик кин билан тикиларди, нега сени бунчалар ёмон кўришарди улар?! Эсингдами, ота? Ё тушмиди бу? Мен, ўша мишиқи қизалоқ буларнинг барини туш кўрганмидим?! Ўша аравалар тушмиди, ота?!

— Билмадим, қизим, булар менинг эсимда йўқ... Ҳойнаҳой сен туш кўрган бўлсанг керак...

— Ўша пайтлари одамлар гўё бу ерларда ёвуз бир шарпа оралаб юргандай ҳамиша нимадандир қўрқиб, ҳадиксираб юришарди. Бир – бирига шубҳа билан тикилишарди, ҳатто болаларни ҳам бир – бири билан ўйнаттани қўймасди, болалар уйларидан чиқмай қўйган эди. Ҳамма худди ёвуз шарпа сенинг танангта яширингандай, сенга қўрқиб – писиб қарашар, сен билан дуч келиб қолса кўзларидағи ғазабни яшириб, гўё жони сенинг қўлингда тургандай ялтоқланиб, эгизиб – букилиб ўтарди, аёллар эса... аёллар сенинг номингни қўшиб қарғашарди, сени кўрганда этакларини кўтариб, орқаларини кўрсатишар ва энди бу еримни ҳам ол деб шангиллашарди. Нега шундай дейишарди, ота? Нега кечалари қишлоқлар мозористондек жимиб қоларди, ота; нега одамлар бир – бирига еб қўйгудай тикилишарди, бир – биридан нега қўрқарди, ота?!

— Билмадим, қизим. Ҳойнаҳой сен адаштиряпсан. Буларнинг ҳаммаси туш бўлса керак. Ҳаммамиз туш кўрганмиз, қизим, шу сабабли у замонларни яхши эслолмаймиз... эслаганимиз ҳам тузук.

— Мен эса кечалари уйғониб кетаман, назаримда, ҳали ҳам йўлдан аравалар фийқиллаб ўтаётганга ўхшайди, гоҳида күппа — кундузи ҳам йўлга тикилиб қарасам, аравалар ҳамон ўтиб бораёттанини кўраман, уларраввал кун ботишга қараб ўтади, сўнг кун чиқарга... Баъзан бу умр бўйи тутамайди — гандек, охири йўқдек туолади менга. Гёё энди бир умр қулогимиздан аравалар фийқиллаши аримайдигандек, қўзларимиз олдида энди фақат аравалар ўтиб турадигандек туолади менга. Ярим кечалари уйғониб кетаман.....

— Билмайман, қизим. Мен кексайиб қолдим. Менга бундай саволлар берма! Ҳеч нарса эсимда йўқ! Эсимда бўлмагани ҳам тузук.

— Кимdir шу тарафга келаётганга ўхшайди, ота.

— Улар афтидан икки киши бўлса керак, яхшилаб қара — чи.

— Икки киши экан, бири сал орқароқда келяпти. Сиз қаердан билдингиз?

— Кеча хабар беришган эди. Уларни мен эртароқ келса керак деб ўйлагандим.

Қиз бир зум анграйиб қараб қолди.

— Ким экан улар?

— Чўлга жеттанлар. Бегмат полвон билан Ҳасан чўлоқ

— Ахир уларни ўлди деб хабар келганди — ку.

— Улар аллақачон ўлиб кетишган, ўлмаганларида бу ерларга қайтиб келмасди...

...Йўлнинг интиҳоси кўринмасди. Шип — шип этган қадам товушлари эштилар, улар кетаётган йўлга юлдузлар учиб тушарди. Ўғил юриб борар, ота эса унинг елкасида ялпайиб ўтирганча йўлнинг адогига тез — тез кўз ташларди. Афтидан, у ҳам ўғлининг елкасида ўтиравериб ҷарчагандек эди. Йўл кесиб ўтган дала эса ҳувиллаб ётарди, атроф уларнинг шарпасидан кукундан тўзғиб кетаётган куйинди суюклар билан тўлганди; тонг гёё бу ерларга ташриф буоришни унугиб қўйгандаид үларнинг устида бесарҳад тун сим — сими тўшалиб ётарди.

Йўл эса бениҳоя эди...

УРУШ ОДАМЛАРИ (Қисса)

«...Мен катта бўлсам милтиқ сотиб оламан».
«Милтиқни нима қиласан?..»
«Отамни отаман!!!»

I

Қирқ туртингчи йил декабрининг бошларида, қорахат келганидан роса бир йилдан сўнг, ёғин – сочинли кунларнинг бирида терсotalик Нормат полвон бир оёғидан айрилиб урушдан қайтди. Урушдан мажруҳ бўлиб қайтиш одатдаги воқеа бўлиб қолганлиги учун ҳеч ким унинг майиб бўлиб қайттанлигига ажабланмади. Сўнгти уч йил ичida урушга соппа – соғ қетиб, бирон мучасидан ажralиб қайтиш ҳодисаси тез – тез содир бўлиб турарди. Уруш бошланган йилиёқ юқори Тераклидан уста Пирназар қўлидан айрилиб қайтганди. Икки йил олдин эса Қўрғоности қишлоғидан Мулла Турди кўзидан айрилиб қайтди. Шу йилнинг бошида Янгибой ҳисобчи қишлоққа гидиракли аравада кириб кедди. Унинг қуллар ургидан бўлган хотини икки – уч ой сочини юлиб юрди – ю, кейин кўнишиб қолди. Бироқ, ёз бошларида отланиб Қамашига тушиб кетди, бир ҳафталардан кейин эски юқ машинаси – да қайтиб келиб, эрини қаёққадир олиб жўнади.

Ўн кунлардан сўнг бир ўзи якка қайтди. Одамлар унинг эрини Қаршидаги ногиронлар уйига ташлаб келганини билишди. Янгибойнинг соқов укаси ёзнинг охирида янгасини ўласи қилиб савалади. Қўшнилари эртаси чошгоҳ маҳали уни оғзи – бурнидан қон келиб беҳуш ётган ҳолда оғилхонадан топиб олишди. Терсotalикларга Янгибой ҳисобчига қараганда Нормат полвонинг майиблиги арзимас бўлиб туюлди. Унинг фақат бир оёғи, шунда ҳам тўпиқнинг

усти кесиб олинган ва ўрнига ясама оёқ ўрнатилган эди.
Шу сабабли чўлоқланиб бўлса ҳам у бемалол юра оларди.

Эргасига қишлоқ чеккасидаги катта айвонли пахса уйда кичкина тўй бўлди. Қари бўлса ҳам анчагина семиз эчки сўйилди. Қайноқ шўрванинг ҳиди Терсотага ёндош Олма ва Супа қишлоқларигача тараалиб турди.

Нормат полвонни кўриш учун келган қишлоқдошлари ўзлари тасаввур қилган норгул, барваста, умрида олишиб кўрмаган, лекин суги йирик бўлгани учун полвон, деб ном олган, қишлоқнинг олд чавандозларидан бири, қоматидан куч ёғилиб турган, ўттиздан энди ошган ўқтам Нормат полвонни эмас, озиб, мушаклари шалвираб, бўйин томирларида ажинлар пайдо бўлиб, яра излари қолган, ҳали дориларнинг бадбўй ҳиди кетмаган, кўринишидан элликни берса бўладиган, соchlари оқара бошлаган, ўзлари эшиттан урушнинг тирик гувоҳини кўрдилар. Қишлоқдошлари унинг юзидағи заҳилликка, куйган қулоқларининг орти олакула бўлиб қолган бўйинларига ва тез – тез сарак – сарак қилиб, силкиниб турдиган бошига ҳеч кўнига олмадилар.

Йигилганлар беш – олтига қари қартангдан ва оналари қошида ёки ҳовлида ўйин бошлаб юборган болалардан ташқари аксарияти аёллар ва кампирлар эди.

Жойни аввал печкали хонанинг ўнг тарафидаги катта, кенг совуқ, хонага солишганди. Аммо кампирлар келиб, жойни иссиқуна печкали ётоқ уйга ўтказишиди.

— Шусиз ҳам Норматбойнинг меҳмонхонаси борлигини биламиз. Бу ерда ҳеч ким бегона эмас. Бизга шуниси маъқул. Бесаришта, тўзиб ётган уйда ўтирмасак, ўтиргандай бўлмаймиз,— дейишиди улар.

Печкали хона ҳам кенг эди, тўрда тахмонга кир – чир ва қуроқли кўрпаchalар, турли рангга бўялган ҳосилот пўстаклар, ҳар хил гуллар чизилган наматлар, қўлда тўқилган гиламлар йигиб қўйилганди. Хонанинг шифти баланд, лойсувоқ деворларнинг икки томонига қуш, қийик, бир тувак бодомгулни ўртага қўйиб, бир – бирига тикилиб турган йигит ва қизнинг сурати, қўзилар ўтлаб юрган тоғ этагининг ва кўклам кунларининг тасвири солинган иккита узун сўзана осилган эди. Кашталар тагидан иккита қизил гулли яшил рўмол илинган, рўмоллар кўп вақт турганидан деворнинг

нусхи уриб, рангсизланиб қолганди. Сўзанага қараган одам уни тиккан қиз чевар бўлганини ва бу кашталарда ўша чеварнинг қизлиқ орзу – умиidlари барқ уриб турганини, булар келинлик сарполари эканини сезар, бу кашталарда балоғат орзуларини кўриб, беихтиёр энтикиб қўярди.

Одатдагидай урушдан қайттанларга қилинадиган ҳурмат маъносида тўрда Нормат ясама оёгини соғ оёғи устита қўйиб, учта лўлаболишларга суюниб ўтирас, унинг икки томонида ёнбошлаган ёки деворга суюниб олган чоллар Норматни шунчаки гапга солиб ўтиришарди. Печка атрофида эса кампирлар ўнг томонда ўтирган чоллар томон энгашганча қизғин сухбатта берилгай эдилар; гоҳида чоллар шумлик қилиб, секин чимчилаб олса, улар ушшайиб қолган, ажин босган юзларига уялан тусини беришганча тилларида «ҳе, ўл, қариб суюлмай, соқолинг остида қолгур», деб тиҳсиз оғизларини очиб ҳижилар, ўзлари эса чолга яқинроқ сурилиб ўтирас, хотинлар ҳам гўё бу ерга бир – бири билан чуғурлашиш учун келишгандай эди: гоҳ ажабланганини, гоҳ хурсанд бўлганини, гоҳ қайгуришаёттанини билдириш учун юзларини буриштириб, қошлирини ёзиб, ёқаларини ушлаб, яна қўйиб юборишиб, лабларининг бир четидан «чўл» этиб товуш чиқариб, ҳайратланган бўлишар, ҳамишагидек кимларнидир гийбат қилишга киришиб кетишган эди. Ташқарида қозон – товоқнинг даранг – дурунги, болаларнинг «Бўлмайди, бўлмайди, қайтадан», дебчувиллашаёттани ва аёл кишининг: «Ҳа, жувонмарг тўқол, укангди ўйнатмай эрларингминан ўйнаяпсанми?» — деган шанғи овози орасида Шариф қўсанинг нимадир буорган ёки кимнидир, афтидан, болани: «Ҳап, сеними, отангнинг илигига... Шундай қилаберсанг қизимди бермай қўяман», деган бир оз хирқироқ, қувноқ овози келар, гўё ҳамма бу ерга нима учун келганини бир лаҳзадаёқ унтишгандай ёки унтишга ҳаракат қилишаёттандай туюлар эди. Нормат эса қишлоқдошларининг юзларига сўзсиз, жим тикилиб қўяр, нимадандир изтироб ёки ҳижолат чекаёттандай эди. Ҳамманинг олдида чўзилиб ётишни эп кўрмай, ўрнидан туриб ўтиришга ҳаракат қилас, бироқ ясама оёғи халақит берар, у яна аввалгида чўзилиб олар, икки кундан бери келиб – кетаёттандарнинг, қишлоқдошларининг юзидағи

ачиниш ва ҳамдардлик ифодаларини кўриб, оёгини кесишаёттандан бошланган камситилгандек туйгу уни яна гирдобига олмоқда, ичкарига кириб – чиқиб турган, кечаси билан унинг кўкрагига уриб, оҳ – воҳ қилиб, йиглаб чиқсан, ҳозир ҳам сувлугини йўқотмаган хотинини жим кузатар, ундан тўрт йиллик айрилиқ асоратини ахтарар, лекин негадир излаёттанини илгамаёттандек, бу асорат унга сабаби номаълум бўлган бегоналик ва тундлик билан қоплангандек туюлар эди.

Норматта ҳамма нарсадан ҳам хотинининг ана шу тундлиги ёқмаёттандан эди.

— Ичкарига кириб олишинглар, ичкарига! — деб бақирди ташқаридан Шариф кўса қувноқ овозда.— Бепадарлар, силарга айтяпман. Нормат боваларингга кўрсатиб олишинглар, қани, юринглар...

У ичкарига ўн – ўн бир ёшлардаги иккита болани етаклаб кирди. Болаларнинг бири йўл – йўл эски бекасам чопон, барратери қулоқчин, иккичиси қора сатин чопон, афтидан, отасиники бўлса керак, кўкиш, катта аскарий телпак кийиб олган, иккаласи ҳам пишишар, беўхшов ўтирган Норматта ҳадик билан қараб туришар эди.

— Полвон боваси, буларга дуо беринг, олишмоқчи, сизнинг қўлингизди олмоқчи,— деди Шариф кўса Норматта қараб, болаларни ўртага, дастурхон етмаган хойга итариб. — Дастиурхонни қайриб туринглар... дастиурхонни! Нега тимирскиланасиз, сизга айтяпман, Зубай бойбича, қайтариб туринг, ҳеч нарса қимайди... Катта полвонлар бовасига олишибни кўрсатсин...

Нормат полвон ҳамиша болаларни олиштириш билан бошланадиган, энди негадир ўзига жуда узоқ хотира бўлиб туюлаёттандан тўйларни эслаб, жилмайиб қўйди.

Болалар ҳам ҳадиксираб, четдаги одамларга қараб юрди – да, бегона кўрмага, бир – бирига худди жўжахўрз – лардай хурпайиб, кичик даврани айланади бошлишди.

— Қани, хаҳ!..—деди Норматнинг олдида ўтирган Келдиёр сўпи. Аскарий қулоқчин кийган бола унинг ўғли эди.— Берган тузимни ҳалолламасанг, бугун кеча энангди ўзим олиб ётаман...

Ўтирганлар унинг гапига қийқириб кулиб қўйдилар.

— Оввв! — қувлик билан ҳайратланган бўлди боя Шариф кўса "Зубай бойбича" деб чақирган, бугдойранг, ўтгиз бешлардаги аёл. — Энангди отанг бир кеча қўйни — да олиб ётса, кейин энанг қўйнига ёшишиб, чиқмай қолади. Отангнинг қўйнида желими бор...

Қулоқчин кийган бола отасининг гапидан дадилланиб, Зубай бойбичага ўқрайиб қўйди — да, ҳужумга ўтди, беқасам чопонлининг белидан қучоқлаб олиб, орқага итарди. Беқасам чопонли дафъатан ҳужумдан ўзини тутолмай орқасига ўтириб қолди. Сўпининг ўғли унинг устига ўзини ташлади. Шариф кўса ажрим қилди. Иккаласи яна давра айлана бошлади.

— Ҳа, уккағар ёҳиё — е! — деди ёнбошлаб мудраб ўтирган, ўртада олиш бошлиниши билан сергакланган Мулла Саттор. У элликлардан ошиб қолган бўлишига қарамай, анча норгул эди. Бу йил икки ёчки, уч қоп оқ ун бериб, Тиниқ камширнинг ўн беш яшар етим қизига уйлангач, яна яшариб кетганди.
— Нуқул гирромлик қиласи — е, тирранчасидан тортиб каттасигача...

У нима учун бундай деганини ҳамма тушунди. Беқасам чопонли бола унга аскарий телпаклисидан кўра яқинроқ зди.

Беқасам чопонли қайта ҳужумда ўзини анча тутиб олди, қип — қизариб, аскарий телпаклининг ҳамма чилларини оппа — осон қайтариб турди. Аскарий телпакли кучи етмаслигига ишонгач, ҳийлага ўтди; беқасамлининг ёқасидан ушлаб, қорнига оёқ тираб, ошириб юборди. Бироқ, беқасамли яна ёнбоши билан ийқилди.

— Бўлди, — деди Кеддиёр сўпи. — Катта полвондики шунча бўлади — да, шуғитиб йиқиттанам катта гап.

— Бас — э, — деди Мулла Саттор унга зарда билан, — олиш кўрганмисиз?! Дустаман қимаса полвонма?..

Шариф кўса ҳам унинг гапини маъқуллаб, болаларни қайтадан олиштириди. Аскарий телпакли ҳийласи ўтмагаچ, хўрлиги келиб, кўзларини қисиб, йигламсираб, беқасам чопонлини ўнг томондан қучоқлаб олди. Беқасам чопонлига худди шу керак эди. У аскарий телпаклининг чап қўйини икки қўллаб қисиб, ёnlама чил берди. Аскарий телпакли ошиб кетди — ю, орқаси билан тушди.

—Ҳалол! — бақириб юборди Шариф кўса.— Буни йиқитиш дейди — да! Уккағарди ули, чоржетим — ей, дустаман қилди — я!.. Ҳой, Ҳайруллобой! — ташқарига бўй чўзиб чақирди. — Половондинг жилигини опкелинг...

Бекасам чопонли тушиб кеттан телпагини олиб, бошига кийди — да, атрофга голибона назар ташлаб, кетишни ҳам, кетмаслигини ҳам билмай туриб қолди. Аскарий телпакли эса отасининг олдига ўтиб, хўрлиги келганидан пиқ — пиқ этиб йиглаб юборди.

—Энангдан айрилдинг, — деди унинг баттар аламини келтириш учун Зубай бойбича.

Бола йиғили кўзи билан унга чўчинқираб тикилиб турди — да, бирдан Зубай бойбичани чапанилаб сўкиб берди. Унинг сўкишидан Зубай бойбича кулимсираб, тилини тишлади, қўлини қайчи қилиб:

—Ҳозир... кесиб оламан, отанг тўй қиласман, деб қийналиб юрмайди, — деб пўписалади.

Бола лип этиб, отасининг орқасидан ташқарига чиқиб кетди, Айвонга боргач, эшиқдан бўйинни чўзиб, онаси — дан ўргангандан лақабни айтди:

—Зубай...Зубай..ма..ма сенга — масхара қилиб тилини чиқарди. Зубай ўрнидан таҳдидали кўтарилгач, унинг дўпир — дўпир қочиб кетгани эшитилди.

—Шу ёҳиёнинг боласи ҳам жуда жиртаки бўлади — да, — деб тўнғиллади Мулла Саттор.

—Нормат бовангди олдига ўтири, — деди бекасам чопонлига Шариф кўса. — Боваси, энди унга қўлингиз — ди беринг. Чоржетимдинг обрўйини энди шулар ҳимоя қилсин..

Бола Норматта бегонасираб қаради — да, бироқ голиб бўлгани учун ҳамма жойда суюкли эканини англаб, Норматнинг олдига бориб ўтириди.

—Кимди улисан? — деди Нормат ҳам боланинг олишидан ва ўзига таниш одатлардан завқланиб, болага меҳр билан жилмайган кўйи тикилиб.

— Эшонқулдинг, — деди Мулла Саттор боланинг ўринга.— қонида бор — да половонлик...

Нормат ўзи билан тенг амакиваччаси, барваста гавдали Эшонқулни эслади. У урушга бошидаёқ кетган, шундан бери ҳеч қандай хабар йўқ эди.

Нормат боланинг кифтига уриб қўйди:

— Бундан ҳали зўр полвон чиқади...

— Масиддинг кунига шу яраб ётибди — да, — деди Шариф қўса. — Охбўта бобо, энангни менга бер деса, эшагининг думидан ўт қўйиб юборибди...

Ўтирганлар боланинг бу ботирлигини маъқуллаб кулиб қўйишидди.

Бола ўзи ҳақида гапиришаёттанидан, гапиришганда ҳам мақташаёттанидан эриб кетди.

— Менинг отамди урущда кўрмадингизми? — сўради бола ҳам эркиnlаниб.

Нормат унинг соддалигидан кулиб бош чайқади. Сўнг боланинг кўнглини нимадир деб кўтаргиси келди:

— Отанг келади, мана мени айтди дейсан, шу баҳорда келади, — деди худди ўзи ҳам қайтишига ишонгандек жиiddий оҳангда.

Болага катта илик теккач, бу мукофотни бошқаларга кўрсатиб, мақтаниш учун у югуриб ташқарига чиқиб кетди.

Болалар курашидан сўнг суҳбат жонланиб қолди. Кимдир ўглини мақтади. Кимдир болаларнинг касали кўпайганини гапирди.

— Ҳов, Зубай бойбича, — деди Мулла Саттор гавдасини болишдан кўтариб, оғзидағи носни гиламни қайириб туфлар экан. — Ўринбойдан хат — хабар борми?

— Ҳа, тоға, келди, аввали кун келди, — деди Зубай ўзини ҳам эслайдиган топилганидан хурсанд бўлиб. — Келди. Зовут — пабрикада ишлаётганмиш...

— Ўҳё, шундай катта ишга кўтарилиб кетибдими?! — ростакамига ҳайратланиб сўради қишлоқ подачиси Ражаб чўпон.

— Ҳа, ака, чин, — деди Зубай. — Ўзи шундай ёзибди, кичкина Шарипдинг ули ўқиб берди.

— Ўзи бўладиган бола эди — да. — Гапга аралашибди чўнқайиб ётиб, Келдиёр сўшининг етти яшар қизига бошидаги битларни тердираёттан Қудурат кампир. — Нуқул ўрисчалаб сўкарди. Ўрис мироблар минан ҳам қишлоқда пақат шу гаплаша оларди. Ҳатто бир марта начайликнинг ўзи елкасига қоқиб, луччи узбекски говори, чем руски деб мақтаганини ўз кўзим билан кўрганман...

— Бу нима дегани экан? — сўради Мулла Саттор, кампирнинг галати талафузда айттан гапларига тушунмай.

— Бу, сен русчани ўзбекчадан яхши биларкансан дегани, — деди донолик билан Келдиёр сўпи.

— А... — деди яна мулла, бош чайқаб. — Унда зовут — пабриқда ишласа ишлайдиган экан — да...

— Вой... қора босгур... — бирдан Кудурат кампирвой — войлаб, битини тераётган қизни чимчилаб олди — да, бошини қирт — қирт қашиди. — Ҳа, тўқалик, чочимди юлиб олдинг — ку! Ҳалигача чоч кўришди билмайсан, сени ким ҳам оларди бу ҳолингда. Эринг уриб ўлдиради — ку..

Нормат уларнинг гапига завқи келиб, жилмайиб қўйди. Унга бу соддалик ва самимийликларнинг ҳаммаси таниш, ҳам ҳузурли эди. У шу тўпори гапларни соғинган, тўрт йил дунё кезиб, хилма — хил одамларни кўриб, ҳеч қаерда она қишилоғидагидай гурунгу гаштакларни кўрмаган, эшитмаган эди. Унинг бу гаплардан юраги орзиқиб кетаёттанди.

— Ҳой, Келдиёр ака! — ташқаридан Турсун гуж — гужлинг овози келди. — Улингизни тиясизми, йўқма, улимди энангди... деб сўкиби... Ҳе, отангнинг ҳалиги... жойига нашватир... қани, кел... Шу гасинг учун сени иштонимдинг ичига соп қўяман... кейин кўрасан томошани..

Ташқарида кимдир қувган, кимдир қочган товуш эшитилди.

— Хайруллабой, ушлаб келинг, оғзига носимди тупурай. — Яна Турсун гуж — гужнинг шанги товуши эшитилди. — Энангди дейди — я... олдин Шарип бовангдан рухсат ол...

— Бунча сасимасанг!.. — ташқаридан тўйга ҳам баковуллик, ҳам кайвонилик қилиб юрган Бийди момонинг заҳрли товуши эшитилди. Эрталабдан бери келинilarга иш, юмуш буюравериб, танбеҳ беравериб чарчаган, шекилли, товуши жуда ҳоргин чиқди ва галириб бўлиб охирида уфлаб қўйди. — Боланг тенгигаям шундай дейсанми, уятсиз. Сизларда ўзи бет деган нарса қолмабди.

— Аммам заҳарлигини қўймади — қўймади — да, — деди гижингандек Зубай бойбича паст товуща. — Бундай ёйилиб гаплашиб ҳам бўлмайди, шапла оғзига уради одамнинг.

— Қалинингнинг ярмини тўласа, майли, мен розиман. — ўтирган жойида чийиллади Шариф кўса, Бийди момонинг гапига парво ҳам қилмай хотинига.

Норматнинг юрагига ёқимли бир ҳис ёприлиб кира бошлади. У ҳозир ўзини унугиб, яна ўз ташвишлари, гапларига берилиб кетган қишлоқдошларини кўриб, ўзида уруш жароҳатини енгишга қудрат сезди, қалби янги, умидбахш туйғуларга тўлди.

У изма – из келиб – кетиб турган қишлоқдош ва қариндошларини кўрганда ҳам, тушдан кейин бошқа қишлоқлардан у танийдиган одамлар келганда ҳам ана шу туйғуни ҳис қилди. Номига бошланган тўй бирдан хурсандчилик, урушдан олдингидек қувноқлик тусини олганди. Кампирларнинг ҳам сўлиб қолган тириш юзларидаги шўх ва қувноқ боқувчи кўзлари худди сўлиган отқулоқ баргига тушган икки томчи шудринг каби ялтирай бошлаганди.

—Тўй тўйга ўхшасин – да!—деди эрталабдан бери печка олдида иссиққа елкаларини тоблаб, чолларнинг гапига қулоқ солиб ўтирган Бўстон момо қайдандир ёриқ чилдирма топтириб келиб, тарақ – турук қилиб, шўх – шўх чалиб, мискину шўх оҳангда қўшиқ бошлаб юборди:

Шафтмолининг тагида
Шамоллаган қайнонам.
Кўп хотиннинг ичида
Жомоннаган қайнонам

Эркаклар унга нашъя қилиб, қийқириб қўйдилар. Чилдирманинг мақомига силкиниб, ўргага Норби кампир тушди. Желагини отиб юборди – да, қўлларини қуш ёзиш қилиб ўйнай кетди. Унинг ўйинига шавқи келган эркаклар яна қийқиришиб кулишди. Келдиёр сўни шу йил шаҳарга тушиб ўрганиб келган ҳуштагини чалди. «Оҳ – ҳа – ҳа – ҳай, ҳушшт». Норби кампир оёқларини енгил кўтариб, чўзиқ товушда лапар бошлади:

Оҳ, оғажон, оғажон,
Тутни букиб ўтдингиз.
Менинг ҳам журагимди
Тутдай тўқиб ўтдингаз...

Бир неча келинчак деразадан бош суқиб қаради. Эшик ва айвон болаларга тўлиб кетди. Улар нимжонгина, ҳозир тўкилиб тушаман деб турган кампирнинг қушдай енгил ўйинидан қиқирлаб кула бошладилар. Тезда хотин – халажлар айвонга чиқиб, даврани катта қилишди – да, қизларни ўйинга тортишди. Норби кампир терма айтиб турди. Терсоталиклар тўрт йил давомида хурсандчилик қилишмаганини ва тўрт одам бир ерга йиғилиб сұхбат қурмаганини энди эслаб қолишгандай, аламларидан чиққунча хурсандчилик қилишадигандек шаштлари бор эди.

Эртəлабки болаларнинг олишида ҳам, гурунгларда ҳам, кампирларнинг ишшайишларида ҳам, ҳаммасида шу кайфият ҳукмрон эди. Фам – аламга тўлган турли қалблар ўзларини бир зум, ақалли бир нафас хурсанд қилишга уринишар, бир – бирининг гапига шақирлаб кулар, ёш келинчаклар эри қайтиб келиб, сёғи енгил бўлиб қолган Анзиратта қочирим гаплар қилишар, гаплари гарчи кулгили бўлмаса ҳам кулишар, бу куннинг тезроқ тугаб қолишидан, яна уруш хотиралари ва ваҳималари ётган уйларига қайтишдан, яна ўша ташвишли ёлғиз, ҳорғин ҳаётлари бошланишидан чўчишаётгандек кўринишларди.

Аслида ҳам бу қалбларни бир варақ орқага ёки олдинга варақласа, ҳали урушли ҳаёт бор, ҳар иккала томонда ҳам уруш кезаёттан ва бу қалбларнинг энг яқин кишилари, эрлари, болалари, жигарлари, оға – инилари ана шу урушда ўлаёттан, мажруҳ, ногирон бўлаёттан ёки бирон нарсасидан айрилаёттан эди...

Кечга яқин ҳамма уй – уйига тарқалди. Фақат уч – тўртга эркак алламаҳалгача гурунглашиб ўтирди. Ахийри улар ҳам Норматнинг мудраёттанини кўриб, ўринларидан туришди. Нормат чўлоқланиб, уларни кузатишга чиқди. У бугун жуда ҳориган, бироқ ўша ўзи қайтаман, деб ўйламаган урушдан олдинги ҳаётта қайттанидан юраги енгилгина ҳаприқиб турарди.

— Энди нима қилмоқчисан?! — деди ҳаммадан охирида қолган Шариф кўса ошнасининг қўлидан тутиб, четта бошлар экан. — Ўйлаб кўрдингми?

— Йўқ...

— Сенбоп бир иш топилиб турибди. Агар йўқ демасанг...

Обрўли иш...

— Қандай иш?!

— Бригадирлик. Икки — уч қишлоқда...

Нормат урушдан уйига қайттанига ҳали тўла ишонгиси келмай турган бир лаҳзада уни эски турмуш ташвишлари гирдобига олаётган, шу сабабли иккиланаёттан, журъатсиз кайфиятда эди. Буларният барчасида қандайдир бошқа бир аломат бор эди. Бу аломат ўзини чорлаб турган урушиз ҳаёт эканига у ҳамон ишонгиси келмаётганди.

— Бўлмайди, — деди у ниманидир ўйлаб. — Менга тўгри келмайди.

— Нега?! Айнан сенбоп... Колхоз от беради... сен паҳат буюриб юрасан.

— Қўй, ўзимиздинг дехқончилик яхши. Ерди соғинган — ман... Тушларимга кириб чиқади ер... Урушда кўп қон тўқдим, буни ювишм керак... бўлмаса одам қони тутади.

— Раис сўраб кўр деганди... Бу оёқ минан тириклик ўтказишинг қийин — ку?..

Нормат оғир тин олди ва ошнасининг гапини эшитмагандек тунга суқ билан тикилди, ўпкасини тўлдириб нафас олди... Кечани туман қоплаган, совуқ эди. Қишлоқда итлар акиллар, уларнинг ҳуришлари нариги бетдаги зовларгача етиб борар ва уларда акс — садо олиб қайтар эди.

— Қўй, ошна, биздан катта одам чиқмаган, урушдан ер ҳайдайман, бугдой экаман деб қайтдим, от миниб юраман деб эмас, — деди у орзуманд товушда.

Уйга кирганда Анзират болаларни печка атрофида ухлатиб, тўрга солинган икки кишилик жойнинг бир четидә ўтиради. Норматнинг кирганига парво ҳам қилмади. Ўша алфоз ўтираверди. Нормат ечиниб, тўшакка чўқди.

— Анзират...

У қўнғиротларнинг қишлоқ удумини бузган ўша пайтдаги ягона одам эди; хотинининг исмини айтиб чақираради.

Хотини бошини кўттармай:

— Ҳа... — деди совуқ оҳангда. Бироқ Нормат буни сезмади. У ҳозир сезадиган ҳолатда эмас эди. Унинг қалби эҳтиростга тўлиб бормоқда эди.

— Анзират... — хотинини ўзига тортди. — У жойлар — да ҳар куни сени ўйладим. Болаларди ўйладим... Худога ёлбордим... Шулардинг баҳтига мени омон асра, дедим. Уйда менинг зўр хотиним бор, дедим... болаларим бор дедим... Анзират... бир нима де! Кеганим бери ҳеч кулмайсан... гапирмайсан.

Хотини ўзини тўшакка ташлади — ю, йиглаб юборди. Нормат гарангсиб қолди.

— Анзират... сенга нима бўлди?..

Анзират ётганча пиқ — пиқ йиглади.

— Анзират!..

— Ҳеч нарса... — бўғилиб жавоб берди хотини. — Сиздан қорахат келди... ўлди дейишди...

Нормат енгил тортди. У хотини шу йигланиши билан ўзига даҳшатли бир ҳақиқатни ёки оёғингиз билан менга эрлик қиласизми деб айтади деб ўйлаганди. Қора хат келган пайтдаги хотинининг кайфиятини тасаввур қилиб, енгил тортди. Хотинининг сочини силади.

— Мана, энди олдингдаман — ку... Энди ҳеч қаёқда силарди ташлаб кетмайман... Анзират...

Анзират бошини кўтарди, ёшли кўзларини унга худди раҳми келаётгандай тиқди, чукур хўрсинди, сўнг туриб, чироқни пасайтириб келди.

ИМРНОЛ ОЗМОНДОВИЧ САДЫКОВИЧ

II

Ўтроқ кўнгиротлар Ҳисор тогининг этакларида, унча катта бўлмаса ҳам негадир Каттасув деб аталашиган дарё бўйларида ўша Боботоғ ва Бойсунцоғдан кўчиб келганларида берни муҳим яшашади. Катта дарё азалий чўққиларида бошланниб, юзлаб қишлоқни оралаб, Пачкамарга куйлади. Бошида шўпилон ва шиддат билан бошланган дарё Лангардан ўта бориб, кичкина сойликка айланниб қолади. Дарёнинг битта қилиги бор: баҳор кунлари шўполон қилиб оқади. Унинг ичи харсанг, сангар тошларга шўла, сув пасайғанда тошлар ҳудди улкан тухумларга ўхшайди. Баҳорда эса улар сувга яширишиб олади. Сел пайтлари унда одам оқса, сог чиқмайди: тошларнига ўзи уни адо қиласди. Нариги бет билан

мутлақо алоқа узилади. Иши қиқиб қолғанлар дарёниңг икки бетида туриб, бемалол гаплашса бўлади ўзан унча катта эмас. Баҳор кунлари нариги бетдаги болаларга байрам бўлади — мактаб ёпилади, бериги бетдаги мактабга келиб ўқишининг ҳеч иложи йўқ. Ўқитувчиларниң нариги бетга ўтилари келмайди, дарёдан кўркышади.

Бундан йигирма йил олдин Олма қишлоқлик — Қобил чонинг катта ерларда ўқиб келган ўғли нариги қишлоқларга бориб дарс берган дейишади. Айтишларича, у Терсоңа қишлоғининг рӯпарасидан, саёз жойдан от билан сузиб ўтаркан. Бир куни ҳаттиқ жала бўлади, шининг увлашидан ажабланган Қобил чол кечаси дарё бўйшига — томорқасининг дарёга тушаш жойидаги бодом дарахти остига борса, одамга ўхшаш кўланкані кўради. Қўрқиб кетиб, қишлоқдошларни чақириб бориб кўрса, жасаг ўзининг ўғалиниң жасади экан. Кейин Қобил чол қўр ортидаги Ёнгоқли (қўнгиротлар Жонгоқли дейишади) қишлоғига кўчиб кетди.

Баҳор кунларини айтмаса, Каттасувдек сокин ва беозор дарё бошқа ҳеч қаерда йўқ, унинг суви тиниҳидигидан ҳамто иуз устидан ҳам тагани кўрса бўлади. Катта дарё атрофига келиб ўрнашиб қолган ўтроқ қўнгиротлар эмлик—олтмиш қишлоқни ташкил қиласди. Бу ургу асосан чорвачлилк ва дедқончилк билан шугууланаади. Чорвачлилк ва дедқончилк алоҳидаги алоҳидаги эмас, бир кишининг ўзи ҳам дедқон, ҳам чорвадор бўлиши мумкин. Шу сабабли бу ургуга ўтига бой ҳам, ўти камбагал ҳам бўлмаган. Камбагал ҳисобига кирганниң ҳам ери, ҳам моли бўлган.

Ургу бошқа ургуга қиз бермайди. Бошқа ургуни ўзлари билан тенг кўришмайди. Шу сабабли қўр ортидаги тоҷик овуллари билан ёшлиарниң ургу ҳам, тил ҳам танламаидиган мұҳаббат мажоралари деб тез—тез жанжаллашиб туршишади.

Айтишларича, қўнгиротлар бу ерларга бир неча асрлар олдин келиб қолишган экан. Нима учун бу ерларга келиб қолишганини билишмайди—ю, бироқ ургу жуда тўзиб, тарқалиб, ниҳоятда оз қисми келиб

қолган. Чолларниңг чўпчакларига қараганда, аввалги ерларида улар жуда тотув ва фаровон яшашган экан. Улар уч нарсани: ери, оловни, сувни муқаддас тутишар, ўзларини бу уч муқаддас нарсанинг фарзандлари деб билишар экан. Шу сабабли уларниңг орасига ҳеч қачон ихтилоф чиқмаган. Шу учта муқаддас туйғу уларни бирлаштириб турар экан. Ерлари ҳам бой, сердосил экан. Жойларини Нилуфар водий деб аташар экан. Уругни оқсоқоллар бошқаришар, бой—камбагал деган гапнинг ўзи йўқ экан. Кейин нима бўлибди—ю, уларниңг осойишта ҳаётига уруш кириб келибди. Уруш уларниңг ҳамма нарсасини вайрон этибди, бир—бирига ёв, душман қилиб қўйибди. Ер ҳосил бермай қўйибди, қургоқчилик бошланибди, одамлар очликдан ўлиб кета бошлишибди. Уруг билас, аймоқ билас, ака ука билас урушга киради. Уруг ўртасига ихтилофлар чиқа бошлиайди, уларниңг тотув турмуш—лари издан чиқади. Эски эътиқодларидан воз кечиб, бойликка ҳирс қўя бошлиайдилар. Бойлик эса уларниңг бир—бирига муҳаббатини ўғирлаб олади.

Шунда ўша даврлардаги уруг оқсоқоли Бойхун (балки Бойсундир) энди бу жойларда яшаб бўлмаслигини ва қон шўклигандан ер энди ҳосил бермай қўйганини, сув ҳам, офтоб ҳам улардан юз ўтирганини, энди бу ерлардан урушсиз юрт излаб кетиш кераклигини айтнибди. Унинг гапини ҳамма маъқуллабди. Уруг турли томонга: урушсиз юрт ахтариб тарқалиб кетибди.

Бойхун бошчилигидаги ўпроқлар эса қўёшга, муқаддас оловга томон ўйл олибди. Улар қўёш томонга урушсиз юрт бор, деб ўйлаб, табора тикроқда кўтарлишибди. Бироқ улар қаерга борса, уруш изларидан қувлаб етар, уларниңг ҳаётига хавф солар, қонларига тобора сингиб борар экан, охири шу Катта сув атрофига келиб ўрнашиб қолишибди. Бу даврда Бойхун жуда қариб, ўлим тўшагига ётар экан. У: «Агар урушсиз юртни топмасаларинг, унда ака укага, дўст дўстига, хотин эрга, одамлар бир—бирига хиёнат қиласиган, бир—бирини алдайшиган бўлиб қоладилар. Қаерда қон оқса, ўша ерда

хиёнат кўп соғир бўлади, баҳт у ердан юз ўғирағи, одамлар яшаш илмини эмас, бир—башни ўлдириш илмини ўргана бошлиғилар, сув ўрнига қон шадиган маҳлуқка айланадилар. Уруш — ер юзидағи ҳамма эзгу нарсани қуршади, сизларни ер юзидан супуриб ташлайди. Сизлар ҳаммаларинг жоҳида ва адашган уруш одамларига айланаб қоласизлар. Шу сабабли сизлар урушсиз юртни топинглар, урушни оралариндан ҳайданглар, тотув яшашга ўрганинглар. Билингларки, одамизотининг отаси бишта: онаси битта — ҳамма бир—бирига жигар, кимки урушга қарши бўлса: улар сизларнинг жигарларнинг — урушсиз юрт ахтариб кетган қўнгиротлар. Уларни кўлланглар. Агар урушсиз юрт топсаларинг, уларни ҳам олиб келинглар...» деб жон берибди.

Шундак бери қанча замонлар ўтибди, қанча сувлар оқиб кетибди, лекин одамлар урушсиз юртни топиша олмабди, у ҳеч қаерда йўқ экан. Бошқа уругдошлари ҳам тополмаган шекилли, улардан ҳам дарак бўлмабди. Қўнгиротлар урушнинг қомали гардобида ҳамон яшаб келишар, уруш уларни аста—секан ер юзидан супуриб ташлаётган экан...

Бу чўғчакнинг қанчалик ҳақиқатта яқин эканини ҳеч ким билмайди, бироқ ҳамма шундай бўлганинига ишонади, болаларига Бойхун, Бойсун деб исмлар қўйишидаи ва қаерлардадир урушсиз юрт борлиги ҳақида эртаклар айтишади. Утроқларнинг энг' катта аймоги — тўрт етим аймогининг ўзи ўттиз — қирқ қишлоқни ташкил қиласди. Бу аймоқ ўзининг урушқоқлиги ва жангарилиги, бир қолишига сигмаслиги, аёлларининг эркаклардек барча масалага аралашиб кетиши, узун ва барвасталиги билан ном қозонган; Шу сабабли бошқалар бу аймоқдагиларни айнидан тарқаган ҳам дейишади. Бу аймоқдагилар яна сал овсарроқ ҳам. Овсарликлари кўпроқ мугомбираликка ўхшаб кетади, лекин ростдан ҳам эсарроқ. Тегирмондан қайтишда унни тупроққа тўкиб юбориб, уч кунгача ундан тупроқни ажратаман деб, шопириб ўтирган машҳур эсар худди шу аймоқдан бўлган. Эркаклари ҳам, хотинлари ҳам жуда бақувват ва басавлат бўлишади.

Ўтган асрнинг охирларида Олма қишлоғидан чоретим Бердишукур қизил(бу лақабнинг большевикча "қизилга

алоқаси йўқ, ранг, тус маъносида) Беккам оқсоқолдан Терсота шаршараси остидаги ерларни сотиб олиб, қишлоқ қуради. У ҳам ҳам ҳар хил жанжаллардан, келишмовчиликлардан, аймоқлар, қариндошлар ўртасидаги низолардан безиб, фақат ўғиллари ва невараларидан иборат битта тутув қишлоқ курмоқчи бўлади. Урушгача ростдан ҳам бу қишлоқ аҳиллиги билан ном қозонган эди. Тупроғи қора, ҳосилдор бўлган ер Берди Шукурни анча давлатманд одам қилиб қўяди. Терсота аста – секин бошқа аймоқликлар ҳисобига ҳам кенгая бошлиайди. Уруш арафасида қишлоқда йигирма, йигирма бешга яқин уй бор, лекин жуда сийрак жойлашган, бошқа уйдагилар кўланка бўлиб кўзга ташланарди. Дарахтлари ҳам сийрак, арчазор билан ўралган қишлоқ эди.

Нормат Бердишкур бобонинг кенжасидан ёлғиз (тўқиз қиздан кейин) ўғил эди.

III

Бу ерларга қиш ноябрнинг адогида юз кўрсатади. Сўнг, токи мартнинг охиригача тоғда ягона ҳукмдор бўлиб олиб, ҳоҳлаган ўйинини ўйнай бошлиайди. Лекин анча пайттacha дарёлар музламайди, булоқ сувлари иссиқ бўлиб қолади. Баъзи – базидагина, шунда ҳам чилла кирап ва чиқар пайтларидағина қорасовуқ бўлиб, дарахтларни совуқ уради.

Бу йил қиш декабрнинг бошларида юз кўрсатди. Аввал муз аралаш қор учқунлади. Кейин гупиллаган қорга айланди. Эртасига эрталаб одамлар ўйғонганиларидан сўнг ташқарига чиқиб, ҳайрат билан узоқ – узоқларга боқдилар: ҳаммаёқ оппоқ қор эди, гўё бутун дунё оппоқ эди. Бу — шу йил ҳисобидан ёқдан биринчи қор эди...

Нормат келганидан буён бирон ишга қўл урмади. Мумиё ичиб, мадорга кирди. Ўзида қувват сеза бошлиади. Юришини машқ қилди. Кучга киргач, Янгибой оқсоқолнинг минилмай ётган Қўратўшини насияга одди. Отда юриш унга анча қулай эди. Отта ўзи минадиган бўлгунча бирон ёққа чиқмади. Оёгининг оғриши қўйғандек бўлгач, от миниб айланиб келадиган бўлди. Бироқ, келганидан бери юраги хижил эди. Анзират у билан тортиниб муомала қилас; оёқсиз қайтганимга шундай қиляптими, деб ўйлар ва эзилар эди.

Болалари эса ундан бир зум ажралмас, айниқса, Холмат, аста – секин гапириш ва иш қилишда унга тақлид қила бошлаган эди. Кечқурун болалари Нормат полвонни ўраб олиб, нима учун сёғи бундайлигини сўрайвериб, безор қилиб юборар, кейин Ҳожар елқасига чиқиб олиб, ерга ўзини ташлар, бу ишидан завқланиб, қиқир – қиқир кулар эди. Анзират эса шу пайтлари печка оддида индамай урчук йигириб ўтирад, кўзларида уни нимадир эзаёттандек кўринарди. Уни кўриб, Нормат полвон ҳам эзилар, лекин юзага чиқармас: сабаби ўзига тақалишидан ва бунинг ошкор бўлиб қолишидан қўрқар эди.

Охири бир куни чидай олмади. Ёттанларида хотинидан: «Менинг ўлганим чин бўлганда қовоқ – тумшугинг очилиб юрармиди?»— деб сўради. Анзират бу гашни эшитиб, ҳўнграб йиглаб юборди. Нормат полвон нима қилишини билмай қодди:

— Сенга нима бўлди? — деди қўрқиб кетиб. — А, нима қилди?!

Анзират анчадан кейин йигидан тўхтади — да, секингина, эркаланган товузда:

— Каклик гўшти егим келяпти, — деди.

Бу гапи урушдан оддинги Анзиратнинг нозли гапига ўшагани учун Нормат хурсанд бўлиб кетди.

Эртасига Нормат милтигини ва Қоратўшни олиб каклик овига жўнади. Уруш бошланганидан бери каклик овлаш одамларнинг эсидан чиқиб кетган, какликлар кўпдан безовта бўлмай қўйган бўлишига ҳарамай, Нормат Бухор зовларигача биронта каклик учратмади... Бухор зовларига келганда унинг каклик овлаши ҳам эсидан чиқди. У бу ерларда ўтган урушдан оддинги ҳаётини, тожик овулларидан кўшкаридан қайттанда тўхтайдиган булоқни қўмсаб, ўша энди сира қайтмайдигандек туюлаётган мунаvvар, серташвиш йигитлик – навқирон йилларининг хотирасига берилиб кетди. Болалигида қўзи ҳайдаб келиб, устига чиқиб ўтирадиган катта қизил харсангтошни, бир – бирига туташшиб кетган зовларни урушда кўп қўмсарди. Зах окоиларда ётиб, ўша зовларни яна бир кўрсам армоним йўқ, деб ўйлар, ҳозир эса қалбида гайритабиий шуур уйғонмоқда эди. У йигитлик ва болалик хотираларига берилиб, Бухор зовларида

узоқ кезди. Зовлар орасида хирагина туман бор эди. У виқор түкиб турган қорни катта қирларга ёпишиб олган, тохик овуллари тарафдан эсаёттан шабада билан дарё томон силжиб бормоқда эди. Ҳавонинг авзойи солиқ, эриниб ёмғир ёғарди. Икки томони қирлар билан ўралган арава йўли тойғаноқ бўлиб қолган, юриш қийин, айниқса, йўл тепаликка кўтаришганда юриш яна ҳам қийинлашар, от туёғи сирпалиб кетаверар, шу сабабли йўл чеккасидағи сарғайиб қолган ўт—ўланлар устидан юришга тўғри келарди. Қорайиб қолган қирлар негадир ғамгин тусга кирган, бу ғамгинлик ранги сўла бошлиган арчаларга қадар ўтганди. Норматта арчалар қора кийиб чўнқайиб ўтирган кампирларга ўхшаб кетди. У болалигига устига чиқиб ўтирадиган кекса арчанинг олдига борди. Арчанинг шохлари тарвақайлаб кетган, баъзи шохлари қўрий бошлиган, танасида пўстлоғи чириб, нимхуш, ачимсиқ ҳид келарди. Арчанинг шу туриши жуда ачинарли эди. «Қарияпмиз, ошна,— деб ўйлади ичида Нормат.— Асли — да ҳаммамиз ҳам ердан озиқ, оладиган арча эканмиз».

Тўсатдан зовлар ичидан какликнинг «қийинқ, қийинқ», деган зорланиши эштиди, сўнг бу товуш ҳам қоялар ичига сингиб кетди. Норматнинг юраги йўқотиб қўйган онасини бирдан кўриб қолган гўдакникдай бозовта эди. Ҳатто энг кичик тошлар ҳам жой — жойида турган бўлса — да, унинг назарида ҳамма нарса ўзгаргандай, ўз руҳига мос синиқандай эди.

Бухор зовларидан ўтиб, қотнинг устидаги дарага борди. Кейин Терсота сойи бўйлаб, Читта жўнади. Тоғда сокинлик ҳукмронлик қилас, ўт—ўланлар сарғайиб, мевали дарахтлар қип — яланғоч ечингацди. Йўл четидаги ёввойи бодомлар ети — саккизтacha мевани ушлаганича, энди буни ҳеч кимга бермаймиз, деёғандай силкиниб — силкиниб қўярди. Фақат арчалар ўша — ўша — ям — яшил эди. Булар ҳаммаси Норматта тинч, осуда ҳаётни эслатди. У завқи келиб, отини ниҳтади. Сойлик бўйлаб, отда чопмоқчи бўлди, бироқ қари от лўйк — лўйк этиб йўргалади — ю, яна аввалги юришига қайтди. Нормат юрагидаги туйгуларни бошқаролмай, ҳе — е — ей, деб бақирди. Унинг товушидан от чўчиб, қулогини диккайтди, зирк орқасидан қандайдир қуш пир этиб учиб кетди. Бақириғига жавобан зовлар

акс – садо берди. Акс – садо анчагача тинмади, унинг товушини ҳар хил қилиб қайтариб турди. Зовларнинг бу эркалаши Норматга ёқиб қолиб, яна бақирди... Акс – садога қулоқ тутиб, яна бошқачароқ қилиб бақирди. Зовлар унга бошқача жавоб қайтарди. Нормат хурсанд бўлиб кетиб, товушига яна ҳар хил тус бериб бақира бошлади. Томоги хириллаб қолгач, ўзини енгил сезди – ю, нима учун келгани эсига тушиб, Қоратўшни изига бурди. Нормат кечгача иккита, шунда ҳам биттаси оқсоқ каклик овлай олди. Кечта яқин қишлоқ устидаги булоққа келди, отни кекса арчага боғлаб, ўзи булоқнинг бошидаги нам тошга ўтиради. У бутун уруш давомида ўйлаган, орзу қилган тинч, осуда ҳаётта қайтганини энди англади. «Энди бу тинчлигимни ҳеч нарсага алмашмайман, хотинимни ҳеч ҳам ўкситмайман, одамларнинг кўнглини оламан, мана шу тоғлар ҳурмати... энди хотинимни ҳам, мени интизорлик билан кутиб олган одамларни ҳам бошимда кўтариб юраман. Бир умр уларнинг иззатини қиласман, менинг учун энди уруш, қон, ўлим, деган нарсалар тутади», деб ўйлади. Келганидан бери ҳеч ишонмаёттан, ҳеч ўзини кўнигира олмаёттан, худди бироннинг ўрнида яшаётгандай туюлаёттан ҳаёти ўзиники эканини, бегонадек бўлиб қолган Анзират ҳам, мана шу тоғлар ҳам, шу тоғларда яшовчи одамлар ҳам фақат ўзиники эканини ва дунёдаги ҳамма нарса унинг бахти, қувончи учун яратиғанини тўйди, энди бу нарсаларни ҳеч нарсага, ҳатто ҳудоси келса ҳам алмашмайман: булар менинг ҳаётимдан ҳам азиз, менга ҳаёт бахш этди, деб ўйлади. У, шу дафъя хотиним мени қандай кутиб олади, деган ҳадиги энди ўтиб кетганини, хотини дунёдаги энг яхши хотин эканини ҳис этди. Кўнгил дарчаларини яшнаб – яшнаб келаётган ҳаётта тамом ланг очиб қўйди.

Шу қуни Норматнинг уйида сал кам байрам бўлди. Анзират ҳам очилиб – сочилиб гаплашиб ўтиради. Унинг товуши хуашнуд ва жарангдор чиқа бошлади. Болалари Норматни ўраб олиб немислар ҳақида гапириб беришини сўрайди, уни от қилиб минишади,

Анзират уларни ҳавас ва меҳр билан кузатади, уларга қўшилиб кула бошлайди.

— Пашист нимага ўхшайди? — деб сўрайди Холмат. — Малимимиз бўрига ўхшайди, дейди.

Нормат нима дейишини билмайди. Бизга ўхшаган одам, деса ўглиниң тассавурига путур етадиган, кўнгли чўқадиганга ўхшайди, ўглимниң сазаси ўлмасин, дейди.

— Ҳа, Малик бовонгдинг итига ўхшайди, — дейди.

Холмат Малик чўпоннинг кўрингангага қутургандек ташланадиган игини кўз олдига келтиради. Тушунганга ўхшайди. Лекин яна сўрайди:

— Уларам тўрт оёқлими — а?

Нормат полвон ўглиниң сергаплигидан, фаросатидан гурурланади:

— Ҳа, уларм тўрт оёқли, икки оёғида юрса, икки оёғида ажал олиб юради...

Анзират уларга жилмайиб, ўз ҳаётидан, бахтидан миннатдор бўлиб қараб ўтиради.

IV

Нормат полвон каклик овидан қайттач, хеч қаёқда чиқмади. Бузилиб қолган чолғи, ўроқларни тузаттан бўлиб, ўзини авраб юрди. Яраси газак олиб кетмаслик учун ташқарида ҳам кўп юрмас, қорасовуқ ва об — ҳавонинг бирдан ўзгариши унинг ярасига таъсир қилган, йиринглай бошлиганди. Фақат баъзи кунлари Қоратўшни миниб, қотнинг устига — хар йили дехқончилик қиласиган ерига бир чиқиб тушар эди.

— Ер ишланмай қотиб кетибди, — дер эди у тоғдан қайттандан сўнг. — Чакалакзор бўлиб қолибди. Сугуриб ташладим. Бироқ, томирлари ҳали ҳам одамни роса қийнайди.

Норматни дехқончилик ташвишлари тобора яшартириб бормоқда эди. У омбордаги занглаб ётган омочни толиб олиб, унинг мих — чўпларини қайтадан қоқди ва кўкламга созлаб қўйди.

Аммо бу ишлар тез тутаб қолди. Унга деярли юмуш йўқ эди. Молхонани Анзират ёки Холмат кураб қўярди. Ўтин ёриш ҳам Холматнинг бўйнида эди. Нормат эса кунни уйда қамалиб, эски чориқларни ямаш, уни синган чойнакларга тумшук ўрнатиш билан ўтказарди. Бекор пайтлари печка

ёнида ухлаб ёки орқасини печкага бериб ўйланиб ётарди. У хаёлга берилиб, мудраб ётганда унинг оромини бузишга ҳеч ким журъат этолмасди. Баъзи кунлари у йўқ ердаги эрмакни ўйлаб топарди. Бир куни ташқаридан лой олиб келди – да, туяга ўхшатиб, ичини ковак қилди. Икки – уч жойдан яна тешик қолдириб, ажабтовур маҳлук ясади ва печканинг остига тиқиб қўйди.

— Ота, бу нима? — деб сўради ҳайрон бўлиб, уни кузатиб ўтирган Холмат.

— Ҳали қўрасан, — деди у сирли қилиб, катта иш қилгандай жилмайди.

Ярим сеатлардан кейин нечканинг остида қуриган "маҳлук"ни олиб, тузаттан бўлиб, оғзига солиб, пуфлади. «Махлук»дан ингичка, аммо ёқимли товуш чиқа бошлади.

Бошига катта рўмол ўраб олган Ҳожар шодланганидан қийқириб юборди – да, Норматнинг қўлига ташланди.

— Менга бейинг, — деди ҳурсандлигидан ўзини йўқотиб.

— Менга бейинг, менга... менга...

— Сен чалишни билмайсан, — деди Холмат уни орқага итариб. — Отам менга ясаб берди.

— Йўқ, менга, — деди чийиллади Ҳожар ва Холматнинг қўлидан итариб, жонҳолатда ҳуштакка интилди.

Нормат эса уларнинг қувониб кеттанини кўриб, ўзи ҳам суюниб, хунук қилиб, ҳиринглай бошлади. Унинг ҳиринглашини кўриб, Анзиратнинг юраги орқага тортиб кетди: мулла Абдулланинг гунг ўғли Хайруллони бирор елкасига қоқиб мақтаса, шундай ҳиринглаши эсига тушди.

Эртасига Нормат хаёлга берилиб ётди – да, сўнг ниманидир эслагандай, ҳамир қораётган Анзиратта қаради:

— Ҳе – ей, ийирган ипинг йўқми?

Анзират унга ялт этиб қаради – ю, гапига тушунмагандек, унга тикилиб қолди.

— Ипни нима қиласиз?

— Тўқийман.

Анзират эрига акабланиб қаради.

— Нима қиласиз? — ишонқирамай сўради.

— Тўқийман, — деди Нормат сирли қилиб.

— Энди бир камингиз ип ийиришингиз қолганди, — деди ва жилмайиб қараб қўйди. Норматни ип йигириб

ўтирган қиёфада тасаввур қилди – ю, шарақлаб кулиб юборди. Ўзини кулагидан тўхтата олмай, деворга суюниб қолди. Сўнг бирдан Норматта қараб, жиддий тортди – да:

— Урчук ҳам ийирасизми? — деб сўради.

Нормат унинг айёона тикилиб туришидан келинчак – мигидагиdek – бирон мугомбирликни ўлаганини сезиб, хафа бўлиб, хўмрайди.

— Сенга ҳазиллашаёттаним йўқ, — деди хафа алфозда.

— Ипинг бўлса, бачаларга қўлжилоп тўқиб бераман.

Яна кулиб юбормаслик учун Анзират унга синовчан қаради:

— Балким, гиламам тўқирсиз? — деб сўради у яна ўша шўх ва кинояли оҳангда.

— Йўқ, — деди соддадиллик билан Нормат. — Сен ишонмаяпсан. Биз у ёқларда, госпиталда – ёттанимизда, духтур қиз зерикаб қолмаслигимиз учун ипдан ҳар хил парсалар тўқишини ўргатарди. Сават, солдатларга жилоп, қўлжилоп тўқирдик. Баъзилари ўзларига эгнилик ҳам тўқиб олган эди.

Анзират Норматкинг зерикаёттанини, ишга ўрганган одамнинг бўш тургиси келмаёттанини англар, бироқ ўзи ҳам эрини зериктирмасликнинг чорасини топишга ожиз эди.

— Сиз ҳам бундай меҳмон – сеҳмон бўлиб қидирсангиз – чи? – дерди унга қараб ўтириб, ачиниб кеттан Анзират. — Боринг, кўринг, одамнинг тафтини одам олади. Ётаверсангиз, хуннайиб, ҳаммадан ажраб қоласиз – ку.

— Менинг боргим келмайди деяпсанми! — зорланди Нормат. — Борсам одамлар сўрайверишади, сўрайверишади. Фалон эмиш, чинми, писмадон эмиш, чинми, одам қони дарё бўлиб оқиб, шаҳарларни селдек оқизипти, чинми, деб. Урушни эсласам, кўнглим айнийдиган бўп қолган. Эсласам, бошим айланади, юрагим куйиб кетаберади. Худди мени бирор ҳозир отиб кетадигандек туюлаверади.. Э... қўй, баҳоргача уйда бўп турай... кейин бир борнб даволаниб келаман...

Анзират бундай пайтда эрини тушунарди. Нормат номусли одам эди. Ўзининг ожизлигидан уялишни ва бундан ниҳоятда қийналишини биларди. Шу сабабли у Норматта меҳмондорчилик тўғрисида бошқа гапирмади. Холмат билан

Ҳожар Норматнинг ёлғиз овунчоги эди. Ҳолмат бўш бўлди дегунча, отасининг олдидан жилмас, у тўқиётган пайпокларга ҳавас билан қараб туар, сўнг отасининг қўлидан олиб, ўзи ҳам тўқимоқчи бўларди. Шундай пайлари Анзират номус қилиган бўларди.

Ҳожар юзи лўппи, Норматнинг опаларига тортган, дўмбоқ, тўлиқдан келган қиз эди. Эсини энди таний бошлаган Ҳожар отасининг севимли «мушуги» эди. У отасининг қўйнидан чиқмас, уни от қилиб ўйнар, юрганда елкасидан тушмас, кечалари ҳур – ҳур этиб, Норматнинг қўйнида ухлаб қолар, Анзират уни ўз жойида ётишга зўрга кўндирап ва уни «отасининг мушуги» деб эркалар эди. Нормат урушдан келганидан бери болалаларига айрича меҳр билан қаради У Ҳолмат дарс қиляптими, йўқми — мунтазам текширап, Ҳолматдан билимли ва ўқимишли одам чиқишини истарди.

— Қани энди шу болалар ҳам катта бўлиб қолса – ю, сен билан мен буларнинг роҳатини кўриб чўзилиб ётсан, — дерди Нормат қариялардек орзу қилиб.— Мен у ёқларда юриб, Ҳолматимни катта бўлса, кемачиликка ўқишга қўяман, Ҳожарди эса духтурликка қўяман, деб ҳавас қиласдим. Бизда кемачилар бор эди. Матрослар дейшарди, улар жуда ҳурматли, обрўйи зўр эди. Доим кемада юришарди, ҳатто бозорга ҳам кемада бориб келса бўларди. Мен Ҳолмат катта бўлса кемачилар ўқишига қўяман дердим .

Норматнинг болаларча орзу қилиши қолмаган эди. Балки шу сабабли ҳам ҳаётта ташналик билан боққандир? Ҳар қалай, у болаларининг катта, ўқимишли одамлар бўлишини истарди. «Ахир, кема яхши – да! — деб ўйларди у. — Дарё бўлса бор, шартта ўтиради – ю, истаган тарфга кетаберади». У фақат бу дарёда кема сузолмаслиги ҳақида ўйлаб кўрмаганди. Орзулари унга ҳаётта тик ва ҳаққоний қарашга халақит берарди.

V

Бир куни тонг маҳал Нормат полвонникига Шариф кўса отланиб, қўлида милтиқ ва анча ташвишли қиёфада келиб қолди.

— Нормат, сени Шўро чақирияпти, мильтингни олиб бораркансан.

— Нима гап?!— деб сўради Нормат ҳайрон бўлиб, шўро раисининг ўзини бунчалик кеч эслаганига ҳайрон бўлиб. Шариф кўса Анзират турган томонга имо қилиб, Норматта кўз қисди. Шунда Нормат бирон муҳим нарса юз берганини англади.

— Иссикроқ кийиниб ол, — деди Шариф кўса. — Кечгача келмасак керак.

— Ака, чой ичиб олсаларингиз бўларди,— деди Анзират Шариф кўсага, унинг тонг—саҳарлаб, яна мильтиқ билан келганига тушунолмай, хавотирланиб.

— Чойга бошқа вақт. Бизни Олма қишлоғида — идорада кутиб туришибди.

— Эшилтан бўлсанг керак, Хотам чавандоз урушдан қочиб келувди,— деди Шариф кўса йўлга чиққач. — Уч йилдан бери ушлай олишмаётганди. Тожикистонда, тоғларда қочиб юрибди экан. Кеча ярим кечаси Сапар ўғри хабар берди, уйга келган эмиш. Бугун ушламасак, яна қўлдан чиқади. Раис сени фронт кўрган, опкел деди. Яна военкоматдан уч киши бор.

Тераклилик Хотам чавандознинг урушдан қочгани ва қаерлардадир қочиб юрганини Нормат илгари эшилганди. Бироқ, бирдан юраги хижил бўлди. «Наҳотки, энди ҳам тинч қўйишмаса?!» деб ўйлади у кўнглиниг бир четида норози бўлиб.

Идора олдида тўрт киши уларни кутиб турарди. Иккита қозоқ солдат, ҳарбий комиссариатда ишлайдиган нўғай капитан ва қишлоқ шўросининг раиси Мирзақул ҳам бор эди. Нормат уни негадир урушдан олдин раис бўлган пайтиданоқ ёқтиирмасди. Нормат қайтгандан сўнг уни Норсапар бечоранинг жанозасида кўрган ва «Бунча семириб кетибди?», деб ўйлаганди.

— Нормат,вой, занғар—ей, сенам ҳеч кўриниш берасанми ўзи,— деди Мирзақул ярим чин, ярим ҳазил дўй уриб. — Хотинингнинг қўйнидан чиқмай ётаберасанми?

— Раис бова, шу менсиз ҳам кўп экансизлар, бормасамми, деб эдим. Оёғим совуққа чидамайдиган бўп қолган, — деди у таваккалига баҳона қилиб.

— Ҳу—у! — товушига расмий тус бериб, қўлини пахса қилди Мирзақул. У негадир Норматни кўриб, типирчилаб қолганди. — Менинг томорқамга ишга бораёттанинг йўқ. Ҳукуматдинг буйругини бажаряпсан... Сенга ўхшаш занғар урушдан қочиб, ҳаммамизни шарманда қилди.

— Чоржетимликлар ҳали ҳеч кимди шарманда қилмаган, оғизга қараб гапиринг, раис, — деди Шариф кўса ўксинган ва ҳақоратланган қиёфада. У жуда оркаш, лекин сипо одам эди. Ўзи бригадирлик қиласиган қишлоқлар ҳақида ёмон фикр бўлишини истамасди.

— Менга деса иккаловинг ҳам борма! — зарда билан қўл силкиди Мирзақул. — Лекин мана, ҳукуматдинг одами келиб, талаб қиляпти, тушуняпсанми, илтимос қилаёттани йўқ, талаб қиляпти. Дизиртирни тутишга кўмак бер, деяпти. Кучимиз камлик қиляпти, деяпти.

Нўтай капитан уларнинг жанжалига эътибор ҳам бермади. У оёги ясама Норматга қараб, нимадир деб гўлдиради — да, бошини чайқаб, отига минди.

— Давай, канчай, Ташанич! — деди у Мирзақулга. — Поедим.

Олтига қуролланган киши Тераклига қараб йўл олишди. Тонг энди бўзара бошлаган, секинлаб майда қор ёғар, ҳаво баҳридилни очарди.

— Ташанич, — деди капитан Каттасувни кечиб ўтишгач, — кишлиқда отищма нельзя, а у него можетъ оружия. Вот так сделаем, сен адамларинг билан дарага чиқиб, йўлни тўс. Кишлакни ўраб олиб, уни кишлиқдан суриб чиқарамиз. Дарага блокада этабиз. Сен ана уни олиб, — Норматни кўрсатиб, — дарага боком турасизлар. Биз сенга гонят қилиб борамиз.

Мирзақул Норматга ижирғаниб қаради — да, отни дарага бурди.

— Ташанич, помни, живой нада, понил?

Мирзақул бош силкиди ва дарага қараб — отини йўрттириб кетди. Нормат ҳам унинг изидан Қоратўшини Дарага бурди. Ердаги қор ҳали эримаган, отни чоптириб бўлмасди. Нормат оёғининг устидаги қорни тез — тез қоқиб борар экан, безовта бўлар, юрагининг бир чеккасида ўжарлик ва терслик уйғонганди. «Наҳотки, бу падарқусур

урушдан ҳеч қутула олмасам? — деб ўйларди у. — Қаерга борсам, қувиб етади, Ҳа, Бойхун бобом тўғри айтган, меҳр – оқибат кўтарилиган юртдан уруш аrimайди деб. Эл қаерга борса, уруш қувлаб етади деб. Одам қони оқсан жойда меҳр – оқибат, барака кўтарилади. У ернинг нонини еган қонхўр бўлади, деяр эди отам бечора. Пайғамбарча умр кўриб, одам ўлдирмай кетди. Ҳатто уйини талаёттанданда ҳам қўлига миљтиқ олмади. Ким қўлига миљтиқ тутса, у уруш одамидир, у одамнинг ўзини ҳам уруш ҳалок қиласди, дер эди. Шу одамнинг ўғли мен қанча одам ўлдирмадим!... Аххх – хха! Ўша Бойхун бобомиз айттаи урушсиз юрт бормикан, бор бўлса, қаерда, қайдо? Қуёш олдин чиқадиган юртда, дейишарди. Қуёш олдин қайси элда чиқаркин?!»

Нормат булатли осмонга, қуёш чиқадиган томонга сўк ва изтироб билан боқди. Пороҳ дудини яна ҳидлашни ўйлаганда, кўнгли айниб кетди.

Даранинг оғзига кираверишда сойликда тўхташди. Олдинга ўтиб кетган Мирзакул ўёқ – бу ёқни кўздан кечирди – да, Норматнинг олдига келди. Унинг боядан бери ҳўмрайиб олгани бироз ёзилган, юзига қизиллик югуриб, анча мулоиймлашганди чоғи, очиқкўнгиллик билан буйруқ бера бошлади.

— Сен нариги бетта чиқ, ановн ҳарсанг орқасида тур, отдан тушма. Отингни кўриб, қочиб қолиши мумкин.

Қор ёгиши тезлашган, бир қадам нарини зўрга кўриб бўларди. Нормат қизғиши ҳарсанг олдига келди – да, раиснинг гапларини эсидан чиқарди. Отдан тушди. Ҳарсангта ҳоргин суюнди. Уюшиб қолган оёғини ёзиш учун силкиб қўйди. Бирдан бадани титраёттанини, иситма тутаёттанини англади. Эти қалт – қалт титраб, юрагини нохуш бир кайфнат эгаллади. У бўзрангга кирган осмонга, ўқпар бўлиб, учеб тушаёттан учқунларга, оппоқ далаларга, рус шаҳарларида кўрган чёрков қуббалариdek учбурчак гумбаз шаклидаги чўйқиларга қараб, кўнглига бу гўзалликни сингдириб олмоқчилик, чуқур нафас олди. Кейин бир нарсага аҳд қилгандек, милтигини тошнинг устига қўйди. «Бўлди, шунчаси, агар қирқ йил қирон келса ҳам энди одам отмайман. Ўзлари отаверсин», деб ўйлади. Қор қуюқлаш – ганидан даранинг нарига томони зўрга кўзга ташланарди.

— Нормат,— товуш эшитилди у ердан,— бу даюс қорҳам халақит берадиган бўлди—да. Йўл умуман кўринмаяпти.

Нормат юрагининг дукиллашини босиш учун ерга ёнбошлиди ва ютоқиб қор ялай бошлиди. “Йўқ, отмайман, ўзлари отаверишсин, — ўйларди у. — Ҳеч қурса, тушимда тинч қўйинглар, алаҳсирамай, одамларга ўхшаб яшай дейман, хотиним, болаларим ҳаққи, қон тўкмайман. Фашистлар у ёқларда, узоқларда қолди».

— Раис бова, балки бошқа ёқдан қочиб қолгандир? —— бақирди у. — Менинг оёғимга зах ўтиб кетди. Совуб қолди. Мен кетаверсам, бўлмайдими?

— Бошқа ёқдан қочолмайди, — Мирзақулнинг тантанавор товуши эшитилди. — Бошқа томон очик.

— Шу ердан қочади, ўтган йили шу ердан тогга қараб қочиб кетувди...

У гапини тутатмасдан қишлоқ тарафдан от дупури, «Стой, стой, стрелят — буду», деган товуш эшитилдию, варанглаб миљтиқ отилди. «Бу солдатлар эмас,— деб ўйлади Нормат шошиб турар экан харсангта пусиниб. — Шариф отолмайди, қўли чўлтоқ. Демак, Ҳотамда миљтиқ бор экан — да?» Шу пайтда яна бир ўқ узилиди. Отлар дупури аниқ кела бошлиди, кимнингдир ҳансираф югуриб келаёттани эшитилди. Нормат қишлоқ томонга қаради — ю, сойлик бўйлаб, югуриб келаётган кўланканни, қўлида косовдек нарсани кўрди. Кўланка Мирзақул турган томонга бурилдию, бироқ осмонинг қаратиб ўқ узилгач, йўлини Норматга қаратиб бурди. Мирзақул Ҳотам билан юзма — юз келишдан қўрқсан ва ўзидан балони узоқлаштирганди.

— Нормат, эҳтиёт бўл!.. — деб бақирди у.

Кўланка Нормат турган томонига жонҳолатда эмаклаб чиқа бошлиди. Нормат унинг оқиши пўстинини, қоп — қора соқолини кўрди. Кўланка тошга йигирма қадамча қолганда, у пусиб турган жойдан отилиб чиқди. Кўланка уни кўриб, миљтиқни даст кўртардию, Норматнинг миљтиқсиз, чўлоқланиб турганини кўргач, бостириб кела бошлиди.

— Қоч, Нормат, йўлимди тўсма, қоч, отиб тагпайман.

Нормат серрайганча унга қараб турар, фақат унинг озгин юзини, ўсиб кетган соқолини, қонга тўлган кўзларини кўрарди.

— Қоч, Нормат! — деди ёввойи товушда Ҳотам. — Сен ҳам сотилдингми, уккағар?! Кимларга сотиляпсан, қоч. Булар бутун халқни қириб ташлашди... қоч.

Нормат унинг улкан гавдасига, терлаб кеттан юзига қараб тураркан: «Мени отмаяптими, демак, оз бўлсаям имони бор экан», деб ўйлади.

Нормат Ҳотамни энг ҳалол ва мард чавандоз деб биларди. Ҳотам кўпкарида фирромлик қилмас, қўнғиротнинг одд отларини минарди. Носир жовканинг тўйида иккови зотнинг тенг ярмисини айришган, шунда Ҳотам чавандоз Норматта «фирромликни билмас экансан, ке, от алмаштириб чопамиз», — деган ва от алмаштишган эди. Шундан кейин иккови ўргасида ошначилик пайдо бўлганди.

— Қоч, Нормат, қонимди қайнатма, — деди бостириб келарди Ҳотам чавандоз.

— От!! — бақирди нариги бетдан Мирзақул. — От, Нормат, отиб ташла, ҳозир қочиб кетади, отиб ташла, энагар!..

Нормат Ҳотамнинг йўлини тўсади.

— Ҳотам, қочишинг бефойда, бари бир отишади. Яхшиси, ўзинг таслим бўл...

— Менга гап ўргатма! — Милтигининг затворини тортди Ҳотам. — Бари бир отиб ташлашади. Ҳаммамизни отишади бу динсизлар...

— Бўлмаса мендан ўтолмайсан, — деди Нормат, унинг йўлини тўсиб. — қани, зўр бўлсанг, мени от! Мен сени қўйиб юбормайман.

Ҳотам милтигининг тепкисини ушлади — ю, нимадир эсига тушиб, ақлдан озаётгандек ўкириб юборди.

— Мен сени отолмаслигимни биласан, уккағар, қоч, бўлмаса барибир отаман.

— Йўл бермайман, — унинг милтиғига ўзини ташлади. — Эсингди йиғ.

Орқадан от дупури тобора яқинлашиб келарди. Кимdir русчалаб сўқинди. Ҳотам чавандоз Норматни силкиб ташлади, ундан кутуоломагач, орқага чекиниб, қорнига төпди:

— Ўзингдан кўр, чўлоқ!

Киндигининг устидан тепки еган Нормат «иҳ» деди — ю, милтиқни қўйиб юборди ва қорнини ушлаб юз тубан

йиқилди. Ҳотам чавандоз унга эътибор ҳам бермай, юқорига тирмашди. Харсангни айланиб, йигирма қадам юрмасдан нариги бетдан етиб келган Мирзақул изидан ўқ узди. Ҳотам чавандоз илкис орқага бурилдию, раисни кўриб, хунук қилиб тиржайди – да, чалқанча йиқилди ва пастта думалаб кетди.

Мирзақул унинг милтигини отнинг устидан узалиб олди – да, атрофга ғолибона назар ташлади. Ҳотам чавандоз боя Нормат ўтирган харсангга таяниб, осмонга қараган кўйи қотиб қолган, қийшайиб турган телпаги остидан ўсиб, патак бўлиб кетган соchlари кўзга ташланиб турар эди.

Нормат ўзини ўнглаб, ўрнидан турмасдан орқадагилар етиб келди. Бир солдат отдан тушиб, жасаднинг бошини кўтарди – да:

— Тамом, — деди, — шуля на сердцу.

Нормат ўрнидан туриб, буқчайган ҳолда Ҳотамнинг тепасига борди. Ҳотам чавандоз оёқларини чўзиб, улугвор қиёфада чалқанча тиржайиб ётар, бўйни, оқ пўстиннинг ёқалари қонга беланганди. Норматнинг қонга кўзи тушиши билан бирдан боши айланиб кетди, миясига нимадир урилгандаи бўлиб, қўнгли беҳузур бўла бошлади, кўзларини чиртта юмиб олди.

— Ҳой, даюс! — бақирди унга қараб, от устидан Мирзақул. — Ҳали сенми, сотқинга ёрдам берадиган? Сен ҳам шу билан қўшмозор бўл! — У Норматнинг юзи аралаш устма – уст қамчи туширди. — Бу ишинг учун Сибирь қиласман!

Юзига тўсатдан тушган қамчи зарбидан Норматнинг кўз олди чараклаб кетди. У секин Мирзақулга қаради. Кўзлари қонга тўлганди. Мирзақул унинг юзи аралаш иккинчи қамчини тушириш учун кўтарди, бироқ Норматнинг бақувват қўли қамчини ҳаводаёқ ушлаб олди. Нормат қамчини силкиб торти. Мирзақул отдан учиб, ерга қулади. Нормат унинг устига бостириб борди. Унинг қулбўлари тагида бирдан гуввиллашга ўхшаган шовқин бошланган, аскарларнинг уларнинг орасига тушганини ва ўзини бир четга тортаётганини ҳам билмасди. Кейин у бир силикиниб, аскарлар қўлидан чиқиб, Мирзақулга қараб юрди ва шу дафъя бирдан хириллаганча ерга қулади.

Шариф кўса отдан тушиб Мирзақулни ўрнидан турғизди. Қўрқиб кетиб пишқираётган отига қайта миндириди. Норматнинг олдига бориб, хавфсираб қаради. Норматнинг чакка томирлари бўртиб чиқсан, кўзларининг атрофи кўкариб кетган, оғзининг бир чеккасида сарғиш кўпик пайдо бўлаётган эди.

— Қўйинглар, ўўзимм... — деди у солдатларга ва Норматнинг қўлтиғидан олиб, турғизди. Бироқ у Норматни суяб қололмади. Нормат чинқирганча, икки қўли билан чакка томирларини ушладио, гир айланиб ерга қайта йиқилди.

Капитан нима ҳол юз берганини англадими, Мирзақулга зарда билан қараб, отдан иргиб тушди, Норматнинг чакка томирларини уқалай бошлади.

— Снег... снег!.. — бақирди у аскарларга, сўнг Шариф кўсага қараб, — втирайте со снегам... втирайте со снегам!.. — деди бор овози билан.

Бу ерда турғанларнинг ҳаммаси, ҳатто Мирзақулининг ўзи ҳам эсанкираб қолди. У оғзидан кўпик келиб ерда типирчилаб ётган Норматта чўчиб ва ваҳима билан қараб турарди.

VI

Бийди момо — бутун Терсота қишлоғига Берди Шукур бобо томонидан амма бўлардан. Аслида қишлоқ бир авлоднинг унча узоқлашиб кетмагаи шахобчалари эди. Шу сабабли ҳар бир уйда азами, тўйми, кампирнинг ўрни бор, ҳар бир нарсага, хоҳ жанжал бўлсии, хоҳ тўполон — ҳаммасига аралашишга ҳақлиман деб ҳисоблар, ҳеч бир нарса унинг иштирокисиз ёки маслаҳатисиз ўтмасди. Мабодо унинг йўқлигига бирон мажоро ёки қиз узатиш маслаҳатлари бўлиб қолса, у бундан ўзини жуда хўрланган ҳисоблар, ўша қизнинг ота — онаси билан гаплашмай қўяр ёки маслаҳатни қайтадан бошлаб, ҳамма шов — шувига ўзи аралашиб, яна ўзи тинчтишиб қайтар эди. Усиз ҳеч ким совчи жўнатолмас, кимнинг зоти паст, кимнинг тоғаси ўгри, кимнинг отаси хотинчалиш, кимдан яхши қайнона ёки қайнота, кимдаи яхши куёв ёки келин чиқади — ҳаммасини билар, ҳаммасини ҳал қиласар эди. Унинг бу кайвонилигига терсоталиклар ҳам ўрганиб

қолган, унинг аразидан қўрқибми ёки у ҳар бир ишни жуда осон ҳал қилишига ишонгани учунми, ҳар қалай, улар бу катта аммаларини энг кичик оилавий йигинлардан ҳам қуруқ қолдиришмас, ҳурматини жойига қўйиб, чақириб боришарди. Кўпгина хотинлар унинг аччиқ сўзларидан, койишларидан безор бўлган бўлса ҳам уни ичида ёмон кўришса ҳам сиртларида жилмайиб туришар, уни кўрганда югуриб бориб кўришар ва шунда ҳам ундан бирон койиш эшитишдан чўчиб туришарди, ҳамиша уни кимгадир, танбеҳ бералиёттан ёки кимнидир уришаёттан қиёфада учратиш мумкин эди. «Шулар ҳам аёлми! — дерди у аёллар ҳақида. — Аёл деган рўзгорни сантдай қилиб юриши керак, булар эса овларини кўрсатиб кўчада ўтиришни яхши кўради». «Эркак деган, эркақдай бўлиши керак, — дерди у эркаклар ҳақида. — Хотинга ўхшаб, мижғов бўлмасин, Бизнинг даврларда эркакларнинг изидан бир ҳафта юриб ҳам бир оғиз сўз эшитмасдик. Ҳозиргилар эса, гал чайнаб юришади». Бийди момо қишлоқда ҳар бир нарсага аралашибга ҳаққим бор деб ҳисоблаши бир томондан аммалиги бўлса, иккинчидан кўпни кўрган, бошидан кўп нарсаларни ўтказган қишлоқдаги энг кекса кампир эканлиги эди. Бошига тушган қийинчилклар, кулфатлар унинг қаддини букишдан кўра, тик қилиб қўйган, у ҳали ҳам қарилукни бўйнига олгиси келмас, ғайратли эди. Баъзи чоллар: «Бийди, кундан — кунга яшариб боряпсан, ке, совчи қўйиб, сенга уйланана қолай, юрасанми ўғилларингди эшигига сарғайиб», — дея тегишарди. Бу ҳазилдан кўра унинг чиндан ҳам ёшариб бораётганлигига ишора ҳам эди. «Раҳматли Бухор полвоннинг полвонлиги у ўлгандан кейин хотинида қолди», дейишарди чоллар. Авваллари анча торгинчоқ аёл эри ўлгандан кейин бирдан қишлоқга аралашиб, тўй — азасида бел боғлаб хизмат қилиб, элнинг арзандасига айланганди. Бухор полвондан икки ўғил билан жуда ёш қолган бўлишибга қарамай, бошқа эр қилмади. Бутун кучини шу ўғилларини одам қилишга сарфлади. У ўроқ ўрар, ўтин ёрар, беда ташир, буғдой янчар, тегирмон тортар, оғил қурар, навбатида мол боқар, тўйларда эркаклардан қолишмай хизмат қилар эди. Одамлар доим уни эрининг эски қора чопонини кийиб, белини чилвир билан боғлаб, ўғиллари ёнида бирон иш

билин шуғулланаёттанини кўришарди. Унинг катта – катта тошларни кўчириб, томорқасига сув ҳайдашттанини, Бухор полвоннинг баркашдай кетмонини баланд кўтариб, лой қориёттанини, эшакка боғ – боғ қилиб ўтин ортиб келаёттанини кўришиб, унинг бунчалик куч – қудратни қаердан олаёттанига ҳайрон қолишарди Бўлмаса жикаккина аёл эди. "Бутун гавдасини битта ун халтага жойласа бўлади, лекин ўзи бутун қишлоқча жой бўлмайди", дерди Ражаб подачи.

Ҳамма босмачидан қўрқиб, ўтин теришга чиқмай қўйганда, у бемалол қари эшагини етаклаб ўтин териб келарди. Очарчилик бошланиб, бир бурда нон топиш учун бошқалар Маккага бориб келишга ҳам рози бўлган пайтлар унинг дастурхонида нон бўларди.

Ҳеч ким унинг нима учун бунчалик жонини жабборга бериб, куйиб – пишаёттанини билмасди. Қўлини сўраб келган совчиларни бир хил жавоб билан қайтарарди: «Мени эрим талоқ қиммаган, ҳали ҳам унинг никоҳидаман». Ҳеч ким уни бу фикридан қайтаролмади. Орадан йиллар ўтиб, келинли, неварали бўлгандан сўнг у нима учун ўша пайтлар бунчалик куйиб – пишганини ва биронта ўзига тўқ одамга тегиб олиб, умрини ташвишсиз ўтказмаганини келинларига аён қилгандек бўлди: «Қайноталаринг қандай одам эди – я, ҳар бир елкасига тўртгадан одам ўтирарди, икки бети қип – қизил, кўзлари бургутницидай. Ундан ҳатто Амир Олимхон ҳам кўркарди»... Сўнг доимгида Бухор полвоннинг қандай ўлганини гапириб берарди. Бухор полвон авлоди азалдан полвонлиги ва чавандозлиги билан довруқ қозонган қадим авлодлардан бўлган. Бу авлод ота – бобомиз айиқ бўлган деб, фахрланишарди. Бухорогача довруғи кетган Бухор мерган шу авлоднинг ягона сўнгти вакили эди. Ундан фақат бошқа ургуликлар эмас, Шаҳрисабз беги ҳам чўчиб муомала қилган. У учиб бораётган чумчукнинг кўзидан урган. Ўчакишган одамидан ўчини олмай тинчимаган. Унинг даврида ўтроқ қўнғирот қишлоқларда бирон марта ҳам босмачилар бостириб кирмаган, қўрбошилар Бухор мерган билан ўчакишиши истамаганлар. Амир Олимхоннинг ўзи унинг қўлидан каклик, тустовуқ оттириб еган. Унинг ҳурматини доимо сақлаган. Амир Бухорога чорлаб, унга

одам қўйганда, у: «Амирингда менинг ишим йўқ, агар иши бўлса ўзи келсин», — деган. Шундай одам кичкина, бор — йўғи калладай келадиган тошнинг остида қолиб ўлган. Тошни ким думалаттанини, ким уни Boқирчининг зови устида ярим кечагача пойлаб ўтирганини чоретимликлар ҳозиргача билишмайди. Билганлари шуки, тош унинг қоқ кўкрагини эзиз юборган. Бухор полвон ўлими аниқлигини, шу тош Азроилнинг хабарчиси эканлигини билиб, уйигача зўрга етиб келган, етиб келган — у, айттан охирги гапи шу бўлган: «Хотин, уйнинг чирогини ўчирма, болаларимни бирорга хор қилма, агар уйимнинг чироги ўчса, тоабад сендан рози эмасман...»

Бийди момо бу ҳикояни неча марта айттан бўлса ҳам, яна айтаверади. Ҳар айттанды қўшиб — чатиб айтади. У, келинларим билсин, айиқ авлодининг чироги мендан кейин ҳам учмасин деб, атайлаб қайта — қайта айтади. Айиқ авлодини ўстираётганларидан, бу авлодга келин бўлганларидан фахрланишларини истайди. Келинларига невараларини ориятли, номусли қилиб ўстиришларини, ҳеч кимга хор қилиб қўймасликни талаф қиласди. У набира — ларини боболаридаи полвон бўлиб ўсишини истайди, чунки ўзи болаларини шундай қилиб тарбиялаган эди. У ўғиллари одам қилиш учун қўлидан нима келса, одамзод нима қилиши мумкин бўлса, ҳаммасини қиласди. Болаларига бирорнинг бир қошиқ сутини ичирмай, ҳеч кимга хор қилмай ўстирди. Ўзи тиланди, ўзи ямоқ кийди, ўзи хўрланди, лекии болаларини тилантирмади, ямоқ кийгизмади, хўрлатмади. Болалари ҳам ўзи ўйлагандек ориятли, номусли, зийрак йигитлар бўлиб вояга етишди. Каттаси отасининг издан борди, тўйларда олишиб, ном қозонди. Кичиги — мўминроги чавандозлиқдан ном олди. Ўғиллари биринчи зотларини келтириб ташлаганда, у шунча чеккан заҳматлари бекорга кетмаганини англаб, эри ўлгандан — бери биринчи марта тўйиб — тўйиб йиглади.

Бироқ унинг орзуси энди амалга ошиб, Чоршонби оқсоқолнинг қизига совчиликка бораман деб турганда, катта ўғли Тераклидан Пирназар печкачининг қизини олиб қочиб келди. Бийди момо қанчалик ўжар бўлмасин, ўғли ундан ҳам ўжарроқ эди — сўзидан қайтмади. Пирназар қизини

оқ қилди. Катта ўғлида етишмаган орзусига кичик ўғлида етишди. Мулла Ташнинг кенжак қизини келин қилиб одди.

Бийди момонинг катта келини оққўнгил бўлгани билан уқувсиз, бўш – баёв, бирон ножўя иш қилиб қўйишдан чўчиб юрадиган соддагина аёл эди. Ўгай онанинг ҳамиша бошига муштлаб қарғашидан қилпачик бўлиб қолганди. Тезак териш, молхона кураш, сув ташиш, ўчоқ ёқиш каби қора ишларни қилиб юриб, қўли овқат қилиш, тикиш – бичиш, уй тутиш ишларидан узоқлашиб қолганди. – «Сен менинг суқсурдай ўғалимни хор қилдинг, — дерди унга Бийди момо. — Сен кўзингни сузиб, иштонингни тагингта тўшаганингдан кейин, у нима қиласин? Агар сендан бошқа бўлганда, менга келин бўлганидан миннатдор бўлиб, қўлимни совуқ сувга урдирмасди. Сен бўлса... Изингдан бирор ишингни қайтадан қилиб юриши керак».

Бийди момо токи кенжак қелин тушгунча, катта келиннинг кунини бермади. Уни койир, йиглатар, йигласа, яна койир, унинг ожизлигини кўриб, ғаши келар, чунки унинг ўзи ҳеч қачон ожизлик қилган эмас, гап қайтарса, ўғлига айтиб урдиради. «Сен Бухор полвон авлодининг давомчисиссанми? Бу ҳолда Бухор полвоннинг шўри қурийди. Бурнингни тортишни билмайсан, қандай қилиб бола ўстирасан?» Ёки жаврагиси келиб турганда, қарғишнинг қуюнини чиқариб ташларди. «Илоё у дунё – бу дунё ўнгланма. Сен менинг бутун йигирма йил чеккан заҳматимни бир этагингни кўтаришинг билан чиппакка чиқардинг, менинг хонумони – мни куйдирдинг. Бухор полвоннинг арвоҳини чирқил – латдинг. Бу авлоднинг кушандаси бўлдинг. Илоё, ажалинг ўзингдан бўлсин. Сен Бухор полвоннинг авлодини хор қиладиган бўлдинг».

Катта ўғли оғир одам эди. Энасининг жавраларига жилмайиб қўярди, холос. Баъзан нимжон хотинини ўлардай савалаб, ўзининг уйига киритиб ташлардида, индамай ишини қилаверарди. Хотини ўласи бўлиб қолса ҳам, гинг демай, на эрига, на қайнонасига сўз қотмай, икир – чикирларини қилиб кетаверарди. Бийди момо унинг шу хусусиятини – эрига содиқлигини ёқтиради.

Кичик келин тушигандан кейин у негадир яна ўша уқувсиз, ўзининг орзу – умидига зомин бўлган келин билан

қолди. Кичик ўғлига эса ҳаётнинг ўртасидан жой қилиб берди. Уй ажралган билан қозон бир ерда қайнади, бир дастурхонда овқат ейиди, бир товатошга нон ёпилди.

Кичик келин – ўзи орзу қилиб олган келини келишган, шириңсўз, хушмуомала чиқди. Бийди момонинг айттанини айтган, деганини деган қилиб бажарар, унинг ишидан бирон қусур топиш қийин, шундай бўлса ҳам номига унинг бундай этчилигини койиб қўярди. Кичик келин одобли, фаросатли, одамнинг ичига кириб кетай дерди. Бир оз керилиб юришга мойил бўлса ҳам, Бийди момонинг оддида ўл деса ўша заҳоти ўларди. Ҳаммага меҳрибон, одамнинг кўнглидан чиқадиган келин эди. Катта келин тушганидан бери унча борди – келдиси йўқ, қишлоқдошлари билан у бир ойда чиқишиб кетди, худди азалдан шу қишлоқда туғилгандай. Ҳамма кичик келинни ёқтириб қолди. Катта келин эса ҳали ҳам ҳуркак, ўз соясидан чўчигандек бўлар, бу эса Бийди момонинг ғашини келтиради. Ўғлига неча марта бунингни олиб бориб ташла отасиникига деса ҳам ўғил гапга кирмади. Изма – из туғилган болалардан кейин Бийди момо ҳам тақдирга тан берди. У "ҳамма умидим кенжака келиндан, Бухор полvonнинг давомчиларини шу тарбиялайди" дерди.

VII

Бийди момонинг ўғилларини урушнинг биринчи йилиёқ бир пайтда олиб кетишганди. Келинлар энди Бийди момонинг қаромоғида қолди. Кенжака келин бу пайтда бу уйга тушганига энди бир йил бўлганди. Бошида онда сонда келиб турадиган хат кейин тақда тўхтади. Бир йил бурун эса унинг уйига Абдулла почтачи билан шўро котиби Панжи чўлоқ кириб келишди. Улар анчагача жим ўтиришди Гўё бу уйга нега келганини ҳам эсларидан чиқаргандек эди. Иккита келин ҳам печка ортида қулоқларини динг қилиб туришарди. Бийди момо эса дастурхоннинг попугини ўйнаб, улардан гап кутиб турарди. Охири у чидолмади. Абдуллага қаҳрли кўзларини тикди. Абдулла унинг қарашидан довдираф қолди.

—Момо, ўзи яхши юрибсизми? Оббо, сизей... – деди у титраб - қақшаб.

— Гапни чўзма! — ўша оҳангда деди Бийди момо — Нима бўлди?

Абдулла ҳам ерга қаради. Қийналди:

— Каттангиздан қорахат келди.

Бийди момо сесканиб кетди — ю, лекин ўзини йўқотмади. Почтачи билан чўлоқ кириб келганда у номоз ўқиёттан эди. Ўша пайтдәёқ булар беҳудага келмаганини сезган ва ўзини ҳар нарсага тайёр туришга ҳозирлаганди. Бу аёлмижозлар олдида ўзини йўқотиб қўймасликка — чидашга қарор қилган эди. Катта келин,вой, деб юборди — ю, деворга суюниб қолди Унинг ранги оқариб кетганди. Кичик келиннинг юзи қизариб, ҳеч кимдан яширмай, эркин нафас олди: юзида хурсандлик аломати ярқ этиб кетди.

— Вой, акајоним, — дея у овозига ясама тус бериб, йиглаб юборди.

Бийди момо худди намоз ўқиётгандек, яна узоқ кўз юмиб турди. Йиглаб юборган келинларита ўқрайиб қаради. Сўнг яна бардам, худди ҳеч нарса юз бермагандек, Абдулла сариқقا тикилди. Иккови ҳам бошини эгиб ўтиради. «Йўқ, бу ерда яна бошқа сир ҳам бор, агар фақат шу гап бўлса, сариқнинг ўзи ҳам келтириб бераверарди. Чўлоқ, бу ерда нима қилиб юрибди?»

— Шуми? Йўқ, сенлар яна бир нарсани яширяпсизлар. Айтинглар, менга ҳеч нарса қилмайди... Мендан яширсаларинг тириклай ўлдирасилар... гапир, гапир!..

Абдулла сариқ гапирайми декандек Панжи чўлоққа қаради. Панжи чўлоқ бошини этганча ўтиради.

Бийди момо бўғзидағи куйикни зўрга ютди. Ўзини йўқотиб қўйишдан қўрқандек, бир қўлига суюниб, Абдулла сариқ ва Панжи чўлоққа еб қўйтудек қаради:

— Вой, чурра — ей, вой чурра — ей, отанг сипочилик қимлмаган, энанг сипочилик қимлмаган, шўрликлар бир парча ионгѓа зор бўб, бир иштонни алмаштириб кийиб юришар — ди... Сенга ким қўйибди сипогарчиликни, чурра..! Айтавермайсанми тўғрисини?!

Кичик келин йиглашдан тўхтаб, уларга қулоқ солди. Панжи чўлоқ оғринди. Ҳатта ўшро идорасида ҳам унга Панжи Турдиевич деб муомала қилишса — ю, унинг қўл остидаги бир исқирит кампир унинг нозик касалини эслатиб,

ҳақорат қилиб ўтиrsa... Бошқа пайт бўлганда у кенглик қилган бўларди. Бироқ, ҳозир у ўзини хўрланган ва ҳақоратланган, деб ҳисоблади. Бунинг учун ўзининг ким эканини эслатиб, аламини олмоқчи бўлди.

— Бўлмаса, момо.. кўпига келган тўй экан... азани иккита қилинг. Кичигингиздан олти ой олдин қорахат келган экан. Абдулла aka сизга беришга қўрқиб юрган экан..

Кичик келин ўкириб, ўзини ерга ташлади. Печка орқасидан катта келин ҳўнгиллай бошлади.

— Ташқарига чиқинглар! — ўшқирди Бийди момо — Чиқ, кўзимга кўринма! Кимларнинг олдида йиглаяпсанлар?!

Шу нокасларга кўрсатиб йиглаяпсанларми, чиқинглар, икковларинг ҳам чиқ, чиқ!.. Куйдиргилар... вой.. шўрпешонам!..

Икки келин ҳам унга биринчи марта қулоқ солишмади: ўкириб йиглай бошладилар.

— Вой, шунқорима! — бақириб, ўзини ерга ура бошлади кичик келин. — Вой, бургутима, арслоним — ай, арслон — гинам — ай... Мени ташлаб кетдингми — я, мени кимга қолдириб кетдинг — а, сен ўлгунча мен ўлсам бўлмасмиди, арслоним — эй!..

Бийди момо бошқа ҳеч нарса демади. Панжи чўлоқ фотиҳага юз торгди. Бийди момо уларнинг далласига ҳам, чиқиб кетаётиб айттан гуноҳкорона «Момо, бизда нима айб, катталар бориб айтинглар, яхши бўлади, дейишганди». Деб минғирлаб кетиганларига ҳам, келинларнинг йиғисига ҳам эътибор бермади. Бир нуқтага тикилиб ўтираверди. «Уларнинг олдида манави шаллақиларга ўхшаб айюҳаннос солмаганим яхши бўлди... бирорвга сиртингни берма, деб ўргатарди Бухор полvon. Ҳа, бечора Бухор полvon, шундай ўргатарди. Э, Бухор полvon, энди мана иккимиз ҳам бечора бўлдик. Сенинг орзунгни амалга ошироимадим, мендан рози бўларсан. Қўлимдан келганини қилдим. Мана энди сенинг Айиқ авлодингга ҳам чек қўйилди, Пешонада ёзилгани шу экан, Бухор полvon».

...Эртасига Бийди момо икки ўғлига аза очди. Жаноза ўқитиб, қора кийди. Шундан кейин у қишлоқда бошқа ишларга аралашмай қўйди. Кун бўйи уйида, бир — бурчақда, ўғилларининг кийимларини титиб, аллаким биландир

таплашиб ўтирадиган ва одамларга бегонасираб қарайдиган, одамлардан хавфланадиган ва уларга адоват билан тикиладиган одат чиқарди.

VIII

Нормат Янгибой оқсоқолни кўриб келиш учун Қизилийримгача борди—да, довондан ўтолмай қайтиб келди. Ҳаётининг Келдиёр сўпи билан туташ қисмига гўнг таший бошлади. У дарадаги воқеадан кейин ўзини анча олдириб қўйган, юзидаги заҳиллик яна ҳам ортганди. Анзират тушгача унга ёрдам берди, сўнг уй йиғиштиришга тушди.

Тушдан кейин Анзиратнинг олдига Шариф кўсанинг хотини Турсуной гуж — гуж чиқди. Анзират меҳмонхонада чанг босиб ёттан келинлик кўрпаларини ағдар — тўнтар қилиб, уй кўтармоқда эди.

—Келин, — деди Турсуной меҳмонхонага бурни узун бошини суқиб. — Нима ташвиш қиляпсиз? Вой — бўй, кўчаяпсизларми?..

—Қуриб кетсин, куя еб кетяпти буларни, — деб зорланди Анзират. — Индамай десанг, кўзнинг нури сингган, индасангиз, кўриб турибсиз. Уф... чарчаб қолдим...

—Роҳат қиз кўрибди, юринг, аёллар йигини бўлаёттан эмиш.

—Вой, қиз эканми? — Анзират ўтириб қолди — да, суюнганидан чапак чалиб юборди. — Орзусига етибида. Бечора ҳаммаси ўғил, деб куйиниб юрарди.

—Юринг, бугун чақирган экан, — деди Турсуной гуж — гуж қат — қат кўрпаларга ҳасад билан кўз югутирап экан.

—Ҳозир мана бу дардисарларди йигиб олай. — Анзират кўрпаларининг орасига қуядори сепди. Хонани ачимсиқ ҳид тутиб кетди. Анзират кўрпаларни буклаб жойига қайтиб йига бошлади. Куроқли кўрналар оғир эди. Тезда у ҳансираф қолди. Турсуной гуж — гуж ичкарига кириб, бир бўхчанинг устига ўтирди — да, Анзиратта қараб ўзи ҳам уфлаб қўйди.

—Муслим эри ўлганини эшигтандан бери қадамини суюқ оляпти эмиш, — деди у яхшилаб ўтириб олгач. — Ойхол айтди. Эркак ўтса, изидан термилиб қолармиш.

—Унгаям қийин — да, — деди Анзират Бийди момонинг кичик келини ҳақида аввал ҳам шунга ўхшаш гапларни эшиттанини эслаб, кўнгли фаш тортди. — Бир йил ҳам келин бўп яшагани йўқ, шўрлик.

—Бийди момонинг ўзи ҳам буни билса керак? — гумон қилди Турсуной гуж — гуж. — Ўзиникини яшириш учун бошқалардан йўқ жойдаги айбни бетига айтиб, қопиб олаётган эмиш.

Анзират Бийди момонинг Турсуной гуж — гужни ўшакчилиги учун ёқтирмаслигини ва ҳамиша уни мулзам қилиб юришини, биларди. Бийди момо бор даврада Турсуной гуж — гуж ўтиrolмасди. Турсуной гуж — гуж заҳил — қизғиш юзли, узун бурун, кўп гапиришидан лаби доимо тупукланиб юрадиган бу аёлга миш — миш сув ўрнида эди. Қишлоқда ва қўшни қишлоқларда нима ҳодиса юз бергани, ким хотин қўйган, ким хотин устига хотин олган, кимнинг қизи ким билан кулишиб турган, кимни эри урган, ҳаммасини шу аёлдан билиб олиш мумкин эди. Хотини Шариф кўсанинг акси эди. Шу сабабли уни доим пешонаси шишган ёки моматалоқ бўлган, яъни эрининг жаҳлининг асоратларини кўриш мумкин эди.

—Бийди момо ҳам қариdi. Олдинлари жуда одил эди. Энди ўзимники тўғри дейди, ўзиникини зўрлаб ўтказади.

— Турсуной гуж — гуж гап мавзусини бошқа мавзу билан улаш учун бидирлай бошлади.

—Аммамга ҳам қийин,— ёнини оди Анзират кўрпаларни тахлар экан. — Бирдан икки ўғли... туф — туф, худо кўрсатмасин. Бу дунёда ёлғиз шуларни деб, яшаб юрибди. Энди нимаям қилсин, ўзини урагра чўқ тополмай юрибди. Келинларигаям ишонмайди. Шунинг учун ичини ит тирнаб ётибди. Ўх — ўх — ў, ў...ҳў...ӯ...ӯ...ӯ!..

Анзират гапини тутатмасдан бошини ушлаб ўтириб қолди, бир қўли билан оғзини ушлади.

—Вой, келин! —Турсуной унинг олдига келди. — Нима бўлди сизга?! Вой, ўлмасам...

—Ў...ӯ...ӯ!..— Анзират зўриққанидан кўзларидан ёш чиқиб кетди. Ҳеч нарса демай, югуриб айвонга чиқди — да, бир бурчакка бориб, “ў — ў — ўҳў”, деганча шариллатиб қайд қилди. Изидан югуриб чиқсан Турсуной гуж — гуж унинг

бошини икки қўллаб ушлади.

— Вой, ўлмасам, бу нимаси?! — унинг юзига чўчинқираб назар ташлади Турсуной.

— Ий... ис... — деди Анзират. — Ис кўнглимни кўтарди. Бошим айланаб кетди.

— Келин?.. Келин, бу нима деганингиз? Бошиңиз айланди?!

У Жангил табибга ўхшаб, Анзиртанинг қорнига косовдай қўлларини жўнатди ва худди бир нарса топмоқчилик, ҳаммаёғини ушлаб чиқди.

— Ие...ҳмммм... қани, уйга киринг—чи... Вой, мен ўлай, бўйингизда бор—ку, юринг... юринг... ётинг.

Анзират зўрға ўрнидан турди. Атрофида айланадиган Турсунойнинг гапларини деярли эшитмади. Эшитса ҳам нима деяёттанини тушунмади... У Турсуной гуж — гужнинг ёрдами билан зўрға ўрнидан турди — да, печкали хонага кирди.

— Қатиқ борма, қатиқ ичинг,— деди Турсуной гуж — гуж. Уни ётқизиб, қорнини яна секин пайпаслаб кўрар экан, бирдан қўлинни тортиб олди — ю, Анзиратнинг юзига қараб, бирпас безрайиб қолди. Сўнг югуриб катта кадидан ёғоч косага қатиқ солиб келиб, Анзиратта ичирди.

— Ичинг, босади, ичинг,—деди у парвона бўлиб. — қачондан бери шундай бўляяпти?

Анзират ҳолсиз ва яна айниётган кўнглини босиш учун беихтиёр жавоб қайтради:

— Бир ойча бўлиб қолди, — шундай деб яна ўхчили.

— Бир ой? — Турсунойнинг кўзлари ола — кула бўлиб кетди. Анзиратни энди кўраёттандек, анграйиб тикилиб қолди. Кейин унга қатиқ ичирди. Ўрин солиб берди — да, унинг кўзини юмисиз, мадорсиз ёттанини бирпас кузатиб, лип этиб ташқарига чиқди. Айвонга чиқиб, нима қилишини билмай, тарааддулданиб турди, сўнг қишлоқнинг нариги чеккасига қараб шошиб жўнади. Тез юрганидан икка марта қоқилиб кетаёзди. Унинг юзида қандайдир ташвиш билан бирга безовталик акс этмоқда эди. У ичиди гап ётмайдиган аёл эди. Шу сабабли у ўзи олдин гувоҳи бўлган воқеани кимгадир тезроқ айтиб ёрилгиси келарди. Унинг бундан бошقا нияти ҳам йўқ эди.

—Турсуной бойбича, мунча тиржаясиз, отангиз тирилиб келдима? — деди йўлда учрашиб, тўқнашиб кетаёзган Аляр чол. — Сал кўзга қараб юрсангиз — чи, тилла топгандай ҳовлиқмай.

—Вой, тоға, кўрмай қопман, — деди Турсуной ишшайиб.— Лекин тилла топгандаиам каттароқ нарса бор. Ҳали эшитасиз.

Алар чол унинг гапига ҳайрон бўлиб, тўхтаб изидан қараб турди: «Сочингдан осилгур, бу ҳовлиқма яна нима машмаша топди? — ўйлади чол. — Бийдиникига бораяппа? Ҳа, Бийдиникига. Нима бало? Бийдининг бирон боласидан хат кеп, ўлгани ўтрик чиқдимикии?! Шундайга ўхшайди, бу тўқалакни Шарип қандай қилиб хотин қип юрибди экан, нақ тог эчкисининг ўзи — я!»

Алёр чол оғилхона эшиги олдида қатта ёғоч қуракка суюнганча уларни кузатиб турарди. «Бийди қурғур чўкиб қолди — да! — ўйлар эди у. — Эҳ, шундай кампир икки ойда чўпдай бўлиб қолди — я? Худди тутдай тўкилди!» Алар чол чуқур хўрсинди — да, сақолини қувлик билан силаб қўйди. У Бийди момонинг уйига кириб кетганини, бошига йўл — йўл желак ташлаб, Турсуной гуж — гуж билан ўзига қараб келаётганини ва унга етмасдан, сал наридан бурилиб, Норматникига қараб ўрлаганини кўриб турарди. Алар чол ўрнидан туриб, оғилхонанинг устига чиқди. У Бийди момони бунақа тез юрганини кўрмаганди. Чолнинг қишлоқдаги қизиқ бир воқеадан қуруқ қолгиси келмаётганди. Иккала аёл Норматнинг уйига кириб, анча йўқ бўп кетишганини, уйга кириб чиқсан Бийди момонинг тizzасига уриб, бақириб — чақираётганини, унинг бақиришига одамлар тўпланаётганини кўриб турарди. Қулоғи оғир эди, эшитмади. Лекин юраги ёмон бир нарсани сезгандай, ғаш тортди. У Бийди момонинг ҳаёти ўртасида чўлоқланиб гўнг ташиб юрган Норматнинг олдига бориб, нималардир деб, ер тепиниб, ўтириб олганига, юзига кўрсаткич бармоғини тираб, ер муштлаётганига қараб турарди. Норматни уйига томон етаклаб жўнаганини, уйига кириб кетган Норматнинг Анзиратнинг социдан тортиб айвонга чиқарганини, буралиб тепаётганини кўриб турарди. Ҳаммасини кўрарди — ю, ҳеч нарсага тушунолмасди. «Булар ақлдан озибди, — деб

ўйларди чол. — Анови туёғи йўқ, шайтондинг ургочиси бекорга юргилаб қолмаган экан — да...» Чол оқсоқдана — оқсоқдана одамлар йигила бошлаган Норматнинг уйига қараб жўнади. Жанжалга йигилганларнинг аксарияти болалар ва аёллар эди. Аляр чол қулоғини динг қип бораверди. «Одамлар кўп бекор қолса, тез — тез шундай ақлдан озиги туришади, — деб гўлдирарди чол. — Бу лўлилар яна бир ўйинни бошлашди». Чол Норматнига етиб келганда томошибинлар давраси анча кенгайиб қолганди. Нормат ерда лойга ва қонга беланиб ётган Анзиратни тўғри келган ерига тепарди.

Аляр чол аввалига ҳеч нарсага тушунмади, тушунгач, юраги дириллаб кетди.

Нормат кўринишидан ҳам, ҳаракатидан ҳам ақлдан озганди. Унинг кўз косалари катталашиб, юзи қорая бошлаган эди. Кўзлари қонга тўлганди.

У ерда тупроқ ялаб ётган Анзиратнинг ёқасидан ушлаб, лип этиб кўтарди — да, қўлига сочини ўраб, нафрат ва жирканиш билан сўради:

— У ким?! Ким, қанжиқ?! Айтмасанг, ҳозир бурда — бурда қиласман.

Унинг товуши хириллаб, бўғилиб чиқарди. Анзират ҳолсизгина кўзларини юмиб олди.

— Айтмайди, бузуқлик қилишга қилиб, энди тилини қисиб ўтиради... қаранглар...вой, шарманда,вой... Бутун қишлоқни шарманда қилди.

— Ким эди? Ким у нокас?! Ҳозир чопиб ташлайман! — деди Нормат унинг бўйни аралаш қамчи соларкан.

— Ундан гап сўрагунча ўлдир, — деб бақирди Бийди момо дағ — дағ титраб. — қишлоғимиз устидан нега кулпат аримай қолди десам, гап буёқда экан — да. Ҳой, одамлар, урушга ҳам мана шундайлар сабаб бўлади, мана шундай — ларнинг дастидан уруш келиб чиқади. Болаларимиз қон тўқади, бу эса бузуқлик қип юради. Тошбўрон қилинглар уни. Қорнида бола бўлгунча қишлоғимизни булғаб юрган. Яна эри билан индамай яшай берган, билмайди деб ўйлаган...

— Вой, ўлай! — деб юборди Қудурат кампир. — Писмиф — ей, ҳали мен бу билан олди — берди қип юрипман, мениям ҳаром қипти — да. Тфу — тфу... ер юттур!..

—Бизнинг ҳаммамизни гуноҳга ботирган, ҳаммамизни хорам қилган... — Унинг галидан янайм дадилланиб бақирди Бийди момо.

—Олдинлари тошбўрон қиларди бундайларди!

— Буни ҳам тошбўрон қилиш керак! Уруғи кўпаймасдан тошбўрон қилиш керак...

—Шундайларди деб бир куни ҳаммамизни қора ер ютади...

—Охир замоннинг хотинлари — да!..

Нормат Анзиратнинг сочидан бураб оғилхонага судраб жўнади.

—Осаман, агар айтмасанг осаман!..

У оғилхонанинг равига бир қўллаб чилвир боғлади — да, сиртмоқ қила бошлади.

—Ақдингни ема, Нормат! — югуриб бориб, қўлини ушлади Аляр чол. — Эсингди йиғ!..

— Нари туриңг! — унга ўшқирди Нормат газаб билан,— Аралашманг...

Аляр чол сиртмоқни икки қўллаб маҳкам ушлаб олди.

—Болаларингни тирик етим қилмоқчимисан?! Падар — лаънати...

—Кетинг! — итариб юборди Нормат.—Онаси шу бўлса болалариданам кечдим.

—Унда мени ос... — Унинг қўлига осилиб олди Аляр чол.— Мени ос, эртага одамлар Аляр чол бор деб юрмасин... Мени ос...

—Ҳой, эчкисоқол,— унга қараб бақирди Бийди момо хириллоқ товушда — Ақдинг етмаган нарсага аралашиб нима қласан? Ундан кўра майиб кампирингни тўсиб кел! Буни тошбўрон қилиш керак! Қишлоқни саситди.

Кудурат кампир Бийди момоининг галидан дадилланиб, қор орасини титкилаб каттагина тошни Анзиратш қаратиб отди. Тош Анзиратнинг қаншарига тегди — да, бирон из қолдирмай сирғалиб тушиди.

—Ким тош отса савоб қилган бўлади! — Бақирди жиннилардек Бийди момо ерда ётган қор уюмини чанглаб тўдаларкан, қалт — қалт титраёттан қўллари орасидан қор эзғиланиб тушиб кетди. Бундан асабийлашган Бийди момо қўпроқ қорни тўдалай бошлади. Мушгдай қорни

бир амаллаб отди. Қор тегмай ўтиб кетди. Яна кимдир ҳўл кесак отди.

—Осаман! — бақирди Нормат Анзиратнинг сочидақ тортиб турғизиб — Ўлдирман сен энагарди.

У Анзиратнинг сочини дор қилиб, қўллари қалт — қалт титраб бўйнига ўрай бошлади, қўллари қалтираганидан сочни ҳеч ўраб ололмас, бундан тобора қаҳри қўзиб, Анзиратнинг бошини силкиб — силкиб ташлаётган эди.

—Вой, осиб қўяди! — бақирди бир аёл олдинга югуриб чиққанча.—Тентак бўп қопсизлар. Нима қилаёттанларингни биласанларми?

Аёл югуриб бориб, Норматнинг қўлидаи Анзиратнинг сочини силкиб тортди. У Анзират тенги, сарғиш озғин, юзидан касалмандлиги билиниб турган аёл эди.

—Қоч, Ханипа! — хириллади Нормат. — Қоч, йўқса икки шутингди орасига пичоқ соламан.

Ханифа унинг қўлига осилиб олди — да:

—Мени ўлдир! Ўлдир, бўлақол.— шаллақилик қила бошлади у.— Бўлақол, ўлдир, мен тутмасни ўлдир, етти пушти қуйиб кетган мен тутмасни ўлдир, буни ўлдирсанг, анави қоракўзларинг тирик етим бўлади Ё, уларам, бузуқликдан ортирилганми? А?!

Нормат сесканиб, унга қаради — ю, бир дам туриб, қолди. Кейин яна аввалги ҳолатига қайтиб:

—Йўқол! — деб ўшқирди қутургандек талвасага тушиб. — Мени тириклай ўлдирди, ўлдирди мени!... — У қаҳр билан Анзиратни буга бошлади. Лекин унинг қўлларига ёпишиб олган Ханифа дод содди.

—Кутурган бўлсанг, мени ўлдир. — Ханифа унинг қўлига тобора оғирини сола бошлади. — Агар шу бугун одам ўлдирман деб қасам ичган бўлсанг, мени ўлдир!

У Норматнинг қўлини Анзиратнинг сочидан бўшатиб олгач, ўзини Анзиратнинг устига ташлади.

—Аввал мени ўлдир, кейин уни ўлдирасан! Йигилганлар ичидан яна кимдир, «Етар энди», деди қўрқа — писа. Нима гаплигига ҳали ҳам тушунмай ўтирган Маҳамади кал хотинининг ботирлигидан ўзига келиб, бориб, Норматнинг қўлидан ушлади, қамчими силтаб торғиб олиб, бир чеккага улоқтириди.

— Кўрганлар нима дейди? — деди у чучук тилда. — Чоржетим ўзи билан ўзи қирилишиб ётибди, демайдими! Нима, жонларинг ортиқча бўп қолдими?

Яна икки келинчак даврадан чиқиб ҳушидан кеттан Аизиратни қучоқлаб турғизди — да, суюб уйга кирита бошлади.

Уларнинг ҳаракатидан Бийди момо эсанкираб қолди, яна зугумга ўтди:

— Нима, шекрикмисилар бунга? Нормат уни буғиб ўлдир!

Лекин ҳеч ким унинг айттанини қилмади. Нормат бир силкиниб, Маҳамади чўпоннинг қўлидан чиқди — да, келинларнинг оддини тўсмоқчи бўлди. Бироқ Маҳамади кал яна уни маҳкам қучоқлаб олди.

— Уят бўлади, тентак! — деди у кучаниб. — Хотининг бузуқ бўса кўчага чиқиб бақирасанми?

— Нима бўляпти бу ерда? — товуш келди Норматнинг орқасидан.

Нормат товушни таниб, ижирганиб қўйди.

— Нима тўполон, Бийди момо? — деб сўради яна Шариф кўса — Нега ҳаммани тўдалаб олиб, қий — чув ўтирипсизлар?

— Ўлмабсан — да, кўса, — деди Бийди момо унга масхараомуз тикилиб. — қачондан бери шундай савол бериб, жавоб оладиган бўлдинг?

— Айғоқилик қилманг, — деди Шариф кўса таҳдид билан.

— Уни бирор босиб ёттанини кўзингиз билан кўрдингизми? Йўқ?! Унда нега қий — чув қилаяпсизлар? — Сўнг Норматта қаради. — Ҳа, Норматбой, сизам кўрдингизми, силар — чи? Сизлар кўрганмисизлар, бойбичалар?..

— Йўқ!

— Кўрмаганмиз.

— Ким пойлаб турибди бузуқини?! Бузуқига қоравул — мизми?

— Ҳеч ким кўрмаган?! Вой, лўлилар — ей, йўқ нарсага шунча ғовғами?! Йўқол ҳамманг уй — уйингта!

Безрайиб қолган Норматта ҳам ҳамма эшитсин деб дўқ урди.

— Яна уруш кўрган одам эмиш!.. Бор, уйингта кир, хотинларнинг ботири.

—Кирмайди.— Норматнинг олдини тўсди Бийди момо.
— Бу харом уйга кирмайди. Қачон бу бузуқи бу ердан кетади, ана ўшанд... шунда киради. Юр, буларнинг ҳаммасининг гапи бирга ўхшайди. Юр, сенга ўзим жой бераман, бу харом уйда энди сениям бирон фалокат босади. Ўзингни хор қима... Бола белишгда.

Нормат бир Шариф кўсага, бир Бийди момога қаради — да, ҳайрон бўлиб тургач, Бийди момонинг изидан судралиб жўнади.

Улар кеттандан сўнг йигилганлар тарқала бошлади. Фақат бир — икки аёл Анзиратнинг изидан кириб кетди. Шариф кўса эса молхонага суяб қўйилган куракни олди — да, ўчоқ бошида айланиб, унинг кўзига кўринмаслик учун икки пакирни олиб, дарёга қараб зиппиллаб кетаётган хотинининг изидан кетди.

IX

Анзират эрининг жаҳли чиққанини жуда кам кўрганди. Нормат анча босик, аёлларнинг олдида ўзини тута оладиган, лекин феъли келса, отасини ҳам аямайдиган одам эди. У эрининг орияти келганини фақат бир марта, урушдан олдин, қотнинг устида, беда ўримида кўрганди. У пайтлари Холмат эндиғина юрадиган бўлган, Анзиратнинг ташвиши кўпайган кунлар эди. Холмат сал кўздан пана бўлиши билан ариққа ёки ўрага тушиб кетган, ё бўлмаса ўчоқ бошида кўл титиб турган бўларди. Бу ташвишларининг устига қишлоқда яна бир ташвиш — беда ўрими бошланганди. Бир куни эрталаб Нормат полвон уни эргаштириб қотнинг устига, беда ўримига олиб чиқди. Холматта катта рўмолдан чайла қилиб беришди. Эр — хотин бири чалғида ўрди, иккинчиси боғлади. Тушга яқин Анзират чой дамлагани булоқ бошига кетганда, узоқдан эрининг шўро раиси — бўз отли Мирзақул билан нимадир тортишаштанига кўзи тушди. Мирзақулнинг қаттиқ — қаттиқ гапларини эшигтиб, ажабланиб қараб қўйди. Нормат полвон эса индамай беда ўтар, афтидан, у гаплашишни истамаётган эди. Учоқка авора бўлган Анзират кимнингдир чинқириб юборганидан чўчиб, ўтирилди — ю, эрининг чалғи дастасини сермаганини, Мирзақул от

устидан учиб тушганини кўрди. У саросималик билан эрига қараб югурди. Югуриб борганда Мирзақул индамай отини етаклаб кетаётган, эри эса қайтадан ўримга тушиб кеттанди. У эрининг олдига бориб юзига тикилди: эрининг юзи газабдан қип – қизариб кеттан, чалғини зарб билан уради.

— Нима бўлди?!

Нормат унга газаб билан қаради.

— Ҳеч нарса?! Бор, ишингни қил?!

У эрининг авзойи бузуқлигини кўриб, индамай булоқ бошига қайтди. Мирзақулни нима учун урганини эри кейин ҳам айтмади. Анзират фақат бир нарсани — унинг бекорга аччиғи келмаганини биларди. Бу воқеанинг тагига анча йиллардан кейин — Нормат урушга кетган йили Мирзақулнинг ўзидан эшилди. Қишлоқ хотинлари билан ўримдан қайтаётганда Мирзақул унинг олдига келиб, сух ва писанда билан тикилди:

— Эрингдан хат келяптима?

У, афтидан, Нормат половоннинг урушга кеттанидан, хат келмаёттанидан хурсанд эди. Юзида намойишкорана зафар ифодаси бор, буни қип – қизил юзи ниқоблаб турса ҳам, лекин, кўзлари ошкор этиб турарди.

— Давлатнинг бедаси учун хотинингни солиқ қилиб берасаними, деганимда ўлдириб қёёзганди, бошимни олиб қочмасам, бўйнимни узиб ташларди. Қони суюқ, сенсиз қандай чидаяпти экан?!

Анзиратта эри ҳақида ҳақорат оҳангода гапириш ёқмади. Эрини соғинган, уни қўмсар, шу сабабли эри ҳақидаги ҳар бир гап унинг хўрлигини келтирап эди.

— Ҳов, Мирзақул, — деди хотинларнинг олдини тўсғанидан ғаши келган Қудурат кампир. — Кўзингта қара, бўлмаса, каллангданам ажralасан. Нега йўл тўсасан?!

Хотинлар пиқ – пиқ кулиб, нари кетипди – ю, бирдан ҳахолаб кулиб юборишиди.

Анзират эри ўзинииг номини ҳимоя қиласман деб Марзакулни урганидан ўша пайт кўнгли тоғдек кўтарилган ва эридан қанчалик гурурланган бўлса, энди шунчалик қўрқар эди. Мирзақул қулфсиз гап қилган, аччиқ устида шундай деган. Унинг тайини йўқ одам эканини Нормат ҳам биларди. Билиб туриб, қандайдир хотинмижоз эркакнинг

ўзини ҳақоратлашини истамаганди. Оддий, ҳар куни содир бўлиши мумкин бўлган бир тийиқсиз тили туфайли Нормат шунчалик қилди, бир кишини ўлдириб қўйишига сал қолди. Анзират қилган гуноҳ эса... Йўқ! Худонинг ўзи асрасин! Ҳали ҳам Шариф кўса чалгитди. Унинг ўлими аниқ эди.

Ҳаммаси Нормат полвон урушга кетганига бир йил ўтгандан кейин бошланди. Ҳолматни уйга қўйиб, кун бўйи колхозчилар билан бирга ўроқ ўргали, бошоқ тергали, қўш ҳайдагали, буғдой янчгани борар, улар эркакларнинг ишларини қила бошлаган, зреклар эса қишлоқда саноқдигина ҳолган эди. Қолганлари қари – қартанглар, майиблар ва болалар эди.

У кун бўйи тиним билмасди – ю, бешикдаги қизчаси ва Ҳолматнинг очликдан кичрайиб бораётган гавдасига, очликнинг даъшатли, талвасали қадамига қарши туролмасди. Ҳамма нарса тўзиб бўлган, иккита сигирнинг биттасини колхоз олиб кеттаи, иккincinnисини илон чақиб, шишиб ўлди. Уаар бор – йўги колхоздан бериладиган бир ҳавуч арпа унию учта ориқ эчкининг сутига қараб қолишган эди. Анзират ишлар, эҷқиларга ўт олиб келар, ёзда молхона сувар, ўтигин фамлар, қищда ўтин ёрар, молхона куар, баҳорда ҳам ўз ерида, ҳам колхоз учун қўш ҳайдар эди. Ҳаммасига улгурап, улгуриши керак эди. Кечаси эса ҳам эрини қумсаб, ҳам чартоқдан толиқкан вужуди қалтираб, танасини совуқ кўрпанинг ичига ноchorгина тиқиб йиглар, Кейин ёстигини ҳўл қилиб, ухлаб қолар, эрталаб яна шу ташвишлар билан югурар эди.

Бу йигилар аста – секин уни чарчатди. У энди бу мاشаққатиларга енгила бошлади. Одамларга қўшилмай қўйди. Ҳолмат билан икки яшар Ҳожарни урадиган, бекордан бекорга жаврайдиган одат чиқарди. Қарғишни ўрганди. Шанги бўлиб қолди. Бу ҳолатлар унинг сулув чеҳрасига мос келмасди; ўзи ҳам, асаблари ҳам чарчаган, шу вақттacha фақат ўз иши, аёллик ташвишлари билан юрган, шундан бошқасини кўрмаган, бошқасининг ташвишини тортмаган аёлнинг бошига бирданига иккита вазифа тушган: у энди ҳам зрек, ҳам аёл бўлиб яшаши керак эди. У яна дунёда энг оғир юмушни бажариши — кутиши керак эди. У ҳаммасидан ҳам шу азобга тоқат қиломасди. Ўзига тўқ

оилада — етти акаси ва обрўли ота қарамогида ташвиш нима билмай ўсган Анзиратни бу вазифалар ҳолдан тойдириб, довдиратиб қўйган эди. Уруш бошланганининг учинчи йили айниқса унга оғир бўлди. Унинг иккита акасидан қорахат келди. Онаси бу қайгуни кўтаролмади. У ҳам йиглайдиган одат чиқарди. Ҳамма ишни қилиб, болаларни жойига ётқизарди — да, туни билан йиглаб чиқарди. Бутун вужуди ўт бўлиб ёнар, қони томирдан тошиб чиққудай бўлиб, аъзои — бадани таранглашар, вужудида қўймасаш... ниманидир қўймасаш туйгусини сезарди. Бу қўймасаш баъзи кунлари ақдан оздирадиган даражада асабий қилиб қўяр, авж олар, тўғри унинг юрагини, бутун танини кемираради. У эркак қучогини кўрмаганига ҳам уч йил бўлганди... Ўша йилнинг охирига бориб, у кўп иарсага чидамсизлик қила бошлади. Энг катта чидамсизлиги эса кейин содир бўлди. Ўша йили у ўша эридан чалғи еган Мирзақул билан ўзи билмаган ҳолда ўралашиб қолди. Мирзақул гаргар билан Анзиратнинг узоқ қариндошлиги ҳам бор эди. Бироқ бу қариндошлик аллақачон узилган, борди — келди қилишмасди. Урушдан оддин Анзират уни фақат икки марта: бир марта тўйда, иккичи марта Нормат билан қот устида жанжалда кўрганди. Барваста, келишган, юзидан жаҳл ёғиб турадиган, аммо аёлларни ўзига чорлайдиган нимадир, балким, юзидан ёғилиб турган ҳирса сурбетлиқдир, бор эди. Ана шу узоқ қариндоши унга алоҳида эътибор бера бошлагандан кейин Анзиратта кун чиқди. Аввалига унинг эътибори эриш туюди, балким эрининг чалғиси учун мени шармисор қилмоқчидир, деб ўйлади. Лекин Мирзақулнинг овозиздан ҳеч бир ёмон ният сезилмасди, раис кўп нарсада унга қайишадиган, мулоим муомала қиладиган бўлди. Аста — секин унга бу муомалалар беғараз туюла бошлади. Унинг ёрдамини бажону дил қабул қиладиган бўлди. У баъзида Анзиратнига ҳозир тиллага ҳам топиб бўлмайдиган оппоқ бугдой уни олиб келар, бунинг учун ҳақ ҳам сўрамас, «қийналиб кетибсан, ола қол, болаларниг одам бўлса, менинг ҳам ҳожатимни чиқаришар», деб жўнаб кетарди. Бу муносабатта ҳайрон қолмаса ҳам бўларди; бу ёрдамларни қариндошчиликка олиб бориб тақаш мумкин эди. Буни Анзират беғараз ёрдам, деб ўйлар, унинг

олдида ўзини тобора қарздор ҳис қилиб борарди. Унинг қандай қилиб, кўнглини олишни билмасди. Раиснинг унга қайишиши, айниқса, Нормат полвондан қорахат келгандан кейин кўпайди. Энди унинг баҳонаси кўп эди: «Фронтовик оиласа ёрдам», «Кўнгли яримта, кўнглини олиш керак», ва ҳоказо, ва ҳоказо. Анзират булар учун фақат Мирзақулдан миннатдор бўларди. Унинг номига дуолар ўқир, уни ҳамма эркаклардан ва қариндошларидан яқин тутарди.

Ўтган йили қиш жуда оғир келди. Қиш билан қўшилиб Нормат полвондан қорахат келди. Ноябрнинг охирида бошланган қиш мартнинг охиригача забтига олди. Кунлар аёзли, чўл томондан изгиринли шамол эсарди. Анзиратнинг йиққан ўтини февралнинг ўрталарида тугаб қолди. Бугдой эса... Улар кейинги ҳафтадан бошлаб, арпа нон ейшаёттан, арпанинг ҳам таги кўриниб қолган эди. Уруш улар ишониб ва умид қилиб ўтирган ёлғиз сигирларини ҳам олиб кеттач, арпа нондан бўлак илинжалар қолмади. Арпа нон ични суриб кетар, егани юқмас, Холмат билан Ҳожар тез – тез, очқаяпмиз, опа, очқаяпмиз, деб турар. Анзират уларнинг қоринларини тўйғизишига қурби етмас эди. Арпа ҳам тутагач, улар ёлғиз колхозга умид боғлаб қолдилар.

Мартнинг бошларида Ҳожар тўсатдан иситмалаб ётиб қолди – ю, Анзиратни қўрқитиб юборди. Ҳожарнинг аҳволи оғир эди: қаттиқ шамоллаган, устига – устак, қорда оёқ яланг юраман, деб ўзини совуққа олдирган эди. Анзират ўтин тиланиб уйма – уй югуарар, уйлари совуқ, зах, устидан чакка ўтиб, кўлмак бўлиб қолган, синган деразанинг бир четидан ҳувиллаб изгирин кирав, қишининг охири кўринмасди. Қишлоқдошларнинг ҳам ўтини ўзига етмасди. Эркаклар етишмас, эркаклари борлари ҳам ўтин қиладиган эркаклар эмас, ўзларини зўрға амалларди. Ҳожарга иссиқ овқат зарур, лекин ёғ ҳам, гўшт ҳам қиши бўйи тутаган, фақат аталагина кунига яради.

— Товуқ шўрва ичирсанг, мадорга киради, иссиқни ўзи қувади, — деди уни кўрган Ўрол табиб. — Бу турища айрилиб қоласан...

Товуқ гўшт эса фалон пул эди. Ўнта товуқнинг пулига бир сигир сотиб олса бўларди. Анзиратда эса пулнинг ўзи ҳам йўқ, ҳаммасини урушнинг бошидаёқ Нормат олиб бориб

топширганди. Уйларида егулик нарсани топиш қийин, сотишга эса... ким ҳам сути қуриб қолган эчкига товуқни алмаштиради? Эчкини сотай деса, ким ҳам эчкини Бошчорбоғта олиб бориб берарди?! У отлиқча икки кунлик йўл. Пиёдага эса...

Анзират Ҳожарнинг бошида туни билан ухламай ўтириб чиқар, унинг алаҳсираб, оғриқ аралаш ҳушига келолмай ётишига қараб, ўт бўлиб ёнаётган пешонасига лабини босарди.

—Опажон, мени қутқайнинг, мени қутқайнинг, ўлиб қоламан? — алаҳсиради Ҳожар. — Сув бейинг, сув ичтим кеяяпти... қор сув бейинг, опажон...

— Қизим, сенга совуқ сув ичиш мумкинмас, — дерди Ҳожарни бағрига босиб Анзират. — Эртага тонг отсин, товуқ топиб, шўрва қип бераман, тузалиб кетасан, тонг отсин...

— Мен шуйпа ичмийман... — Йигламсиради Ҳожар. — Сув ичаман, сув бейинг...

Ҳожар кейинги кунларда кўзини умуман очмайдиган, очганда ҳам бир зумга очиб, Анзиратта ялинчоқ алфоз қараб: «Опажон, ёниб кетаяпман... опажон», дерди ва яна юмиб оларди.

— Қизим, қизгинам, дардларингни менга берсин, қизим!..

— Йигларди Анзират нима қилишни билмай. — Худойимга сен нима қиб эдинг, менга берса бўлмасмиди бу касални, қизгинам. Э, худойим, шунча қилаёттанинг каммиди!..

Ҳожар сурункасига икки кун кўз очмади. Анзират дод —вой қилиб, ўёқча югурди, буёқча югурди, лекин товуқ ҳеч кимдан топилмади.

Учинчи куни Анзират эрталаб туриб колхоз идорасига — Олмага, Мирзақулни излаб борди. Охирги умиди ундан эди. Агар у ҳам йўқ деса, Ҳожардан айрилиши турган гап эди. Мирзақул уни очиқ юз билан кутиб олди ва унинг дардини эшитиб, кўп афсус чекди. ,

— Бирдан менга келабермабсан — да, — деди у бош чайқаб, ўпкалангандек. — Фронтчининг оиласига шундай пайт ёрдам бермасак, қачон берамиз? Бизди ҳукумат нима учун бу ерга қўйиб қўйибди... Эҳ, сиз хотинлар кимдан талаб қилишни билмайсилар...

Мирзақул колхоз отбоқарини қаёққадир жўнатиб, бир соатларда Анзират уч кун излаб тополмаган товуқни — яна сариқ товуқни оп — осон топиб берди.

— Худо ёрлақасин сизни! — Йиғлаб дуо қилди Анзират.

— Мендан қайтмаса, худодан қайтсин, болаларингизнинг роҳатини кўринг, илоё, мартабангиз бундан ҳам улуғ бўлсин!..

— Бўлти, бўлти, майли боравер, эртага ҳам кел, яна битта товуқ топиб қўяман, — деди Мирзақул, сўнг ниманидир ўйлаб: — Яхшиси овора бўлма, — деди. — Халил отбоқарникуга ўзинг бора қол, мен обориб қўяман... Бор, бор энди.

Анзират қайта — қайта дуо қилиб, севиниб жўнаб кетди. Бора солиб, товуқни шўрга қилиб, уч марта ичирди. Ярим кечаси Ҳожарнинг пешонасидан тер чиқа бошлади. Анзират худога шукурлар қилиб, кечаси билан Мирзақулни дуо қилиб чиқди. Эртасига қишлоқнинг чеккасидағи Халил отбоқарникуга жўнади. Халил отбоқар ўриссифат, элга аралашавермайдиган, доим ичиб юрадиган, очарчилик йиллари Фарғонами, Андижон тарафлардан келиб қолган, сўққабош одам эди. Унинг уйда бўлишидан бўлмаслиги кўп эди. Анзират нима учун Мирзақул айнан шу жойни танлаганини хаёлига ҳам келтирмас, Мирзақулнинг имони бутун одам эканига ишонган, ҳеч қандай шубҳага бормаганди.

У Халил отбоқарнинг кичкина, худди катакка ўхшатиб қурилган уйига етиб борганда, уй олдида ҳеч ким кўринмасди. Деразасига тахта қўйиб михлаб ташланган, эшиги қия очиқ эди. У айвонда туриб, “Халил ака!”, деб чақирди. Ҳеч қандай жавоб бўлмагач, секин эшиқдан ичкарига бош суқди ва печка ёнида ўриндан туроётган Мирзақулни кўрди.

— Кел, киравер, — деди у ҳижолат бўлгандек. — Мен ҳам Халилни кутиб ўтирибмаи, келмаяпти. Кутиб, мизгиб қопман. — Мирзақулнинг юзида қандайдир хавотирлик ва аёлни кўрганда голиблик нашидалари бор, у нимадандир хурсанддай эди.

Анзират ичкари кирди.

— Кел, ўтириб, — деди Мирзақул, сўнг уни бошдан — оёқ кўздан кечирди — да, кўзлари йилтиллаб кетди. — Анча совиб қопти, мен печка ёқай,

— Мен ёқа қолай, — деди Анзират ундан миннатдор, қарздор оҳангда.— Ўтин қаерда?

— Йўғ— э! — деди Мирзақул. — Майли, ана, айвоннинг нариги бурчагида, устига пичан ташлаб қўйилган.

Анзират ўтин келтириб печкани ёқди. Мирзақул ўтирган ерида уни кузатиб туарар, ниманидир режалштираётгандек бесаранжомлик бор эди юзида. У филқ этиб ютиниб, гоҳ, ёнбошлар, гоҳ яна қаддини кўтариб, ўтиради. Анзират печкани ёққач, эшик олдида турган хуржундан боғланган товуқ чиқарди.

— Мана буни опқўй,— деди Анзиратта узатиб. — Хўш, энди айт—чи, яшашинг ёмонми?

— Бир нав, — деди Анзират. — Ўтиб турибди. Кўпчиллик қатори. Элга келган тўй.

— Энди қийналмайсан,— деди Мирзақул тўсатдан унга яқин келиб, мулойим — юмшоқ оҳангда. Унинг овозида меҳр бор эди.. — Кел, яқинроқ ўтири. Нега остонаяга ўтириб олдинг? Чақиб олмайман, мана, кел, тўшакда ўтири...

— Ҳозир тураман,—деди Анзират. — қизимди бир ўзини ташлаб келгандим.

— Товуқ шўрва ичирган бўлсанг, қизинг ухлаб қолгандир? Ҳозир кетасан, озроқ гурунг қил, мен ҳам фронтчиларнинг оиласи қандай яшаёттанини билишим керак... Кел.. яқинроқ ўтири...

—Яшаяпмиз... — деди Анзират. Мирзақул ёмон хаёлга бормасин деб унинг қаршиисига, тўшакка чўқди. — Қийналганимиз билан додимизни кимга айтардик? Элга келган тўй, ака.

—Энди қийналмайсилар, — деди Мирзақул юзига ясама кулгу эндириб, Анзиратнинг тиззасига, чопонини туртиб чиқиб турган сийналарига суқ билан тикилар экан. — Мен қийннаттириб қўймийман сизларни.

— Раҳмат, ака, шусиз ҳам кўп яхшиликлар қилдингиз, худо ярлақасин, умрингиз узун бўлсин.

—Қуруқ дуо билан иш битармиди?..— ишшайди Мирзақул унга кўзларинини лўқ қилиб тикилиб.

Анзират унинг тикилишидан ҳижолат бўлди. Гапини ўзича тушунди.

— Биз бечораларнинг қўлидан фақат дуо келса нима қиласилик, ака, қани, биз сизнинг бир хизматингизга ярасак... ўзимиизди зўрга эплаймиз.

— Э, Анзират, ундаи дема, сенинг қўлингдан кўп иш келади. Мунақа чирой билан подпони оғдириб оласан.

Анзират қизариб кетди. Қизарганда қошлари янада қорайгандек, кўзлари тўрт йилдан бери эркак кишидан эшигмаган энг роҳатбахш сўзни эшигтандек бўлди.

— Қўйинг, ака, одамди уялтируманг. Бу ҳолатимда бирор менинг чиройимди пишириб ермиди...

— Пишириб ейдиганлар топилади. — Мирзақул сирли қилиб, сўнг олдинга эгилганга ўхшади — ю, Анзиратни чап қўлидан ўзига силтаб тортди, бўйнидан қаттиқ, қучоқлаб олиб, лабларидан очкўзлик билан ўпа бошлади.

— Вой...вой! — шивирлади қўрқиб кетган Анзират. — Вой...ака... нима қиляпсиз... кўрганлар нима дей —ди?.. Қўйиб юборинг... қўйиб юборинг...

— Бу лаҳзаларни олти ойдан бери кутаман... — деди ҳансираф Мирзақул ва Анзиратнинг сочини қўлига ўраб, чопонини еча бошлади.

Анзират унинг қўлларидан қутулишга ҳаракат қилар, бироқ кучли қўлларнинг олдида у ожиз эди.

— Қўйиб юборинг! — бақирди у. — Қўйиб юборинг. Ҳозир додлайман, шарманда қилманг, қўйиб юборинг.

— Йўқ, энди қўйиб юбормайман. Қачондан бери кутаман сени... чиройингни кўрган бери бери сени пойлайман. Энди етишдим деганда, қўйиб юбараманими? Сенга шунча хушомад қилганим етмайдими? Энди сен ҳам эри — да. Нимадан қўрқасан?! Эрингдан қораҳот келган бўлса. Олдинг очиқ, даврингни сурмайсанми?!

У Анзиратни даст кўтариб, тўрдаги тўшак устига олиб ўтди. Анзират унинг қўлларида, типирчилар, юз — кўзига аямай ураг, “шарманда қилманг”, деб ялинар, Мирзақулни кўксидан нарига итарар, бироқ барибир халос бўлолмасди.

— Берган нарсаларингга куйдирги чиқсин... — йиғлаб юборди у Мирзақулнинг терлаб кетган башараси аралаш кучсизгина шапалоқ уриб. — Ҳаммасини тўлайман, фақат қўйиб юбор.

Мирзақул унинг чапонини ечиб бўлгач, қўйлагининг ёқасига қўл солиб бир тортишда охиригача айириб ташлади. Оппоқ сийналарга ҳирс ва очкўзлик билан ташланди.

—Хи — ҳи... — ҳансирар ва беўхшов ишшаяр эди у. — Жоним, ўзим сенга уйланаман, хотинимни қўйиб юбораман. Сени деб қанча ойдан бери тинч ухломайман... Сенсиз... сенсиз...

Анзират икки қўли билан сийналарини яширишга уринар, Мирзақулни қарғар, соchlаридан тортар эди. Бироқ Мирзақул хеч нарсага парво қилмас, ютоқиб тишлар, бўш қўли билан Анзиратнинг очиқ қорнини... силарди... Анзират кўп олишди. Охири мадори қуриб, индамай қолди...

...Ўша кундан кейин анчагача Анзират бу воқеа қандай содир бўлганини англомай гарангсиб юрди. Ўз ёғига ўзи қоврилди. Ҳар нарсадан чўчийвериб, тентак бўлиб қолаёэди. Йигирма тўқиз ёшида сочига оқ тушди. Кейин... гуноҳининг кечирилмаслигини англаш, Мирзақулнинг кейинги келишига замин яратди. Эридан қораҳат келгани уни бир оз хотиржам қилди: гуноҳи унча катта кўринмади. Англашилган ва содир бўлган гуноҳ иккинчи гуноҳнинг остонасиdir. Аслида унга барибир эди. Энди қандай қилиб бўлса ҳам яшаса бўлди, қийналмаса бўлди эди. Қийин – чиликлар унинг юрагини олиб қўйганди. У бу туйгуни туйиши билан ҳеч нарсанинг унга қизиги қолмади. Ҳаммаси тугагандек, энди бошқа бирор бўлиб ящаёттандек сезарди ўзини. У болаларимнинг ҳаётини сақлаб қолиш учун шундай қилдим, бўлмаса, улар ўлиб кетарди, ана, шўсиз ҳам қишлоқда очлиқдан касал бўлиб ўлаёттандар озми, деб ўйларди ва енгил тортганга ўхшарди. Бироқ бу ерда яна бошқа бирор бор эди. Ўша бошқа бирор, бошқа бир вужуд ҳар куни Мирзақулнинг суйиб эркалашини, соқоли олинмаган чакаги билан бўйини қитиқлашини, уч йилдан бери эркак ҳидини кўрмаган соchlарини эркак қўллари силашини... хуллас, эркакни, эркакнинг дағал қилиқларини, улардан келадиган ёқимли ва эҳтиросни қўзғайдиган ҳидни қўймасарди. У энди ўз қисматига қарши гапиролмас, гапирганда ҳам қисмат унинг бутун айбини очиб ташлаган, ҳалок қилган бўлар эди. У вужудидаги ўша бошқа бирорни бўғиб ўлдиrolmas, аста – секин унга таслим бўлган, ўзининг бутун

инон – ихтиёрини, келажагини, орзу – умидларини унга тоширган; унинг қули, унинг одами бўлиб қолган эди.

Бироқ, қишининг бошларида, худди момақалдириқдек, гумбурлаб Нормат полвон урушдан қайтиб келди. Унинг урушдан қайтиши Анзиратнинг хаётида кескин бурилиш ясашга мажбур қилди. У эрини худди аввалгидай кутиб олишга, аввалгидай муомала қилишга уринди. Эрининг болалари ёнига қайтиб келганини кўриб, хурсанд бўлиб, бўғзида тиқилиб ётган алами тарқагунча йиғлади. Лекин кечаси эрининг оғушига кираётгандагина бу одам учун ўзининг энди харом эканлигини, ўзи учун энди чинакам баҳт бегона эканини ҳис қилди. Барibir яшаш, Нормат полвондаги иштиёқ унга ҳам таъсир қилди. Болаларининг чулдираши, уйда эркак овозининг борлиги унда яна яшашга иштиёқ уйғотди.

Ҳаммаси унинг учун яхши тугаган бўлса ҳам у ҳали бу нарсаларни хотима деб билмас эди. Хотимаси ҳали олдинда эканини, энг даҳшатлиси ҳам олдинда эканини ҳис қилар, ҳис қилган сайин қўрқувдан даҳшатта тушар эди. Бир куни юрагида ўлиб бораётган ўша бирор бирдан бош кўтариб, ўзининг аччиқ ҳақиқат тўла наизасини унинг қаеригадир, эҳтимол юрагига санчишини, ундан тирик қолиши даргумон эканини билар эди.

Бир куни Нормат ҳайгадир чиқиб кетган, Холмат эса эски наматнинг устида Ҳожарга ошиқларини кўрсатиб мақтаниб ўтирас, ўзи эса сўклиб кетган хуржуннинг бурчагини ямаётган эди. Бигизлар тўқималар орасидан усталик билан алмашиб ўтар, қўлида чеварлик билан айланар, чок жой – жойига тушар эди. У бундай нарсаларнинг устаси эди. Кун тушдан ошган, ташқарида қор ёғар, унинг эса кўзлари тиниб, ўз – ўзидан юраги тўлиб бормоқда, ғашлик уйғонмоқда эди.

Шунда ошхона томондан Норматнинг таҳдиданми ёки қувончданми — фарқлолмади:

— Анзират, — деган ўкириги кедди.

У чўчиб тушиб, иргиб турди – ю, миясига лоп этиб урилган фикрдан тиззалири қалтираб ўтириб қодди. У энди ҳаммаси тамом, эрим бир нарсани эшитиб кедди, ўша мен куттан лаҳза содир бўлди, у ана ташқарида туриб, ҳозир

мени кўриб, янчиб ташлайди, деб ўйлади, нажот кутгандек Холматта жовдираб боқди. Холмат югуриб ташқарига чиқди: кимнингдир чийилаб гапирган товуши эшитилди. Салдан кейин эшикдан Холмат билан унга жуда ҳам таниш ва жуда ҳам муқаддас чеҳра — отаси Мулла Хидирнинг нигоҳи кўринди.

—Отажон! —унинг ўвишиб қолган тиззалари қарсилаб кетди, димогида таниш ҳидни туйиб, отасининг бўйнидан қучоқлаганча йиглаб юборди. Унга ҳозир бу одам жуда зарур, жуда керак эди. Йўқ, у отасига гуноҳини айтиб, ўзини оқламоқчи эмасди. Фақат кўпдан бери тўлиб турган юрагини бўшатиб, хижилликларини ёйиб олмоқчи эди. Отасининг бағрида узоқ йиглади. Акалари ва онаси ўлгандан кейин отасининг гавдаси кичрайиб, чўкиб қолган, анча кексайганди. Отаси уни ўзича тушунди.

—Қўй, қизим, юрагимни эзма... Мана, эринг қайтиби, болаларингнинг баҳтига шукр қил, қизим, худо де...

У отаси айтмаса ҳам худо дер, шукр қилар, худодан худди ўзидан қўрқандай қўрқар, уни Нормат билан бирга яшашга қайтарган куч ҳам уни хатоси учун доим тергаб турадиган куч ҳам худди шу қўрқоқлиги ва ишончи эди. Бироқ унга ҳозир шукр қилишнинг ўзи етмас, худо дейиш унга камлик қилаёттан, бу шукроналик, бу товба унга ёрдам бермаётган, аксинча, уни иккиси ўртага олиб, сўроқ қиласарди — у бу ишга қадам қўйган кечасидан бошлаб икки киши бўлиб яшай бошлаганди.

Мулла Хидир бир кеча ётди — ю, эртасига қайтиб кетди.

—Энди бошнингдан нима ўтган бўлса, унуг, — деди отаси кетиши олдидан унга худди кўнглини уққандай. — Энди у кунларни унугт. Нима кўрган бўлсанг, кўрмадим де. Уруш ҳаммани йўлдан оздирди. Эринг яхши одам. Уни ҳурмат қил, унга меҳр қўй...

Анзират бу гапларга чидай олмади, хўрлиги келганидан ва аламидан ялинчоқ оҳангда:

—Отажон! — деди — ю, отасининг оғзини ёпди. У эри ҳақида бошқа гап эшитишдан, ўзининг бу гапларга бардош беролмай қолишидан қўрқди.

Отаси келтандан кейин у Норматта меҳр қўйганга ўхшаб юрди — ю, барибир кўнглини ўша бир парча муз совутиб

турди. Яна аввалгидай гоҳ иссиқ, гоҳ совуқ яшай бошлади. Аста – секин шундай муаллақ яшашга кўниди ҳам.

X

У болалигида Катта дарёning қўйирогидаги қишлоқ – ларининг қандай ёнганини, болалар ва одамларнинг қандай осилганини кўрган эди. Қишлоқларига дарёning нариги бетидан бир тўда милтиқ кўтарган одамлар ўтиб келар, қишлоққа қий – чув солар, талар, кетиш олдидан ёқиб, яна нариги қирғоқча ўтиб кетишарди.

У болалик тасаввури билан қанча кузатмасин, қишлоқдошларига ўлим, кулфат, йифи олиб келадиган ўша одамлар ҳамиша дарёning нариги қирғоидан ўтиб келар, яна талаб, уриб, ёқиб қайтиб кетишарди, Ўша пайтлардан бери Анзиратнинг тасаввурида нариги қирғоқ (у "нариги бет" дерди) жуда ёмон из қолдирган, у дарёning икки бетидаги икки хил ҳаётни ҳис қиласар, бири тер тўкиб йигар, иккинчиси талаб кетар — назарида, нариги қирғоқ баҳтсизлик келтирадиган қирғоқ эди. Энди эса ўзининг ҳозирги ҳаётини ҳам дарёning икки қирғогига ўхшатар, ҳатто бу даражада ўхшаплиқдан ҳайрон ҳам қоларди.

Унинг эри кеттандан кейинги ҳаёти дарёning шу қирғоги — ўлим, очарчилик соя солиб турган, алланечук серкулфат қирғоқ эди. Бу қирғоқда у ўлиб кетиши, бутун орзу – умидларидан айрилиши, икки бола билан ёш, сулув бўла туриб, бева қолиши (у ҳаммасидан ҳам шу нарсадан қўрқарди) мумкин эди. У ўзининг баҳтига ўзи зомин бўлишни истамасди. У ҳам ҳамма аёлларга ўхшаб, яхши яшашни, турмуши фаровон бўлишини, ҳаётда ҳеч нарсанинг ташвишини тортмай яшашни истарди. У ҳамма гўзал аёллар каби ўз гўзаллигини билар, билгани учун ҳам ўзининг ҳаётда сиқилиб яшashi мумкин эмасдай туолар, орзу – умиди ҳам шунга яраша эди.

Бироқ у жуда таъсирчан аёл эди. Бу таъсирчанлиги унга отасидан ўттан эди. Мулла Хидир ўжар бўлгани билан кўнгли бўш одам эди. У бирорни сўкар, жеркиб ташлар, ҳайдаб соларди – ю, кейин ўзи пушаймон бўлиб юарди. Анзиратта отасининг худди шу феъли ўттан эди.

Норматта текканда у қизлик орзусининг амалга ошганини англади. Нормат ҳам ўзи каби ўт, олов, файрати ичига сифмаган, қони қайноқ йигит эди. У яхши дәҳқон, номи чиққан чавандоз эди. Топари ҳам яхши, фақат кўпкарининг ўзидан тушгани билан катта бир оилани боқса бўларди. Яна келинлар учун битилгувчи қисмат — қайнона ва қайнота Анзиратта ато этмаган, улар сал олдин ғойибга бирин—кетин сафар қилган эдилар. Нормат ёлғиз эди, Анзират ана шу ёлғизнинг файзсиз, фараҳсиз кулбасига файз ва чироқ бўлиб кириб келди. Ўзи орзу қилгандек хонадоннинг маликаси бўлди.

Келинлик либосини ечмай, Норматта ўрганиб қолди. Кечалари унга отаси ва ўзи ўқиган эртаклардан айтиб берар, "сиз келмасингиздан олдин ўзимни эртакдагидек тутар эдим", дерди қизлик пайтларини эслаб. «Негадир ўша сизни кўрган булоқ бошига келиб, хаёл суришни яхши кўрадим. Булоқ бошига қандайдир шаҳзода отини суроргали келади, оти оппоқ бўлади, у мени отига мингизиб, ўз юртига олиб кетади, мен малика бўламан, деб ўйлар эдим. Сиз кулманг, ростдан ҳам шундай ўйлардим. Кулманг, дедим — ку! Ана, куляпсиз, чиндан шундай ўйлардим, менга ишонмаяпсиз — а? Ана, куляпсиз — ку, мен эса тўгрисини айтяпман, сиз оқ от миниб борганингизда сиздан қўрқиб кетганман, худди ёввойи одамга ўҳшардингиз, ростдан ҳам ёввойи эдингиз, ҳозир ҳам ёввойисиз. Назаримда, ўша подшо жодугар кампирнинг гапига учиб, мени чўлдаги қудуққа ташлайди, мен эса қудуқда ҳеч нарсани кўрмай, кўп йиллар яшайман, биздан туғилган ўғил мени қутқаради, деб ўйлардим. Қаранг, жинниман — а, гирт жинниман!.. Шундайми, сиз менинг устимдан куляпсиз, мен эса сизга... Ана, ана, қулдингиз». Булар унинг энг ширин хотиралари эди. Унга ўша пайтда — серкулфат қирғоқда ёлғиз қолган пайтда хотира эмас, меҳр, аёл меҳридан, одамлар меҳридан ўзгачароқ, аниқроғи, эркак меҳри керак — у шу меҳрга ташна эди. У ҳаммасига чидаши мумкин, бироқ меҳрсиз яшай олмасди, меҳрсиз тобора ўз ўзанига сифмай бораётган эди.

Шундай кунларда дарёning нариги қирғоидан жуда кўркам ва худди эртаклардаги каби кема келиб, уни нариги қирғоққа олиб кетди..

Унинг ўзи ҳам бир умр фақат ғам, қайғу ташвишларнинг зах соясида яшагандан кўра бир кун бўлса ҳам ташвишлардан йироқ, қандай бўлишидан қатъи назар, ўша ўзи ахтарган меҳр бор қирғоқда яшашни истарди. Бунинг учун у ўзининг эски хотиралар либосини ечиб ташлаши; янги, ҳамиша таъқиб этиб юрадиган либос кийиши керак эди. У шундай қилди ҳам. Кемага ўтириб, нариги қирғоқча борди. У қирғоқнинг гарчи йигили, изтиробли бўлса ҳам, лекин қийинчилклардан, ёлғизлик ва ташналиқдан йироқ ҳаётда пусиб, чўчиб яшай бошлади.

У одамови ва ҳар бир гапдан ҳадиксирайдиган бўлиб қолди. У истамагани ҳолда Мирзақулнинг боқимандасига айланди. У бу қирғоқда қанча кўп яшаса, шунчалик тубанлашиб, шунчалик номуссиз хотинга айланиб бораарди. Аммо йилнинг охирида уни жуда улкан куч нариги қирғоқдан тортиб олиб, ўзининг эски либосини қайта кийдирди ва аввалги турмушини изга солиб юборди.

Анзират мих устида юргандай юрар экан, ўша ўзини нариги қирғоқдан тортиб олган кучга ўз ихтиёрини тоддиширади. Бу куч унга таниш, уни баҳтиёр қиласан ва зор ҳақшатиб, уч йил куттирган куч эди. Бу куч уни яна баҳтиёр қилмоқда, ўтмишдаги хатосини ўчириб ташламоқда, қалбида ҳаётта муҳаббат уйғотмоқда эди. Лекин бу муҳаббат унинг қаршисида муаллақлигини эслатиб турарди. Анзират на эски – ю, энди янги ҳаётига тўла кириша олар, на уни ташлаб кета оларди. У ўзи босётган қадамидан чўчиб яшар, ўз хатосидан қўрқарди. Анзират бу кунларнинг хотира, эртанги кун бўлиб, ёхуд қачонлардир бўлиб ўтган ёшлиқдаги хатоси бўлиб қолишини истар, ухласам – у тонгда бошқа дунёда, мутлақо бегона одамлар орасида уйғонсан, уларнинг орасида чўчиб эмас, ҳаётта, одамларга ўша аввалги ҳалол, содик аёл кўзи билан қарасам, деб орзу қилар, баъзан бошқа узоқроқ қишлоқча кўчиб кетсак – чи, ахир, уруш бошлангандан бери қанчадан – қанча уйлар эгасиз, ҳувиллаб ётибди, кейинроқ уруш тугагандан сўнг ўзимизга яхшилаб уй қуриб олармиз, деб ўйларди. Бироқ кўчиш ҳақида Норматга гап ҳам очиш мумкин эмас, у сабабини суриштириб қолишидан қўрқарди. У ҳамма одам менинг Мирзақул билан бўлган муносабатимни билади, билгани

учуи ҳам мен билан аввалгидай, билинтирмай муносабат қиласи, ичида эса кулади, деб ўйлар, унга одамларнинг ҳар бир ҳаракати ўзининг гуноҳига шаъма, пичинг бўлиб туюлар, ҳар бир одамнинг гапини кўнглига олар, ўксир, одамларни тобора ёмон кўриб борар эди.

Бир куни Бийди момо уларнига келиб ўтирди – да, кетиш олдидан томдан тараша тушгандай қўлларини дуога очди ва:

— Илоҳи тўполонга кетганлар омон қайтсин, тўполон бошлаганинг ўзи тўполоннинг остида қолсин, бу ерда қолиб, аскарнинг хотинини бузганларни ҳам тўполонли қора ер ютсин, — деди.

Унинг нима учун шундай деганини на Анзират, на Нормат англай олди. Анзират унинг гапини эшишиб, сесканиб кетди – ю, кўзини ерга олиб қочди ва энди нима бўлишини кутди. Бироқ у куттан ҳеч нарса содир бўлмади. Бийди момо ўрнидан туриб, инқилаб буғчайганча, қариб, сўлиб қолган гавдасини зўрга судраганча ичида нималардир деб фўнгиллаб чиқиб кетди. Салдан кейин унинг уйи тарафдан: «Ҳа, қора босгурлар – ей, уйда ҳеч туришмайди, нуқул эркак иси бор жойга югуришади», деган жаввраши эшишилди. У кетган – дан кейин ҳам Анзират анчагача ўша ҳолатда, дастурхон бошида ўтириб қолди. Сўнг бирдан ҳамма одамни ёмон кўриб кетди, бу ерлардан кеттиси, одамларнинг кўзидан йирокроқ яшагиси келди.

Майли, бирон чолдевор бўлса ҳам бўларди, ўйларди у, ҳаммасига чидайман, оч қолишдан қўрқмайман... Фақат эри, болалари ёнида бўлса бўлди, у ҳаммасига чидайди, музлаб ўлишга, тиланчилик қилишга, ҳаммасига рози, юрак ҳовучлаб яшамаса бўлди, ҳамма нарсага тоқат қиласи, фақат одамларнинг кўзидан нарироқ турса бўлди...

Бу фикрлар унга бир йил кечикиб келаётганига ўзи ҳам ажабланарди. Агар бу туйгуни олдинроқ, ақалли олти ой олдин ҳис қилганидами, бу воқеа содир бўлмаган; у ҳам бу тариқа зил кетиб яшамаган бўларди. Унга ҳаммасидан ҳам эрининг сокинлиги ёқмасди. Нормат ҳам деярли ҳеч нима бўлмагандай, сезмагандай, у билан аввалгидай дам қайноқ, дам жиддий муомала қиласи, болаларга кўпроқ андармон бўлар, гўё улар билан овунмоқчидаи эди. У уч

йил урущда юриб, ўзи ҳам болага айланиб қолгандай эди. Унинг ҳамма ҳаракатлари худди боланикдай, лекин беўхшов эди. Анзиратга атайлаб шундай килаёттандай туюлар, болалар билан ўйнаёттанини, унинг елкасидағи Ҳожарнинг қиқир – қиқир кулаёттанини ёки Ҳолматнинг ҳайратланиб, эшиптан бўлса ҳам яна ўша Бобо Бойхун ҳақидағи эртакни берилиб эшитаёттанини кўрса ғаши келар, кўнглининг бир чеккасида ҳасад уйғонар эди.

Гоҳида Норматнинг ва болаларининг кулгисини кўриб, унинг кўнглидаги губори бир оз ёзилар, у ҳам мана шу шовқинли – шавқли ҳаётта қўшилиб кетишни истар, лекин бу ҳаётнинг остонасидан ҳатлаб ўтиш билан дарров изига қайтар, яна шубҳа уйғонар, эрининг сукути, бу шодонликлари катта сел олдидағи дарё жимлиги деб ўйлар, яна турли хил гумонлар уни турли томондан қистовга олар, бадбуруш панжаларида аямай эзгиларди. У ҳамма нарсага шубҳа билан қарайдиган бўлиб қолганди.

Мирзақулни дарё бўйида учраттандан кейин унинг кўзлари ярқ этиб очилгандаи бўлди ва эрининг майиб бўлиб келгани ногаҳон эсига тушиб қолди. У Норматнинг қайтиб келишидан шунчалик қўрқиб кеттан эдики, токи Мирзақул айтмагунча, шу қўрқув таъсирида эрининг бир оёқ бўлиб қайттанига ҳам унча эътибор бермаганди. Мирзақулнинг гапидан кейин эрининг оёқсиз қайттани унинг қоронги кўнглига чироқ ёққандай бўлди; ахир у оёқсиз, яримжонга ким ҳам тегарди, у менинг гуноҳимни кечирса бўлади, уни фақат мен шундай авайлаб – асрояпман, унинг чўлоқлигига фақат мен кўнишиб яшаяпман, бошقا бўлганда ёш жонини шу майиб одамни деб қурбон қилиб ўтиргмаган, шартта жавобини олиб кетиб юборган бўларди. Ана, Розия шундай қилди – ку, у ҳам яшаб юрибди – ку, менга ўхшаб, қийналиб ҳам юргани йўқ, эри тирик ва соппа – соғ бўлса ҳам, боши қалтирайди деб, онасиникига ташлаб, ҳосилотнинг уйига бориб олди – ку, одамлар ҳам шунга кўниқди, одамлар ўзи ким — бир тўда фисқу фасодчи, менга ўхшаган кўнгли бўшларнитина гийбат қилишади, ким ўз йўлидан қайтмаса, ўшаникини маъқуллашади; илгарилари туғри айтишган, одамлар подага ўхшайди, қаёқча ҳайдасанг кетаверади деб. Мирзақул билан ҳозир ҳам ўйнашиб юрсам, эрим хурсанд бўлиши керак,

унинг тумтайишини, гурурини ким кўтаради, у замонлар ўтиб кетди, энди ҳар ким ўғрилик, гарлик қилиб бўлса ҳам яшаб қолсам бўлди, деган замон; унинг яримжонлигига фақат мен чидаяпман, унинг сассиқ оёғини ким ҳам қучоқлаб ётарди, мен эса унинг исқиртлигига кўнишиб яшаяпман, деб ўйладиган бўлиб қолган эди. Бу ўйдан ўзи ҳам қўрқар, лекин бу ўй аста – секин тасалли бера бошлаган, Норматнинг баъзи қилиқлари энсасини қотирадиган бўлиб қолган, унинг эзмаликлари кўнглига урган, назарида эри кўп бекорчи ишлар билан шугуланаётгандай бўлар, келганидан бери бирон ишнинг бошини тутмай, уйда ағнаб ётиши жонига тега бошлаган, ҳамма ташвиш ўзининг бошига тушганини, у шу уйни деб ўлиб – тирилаётганини, афтидан, Нормат билмаётгандай, билса ҳам билмасликка олиб, мурдага ўхшаб чўзилиб ётишни одат қилиб олгандай туюларди. Айниқса, эри оёғининг яраларини очганда унинг кўнгли айнир, ўзининг юрагида бу ярага ачиниш аломатини сезмас, ярани ювиш ва боғлашга зўрға чидар, баъзан яра кўнглини ағдараётганини эридан яширмас, яра эса чўтирир бўлиб, бита бошлаган бўлса ҳам йириинглаб, илвираб турар, унга ҳар ҳафтада малҳам кўйиб, боғлаб туриши керак эди.

Улар Шариф кўса қаердандир олиб келиб ташлаб кеттан бир шапалоқ гўштни қайнатиб, шўрвасини ичиб ўтиришганда худди шундай қилди. Дастурхон атрофида ҳамманинг димоги чоғ эди. Анзират ҳам негадир ўша куни жуда хурсанд эди, у бундай пайтларда очилиб – сочилиб кетар, шарт бўлмаса ҳам болаларини эркалар, уларни «сизлар» эди. Ҳамма ўргадаги катта тол косадаги овқатни ҳур – ҳур ичишар, болалар бир оз шўхлик қилаёттан бўлса ҳам дастурхон устида ширин сұҳбат кетар, у эри билан бу йилги баҳор, экин – тикинлари ҳақида гаплашарди. Эрининг оёғи билан тегишишидан ийиб кеттан Анзират: «қани энди ҳамиша шундай бўлса? Яқинда уруш тугайди, кўклам келади. Яна биз учун ҳамишагидай ташвишлар бўшланади. Ойдананинг ўғли галагов² ҳайдаганида қанчалар ҳавас қилгандим. Энди менга худди шундай ҳавас қиласидиганлар бўлади. Биз қўш ҳайдаймиз. Холмат ҳўқизни етаклаб юради. У ҳам катта йигит бўлиб қолди. Тавба, худди отасига ўхшайди. Худди қўйиб қўйгандай. Қишлоқда ҳам тинч ҳаёт бошланади; қани

энди мен ҳам боламнинг қўш ҳайдаб юрганини бир кўрсам.
Дунёда ҳеч армоним қолмасди», деб ўйларди.

Холмат билан Ҳожар худди чумчуқ болаларига ўхшаб чирқиллашаётган эдилар. Нормат катта лўлаболиш қўйиб, ясама оёгини сал орқага тортиб, ёнбошлаб ўтирган эди. Шўрвадан кейин ҳил – ҳил пишиб, буги кўтарилиб турган гўшт ўртага қўйилди. Гўштнинг қайноқ ҳиди гуп этиб димоғларга урилди, ҳаммаси яна ҳам хурсанд бўлиб кетишиди. Гўштни тўғрагунча, Холмат билаи Ҳожар Анзиратнинг қўлига осилишиб, шовқин кўтаришди. Анзират уларга одобсизлик қилгани учун, қовоғини уюб, дўқ уриб қўйди. Нормат қўлидаги гўштни тўғраб бўлиши билан ҳамма унга иштаҳа билан ёпишиди. Анзират икки бурда гўштни оғзига солиб, мазасини олиш учун яхшилаб чайнай бошлади. Шунда унга тегажоғлик қилиб ўтирган Нормат гўшт еяётган қўли билан ярасини шошиб қашиб қолди. Кейинги кунларда унинг устки яралари битаётган, шу сабабли, тез – тез қичиб турарди. Нормат почасини тиззагача кўтариб қашлар экан, бирдан яра кўчиб кетди, бармоқлари қон аралаш йиринг бўлиб қолди. У хижолат аралаш, Анзиратта қарамай, ярасини ечиб кўра бошлади. Анзират унга қаради – ю, оғзида чайнаётган гўшти бўғзига тиқилиб қолди, кўнгли кўтарилиб, оғзини шартта юмганча югуриб чиқиб кетди, ўчоқбошига етар – етмас қайд қилди.

Ювиниб уйга кирганда, дастурхонда гўшт ўша ҳолатда турар, Холмат билан Ҳожар бир гўштта, бир тумшайиб олган Норматта, бир унга қараб, ҳайрон бўлиб туришарди. Нормат унга дағ – дағ қалтираганча, кўзлари қизариб қаради. Унинг жағлари учайётган эди. Анзират эса, касали тутиб қолдими, деб қўрқиб кетди.

Шу кечадан кейин Анзират уч кунгача Норматнинг тумтайиб юрганидан хурсанд ҳам бўлди. Кейин ярашиб кетганларида эса ўқинди. Уч кун ичида у Норматта керакли жавобларни тайёрлаб юрди. Ким ўзи у, нимасига ноз қилади, бор – йўги мажруҳ одам, агар бирон нарса деб тергайдиган бўлса, у шуни айтади. Бор, бошқасини топа қол, дейди, ўзига эса ўлиб турганлар сон мингта, майиб одам кимга ҳам керак, пешонам шўрлигидан менга тушиб қолган – да...

Бироқ Нормат ундан ҳеч нарса талаб қилмас, аввал қандай бўлса шундай муомала қиласди. Бу эса уни баттар қийнар, Норматдан ўзини ҳақоратлашни, уришни, уйдан ҳайдаб солишини куттаи, шунга яраша тайёргарлик ҳам кўрган эди. Лекин Нормат ҳеч нарса демас эди.

Эрига бўлган меҳр ҳали буткул совуб улгурмагаи, икки боласи эса ана шу сўнаётган чўғга ўт қалаб туарди. Нима бўлса ҳам Нормат унинг кўз очиб кўргани эди. Уруш, назарида, Норматни ҳам енгтан, уни кўп жаврайдиган, феъли тор одам қилиб қўйганди. У уруш ҳақида гапирав экан, Анзират бир вақтлар ўт – олов бўлган эрининг бўлар – бўлмасга жаврайдигам одам бўлиб қолганини сезар, юраги гашланар эди.

— Биласанми, уруш дегани нима? Билмайсанми? Мен ҳам билмасдим, — дерди Нормат. — Бизни урушга солаёттандада билмасдим. Кейин билдим. Уруш дегани — иккимизнинг шундай гурунглашиб ётишимизни истамайди. Уруш — биз ҳалол пешона тери билан нон топиб ейишни, қўш ҳайдаш, экин экишмизни истамайди. Бизни ҳамиша шу нарсалардан жудо қилишиши истайди Уруш — худди оёғинг остидаги кўчиб турган тошга ўхшайди, кўтарсанг ҳам ўласан, кўтармассанг ҳам. ...Мен токи бу ерга келиб, сени кўргунимча, назаримда, сен бошқа бирорвга тегиб кеттанга ўхшаб туюлаверардинг. Нима учунлигини билмайман, шундай туюлаверарди. Шундай пайтлари, агар Анзират бошқага тегиб, уйимнинг чирогини ўчирган бўлса, мен бораману ўзимни Бухор қоясининг устидан ташлаб, тилка – пора қиласман, бундай номуссизликка чидай олмайман, деб ўйлардим... Одамларни отар экамман, этим ҳамиша сесканиб кетар, худога тавба қиласар, иложи борича тегизмай отишга ҳаракат қиласдим. Буғдойзорларда одамларнинг қони оқиб ёттанини кўрганимда, йиглагим келар, шунда қоним қайнаб, тўғри келган ҳар бир кимсани отиб ташлагим келарди...

...Бугун уруш давомида агар урушдан омон қайтсам, фақат деҳқончилик қиласман, кўпкарини ташлайман, буғдой экаман, одамларга қандай ишлаш кераклигини, қандай ишласа одам урушни эсдан чиқариб юборишини ўргатаман,

ҳар бир уйга буғдой бошоқларидан илиб қўйиб, мана шунга сиғинаверинглар, мана шу дунёинг якка — ю ягона неъмати, ким урушга қарши бўлса, шу буғдой бошоғига сиғинсин, деб айтардим, ўзим эса бутун дунёга етадиган буғдой экаман, уни хотиним, болаларим билан ўриб, одамларга текинга улашаман ва ҳар бир бошоқقا одамларни тотувликка чақириб турадиган қўнғироқ осиб қўяман, деб орзу қиласдим...

Анзират бу сўзларни эрининг ўзининг майиблигини яшириш учун қилаётган хушомади, деб ҳам тушуниши мумкин эди. Бироқ у Норматнинг гапларида орзу билан ўзининг ичидаги ниятларни солиштириб, уялиб кетар ва йиғлар, эзилар, бу орзулар эрига қарши тузган ҳамма режаларини ўзгартириб юборарди. Норматнинг гаплари унга жуда қаттиқ таъсир қиласар, эрим урушда қон кечиб юрганда мен бу ёқда ўйнаш ортириб, давримни сурин юрдим, қандай нодон ва енгилтак аёлман, худо шунинг учун ҳам менинг пешонамни шўр қилиб яраттан, деб хилват — хилватда йиғлаб оларди.

«Менда нима гуноҳ?! — ўйларди у гоҳида, — ҳамма айб урушда, агар уруш бўлмаганда, эрим ёнимдан жилмаганда мен бундай қилмасдим. Бугун меҳримни эримга, болаларимга берган, ундан баҳра олган, уларнинг қувончини қувонч, севинчини севинч деб билган, мен ҳам бошқалардек эримга содиқ аёл бўлар эдим», — деб ўйларди у.

XI

Мирзақул Шибоқлидан — амакисининг тўйидан қайттач, эрталаб Олмага тушиб борди — ю, Норматнинг бир оёқдан айрилиб қайттанини ва Шариф кўса идорадагиларни "аскар кўришга" айтиб кеттанини эшитди. Аввалига у ишонмади, сўнг колхоз ҳосилоти уни Лангарда, аравада келаёттанини ўзи кўрганини айттач, юрагига гулгула тушди.

— Қизиталоқ, арвоҳга ўхшаб қопти, — деди ҳосилот ачинган киши бўлиб бошини қашларкан, тилини танглайига уриб чулпиллатди. — қандай одам эди — я?! Қўрса одам қўрқади! — Сўнг бир зум Мирзақулга синовчан кўз ташлаб турди — да, — Лекин сизга қайтмагани тузук эди. — деди

сирли товушда. — Суқсурдай хотини бор дейишади... ҳа — ҳе — ҳе, урушга кетаётганида комисариатда "хотиним менинг ярим полвонлигим эди, энди дармон қолдими бизда", деб айтган экан... Шундай зўр хотин қаёқдаги бир ялангоёқка тушиб қолганини қаранг...

Мирзақул ҳосилотнинг кинояли гапиришидан фижиниб қўйди. «Туллак, фирт туллак бу! — ўйлади у алам билан. — Хотинининг йили ўтмасдан ёшгина келинчакни уйига олиб бориб ўтирибди — ю, яна нафси тўймайди...»

Идорадан чиқиб, тўғри уйга борди. «Нима қилиш керак? — деб ўйлади у. Норматнинг омон қайттани учун ўзининг қўрқаётганини ҳис қилиб. — Агар Нормат ўша оркашлигига қолган бўлса, хотинидан ҳамма нарсани эшитади — ю, бу ерга бостириб келади. Ундан соғ қутулиш қийин. Унинг авваллари ҳам сал қони суюқлиги бор эди, деб эшитардим, нима иш қилаётганини ўзи ҳам билмай қоларкан... Агар эшитса, шундай қиласди... қўрқяпманми, ҳа, қўрқяпман. Тентакдан қўрқмай бўладими?!»

У ростдан ҳам қўрқаётган эди. Урушдан қайтиб келганлар унинг хирсадай гавдасига ҳасад билан қараб, хўмрайиб, ичларида нимадандир норози бўлиб юришар, бўйсунгиси келмасди. Унинг мансаби энди уларни чўчитолмасди, аввалгида салобатли ва ҳар нарсага қўли етадиган эмасди. Урушдан қайттанлар билан ҳисоблашиб гаплашиш керакдигини у тушунар, Норматнинг худди шу нарсасидан кўпроқ ташвишга тушаётган, қўли калта келиб қолишидан чўчиётганди.

Мирзақул умрида кўп хотинларни кўрган, бирига хушомад билан, бирига мансаби ва қўли узунлиги билан эришганди. У хотинларни шунчаки кўнгилочар тоифа деб биларди.

Шўроликка сайланган иккинчи йили Мирзақул овулма — овлу юриб, биргадаларда ўримнинг кетишини текшириб юрар экан, тожик овулларидан бирига борганда, ўроқ ўраётган келинчаклардан бири, бир пайлар ўзи орзу қилгандек истараси иссиқ, лўппигина келинчак отига ва ўзига сук билан тикилиб, хумор қилиб жилмайиб қўйганини кўрганда, юрагида қандайдир ширин, роҳатбахш режалар ўйғи на бошлаганди.

Бир неча кундан кейин эса жилдираб оқаёттан булоқ сувининг роҳатбахш товушини тинглаб, тиниқ, мусаффо ёз осмонига қараганча, чакалакзор ичида тоҷик келинчагининг бутун вужудни қитиқлайдиган энтикишини ва ўзбекчани бузиб: «Оқо Мирзо, сиз ёмон экон», деб эрининг бўшанглиги ҳақида бидирлаб гапираёттанини эшишиб ётарди. Тонгги шабада ёқимли, хушбўй беда ҳидини олиб келарди. Мирзакул бу totли ва роҳатбахш ҳаётини беда ҳидидай бир лаҳза эмас, бир умр давом этишини истаган эди ўша саҳар.

Бу орада уруш бошланиб қолди. Уруш Мирзакулнинг ризқини эри ўлган ва енгил яшашга ўрганиб қолган уйларга сочиб ташлади. Лекин у уста одам, бу ризқини териб олиб, эл – юрт қаҳрига учрамоқчи эмасди. Шу сабабли у ўзини тийиб юрди.

У бир илож қилиб, эски танишларини ўртага солиб, урушга бошқа бир адашини жўнатиб юборгач, бугун бир аёллар армиясининг қўймондони бўлиб қолди.

Аёлларга, айниқса, қўнғирот аёлларига бош бўлиш ва уларни бир мақсадга бўйсундириш нақадар қийин бўлмасин, бу иш Мирзакулнинг қўлидан келди. У ишнинг кўзини биладиган, хушмуомала, аёлларнинг ёшига, кўнглига қараб муомала қиласидиган раис эди. Фронт учун, Ленинград учун, Москва учун ғалла, кийим – бош, пул маблаги, озиқ – овқат тўплашда у ҳамма йўллардан фойдаланди. Бирорни алдади, бирорга ялинди, бирорга дўқ урди ва фронт учун ишлашда юқоридагиларнинг кўзига тушди, катталарнинг ишончини қозонгач, аста – секин ўз мақсадлари учун хизмат қила бошлади. У эридан қорахат келган аёлларга қўпроқ меҳрибон эди, қўпроқ ўшаларга хушмуомала эди.

Урушнинг учинчи йили, ёшлигига кўриб, лабини тишлаб қолган, чоретимликлардан Нормат чавандозга тушган Анзиратнинг эридан қорахат келганини эшиштач, унга шу вақттача билдирамаган қариндошлик меҳрини намойиш қила бошлади.

У Халил отбоқарникида ўз режасини амалга оширгач, бирдан хотиржам торгди. Мирзакул, Анзират энди гаҳ десам қўлимга қўнади, уни ўзимта ром қилиб қўйдим, деб ўйлаган эди. Чунки олдинги аёллар шундай бўлганди. Бироқ Анзират

ундай қилмади; кейинги сафар уни ҳайдаб солди, худони ўртага қўйди. Йиглади – сиқтади, ялинди, уришди, қарғади — барибир ожизлик қилди: "уруш тугаса оламан, болаларингта ўзим оталик қиласман", деганига ишонди, уни қарғаб, ундан чўчиб, уни ҳайдаб, ахийри ўзини унинг ихтиёрига топширди.

Кейинги боришлирида Мирзақул дадил ҳаракат қилди, энди у бир адашган аёл кетма – кет адашаверишини, бир алданган кетма – кет алданаверишини, тоғда кўчган битта тош ҳамма тошларнинг кўчишига олиб келишини кўп йиллик тажрибасидан яхши билар эди. У Анзиратнинг қалбидағи ўша битта тошни кўчира олган, энди бошқа тошларни осонгина қулатавериши мумкин эди. Кўчки остида қолган Анзиратнинг қалбига у энг заиф томонлардан кириб борар, ўзи ҳам унга аста – секин боғланиб бораёттанди..

Мирзақул Норматни қайттанидан беш кунча кейин Янгибой оқсоқолнинг уйидан икки киши бўлиб чиқиб келаёттанини кўриб, бу чўлоқ одамга нисбатан юрагида англаб бўлмас ҳасад уйғонди. Нормат оқаринқираган, бир оёғини силтаб босар, юриши узоқдан беўхшов кўринар, у ҳар оёқ босгандা бир томонга майишиб кетар, олдидағи — Шариф кўса билан Мирзақул танимайдиган телпаги катта одамга у дарёнинг нариги бетида салобат солиб кўриниб турган қотнинг устини, кўкиш туманли чўққимарни кўрсатиб нимадир деб қўяр, Шариф кўса билан телпакли одам у кўрсатган томонларга қараб, бошларини қимирлатиб, тасдиқлашар эди. Мирзақул уни кўриб, бўғилиб ёттан кўксида алам олов ёниб кетди. Шундагина у Анзиратдан кўнгил узиш маҳоллигини ҳис этди. Сулув бўлгани учун эмас (қанча судувларни қўлидан ўтказди) Анзиратда унга ёқадиган яна бир нима бордай эди. Бир вақтлар хотинининг йиглаши қанчалик фашини келтирган, жаҳлини чиқарган, кўнглини совуттан бўлса, Анзиратнинг қарғагани ва йигиси шунчалик хуш ёқар, йиглаш ва қарғаш унинг чиройини очиб юборгандек, бу билан эркалик қилаёттандек туюлар, унинг тошдай бўлиб ёттан кўнгил музларини бу эркалиги билан эритиб юборар, жунбушга соларди. Агар у қувнаб кутиб олса, балки, кўнглим совиб кетарди, деб ўйларди у баъзан.

Нормат қайтгандан кейин у Анзиратнинг кўзига кўринмади. Фақат кечқурунлари уларнинг уйи орқасида оти билан ўралашиб юрар, Анзиратнинг ёшли кўзлари, қатиқ ҳиди келадиган нам соchlарини қўмсар, у дунёдаги энг ширин неъматдан айрилиб қолгандай эди. У бундай тенгсизликдан — бир чўлоқча шундай сулувни қўшган тақдир таҳқиридан тоят ўкинар, Анзиратни соғинарди.

Қишиш бошларида Терсота атрофида айланиб юриб, дарё бўйида, муз ўйиб, сув олаётган Анзиратни учратиб қолди. Оқшом эндиғина чўккан, ерда енгилгина қор бор, атроф ҳали ёруг ва сокин эди.

Анзират уни кўриб қўрқиб кетди: қўлидаги пақирини ташлаб юбориб, унга ваҳима билан тикилиб қолди. Мирзақул унинг ҳолатини тушунди.

— Яхшимисан, Анзират,— деди у мулоийим товушда. — Эринг келиб тинчиб қолдингми?

Анзират индамади. Унга ҳам ҳуркиб, ҳам қўрқиб; тикилиб тураверди.

— Анча тўлишиб қолибсан,— давом этди Мирзақул ўша оҳангда. — Эринг билан турмушинг ширин шекилли — а?! Ҳеч мени ҳам ўйлайсанми, Анзират?!

Анзират қўлларини ёқасига олиб бориб, унга чўчиб тикилганча ўтириб қолди.

— Мен эса сени ҳар куни ўйлайман, ҳар куни тушимга кирасан, ҳар куни сени бир кўраманми деб, уйинг атрофида ўралашиб юраман, сен эса қиё ҳам боқинг келмайди...

Анзират бирдан кўзларини ундан олиб қочди — ю, иргиб турди.

— Кетинг, — деди у қаҳр билан шивирлаб, унинг юзи ғазабдан кўкариб кетганди.— Кетинг... Одамлар кўриб қолади... Кетинг... Шунча азоб берганингиз ҳам етади...

— Мен ўз ваъдамни унугтаним йўқ, — аланглаб пишиллади Мирзақул. — Ташла, уни...ташла, Анзират, ўзим оламан сени, бошингтacha зарга кўмиб ташлайман... Анзират, ахир ўзинг уйланинг дегандинг — ку!.. Мен ўйлаб кўрдим... бошингни очиқ қилиб олсанг, уйланаман...

— Керакмас... керакмас... — ҳўнграб юборди у. — Мени тинч қўйинг... Эримнинг ўзи яхши... Тинч қўйинг. Худо

хайрингизни берсин... тинч қўйинг... шусиз ҳам юзим қора бўлиб қолди...

Мирзақул унинг йигисини, таниш гапларини эшитиб, юраги орзиқиб кетди. Отдан тушиб унинг қаршисига борди.

— Нима қиласан ўша чўлоқни?! — Илтижоли сўради у.

— Бошингта урасанми? Ўзингни хор қилишга арзимайди. У ҳеч нарсага ярамайди... Умринг азобда ўтади...

— Майли... — Тез, шошиб гапини бўлди Анзират. — Майли... ишингиз бўлмасин... фақат мени тинч қўйинг, умрингизга дуо ўқиб ўтай, тинч қўйинг.

— Истасанг, сени ундан тортиб оламан... Истасанг, эрингни яна қайтариб жўнатиб юбораман... ўша ёқларга...

Мирзақул Анзиратнинг қўлини ушлади. Анзират чўчиб орқага чекинди...

— Истасанг, эртага тўй қип оламан. Эшитяпсанми, эртага... Фақат сен истасанг бўлди. Эринг ҳеч нарса қиломай қолади.

— Йўқ, йўқ! — Анзират орқага тобора кўпроқ чекинаркан:

— Уни тинч қўйинг,— деди. — У сизга нима гуноҳ қилди... Тинч қўйинг бизди... Менга ҳеч нарса керак эмас... — У йиғлар экан, қўллари қалтирап, кўз ёшлари юзини ювив, лабининг бир чеккасига келиб қуйилар, пақирни қаттиқ қучоқлаб олган эди.

— Мени ҳам ўиласанг—чи, мен ҳам одамман...— деб аламли зорланди Мирзақул. — Сени кўриб ҳузур—ҳаловатимдан айрилдим, ҳаётимда маъни қолмади...

— Керак эмас... — Эшитишни ҳам истамай такрорлади Анзират, пақирни олиб, қишлоқ томон тойғана — тойғана чопиб кетди, эллик қадамча бориб тўхтаб, изига қаради. — Болаларингизнинг роҳатини кўринг, бошқа келманг... бошқа кўришмайлик!

Сўнг бўш чеалакларни даранглатганча югуриб кетди.

— Тинч қўймайман. — Хўрлиги келиб, ақлдан озар даражада хириллаб бақирди изидан Мирзақул. — Эрингни сургун қиламан... сени тортиб оламан... ҳали қараб тур, менини бўласан!..

Аёл гапини эшитдими, эшитмадими — билолма — ди. У Анзират токи қишлоқча кириб кетгунча изидан қараб турди. Сўнг отини етаклаган кўйи Тераклига жўнади.

У бекорга Норматдан қўрқкан эди. Унинг Норматсиз ҳам иши чатоқ эди. Уруш охирлаб, олдингидек, фақат куруқ гапларга ва раҳбарларнинг ёзма ахборотларига ишониб келинган замонлар ўтиб, урушдан нафасини ростлаб олган ва фақат уруш ҳақида эмас, уруш орқаси ҳақида ҳам ўйлайдиган замонлар келиб, текшир – текширлар бошланган, Норматсиз ҳам унинг тагига сув кетган эди. Йил бошларида унинг ҳарбий комиссариатдаги эски ошнасини гап – сўзсиз фронтнинг олдинги қаторига жўнатиб юборишида ва урушга бормай юрган кўпгина кишиларнинг ҳақиқий фамилия – ларини излаб топишида, уларга ҳам қайтадан чақириув қофози берилди.

Бу иш шу даражада тез юз бердики, Мирзақул танишларини орага сололмай ҳам қолди. Ошнасининг фронтта жўнатилганини эшитиб ва колхоз раисининг ишдан кетганидан қўрқиб юрган кунларида унга ҳам чақириув қофози берилди. Унга уруш даврида қилган катта хизматлари эвазигагина суд бўлишдан халос этилиб, ўз ихтиёри билан фронтта жўнатилаётганини айтишида.

Анзиратнинг калтакланиши ва унинг чала туғиб қўйгани, Норматнинг уйини ташлаб кетгани, лекин ўйнаши кимлиги номаълум эканлиги, чоретимликларнинг бошқа уруғ ичida бошини кўтара олмай қолишгани, уларининг тутангтириқдай тутаб ётганлиги ҳақидаги миш – мишлар қўшилиб – чатилиб, унинг қулоғига етиб келгач, у дафъатан эсанкираб қолди. Лекин Анзиратнинг миқ этмагани ва ўз номи сирлигича қолганини билгач, кўнгли сал тинчиди. Анзиратнинг ўлим тўшагида ётганини эшиттач, унинг кўнгли ўзи ҳам тушунмас бир меҳрга тўлди.

Урушга кетишдан олдин у Анзиратни кўп қўймасди. Агар ўлиб кетсам, у мени ҳамиша қарғаб ўтади, юрагимда армон қолади, деб ўйлади. Охирги марта унинг қатиқ ҳиди келадиган сочини ҳидлагиси, умрининг энг ширин дамларини бир зум қайта ҳис қилгиси келди: агар шундай қилсам, урушга армонсиз кетаман деб ўйлади. Норматнинг уйини ташлаб, бошқа уйда яшаётгани унга умид бағишлади.

Урушга кетиш олдидаи Анзиратни кўриш истаги унинг бутун вужудини қамраб олди ва охири бу мақсадга, ёввойи ва яна ўша тийиқсиз мақсадга айланди.

...Терсотадан бошланган миш – мишлар жилғаси аста – секин узайиб, жуда катта түлқинга айланди ва тогу тош демай бир неча ҳафта ичида бутун қўнғирот элинни қамраб олди. Бу тўлқин шу даражада шиддатли ва оҳанрабо эдики, унинг сувига юз ювмаган одам деярли қолмади. Миш – мишлар тўлқини улкан дарёга айланиб, худди баҳор пайтидагиdek, қутуриб, қоп – қора бўлиб, йўлида учраган тўсиқларни йиқитиб, шиддат билан қишлоқма – қишлоқ бостириб кира бошлади. Терсотадан кичкина жилға бўлиб чиқсан бу дарё тезда Ҳисор тизмаларидағи қишлоқларнинг ярмини босиб олган баҳайбат кўлга айланди. Бу кўл ўз чегарасини аста – секин кенгайтира бораради.

Ҳар ким бу миш – мишлар шарини кучи борича пуфлаб, шиширишга ҳаракат қилас, урушдан чарчаган одамларга бу шар жуда қулай эрмак эди. Воқеалар пуфаги шу даражада семириб кетдики, охир – оқибатда одамлар бу воқеа қайси қишлоқда, қай маҳал, қайтарзда содир бўлганини ҳам эсдан чиқариб, қуруқ воқеанинг ўзини ҳикоя қила бошладилар. Фалон қишлоқда, фалон киши урушдан уйига қайтиб келса, хотини ўйнаши билан ётган эмиш, у аламидан ўзини осиб қўйибди... Ёки, фалон киши урушдан қайтса, хотини ўйнашидан бола орттириб ўтирганмиш, у бола – сола билан хотинини уйига қўшиб ёқиб юборибди... Фалон киши урушдан келса, хотини бошқа бирровга тегиб кетибди, бечора номусга чидай олмай яна урушга қайтиб кетибди ва ҳакоза...

Бироқ Норматнинг ўзигина юз берган ҳодисага ишонгиси келмас ва бу воқеадан ўзига келолмасди. У бунинг ҳаммасини қандайдир ёмон туш ва мен туш кўряпман, тезда ўйғониб кетаман, ҳаммаси биратўла тугайди, деб ўйларди. Аммо, бу туш узоқ ва сўнгсиз тушга ўхшарди, уни азоблар, ўзини ўнгариб олишга имкон бермасди. У ўша куни нималар қилганини эслай олмас, Анзиратни буғдими ёки урдими, ҳаммаси аланг – жаланг эсида қолган, бошидаги жароҳат қўзиб, хотирасини заифлаштириб қўйганди. Унинг алданган кўнглида хилма – хил режалар кезар, булар ҳам алданган ва хўрланган кишининг режалари эди. Бу шармандаликка

чида́й олмай, қаёққадир бош олиб кеттиси келарди. Унинг хаёлида дам – бадам бу номуссизликларни кўргунча, нега ўша ёқларда ўлиб кетмадим, нега мен қабрини худо ҳам унуттан кишиларнинг бири бўлмадим, деган афсус ва надомат кезар эди. У элим – юртим, болам – чақам деб, қирғинлардан омон қайтдим, бошқалардай бегона хотинларга кўз олайтирмадим, хотинимни ўйладим, уни энг вафодор, деб билдим, унга хиёнат қилмадим, уни деб етиб келсан – у мен сифинган эл мени мана бундай кутиб олди, деб ўйлар, ўкинар, ўксинар эди. Шундай пайтлар оёгини кесган врачни, унинг далдаларини, ураллик солдатни ва доимо “сизлар бу ердан туриб ўз ерларингни, бола – чақаларингни ҳимоя қиляпсизлар, голиб бўлсангиз, элларинг сизларни поёндоz тўшаб кутиб олади, мағлуб бўлсаларинг, сизларни қувиб ҳайдайди”, деб ташвиқ қиладиган замполитни эслар экан, уларнинг ҳаммаси уни алдагандек ва гаплари ҳам бемаъни, кераксиз нарсага, ўзининг устидан кулиш учун атайлаб тўқилган маталларга ўхшаб қолган эди. Мени, аввало, урушга бор, деб алдашган, кейин урушда алдашган, хотинини йўлдан уриш учун уни урушга юборишган – урушда ишларни битказиш учун алдашган, уни ҳамма алдаган, кўрган ҳар бир киши алдаган, келган биринчи кунлари ёк алдашган, йўлларда алдашган, госпиталда алдашган, уни мана шу машъум воқеани кўрсатиш учун уйига қайтаришган, сўнг устидан кулиб юришган, уни ҳамиша алдаб келишган... деб ўйлар эди. Келган кунлари одамларнинг жилмайишлари ҳам, ҳаракатлари ҳамма – ҳаммаси мана шу нарсадан дарак бўлган. У эса уларнинг масхараомуз жилмайишларига кўр – кўронা қўшилиб, жилмайиб юраверган.

Юраги туб – тубидан оғрирди. Бу оғриқ асабларини эзib ташлаётган ва бошидаги яра ҳам оғрий бошлаганди. Нимадир иғнага ўхшаш нарсалар унинг юрагига келиб урилар, ичи, бўғзи ёниб, қуруқшаб, ачишиб борар, бошидаги оғриқ тобора кучаяётган эди. Кимдир унинг миясини тинмай чангллар – эзғилар эди.

У қайттан кунлари Анзиратда алланечук бегонасираш сезган, лекин буни урушга ва кўришмаган тўрт йилга йўйган эди. У Анзиратта хос бўлган кўнгилчанлик ва ўзига

ярашадиган нозли ишваларидан энди қандайдир енгилтаклик топгандай, у бугун умр бир бузуқ хотин билан ўзини булғаб келгандай, қўйнида илонни сақлаб юргандай бўларди. Анзиратнинг авваллари унга ёқадиган барча келинлик одатлари энди унга ўша бузукликдан даракчилик туюларди. Унинг ожиз ва беқарор қалби яна урушда юрган кунларида гидек тушкун ҳолатта қайтган, ишончсизлик ва қайғуга тўлган эди.

У боғ тўридаги уч йилдан бери қаровсиз ётган Бийди момонинг кенжা ўғли уйида яшай бошлагач, бошқа ҳеч қаёққа чиқмай қўйди. Унинг бош кўтариб юришга қурби етмас эди. Уни кам кишилар йўқлаб келарди. Баъзида иссиқ – совуғидан хабар олгани Бийди момо ёки катта келини ва Шариф кўса келарди. Бийди момо унга жавраб – жавраб кетарди. Кейинги кунларда Норматнинг шу аммасидан бўлак яқин кишиси қолмагани учун у аммасидан кўпроқ миннатдор бўларди. У боғнинг ўртасидаги бу уйда худди беватан дарвишларга ўхшаб кун кечирарди. Бийди момо унга уйланишни ва шунда хотини қуйиб қолишини, аёл зоти азалдан куйинчак бўлиб яратилганини, уйланса бўлди, Анзиратдан муносиб ўч олган бўлишини айтиб, Норматни ҳоли жонига қўймасди. Нормат эса бошқа уйланишни хаёлига ҳам келтирмасди. У шундай пайтлари ёлгизликни истарди. У ерга кигиз, пўстак тўшаб ташланган кенг хонада ёлгиз ётар экан, ичи совиб бораёттанини, кўксида қандайдир муз пайдо бўлганини, унга ҳаммасидан ҳам шу муз кўп азоб беришини ҳис қиласар, муз эса тобора катталашиб борарди. Хонанинг чирогини ҳам ёқмай ётаркан, музлаб ётган вужудида қандайдир ўлимтик ҳис кезаёттанини сезар, ўзини дунёдаги энг баҳтсиз киши деб ҳисобларди.

Баъзи – баъзида уни Шариф кўса йўқлаб келарди, эски гапдан оғиз очиб, ошнасининг кўнглига озор бергиси келмай, унинг олдида соатлаб ўтириб кетарди. Нормат уни кўриб гижиниб ўтирас, гапларини истамай ёшпитар, хўмрайиб олар, ўзининг ожизлигини кўрсатмаслик учун шундай қиласарди. У ҳали ҳам ўзини бечора, тақдирга тан берган киши қилиб кўрсатишни истамасди.

— Е, йил шерикчиликка экамизми? — Сўради орадаги сог’лакни юмшатиш учун Шариф кўса. — Ер роса тобга

келяпти – да. Жонивор қор изма – из ёғди – я! — Шундай деда Норматта ўтринча назар ташларди.

— Мен ўзим экмоқчиман, — деди Нормат унинг ҳафсаласини пир қилиб.

— Қаерга? Ҳамишаги жойингтами?!

— Ҳа.

— Нўхат экасанми, нўхат бозорда қиммат дейишади. Бир торозисига бир эчки берадиган эмиси. Ёки зигир экасанми?..

— Ҳа! — Бақириб берарди ўрнидан даст кўтарилиб Нормат,— Нўхат ҳам экаман, қовун – тарвузам... Ҳаммасини экаман, тинч қўясанми, йўқми?! Нега менга канага ўхшаб ёпишиб олдинг?!

— Нега бақирасан! — Шариф қўса ҳам тутиб кетарди.— Нега менга бақирасан? Нима, отангни мен ўлдиридимми? Сенма фақат... шундай бўлган? Одамларнинг боласи, отаси ўлиб келяпти. Улар сенга ўхшаб таркидунё қилиб олгани йўқ, эркакмисан ўзи, бундай бовурингди кўтар!.. Ётишингни қара... Ҳе, менга деса ўлиб кетмайсанми?!

Шариф қўса хафа бўлгандай чиқиб кетар, барি бир яна гуноҳкордек: «Ҳа, ётибсанми, ота ули», — деб кириб келарди.

— Балки ҳаммаси бўлмагур гацдир, а, Нормат? — деди бир куни ўтириб – ўтириб Шариф қўса.— Балки шунчаки аёлларнинг ваҳимасидир. Ҳеч ким биронта билан кўрмаган – ку.

Нормат унга ҳафсаласизлик билан қаради. У ҳам бир неча кундан бери шундай шубҳага борар, бироқ уни ўзи олдин юзага чиқаришга қўрқарди.

— Ким айтди бу гапни?— деб сўради жаҳл билан.

— Ҳамма, бугун қишлоқ айтгапти.

— Хотинингам шундай деяптима?

Шариф қўса энсаси қотгандек қўл силкиди:

— Хотинларнинг ҳаммаси шундай, ваҳимчи бўлади. Аёллар нима, сигир нима, миш – мишни кавш қайтариб турмаса еганлари ҳазм бўлмайди.

Шундай пайтларда Норматнинг қоронги ва зулмат бостан ичида хира бир чироқ ёнгандай бўларди. Ичи ёриша бошларди. Бу нур ҳали кучсиз ва заиф бўлса ҳам вужуди алланечук исирди.

XIII

Анзират қорлар эриб, кунлар исий бошлагачгина зўрга туриб юрадиган, ташқарига ўзи чиқиб кирадиган бўлди. У озид кеттан, аввалги чиройидан асар ҳам йўқ, сочи бирдан оқариб, қариб қолганди. Ҳомиласи тушганидан кейин кўп қон йўқотавериб, сарак – сарак касали бошланганди. Бопини тик тутиб юролмас, доим муштипар тикилар, юзида қони йўқлигидан оппоқ юзи мурданикideк совуқ эди. Кўзлари чўкиб киртайган, косаси қорайиб кеттан, атрофга маънисиз ва илтижоли кўз югурттар, боши қалтирайвергандан унинг қаерга ва нима учун тикилаёттанини билib бўлмасди. Унинг ўзи ҳам бир нарсани яхшилаб кўриб олип учун узоқ тикилиб тургандан сўнггина ангаар эди. Ҳудди бир нарсадан уялаёттандай, бир кафти билан тез – тез юзини яшириб, кафтлари орасидан нозланаётганга ўхшаб қарап, секин, заиф товушда, вой, мен ўлай, деб қўярди. Унинг бу қилиғи ярапмасдигина эмас, кишида қандайдир ачиниш туйгусини туғдирар эди. уни аввал кўрган кишилар бу ўша Анзират эканига дафъатан сира ишонгилари келмасди. Унинг кўзлари шу даражада бепарво йилтиллардики, гўё иккита чуқур горда noctorgina ёниб турган мойчироқларга ўхшарди. Ҳатто Холмат билан Ҳожарни ҳам зўрга, анча тикилиб тургандан сўнггина танирди. Юрганда ҳам худди суриниб кетишдан қўрқкан ёки сув тўла идиш кўтариб бораёттанду сувнинг тўклишидан қўрқиб, атайлаб секин ва эҳтиёт бўлиб юраёттандек қадам ташларди.

Икки ойдан бери бошида ўтириб чиқсан Ханифа ҳам унга қараб бошини чайқар ва лабини қаттиқ тишлаб, йиглаб юбормаслик учун кўзларини тиззасига босарди. Кўргани келган келинчаклар унга кўзлари тушиши билан ташқарига югуриб чиқиб кетар, том орқасига ўтиб, йиглашар, қишлоқдошлари унинг икки ойда бунчалик қариб ва чўп – устухон бўлиб қолганига ажабланишар, бироқ ҳеч ким бирон нарса дея олмасди. Мулла Хидир ҳам қизининг кимдандир бола орттирганини, Норматнинг уйини ташлаб чиқиб кеттанини эшиттач, келмай турибоқ: «Менинг ундай қизим йўқ, оқ қилдим», деб овоза қилди. Отасининг оқ қилгани Анзиратта, айниқса, қаттиқ таъсир қилди, У бир ҳафта ҳеч

нарса емай, ҳеч кимга гапирмай шифтта тикилиб ётди. Бир ҳафтадан кейин бошини кўтариб, “Отам келмадими?” — деб сўради. Келмаганини эшитгач, ниҳоят, сўнгти бир ой ичидагизига ўш олиб: «Мен отам келди, деб, кўзимни очибман!», — деди — ю йиглаб юборди. У ўрнидан туриб юра бошлагач ҳам мадорсиз эди. Сал нарсага йиқилиб тушай дер, оёғини сал нотўғри босса ҳам довдираф кетар, юрганда қўлларини олдинга чўзиб, худди ҳеч нарса кўрмайтандай лапанглаб, зўрга юрарди. Қўллари ҳам тинимсиз қалтираб турар, доим ниманидир излаёттандай ёки кимнидир кўришни истагандай атрофига ҳам қўрқув, ҳам умид билан тикиларди.

Қўлига теккан нарсани секин кўтариб қўрар, сўнг ҳафсаласи пир бўлиб ташлар ва яна ниманидир излай бошларди. «Нимани излаяпсиз?» — деган саволга жавоб ҳам бермас, тимирскилай — тимирскилай, қўллари толгач, ҳориб, қўлларини кўрпа остига тиқар, кўзини юмар, шу ҳолатда узоқ ётар, сўнг яна ниманидир излаб, қўллари тимирскиланар эди.

— Нимани излаяпсиз? — сўради Ханифа унинг жуда безовта бўлаёттанини сезиб.

— Йўқ — йўқ... ҳеч нарса... — дерди у ва қўлларини кўрпага яширап, Ханифага синовчан кўз ташлар, унга узоқ тикилгач, худди тўсатдан таниб қолганидек: — Туморим қани?... — дерди заиф товушда. — Кўк туморим... Отам Боқоҳон эшонбободан обериб эди... қизгинамга... қизгинамга деб, обериб эди... отажонгинам...

Ханифа нима қилишини билмас, лабларини қонаттудай бўлиб тишлар, хонага кўз югуртириб:

— Мен уни олиб қўйдим... йўқолиб қолмасин деб олиб қўйдим, — дерди ўйлаб топган гапидан хурсанд бўлиб кетиб.

— Сал мадорга кирсангиз, тақиб юрасиз.

— Отам, бу сени бало — қазолардан асрайди, деб обберганди. Сен менинг ёлғиз қизимсан, шуни тақиб юрсанг, ҳамма кўргилик сендан нари юради, деб, обберганди...

— Отангиз кўп яхши одам... — Ханифа иложи борича унинг кўнглини қолдиргиси келмасди. — Ҳали сизга кўп туморлар обберади, сиз ҳеч нарсани кўрмагандай бўп кетасиз...

— Энам... мени кўргани ҳам кемайсан, дермиш тушимда...
Мен яқинда кўргали бораман, энажон, фақат туморимни
тоғиб олай, дермишман. Тақиб юрмасам, отам ҳафа бўлади,
депман...

— Яхшиликка бўлсин, илоё, яхшиликка бўлсин! —
Ханифа кўзларидағи ёшни артарди.

— Сиз йиглаяпсизми?.. — Сўрарди бирдан авзойини
ўзгартириб Анзират. — Менга ачиниб йиглаяпсизми?..
Пешонам шўр экан, нима қиласай, опажон... — Бирдан кўзидан
ёш қуиилиб келарди. — Мени худо урган экан азалдан...
опажон... Сиздан яхшиликлар кўрдим... Агар мен думалаб
кетсам, Холмат билан Ҳожар ҳоваръда (асли текислик, лекин
шевада "ташландиқ", "кимссиз" дейиомқчи) қолмасин,
опажон...

— Вой, ундей деманг, айланай, ҳали бу дардларди
кўрмагандай бўп кетасиз.

— Биламан... опа, куним калта... ҳар кеча энам тезроқ
келсанг—чи, сочим битглаб кетди деб, бошини титиб турди...
Куним калталигини биламан, опажон.

— Ёмон хаёл қилманг, айланай. Ҳали болаларингизнинг
роҳатини кўрасиз.

— Мен ҳам умрим бўйи шуни орзу қилардим. Нима
қиласай, ниятимга етмайдиганга ўхшайман...

— Етасиз, ҳали бу кунларди кўрмагандай бўп кетасиз...

Анзиратта ҳеч ким Нормат ҳақида гапирмасди. Ундан
ҳол сўрагани келганлар фақат ўз ташвишларини гапириб,
Анзиратнинг кўнглини овлаган бўлишарди—да, шу билан
бурчларини бажарган бўлиб, изига қайтишарди.
Келинчакларнинг ҳаммаси Анзиратнинг олдида қувноқ
бўлишга, уни оз бўлса ҳам нимадандир қувонтиришга
ҳаракат қилишарди.

Бироқ у кундан — кунга озиб, мадорсизланиб ҳолдан тойиб
борарди. Икки ой ичида унинг танаси чўпга кўйлак кийгизиб
қўйилгандаи қуриб қолди. Кўкиш тусга кирган соchlари жуда
тез оқармоқда эди. Уни биринчи кўрган киши элликларга
бориб қолган бўлса керак деб гумон қиласди.

Ўрнидан туриб юра бошлагандан бир ҳафталар кейин
унинг қасали қайта ўринга ётқизиб қўйди. Энди унинг бутун
танаси кўкара бошлаган эди. Даствлаб чакка томирлар

кўкарди. Сўнг тирноқларга ўтди. Шу ҳафта ичида кўргали келган Сора деган тенгдош келинчак унга кўзи тушар – тушмас, серрайиб қотиб қолди ва югуриб айвонга чиқиб, йиглаб юборди.

— Аёлларнинг шўри қурисин! — Йиглар эди у девор муштлаб. — Аёлларнинг бошига шўр бўлиб тушган урушнинг номи ўксин. Уни ўйлаб топғанларнинг ҳаммасини қора ер ютсин, илойим. Эй, худо, биз сенга нима гуноҳ қиб эдик, бизга бунча азоб юклайсан!. Худойим, бу нимаси?! Тирик мурданнинг ўзи – ку!. Шунчаям азоб бўладими?!

Анзират кўргани келган нўғай фельдшер унга дорилар ташлаб кеттач, яна қайта юра бошлади.

Отасининг опасини уриб, яна уларни ташлаб кетиб, ўзи Бийди момоникида юрганига ҳеч тушунолмаган Холмат жуда мулоҳазали бола бўлиб қолган эди. Опаси касал бўлганидан бери у болалар билан ўйнамас, Ҳожарни овутар, онасига иссиқ сув қайнатиб, чой ичирар, печка ёқар, уй супурар, молхона қурагар, ўтин ёради. Кечалари опасининг бошида ўтириб, шу ҳолатда ухлаб қолар, опасининг ётиб қолгани уни бирдан катта одам қилиб қўйган эди.

—Холматингиз зўр йигит бўлади, — дейишарди келинчаклар унинг эслилигидан қувонишиб.

Холмат, опаси қанча ётса, шунча кўп яхши кўриб борарди. Ҳали бола қалби биланоқ опасининг қандайдир гуноҳ, тенгдош болаларининг айтишича, «бузуқлик» қилганини, отаси шунинг учун уларни ташлаб кеттанини англаандек бўлар, назарида опасининг гуноҳи унчалик катта эмасдай туюларди. Опаси битта гуноҳ қилса нима бўлти?! Эҳе, у кунига қанчадан – қанча айб иш қилади – ку, ҳамма уни кечиради. Опасини ҳам кечиришса бўларди – ку? Ҳаммасини анови яломогиз кампир қилди, деб ўйларди Холмат. Набирасини икки марта, отаси уруща ўлган, деб йиглатган эди. Шунинг аламига отасини тортиб олди. Бўлмаса отаси келмасдан олдин қандай яхши эди. Холматни нуқул мақтарди. «Катта бўлса, отасидай полвон йигит бўлади», деб. Унга желагининг узун енгидан жийда, баъзида оққанд берарди. «Урушмай ўйнанглар, бўлмаса, олбир – шолбирларингни кесиб оламан», деб пўписа қиларди. Холматнинг назарида ундан яхшироқ амма йўқ эди. Отаси

келди – ю бирдан айниди. Онажонисини урдириб, отасини тортиб олди. Отаси онасини ўрнидан туролмайдиган қилиб ташлади. Энди онаси касал бўлиб ётибди. Отасидан бу иши учун ҳали ўч олади...

Бир марта у болалар билан Кўк қирда тоймачоқ ўйнаётганда, Келдиёр сўпининг кенжа ўғли уни ораларига қўшмаган ва «бузуқнинг ули, онаси бузуқ», деб ҳақоратлаганди. Кейин мактабда ҳам ҳамма унга қарашганини сезар ва мурғаккина қалб азобланар эди.

— Сен энди биз билан ўтирма, — деди бир куни Шариф қалтанинг бирга ўқийдиган қизи.— Онанг бузуқ, биз сен билан ўқимаймиз...

Ҳамма бола бирдан унинг олдидан чекиниб, бўлак – бўлак ўтири. Шунда Холмат хўрлиги келди ва йиглаб юборди – да, халтасини олиб, чопиб синфдан чиқиб кетди.

У мактабга бормай қўйганини онасига айтиб, хафа қилгиси келмас, онасининг кўзига тикилиб туриб, негадир йиғлагиси келар, онаси аввалгидаи эмас, бошқача бўлиб қолганига ҳайрон бўлар, Ханифа ёки бошқа бирор келмаса, опасига ўзи атала қайнатиб берарди.

— Ўзимнинг улгинам, суюнчиқгинам,— дерди шундай пайтлари онаси уни эркалаб. — Силарни деб бу дунёда яшаб юрибман – да, менинг меҳрибонгинам.

Холмат онасининг товушидаги заиф илтижони англаб, юраги фаш тортар, ниманидир сезганга ўхшар, агар онаси инқилламай гапирса, тузалаёттан, инқиллай бошласа яна касал бўлаётганини билар эди. Онаси касал бўлгандан бери кам ўйнар, деярли уйдан чиқмас, уйдан чиқса, қандайдир оғир нарсани кўтариб юрганга ўхшар, ҳамма «ана, онаси бузуқ, онаси бузуқ келяпти», деяёттандай бўларди. Отаси кетиб, онаси ётиб қолгандан бери бутун қишлоқ унга қанақадир бошқача муомала қилар, энди кимдир ўқрайиб ўтар, кимдир ачинганга ўхшаб, ўта меҳрибончилик қилар, кимдир индамай ўтиб кетарди. Холмат буларнинг барини сезар, сезиб, қаеридир ачишганга ўхшар, лекин қаери эканига ақли етмасди.

Ҳожар ҳам ниманидир сезгандек, оғир бўлиб қолган, кўзлари алам чекаётгандек мўлтиллаб турарди. Лекин уйда бирдан – бир чўчимай ва ҳеч нарсани ўйламай куладиган,

ўз – ўзидан қувониб юрадиган ёлғиз у эди. У ҳам уйдаги фожиани англаёттандай бўлар, кўзлари доим савол аломати билан ёнар, юзи изтироб чекаёттандек хўмрайиб олар, опасининг нега бунча узоқ ёттанини, баъзан кунлаб кўзини очмаёттанини тушунгиси келар, бу унга ниманидир эслаттандай ва у ҳам уйдаги умумий ҳолатга қўшилиб, қайғураёттандек бўлар эди. Бироқ, бари бир ҳамма нарсани тез унутар, қайғу ҳам, қанақадир бахтсизликлар ҳам уни буткул изтиробга сололмасди. Ташвишни ва аламларни тезда эсдан чиқариб, яна уйнинг ичидаги ўзини ўзи қувалаб, тахмондаги кўрпачалар уюмидан сакраб, мушукни қитиқлаб, қиқирлаб кула бошлар, у катталарга ўхшаб узоқ қайғуришини истамас эди. Унинг учун ҳамма нарса ўйин ва кўптил ёздиған нарса бўлиб туюлар, ҳамма нарсадан қувонар, шодаанар, ҳамма нарсага кўнгил берар эди. У «онаси бузуқ» деган гапларга ҳам эъзабор бериб, қийналиб ўтирмасди. Гоҳида онасига қўшилиб, онасига ўхшаб, кўзларини юмиб узоқ ётгар, бироқ ҳеч қандай қизиқ нарса йўқлигидан дарров ўрнидан туриб кетар ва онасининг нима учун бу қизиқ бўлмаган «ўйини» бунча кўп ўйнашига ҳеч тушунолмасди. Ўлик оралагандек бўлиб қолган уйда бирдан – бир жонли овоз ва бирдан – бир ҳаёт нишонаси – унинг кулгиси эди.

Холмат ҳам шундай, бироқ у кўп нарсани англар, шу сабабли Ҳожарга ўхшаб бу сўкиш ёки ҳақоратларни тезда унута олмасди. Печка олдида бир халта ошиқларни очиб, ўз – ўзича гўлдираб ўйнар, шу билан ўзини овутмоқчи бўларди.

— Болам, сен ҳам ташқарига чиқиб, ўйнаб келсанг – чи,
— дерди Анзират, боласининг ёлғиз ўйнаб ўтирганидан эзилиб.

— Бормайман, — дерди Холмат хўмрайиб. — Болалар масхара қиласди...

Анзират унинг гапларидан уялиб кетар, шоша – пиша ўзини кўрпа ичига тортар ва йиглаб юборарди.

— Ҳали сизларга ҳам азоб беряпманми?! — деб Холматта тикилиб, узоқ йигларди. — Илоё, бу кунидан онанг ўлсин, ўлим, силарни шарманда қилмай, опанг ўлсин... ўлим тила. Онангта ўлим тиланглар!..

— Сиз бузуқ эмассиз, шундайми? — дерди Холмат унинг йиглаёттанидан ўзининг ҳам йиглагиси келиб. — Мен биламан ..

— Йўқ, бузуқ эмасман. — Йигларди она Холматни қучиб.
— Сен ишонсанг... бузуқ эмасман.

— Она, ҳаммасини анави ёлмоғиз қилган. Биламан, биздан отамни тортиб олиш учун шундай қилган. Мен биламан. Ўшанинг набираси биринчи бошлади — «онаси бузуқ билан ўйнамайман», деб.

— Уларга қулоқ солма. — Ўпкасини босолмасди Анзират.
— Менга ишонсанг бўлди. Бузуқ эмасман, уларнинг ўзлари бузуқ.

— Улар билан ҳеч ўйнамайман, улар мени етимча ҳам дейишади, яна айтишадики...

— Қўй, болам, қўй, айтма...

Анзират Холматни қучганича ўкириб йиглар, ҳозир ўғли ўзининг бошқа бир айбини айтиб юборишидан қўрқиб, унинг оғзини ёпарди. У қилган хато фақат ўзини эмас, болаларини ҳам, отасини ва бутун қишлоғнинг тилини қисиқ, шарманда қиласини аяглар ва бундай номусга чидай олмай ўзиға ўлим тиларди. Ёғиз ўлим... Болаларининг ташқарига чиқмай қўйганини, уларнинг сиқилиб ўтирганини кўрган сайнин, эзилиб йиглаб, азоб ва номус уни тобора еб, унинг бутун мадорини сугуриб борар, уни яна тўшакка михлаб ташларди.

У энди ўрнидан туриб юра бошлаган пайтларда бир куни Холмат уйга югуриб кириб келди. Унинг уст — боши ҳўл, юзи қизариб кетган, худди бир айб қилиб қўйгандаи кўзлари бежо чақнар, ташқарига қараб — қараб қўярди.

— Нима бўлди, ўғлим? — сўради қўрқиб кетган Анзират унинг важоҳатини кўриб.

— Урдим, — деди ҳансираф Холмат.

У гапириб бўлмасдан эшиқдан Неъмат узуннинг бурни катта тоҷик башара хотини кўринди. У қўлига тол хивич қўтариб олган, қарғаниб келарди. У эшиқдан кира солиб: «Ҳали қутуриб қолдингми, сен етимча», деб, хивич билан Холматнинг юзи аралаш туширди. Холмат чийиллаб йиглаганча, Анзиратнинг орқасига ўтиб яширинди.

— Нега бирордиг боласини урасиз! — Бирдан тутоқиб бақирди Анзират. Унинг кела солиб, юз — кўзи демай, ўғлини савалаб қолгани, худди у йўқдай, худди у ўлгандай, болалари кўчада қолгандай қилиб савалагани алам қилиб кетди. — Нега урасиз?! — Яна бақирди бўғилиб ва туйқус йўтали тутиб қолди. — Нега ура — сиз?!. Уҳу, уҳу — ҳу — ҳу, нима? Уҳу, уҳу... мен ҳали шундай — оёқ остида қолдимми? Уҳу, уҳу, нима қилди сизга?..

— Нима гуноҳ қилганини ўзидан сўранг, келин, — деди заҳарли ва кинояли товушда. — Болажонингиздан сўранг, қонга бўяб ташлабди — ку, яна нима қилиши керак?

— Ўзи «онанг бузук», деди, масхара қилди, — деди Холмат онасининг ортидан йиғлаб... — Шундай дегач ураман — да!..

— Вой, ўргилдим, сиздай энасининг ҳимоячисидан! — Шангиллади Неъмат узуннинг хотини. — Нима, энангни бузуқлиги ёлғонма? Ана, энангдан сўра ёлғон бўлса, бузуқни бузук дейди, кўрни кўр, қарни кар дейди — да! Ҳам гарлик, ҳам шангилик дегани шу — да. Ана, ёлғон бўлса опангдан сўра, жувонмарг кеттур!..

Яширинган жойидан чиқиб Холмат онасига қаради. У онасининг бузуқ эмаслигини манави рақибнинг оласига кўрсатиб қўйишни, бузуқ эмаслигини исботлашни истарди. Анзират довдираб қолди. Неъмат узуннинг хотинидан кўзларини олиб қочди. Ўғлининг бошини қучоқлаб олиб, қалтироқ товушда:

— Ундай деманг! — деди у заиф ва аламли товушда. — Ундай деб болани бузманг. Ҳали тирик эканман, ҳеч кимга уришга йўл қўймайман. Эшитяпсизми?! Йўл қўймайман... Ҳеч кимга калтаклатиб ҳам қўймай — ман... Мен ўлганимдан кейин урасиз булаарни...

— Оҳо! — деди Неъмат узуннинг хотини, бутун қишлоқ эшитсан дегандай қўлларини белига қўйиб, гавдасини ликиллатиб, баттар шангиллай бошлади. — Оҳо, ҳали мен оппоқман ҳам дерсиз, ҳали болани ҳам сен туғдинг дерсиз? Йўқ, нега ҳам гарлик қилиб, ҳам баланд келасан... — У бирдан сенсирай бошлади. — Болани мен эмас, сен туғтансан, бузуқликни сен қилгансан, яна болангни ҳам бузасан, бирорларни ур, деб ўргатасан!.. Ўйнаш ортириб, қишлоқни шарманда қилганинг етмагандай болангни ҳам босмачиликка

ўргатасан, сенга ким қўйибди гапиришни?! Олдин этагингдаги доғни ювиб ол. Кейин гапирасан. Олдин болаларингни тийиб юр, катта бўлса, буларният ўйнашликка ўргатасан...

— Бас қилинг!.. — Телбалардай ўкириб ўрнидан турди Анзират. Унга охирги гап жуда ўтиб кетган, у дағ—дағ титрар эди. Кўзларидан ёш қуишиб оқар, лекин артишни хаёлига ҳам келтирмасди.— Бас қилинг ҳозз—зир чопиб ташлайман! — У печканинг олдида турган болтага ташланди.— Чопиб ташлайман... жонимдан тўйиб кетдим.— Болтани кўтариб олдинга югурди.— Тинч қўясанми, йўқми?! Нега мени уйимга бостириб кириб айғоқлик қиласан... Нега болаларимга кун бермайсилар? Мен сенларга нима гуноҳ қилдим, нима айб қилдим... сенларга... арпаларингни хом ўрдимми? Эрингни ўйнаш қилдимми?! Нега ҳамманг менга осиласан?! — Унинг важоҳати қўрқинчли эди. Кўзлари қутургандай қизарип кетган, рўмоли тушиб, оқиш соchlари тўзиб кетганди. Лаблари газабдан титрар, қўллари қалтирап эди.— Ҳамманг мени гап қиласан, ҳамманг аламингни мендан оласан. Нима, ўзларинг оппоқми?! Ўзларинг ҳеч айб қилмаганмисанлар?! Айбимни билмайди деб ўйлайсизларми?! Ҳаммангни ўлдираман... ўлдираман!..

У серрайиб қолган Неъмат узуннинг хотинига қараб болтани кўтарди. Неъмат узуннинг хотини унинг авзойини кўриб, қўрқиб кетди ва орқага чекина бошлади...

— Вой, одамлар, ўлдириб қўяди! Жинни бўп қоғти! — деганча ташқарига югуриб чиқиб кетди.—Ўлдириб қўяди... қутқаринглар...войдод, одамлар!..

У ташқаридаги тўпланган уч—тўрт одамнинг орасига ўзини урди ва баланд овозда шангиллай бошлади:

— Бу қишлоқда туриб бўлмай қолди, бу бузуқ ҳаммани шарманда қилди! Ўйнаш орттириб энди зўравонлик қиляпти. Иштонини бошига кийиб олган бу. Боласини ҳам бузуқликка ўргатяпти... Бу билан бир қишлоқда яшаб бўлмай қолди. Ё у турсин бу ерда, ё биз турайлик, бу нима шармандалик?..

Анзират у чиқиб кетгач, эшикнинг ичидан тамбалади—да, болтани четта улоқтириб, ўзини печканинг ёнидаги пўстакка ташлаб, ҳўнграб юборди, оғир ва баланд товушда тақдирини, қисматини, яратганни қарғаб, узоқ йиглади. У

хўрланган, ҳақорат этилган, дунёдан умид узган, орзу – умидлари парчинланган, забун, кераксиз киши бўлиб қолган алфозда, токи ҳушидан кеттунча, ўзини босолмай, ҳўнграб – ҳўнграб йиглади.

Ҳушидан кетиб қолгач, уни овутга олмай ўтирган Холмат ташқарига югуриб чиқди – да: «Онам ўлиб қолди», деб бақирганча йиглаб, Ханифаникига қараб жонҳолатда югуриб кетди...

Кунлар илий бошлагач, Анзират касалдан тез тузала бошлади. Нўғай фельдшер ташлаб кетган дорилар унга кор қилди. Қишлоқ келинчаклари уни ёлғиз қолдирмай навбатма – навбат келиб туришди. Улар ўзларининг шўх ва самимий кулгилари билан Анзиратнинг ўтмишини оз бўлса ҳам унутиб, ҳаётта ҳавас билан қарашга мажбур қилишди.

XIV

Норматнинг кейинги кунларда қишлоқда тургиси келмай қолди. У ўзининг ҳаётидан хабардор бўлган кишиларни кўргиси, уларнинг ҳамдардона ёки масхараомуз тиржайишларига чидағ, кўнглини бузгиси келмас эди. Ов милтигини олиб, Қоратўшда қишлоқма – қишлоқ кезиб юрар, юрагини шундай қилиб бир оз ёзган бўларди. Тоғлар эса уни гоҳ туманли, гоҳ очилиб, гоҳ хўмрайиб кутиб олар, унинг кўнглига мос равишда гунг ва соқов эди. Оғриёттан эркак қалби кимга ёрилсин? Тоғу тошларгами? Йўлларгами ёки асрий, бунақа дардларни кўравериб, афти ҳам, пешонаси ҳам тиришиб кетган арчаларгами? Улар оғриқ нима эканини қаердан билсан? Эркак қалбини қаердан тушунсан? Қаердан англасин?!

Нормат деярли ов қилмасди. Фақат олдидан чиқиб қолганда ёки завқи келгандагина ов қилас, номигагина милтиқ елкасида юрарди. У ҳафталаб қишлоқча келмас, тоғдан – тоғга ўтиб, таниш қишлоқларда ёки эски горларда тунаб юрарди. Ҳамма жойдан у хўшлашмай кетиб, кутилмаганда пайдо бўлиб қоларди.

Аста – секин у бошига тушган кулфатни бир оз унугтган, шундай сўқабош яшашга кўника бошлаган бўлса ҳам, Холмат билан Ҳожарни согинарди. Шу сабабли ачишган

юрагига малҳам излар, бироқ дунёда ундаи малҳам йўқ эди. Аслида қишлоққа у болаларини узоқдан бўлса ҳам бир кўриш учунгина келар, уларни соғ — саломат кўргач, яна овга чиқиб кетарди.

Қишининг ўрталарида у қишлоқда бир ҳафтача турди — ю, ойнинг охирларида яна овга жўнаб кетди. У бу гал Бошчорбоғ томонлардаги адирларга жўнади. Кечга яқин ўзи ҳам номини билмайдиган тўрт — бешта уйнинг чироги ёниб турган кичкина қишлоққа кириб борди. Унинг қорни жуда очқаган, Қоратўш ҳам чарчаб сурина бошлаган эди. Бутун шу қишлоқда дам олмоқчи бўлди ва дарага тугаш ялангда жойлашган, ҳаёти каттагина, кўпроқ терак экилган боғи бор, эски бир уйга отини бурди. Уйга етмасдан уни катта олапар ит бутун дарани ларзага солиб, ҳуриб кутиб олди. Итнинг кўриниши ёқ ваҳимали эди: жунлари узун ва ҳурпайган, ўзи нақ эшакдай келадиган, товуши дағал, одамга тикка ташланадиган орлон кучук эди. У Норматни ўзига қарашли мулқда кўргач, қорни сачратиб югуриб кеъди. Унинг шарпасидан Қоратўш ҳуркиб, қулоқларини динг қилди ва тўхтаб қолди. Ит кела солиб, отнинг думига ташланди — ю, ўзига ўгирилган милтиқни кўргач, ириллаб, пичноқ тишларини кўрсатиб, орқага тисланди. Қоратўшнинг олдини тўсади.

— Олапар, маҳ — маҳ, жим бўл, — деди Нормат унинг тусига қараб, таъваккалига. — Жим, х.е... харом қоттур, танимаяпсанми?!

Ит унинг товушини эшитиб, баттар вовиллай бошлади. Ит қаёққа ўтса, Нормат ўша ёққа милтиқни буради. Ит айлана туриб, бирдан отнинг тумшугига ташланди: қўрқиб кеттан от ўзини бирдан орқага олиб, олдинги оёқларини тикка кўтарди — да, кишинаб юборди, сал бўлмаса Нормат эгардан учиб кетаёди.

— Олапар... Тўрткўз... ким бор?!.. — деди у жонҳолатда итнинг номини топишга ҳаракат қилиб. — Кўр бўлгур, жим бўл!..

Пастаккина уйнинг эшиги очилиб, бир кишининг қораси кўринди. Изидан хирагина фонус чиқди. Уй агаси фонусни бўйи баробар кўтариб:

— Ким у? — деб сўради ингичка товушда.

Нормат итнынг ўзини жойидан қимирлатмай қўйғанидан боши қотиб туар әди, товушни эшитиб, хурсанд бўлди:

— Қариндош, итингизни чақириб олинг, тоза овора қилди — ку.

Ит эса эгасининг товушини эшитиши билан дадилланиб, қайта ҳужумга ўттан, отни айланиб баттар ҳура бошлаган әди.

— Сиртлон, маҳ — маҳ, тур жойингга бор. Ҳе, ўл, бор!..

Ит думини ликиллатиб бир — икки ҳурди — да, отта йўл берди, боф деворнинг бир четига бориб, кузатиб турди.

— Меҳмон керак эмасми? — сўради Нормат ентил тортиб, элликнинг олдидағи супада отдан тушар экан, фонус кўтарган кишининг сийрак соқол, ориққина киши эжанини кўрди.

— Қайси ўзбек меҳмонни қувлабдики, биз қувласаж, — деди қувноқ ва мулоим товушда фонус кўтарган киши. — Қани, отингизни беринг, сиз ичкарига кираверинг... Эшмат! — деб чақириди ичкарига қараб. — Қани чиқ, меҳмонни уйга бошла... — уй эгаси фонусни чап қўлда кўтариб, отни боғнинг этагида қорайиб кўринаётган молхона тарафга ётаклаб кетди. Ичкаридан чиқсан ўн бир яшарлардаги бола аввал унга ҳайрон бўлиб қараб турди — да, сўнг уялинқираб салом берди ва Норматни уйга бошлади. Уй айвонсиз, биринчи эшиқдан даҳлизга кирилар, даҳлизнинг икки томонида икки эшиги бор әди. Бола даҳлизда катта, ичи кигиз этигини ечди — да, Норматнинг оёғига бир қараб, ўнг томондаги эшикни итарди. Нормат ясама оёғидаги этигини зўрга ечиб, ичкарига, торгина, лекин шифти баланд, кираверишига тунука печка ўрнатилган хонага кирди. Хонада иккита бола ва бир қиз бор әди: болалар саккиз ва беш ёшларда, қиз эса ўн учлар атрофида әди. Болаларнинг каттаси билан қиз печка олдида, беш ёшлардагиси эса уйнинг ўртасида катта ёғоч косага қатиқ солиб, ичиди ўтиради. Қиз билан бола Нормат кириши билан печка атрофини унга бўшатиб беришди. Нормат олдига қатиқ қўйиб ўтирган болага кўз қисди ва бесўнақай ҳолатда ясама оёғини сал эгиб, печка олдидағи пўстакка чўқди. Бола қатиқни оёқларининг орасига олиб, ёғоч қошиқда хўриллатиб ичди — да, Норматта бир қараб, уни обдан кўздан кечиргач,

яна қатигини ича бошлади. Қизил бахмал дўппи кийган, озғингина қиз шарақлаб қайнаган қумғонни печка устидан олар экан, Норматнинг оёғига ажабланиб қаради, сўнг уялиб кўзларини олиб қочди.

Хонанинг тўрига кўрпа – ёстиқ тахланган, яккаю ягона деразага аёл кишининг чопони илиниб, совуқдан тўсилган, кўрпа тахмони олдида катта ёроч сандиқ турар, сандиқ юзидағи расмларни бола чизгани ўхшовсизроқ гулларидан кўриниб турар, унга катта қулф осилган, деворларга кашталар илиб ташланган, ерга кигиз устидан наматлар тўшалган, қатиқ ичиб ўтирган боланинг олдида кири чиқиб кетган дастурхон ёзилган эди. Печка устида қоп – қора идишда ёвғон қайнар, ёвғонга қурт солинган бўлса керак, ҳиди хонани тутганди. Печка олдидағи чолма'ни(қотирилган тезак) айтмаса, хона анча шинам ва тоза эди.

— Адашиб қолдингизми? — сўради ундан боядан бери оёғидан кўз узмай ўтирган, отаси "Эшмат" деб чақирган бола.

— Қаердан – билдинг?

— Бу ерларда кўп адашишади,— деди бола катта одамлардек. — Бошчорбог бозоридан қайтаётганлар адашиб, бизнинг қишлоққа келиб қолишади. Сизни итимиз қандай ўтказиб юборди. У ҳаётдан берига ҳеч кимни ўтказмайди...

— Билмай қолган бўлса керак, — деди Нормат. — Боғта кирганимда кўриб қолди.

— Итимиз бўри тутди,— деди боядан бери Норматдан чўчиёттандай бегонасираб ўтирган саккиз ёшлардаги, отасидек сарғиш бола.

— Бўрини итимиз туттани йўқ, — деди Эшмат унга "жим ўтири" дегандай қараб. — Бўрининг ўзи музлаб қопти. Кимдир оёғидан оттан экан. Қишлоғимизгача судралиб келибди.

— Итларинг зўр экан – да, — деди Нормат Эшматнинг гапига эътибор ҳам бермай сариқ болага қараб. Боланинг қаеридир Холматни эслатарди. Нормат болаларини эслаб юраги орзиқди. — Ит сеникими?

Бола Эшматта бир қараб олди – да:

— Ҳа, — деди ишончсизроқ қилиб, яна Эшматта қаради.

— Алдаяпти, алдаяпти! — деди Эшмат. — Ит меники, мен уни ўзим йўлдан топиб олган эдим.

- Э, чатоқ — ку,— деди Нормат сарғимтири болага қараб.
— Сенинг ҳеч нарсанг йўқ, шекилли?
Бола хафа бўлгандай, бошини эгди — ю, хўмрайиб олди.
— Тойхори бор, — деди унинг ўрнига Эшмат. — Отам шу йил олиб берди.
— Зўракан тойхоринг бўлса,— деди Нормат, қитмирлик билан боланинг кўнглини кўтариб. — Ҳангими?..
— Ургочи, ургочи! — Чийиллади Эшмат қиқирлаб кулиб.
— Ургочи бўлса янаем зўр, — деди Нормат Эшматта кўз қисиб. Сарғиш бола икковига хавфсираб қаради.— Йигиттики ургочи бўлиши керак...
Эшмат кулиб юборди. Унинг кулгиси бегубор ва самимий эди. Бу самимийлик Норматнинг ҳам қалбига ўтди. У ҳам сўнгти ойларда биринчи марта яйраб жилмайиб қўйди.
Озгингина қиз ўртага чойни келтириб, суви қочтан иккита нон қўйгач, эшиқдан фонус кўтариб уй эгаси кириб келди. Тутаб турган қорашиброқ нурида Нормат унинг ўрта бўй, сийрак соқол, қирқларга яқинлашиб қолган киши эканини кўрди.
— Э... меҳмон — ей, шуни айтади — да, чақирилмаган меҳмон азиз, деб! — деди у фонуснинг шимлигини насайтириб бир чеккага қўяр экан. — Буни қаранг, бугун ўзимдан — ўзим оқ шўрва қил, деб тайинлагандим. Қадаминиз хосиятли экан...
Уй эгаси кир чопонини ечиб, печка устидаги қозиқча илиб қўйди ва Норматни дастурхонга таклиф қилди.
— Хўш, меҳмон, йўл бўлсин, асли қаерликсиз? — деб сўради у ўтиришгач.
Нормат қаерлик эканини айтди.
— Қариндош эканмиз — да, — деди уй эгаси, унга мулоим кўз ташлаб. — Шуни айтадилар — да, билмасдан учратмас, деб. Биз ҳам илгарилар Кўкабулоқда ўтирадик. Қани, қизим, келтир — чи овқатингни. Меҳмон, кимлардан бўласиз?
— Мамат мерғанинг ўғлиман.
— Ўтроқи Мамат мерғанингми?
— Ҳа.
— Кўрмаганман — у, лекин зап одам ўттан дейишади. Қани, овқатдан олинг, қурутни ўзим қўлим билан қилганман.

Овқатдан кейин болалар печка атрофига ўтиб ухлаб қолишиди. Нормат уй эгаси ўзи билан тўрга, юк тахмонининг олдига жой содди. Уй эгаси анча сариштали одам экан. Тиниб – тинчимаслиги, кўнгли очиқлиги озгин, чавандоз юзиданоқ билиниб туради. Гапирганда доимо бировнинг кўнглига озор беришдан қўрқсандек мулоийм ва юмшоқ қилиб гапирарди. Унинг ҳаракатидан, гапларидан одам ажратмаслик, бегонасирамаслик одати борлиги билиниб туради. Кўринишидан куйинчак одамга ўхшарди.

— Боя янгам кўринмайди деб сўрадингиз, — деди ёттанларида уй эгаси. — Янгангиз бечора қазо қилдилар. Бир йилдан ошди .. ўзини еб қўйди бечора. Номусига чидай олмади... қайғу олиб кетди... Ҳаммасига мана шу лаънати уруш сабабчи. Сиз оёқдан ажраб қайтибсиз, одамларга кўрингали уяляпман, деяпсиз, уруш нималар қилмади? Унинг келтирган кулфатини санаб бўладими! Мана, ўзингиз айтинг, биз дэҳқонларнинг одам ўлдириш тушимизга кирибдими?! Мажбур қилдиришди — ўлдиридик! Ҳозир ўлдирган одамларим тушимдаям тинч қўймайди. Кечаси билан бўғиб чиқади. Ҳали айтдим, асли Кўкабулоқданмиз, деб. Агар Мулла Турди дегани эшиттан бўлсангиз, ўша кишининг жияниман, етим ўстганмиз.

—Мулла Турдининг?! — ажабланди Нормат. — Унда бизга ҳам жиян бўларкансиз – да. Сизни Кўкабулоқда кўрмаган эканман.

—Очарчилик йилларида бу ерларга келиб қолгандик. Кўкабулоқ фақат меҳмон бўлиб борганиман. Аввал чўпон, кейин қишлоқ шўросида аравакаш бўлдим.

—Буни қаранг, сизни ҳеч тўйларда ҳам кўрмаган эканман. Айтгандай, бу қўлингиз урушдан майиб бўлганми?

Мезбон бош чайқади. У гапдон ва негадир, ичидагини биратўла айттиси келаётган одамга ўхшарди. Бу Норматта эриш туюлди. Лекин мезбон ичидаган оқкўнгил эди. Нормат буни сезиб, жилмайиб қўйди. Бунақа одамлар билан зерикмайсан. Ҳаммасини ўзлари айтиб беради.

—Тўққиз йил арава ҳайдадим. Дэҳқонобод, Шаҳрисабз, Китоб йўллари менга беш қўлдай таниш... Уруш бошланар йили нима бўлди – ю, Лангарота довонидан арава ағдарилиб, беш қоп бутдой дарёга тушиб кетди. Дарё қутурган пайт

эди, ҳеч нарса қилолмадим. Бориб раисга айтдим. У менга дўйқ урди. Қаматаман деди, ўша беш қоп буғдойни бўйнимга юклиди. Ўзингиз ўйланг, ўзим аравакаш бўлсам, беш қоп буғдойни кимдан оламан? Мени роса тергашиди, идорама – идора судрашиди. Кейин тўсатдан уруш бошланиб қолди – ю, мени урушга жўнатиб юборишиди. Орқамда янгангиз тўрт боласи билан чирқилаб қолаверди. Уч йил уруш кездим. Қанча одам ўлдирдим, билмайман, санааб ўтирадиган пайт эмасди. Охири ўзимни ҳам ярадор қилишиди. Чап қўлим ишламай қолди. Дўхтирлар, аста – секин ишлаб кетади, деб уйга жавоб беришди.

Мезбон негадир хомуш бўлиб қолди ва уфлаб қўйди.

—Янга урушдалигингида қазо қилибдими, — сўради Нормат унинг хомуш бўлиб қолганидан таъсиrlаниб.

Мезбон бош чайқади. Кейин яна ўша очиқ – сочиқлигига қайтиб, уфлаганча гапини давом эттириди.

—Уйдан уч йилдан бери хат олганим йўқ денг, савод йўқ эди. Уйга келсам, нимани кўрдим денг, ҳувиллаб ёттан уйимни! Ҳеч ким йўқ. Қўшнилардан сўрасам, сени ўлди деб эшидик, оғирчилик хотинингни эзib қўйди. Ноилож бир ҳисобчига тегиб кетди, дейишди. Роса ғазабим қайнади. Хотинимди бориб ўлдирмоқчи бўлдим ҳам. Э, бор – э, деб ўрус шаҳарларига қайтиб кетмоқчи ҳам бўлдим. Лекин кўнглим бўлмади. Хотинимни – ку, кўрарга кўзим йўқ, ахир у мени шарманда қилди – да, аммо болаларим ҳеч хаёлимдан кетмади. Кечалари тушларимга кириб чиқади. Айниқса, кенжам!.. Мен кетаётгандага энди «атта – атта» дейишни ўрганганди. Ухласам ҳам уни кўраман, юрсам ҳам. Тушимда ҳам у «атта – атта» деётгандай бўлади. Охири бўлмади. «Маллабой, сен шунча қонни ким учун кеңдинг, хотининг учунми ёки болаларинг учунми, хотинингга ўчакишиб болаларингни тирик етим қилмоқчимисан, ўргилдим, сендай номусли одамдан», деб ўйладим – у, шартта Ёнғоқлига жўнадим. Идорага кириб, раисга шундай – шундай, ҳисобчинг менинг хотинимди йўлдан уриб, уйига келтириб олибди, агар яхшиликча кўнса кўнсин, бўлмаса военкоматга бориб айтаман, дедим. Раис қўрқиб кетди. Мени ҳисобчининг уйига ўзи бошлаб борди. Ўша ерда

хотинимни кўрдим: бечора, озиб – тўзиб, бир ҳолатда бўп қопти, устида ўчоқ кўйлак, касалманд, зўрга оёқда юрибди. Ҳисобчи уни иккинчи хотин қилиб олган экан. Мени кўриб, серрайиб қолди: арвойимни кўрдим, деб ўйлаган экан. Қизим ҳам молхонада экан, мени кўра солиб югуриб келди. «Отажон, отажон», дея бўйнимга ўзини ташлади. Уйдан Эшмат улим ҳам югуриб чиқди. У ҳам кела солиб, менга ўзини отди. Уларнинг қувонганини кўриб, хотинимга бўлган ғазабим ҳам ўз – ўзидан ўчиб қолди. Фақат икки улим товуқхонанинг олдида менга ҳайрон бўлиб қараб турарди. Ҳисобчига бир нарса демай, болаларимни олдиму, хотинимнинг қўлидан етаклаб жўнадим. Югуриб чиқсан ҳисобчи нимадир деди, мен эшигтмадим, эшитиш ҳолатида эмасдим. Раис уни уришиб берди. Шундай қилиб, хотинимни, болаларимни уйга қайтариб келдим. Хотиним бечора кўп йиглади, кўп азоб чекди. Доим: «Уйингизнинг чирогини ўчирдим», деб йигларди. Мен бирон марта ҳам айбини юзига солмадим. Аввал қандай бўлсам, ўзимни шундай тутдим. Болаларим қайтиб келиб бағрим тўлди, кўнглимдан дардлар ариди. Улар менга ҳаёт берди. Мен энди шулар учун яашшим кераклигини тушундим. Ўзингиз ўйланг, биздан бу дунёда нима қолади? Шулар – да! Буларнинг олдида ҳар қандай гуноҳини кечирса бўлади, қолган ҳамма нарса ўткинчи. Хотиним олти ой ҳам бирга яшамади. Ўтган қишда ётиб қолди – ю, қайтиб турмади. Бундай ўйлаб қарасангиз, уларгаям қийин бўлган: нима бўлсаем худонинг ожизлари – да, уруш уларниям шундай қилишга мажбур қилган. Биз эрқаклар бир оз шошиб ҳукм чиқарамиз. Мен ҳозир хотинимнинг ўлимига мен сабабчи бўлдим, деб ўйлайман. Агар мен кенг феъл бўлиб, унинг кўнглига шубҳа солмаганимда, у тузалиб кетармиди? Энди ўз ёғимга ўзим қовриламан. Яхшиям болаларим бор. Бўлмаса аллақачон бу ерлардан бош олиб кетган бўлардим. Энди мана шу саккиз жуфт қоракўзни бировнинг қўлига қаратмай ўстирсам, шу менинг умрим, деб ўйлайман...

Уй эгаси жим бўлди. Кейин ўрнидан туриб ташқарига чиқиб кетди. Нормат бу одамнинг гапларидан кейин бирдан ўзидан уяди. Маллабой унга шунча кунлар иккиланиб

юрган ва юрагини тирмаётган саволларга худди унинг келишини билгандай, ўзининг тақдиди билан бирпасда жавоб топиб берган эди.

Маллабой қайтиб кирди. Нормат у билан ортиқ гаплашгиси йўқ эди. Агар яна гаплашса, ўзининг нималари идир фош бўлиб қолишидан қўрқиб, кўзларини юмиб ётди. Маллабой уни ухлаган деб ўйлаб, устига чопонини олди – да, пишишлаганча дам у ёқса, дам бу ёқса ўтириб ётди.

Нормат кўз юмиб, унинг қийналиб нафас олишини эшитиб туради.. Ўзининг ҳам уйқуси келмади, ўзиникига ўхшаб кетадиган бу одамнинг қисматида негадир у ўз тақдидини кўрди. Бу ўхшаш туйғу болаларни кўргандаёқ бошланган, энди кўксини ловиллатиб куйдирмоқда эди. Маллабойнинг ўзидек содда, кўримсиз, мулоим ҳукми унинг баландпарвоз хаёлларини парчалаб ташлаганди. Бу ҳукм гарчи бошқа бир пайтда қарор топган таомил мезонига мувофиқ келмаса – да, шу тобда адолатли ва инсонпарвар эди. Ана шу инсонпарварлиги Норматнинг шу вақттача сифиниб келган номус, орият, шаън ва ғурур деган тушунчалардан устунроқ эди.

Эртасига Маллабой билан хайрлашмай ҳам тонг қоронгисида чиқиб кетди. Қишлоққа қайтди – ю, мартнинг адоғигача овга чиқмади.

Ўн беш кунлар ўтгандан кейин кечга яқин Бийди момоникига ўзи кириб борди. У ҳаммасини ўйлаб, тарозуга солиб кўрган ва қатъий қарорга келган эди. Унинг азиятли ва хаста қалби урушдан олдинги ориятли Нормат полвонни синдириб ташлаган, оддий, уруш кулфатлари эзив ташлаган, унга таслим бўлган, кўнинкан, тақдидига тан берган эди. У мана шу қарорни, мана шу оддий ҳақиқатни тогу тошлардан аслида ўзи икки ойдан буён излаб юрганини фақат Маллабойнинг гапларидан сўнггина англаган эди.

У кириб борганда Бийди момо бошига эски қора чопонни ташлаб, сарғайиб кеттан жунни олдидағи тароқдан ўтказиб олмоқда эди. Кичик келин яланг бош бўлиб олиб, тўрда, одига кичкина қуроқли бўхчани ёзиб, ичидаги кийимларни тахлаётган эди. У Норматни кўрди – ю дик этиб ўрнидан

гурди ва ерда ёттан рўмолини олиб, бошига илди, шоша — пиша бўхчани ўрай бошлади.

— Едирдим, ичирдим, — дерди Бийди момо кириб келганга ҳам эътибор бермай, бошини тароқдан кўтармасдан. — Кўзимнинг нури деб ўстирдим, қариганда тепкилаб кўмишади, деб ўйлапман мен бечора, энди эса ҳузурини бегоналар кўрди. Бегона юртларда ўлиб кетди. Одамларникiday ҳеч қурса биттасиям тирик қолмади. Бошимни азалдан ўзи шўр қилиб яраттан экан... Кетсанг, бор кетавер. Сени ушлаб турганим йўқ, сизлар ўзи шундайсизлар, бироннинг бошига кўргулик тушса, дарров қўшилиб тепкилайсизлар... Бор, тезроқ жўна... Ҳамма лаш — лушларингниям опкет, ҳаммасини кўтариб жўна...

— Амма, — деди кичкина келин, Норматта бир қараб, ҳижолат бўлгандай. — Бўлди энди...

— Нимаси бўлди! — Жаг — жағлади унга қараб Бийди момо. — Тўғри гап ёқмайди — да, эринг ўлган бўлса, гуноҳкор менми?. Нега менга зарда қиласан... Ё сенам биронтани топдингми? Топган бўлсанг бор, кетавер, мени шарманда қилмасдан кет, қорантниям кўрмайин.

— Амма, — деди яна ҳижолатли қилиб кичик келин, Норматта яна бир қаради — ю, дув қизариб, юзларини яшириб, йиглаб юборди.

— Яна йиғлацинг нимаси, йиглаб кўнглимни бўшатаман деяпсанми?! Овора бўлма, ўзи тош бўп кеттан бу юрак. — Бийди момо шаҳд билан жунни тароқдан ўтказар экан, қўллари қалтираб тароқقا бармогини уриб олди. — Ҳе, сафанд қол, сенам, тароқ бўлмай! — деди қонаған бармогига титраб — қақшаб жун босар экан, тароқни олиб пекканинг орқасига улоқтириди. — Авваласиям пешонам қурсин, бўлмаса куним шуларга қолармиди! Келиб — келиб шуларнинг қўлида хор бўлиб ўлиб кетаманми?..

Нормат ноқулай пайтда кириб қолганидан ҳижолат бўлиб йўталди. Бийди момо қонаётган бармогини сиқиб ушлаб, бошини кўтарди — да, уни кўриб тумшайиб олди. Индамай олдидаги жунларни йигиштира бошлади.

— Мана, яна биттаси келди, — тўнғиллади у ўзига — ўзи галираётгандек. — Ҳаммаси бошига ғам тушганда Бийдини эслашади, бошқа вақти эсигаям келмайди.

— Ҳа, амма, — деди Нормат ўзини хурсанд кўрсатиб, орадаги ноқулайлиқдан чиқиш учун.— Тўнингизди тескари кийиб опсиз, нима бало, жездада^м(почча демоқчи) тушингизга кирдими?..

— Эҳ, аввали ўша Бухор полвон қуриб кетсин. — Жаврай бошлади Бийди момо.— Менга шунча етимчани қолдириди, ўзи жўнади — борди. Энди эса унинг етимлари болалариниям менга қолдириб кетмоқчи... Гўё Бийдининг бутун умрига қора меҳнат ёзилгандаи... Сен нима қип турипсан?!— деди пиқ — пиқ йиглаёттан келинига қараб.

— Меҳмонга чой — пой қўй, кейин қиласан нозимойишингни.

Кичик келин бурнини тортиб кўзидан ёшини ҳам артмай, токчадаги дастурхонни олиб, печканинг оддига ёзди. Сўнг Норматта қайрилиб ҳам қарамай катта, кўкиш, сири кўчган чойнакка печканинг устида шақиллаб қайнаёттан қумғонни ағдарди.

— Кўзингни ёшини арт, — деди Бийди момо унга фижиниб қараб. — Ҳозир чойнакка оқиб тушади.

Кичик келин бошини четта бурди — да, яна пиқ — пиқ йиглай бошлади.

— Менда нима гуноҳ?— деди у йиглай туриб, аламли товушда. — Тўрт йил кутдим улингизни... Тўрт йил... Одамларга ўхшаб, бир ой ҳам бундай келин бўлиб яшаганим йўқ... Келганимдан бери қора меҳнатдан бошим чиқмайди... Одамлардай ақалли бир ой келин бўлсам ҳам майли эди... Бир ойям бўлмадим. Пешонам шўрлигидан... Энди қариб, сўлиб қолганимда кимга керак бўламан... ўлдириб бўлди — ку мени бу уй...

— Кўзингта қара, чой тўкиляпти, — деди таҳдид билан Бийди момо унга. — Бўлмаса эрингни беш — олти ой қўйнингда яшириб ёт эди — да, шунда одамлардай эрингнинг исига тўярдинг...

Кичик келин чойни дастурхонга келтириб қўйиб, бояги жойига бориб, изиллаб йиглаб юборди.

— Бўлди, бўлди!— деди қайнонаси жеркиб. — Уйда меҳмондан уялмайди — я бу, тавба!

Нормат этигини ечмай, ясама оёгини сал букиб, пўстакнинг устига ёнбошлади — да, нима деярини билмай, Бийди момо узаттан чойни ҳўплай бошлади. Орага яна

жимлик чўқди. Кичик келин ҳамон изиллаб йигларди. Печканинг орқасида ёттан мушук нон исини сезиб ўрнидан туриб керишди, миёвлаб, Норматнинг атрофини айлана бошлади. Бийди момо ўрнидан туриб, юқ тахмонига борди ва ниманидир «тир» этиб йиртиб, сўнг қўлига боғлади, қайтиб, Норматнинг қаршисига ўтиреди.

— Пиш — э! — деди зарда билан оёғига бориб суйкала — ёттан мушукнинг қулогига уриб.

Мушук тарсаки еган қулоғини бир силкиди — да, Норматнинг олдига ўтиб, унинг оғзига қараб «миёв», деди. Нормат мушукнинг бошини силаган бўлиб, иккита ушоқ олиб бурчакка ташлади. Мушук югуриб бориб, ушоқларнинг бирини оғзига солди. Шарақ этиб очилган эшикка чўчиб қаради — да, хотиржам иккинчи ушоқни чайнай бошлади. Эшикда катта келин кўринди. У сариқ сатин чопони устидан эски, енглари титилиб кетган, бели чилвир билан боғланган эркакча йўл — йўл яктак, балчиққа беланганд катта кирза этик кийган, қизғини рўмолини бошидан сиқиб ўраб олганди. Унинг заиф ва муштдай гавдасига этик жуда хунук кўринар, узоқдан ботқоқда ботиб бораётганга ўхшарди. У эшикни ёпиши билан иссиқ хонага гўнг ҳиди гуп этиб урилди. Яктакка ҳам, унинг юзига ҳам лой теккан, лой совуқдан қизарган юзида худди холдай кўринарди. Норматни кўриб у уялгандай бўлди. Уятчан ва қизарган кўзлари билан Норматта илиқ термилиб қўйди. Унинг юзи озғин, олдтишидан биттаси ярим синган, соchlари палапартиш рўмол ичига тиқиб қўйилган эди.

— Молхонани кураб бўлдим, — деди у ўқрайиб қараган қайнонасига изоҳ бергандай. — Шундай шилта бўп кетибди, яна бир жойдан чакка томяшти. Бирам совуқки, аёз қаттиқ бўлади, шекилини, ҳалитдан ер музлаб қолди. Кўлим қотиб кетди...

— Сарғилинг турдими? — деди Бийди момо хўмрайиб.

— Қаерда? Думидан кўтардим, қулогидан тортдим. Кучим етмади, емиш қанча берса индамай ейди. Кўтарам бўп қопти.

— Ёли атала қип берса, мадорга кираради, — деди Бийди момо куйинчак овозда. — Ёғни отаиқ тополмайди, биз қаердан топамиз.

— Амма, — деди катта келин қайнонасининг юшшагани — дан хурсанд бўлиб. — Эргага чувоққа чиқарсанмикан, ҳарна

иссиқда... Агар акам уйда бўлса ёрам берарди,— деб Норматта савол назари билан қаради.

— Билганингни қил,— деди Бийди момо.— Битта инак³ни эплай олмадинглар, энди хуморларинта пишириб енглар. Бир вақтлари ўн бешталаб инакка ўзим қарагич эдим, яна осмондай — осмондай оққулоқ инаклар эди... Э, нимасини айтаман!..

Катта келин қайнонасининг авзойи бузилганини кўриб, этигини ҳам қуритмай:

— Майли, мен ўтигин чопайин,— деди — да, катта этигини тўқ — тўқ эткизиб чиқиб кетди.

Кичик келин унинг изидан ижирганиб қараб қолди.

— Э, худойим — эй! — кўзларини юмид пичирлади Бийди момо.— Биз сенга нима ёмонлик қилдик, ҳаммасини бизга ташлайсан... Нуқул бизни кўрасан, касофат қилғонларга, ўғриларга, имонсизларга берсанг бўлмайди — ми... худойим!..

Орага ноқулай жимлик чўқди. Нормат айтмоқчи бўп келган гапини энди айтиб бўлмаслигини англаб ўрнидан турди.

— Нега турдинг?— деди Бийди момо унга саволчан қараб.— Ўтири, манавилар бирон ёвғон қиласар...

Нормат ўзининг нима учун келганини айтмоқчи эди, бироқ гурури йўл бермади, эшиқдан чиқаверишда ўйланиб туриб қолди.

— Менда гапинг борми?!— деб сўради Бийди момо, унинг остоңада қаққайиб турганини кўриб.

Нормат Бийди момога қайрилиб қаради ва унинг юзида анча юмашал аломатини кўриб, секин изига қайтди, тезак солинган төгорани тўнкариб ясама оёгини керив ўтири.

— Ҳа, нима бўлди? — деб сўради Бийди момо ажабсениб.— Бунча эри урган хотинга ўхшаб шумшайиб олдинг?

Нормат баттар бошини эгди:

— Амма, — деди синиқ овозда бошини кўтармай,— мен... мен уйга қайтсамми, деб эдим... Бўлар иш бўлди... Энди нима фойда... шунга бизни орага тушиб яраштириб қўйсангиз.

— А?!— Бийди момо қулогига ишонмагандай қайтиб сўради.— Қайтасан?! Ўша бузуқининг олдига — я?! Нима... сини соғиниб қолдингми?.. Орият борми сен — да... Эркакмисан ўзи?! Ёки матоҳингни урушга ташлаб

келдингми?! Ўша бузуқнинг сассиқ думбасини қучоқлаб ётмоқчимисан?!

— Амма! — унга илтижоли тикилди Нормат. — Мен болаларимни тирик етим бўп қолишини истамайман... Ўша ёқлардан ҳам шу қора кўзларди деб қайтдим. Энди уларнинг хор бўлиб юришини истамайман. Қўйинг эски гапларни. Келинингиз адашган бўлса ўзидан кўрсинг! Худодан топсин.. бироқ болаларда нима айб?! Кеча Ҳожар Ҳуррам чоннинг хотинидан қатиқ тиланиб юрибди, кўриб юрагим эзилиб кетди. Ҳамма уларга худди етимга қарагандай қарайди, худди отаси ўлган – дай, амма! — Нормат йирмасира бўзидағи ёшни зўрга ютди.— Мен уларни чирқилатиб қўя олмайман... Нима бўлса бўлди, худодан кўрдим.

— Тўгрисини айтавермайсанми, Норнат. — Унга бирдан жагиллаб ёпишди Ейди момо.— Хотинсирадим, деявер— майсанми?! Тўгрисини айт, нозимойим, хотинсирадингми, а? Мана сенга хотин!— Бийди момо иргиб ўрнидан туриб, кичик келининг олдига бориб социдан судраб келди.— Мана хотин... Бу эрсиран, сен хотинсиратан, олаҳу акбар... боринглар, икковинг эр – хотинсизлар, олиб бор, бор!.. Нега анграяяпсан, мени ҳазиллашпти деяпсанми?! Отанг бечора сенинг шу гапингни эшигтандами, ўзини зов'дан(қоядан демоқчи) ташларди... Болаларим, дейсан... бузуқнинг боласи бузуқ бўлади, бошқа гўр бўладими?!. Сени обигар*(сарсон қиласи демоқчи) қип ўлдиради... Хотин мана, Мулла Соқини ҳозир айтиб келиб, никоҳлатиб қўяман...

— Амма! — бақириб юборди Нормат гарангсиб ўрнидан турар экан. — Мени... мени нима деб ўйлаяпсиз, мен ахир бу... амма, эсингизди йигинг!..

Нормат довдираб қолди. У Бийди момонинг аччиғи бунчалар оловтоб бўлиб турганини билмай, уни ёқиб юборган эди. Кичик келин ўзини қайнонасининг қўлидан бўшатиб, ўтирган ерида орқага тислана – тислана, бир Норматта, бир Бийди момога илинж билан қараб, йиглаб юборди.

— Ҳа! — бор овози билан шангилади Бийди момо.— Мен шундай ўладим. Бузуқни қучоқлагунча, буни қучоқлаш савоб бўлади... Шарманда эркак бўлгандан хотинбоз бўлган минг марта яхши!!!

Бийди момо ақлдан озгандек депсиниб, ерга муштлади, унинг юзи кўкариб, кўзи намиқдан, оғзидан тупук сачрай бошлаганди. Унга шу тобда қарашиб қўрқинчли эди. Юзидағи ажинларгача қизариб, дириллаб кетди.

— Мен бари бир уйга қайтаман,— деди Нормат унга ўчакишгандай қилиб. — Болаларимни бировларга хор қип қўймайман...

— Жўна! — Бақирди Бийди момо. — Ҳозироқ жўна. Ҳозироқ бориб ҳаром путини яла... Сен бутун борсанг, у эртага ўйнашини уйингта киритиб, сени қоровул қип қўяди... у ўйнаши билан остинма — устин бўп ётганда сен тешикдан қараб, кўлингди сўриб ўтирасан...

Норматнинг миясига бирдан лоп этиб қон урилди. Ўзининг шунчалик ҳақоратланаёттани дафъатан эсига тушгандай ёноқлари қалтирай бошлади.

— Бас қилинг! — ўкирди у ёввойи овозда таҳдид билан Бийди момога яқинлашаркан. — Мендан нима истайсиз?! Ўлишимними?! Агар шутиб яна бир гапирсангиз...

— Ур! — Бақирди Бийди момо унга кўкрагини тутиб. — Ур, агар кучинг менга еттан бўлса ур!. Одамлар хотинининг аламини аммасидан опти десин. Ур, нега қараб турибсан?!.

Нормат бирдан ўзига келди — ю, уялиб кетди. Шартта бурилиб, эшикни шарақлатиб ёпиб чиқиб кетди.

— Бор ўша бузуқнинг олдига! — Изидан бақирди Бийди момо.— Менинг кейин номимниям тутма. Бор, бобола — рингнинг арвайи урсин сени... Илоё, хотининг билан қўшмозор бўл!..

Нормат ташқарига чиқиб, совуқ изгириндан энтикиб кетди. Қишлоққа кеч тушган, аёзли тун бошланган эди. Қон — қора осмон қозонида юлдузлар қайнар, кунботар тараф қонли шафаққа беланганд, қорли чўққилар ухлаб ётган оппоқ итларга ўхшаб гира — шира кўзга ташланарди.

XV

Ҳамал ойининг бошларида кунлар илиб кетди. Нормат бу йил экин экадиган жойни буталардан тозалаш учун қотнинг устига чиқди. Қотнинг устида ҳам қор эрий бошлаган, кўпдан бери ҳайдалмаган ер ҳаприқиб, қорни

ютоқар, ундан ер ҳиди бор ҳовур күтарилаёттан эди. Ер ўз одамларини, ўз эгаларини кутиб, келинчақдек ястаниб ётарди. Норматнинг қалбида дәхқончилик туйгуси жўш урди. “Хе—е—е—е...” — бақиргиси келди... Чўлоқланиб югурди, ерни харислик ва ташналиқ билан бағирлади, тупроқларни кўзига сурди, ўпди. Нормат кўзларини йириб, суқ билан ҳовур күтарилаёттан қорга, узоқ — узоқларга термулди. Қуёш бошида турар, оёқ остидаги қор аста сизиб эрир, илиқ ва енгил эсаёттан шабада баҳор кунлари бошланганидан дарак бериб, мунгайиб қолган зиркнинг шоҳларини силаб ўтарди. Нормат юрагидаги ҳислар қайтадан тирила бошлаганини, ўзида яратиш қуввати пайдо бўлаёттанини сезди. Бу — ўша афсонадаги Ер одамларидан, бобоси Бойхундан қолган Ерга бўлган Мұхаббат эканини оғриқ ва роҳат билан туйди. Унинг қулфат, азоб, изтироб, қўрқув, шубҳа ва иккиланиш эзиб ташлаган қалбида умид уйгона бошлади...

...Яна баҳор келади. Олам баҳорнинг шавқига тўлади. Қирларда худди олдингидек уруш билан иши йўқ, урущдан қўрқмайдиган лолалар очилади. Ер пишади. Ер етилади. Қир — адирларни чигирткалар чириллаши уйғотади... ухлатади. Қоп — қора бўлиб етилган мана шу ерни қўши билан бир киши ҳайдайтган бўлади. Омочнинг босқонини ушлаганча, бир қўлида гаврон билан ҳўқизларини ҳайдайди: «Ҳая — ҳуйт, ҳая — ҳуйт!...» Унинг пешонасидан, бўйинларидан сизилиб тер оқади. Тердан қўйлаклари ҳўл бўлиб кетади. Лекин у завқ билан, баҳт билан ҳайдайверади... Унинг эгнидан чиқаёттан ҳовур билан ердан күтарилаёттан ҳовур қўшилиб, узоқда, қўш томон ҳаволайди. У эса завқ билан қўшиқ айтиб, қўш ҳайдайди. У юрагида, баданида занглаб қолган уруш хотираларини, жароҳатларини тер билан юваёттан, ўзини поклаёттан Нормат полвон бўлади...

...Яна баҳор келади...

Нормат кўксидаги туйгулар олдида ожиз қолди. Уларни порлаб турган кўзлари орқали қўйиб юборди. Улар соғинган, тириклиқ ва ҳаёт барқ ураётган, буғ күтарилаёттан кенг далага худди бир тўда болалар каби қувноқ қийқириб юргилаб кетишиди. Нормат улкан калтакесакка ўхшаш тош соясида эримай қолган қордан

ҳовучлаб олиб, юзларига, кўксига ишқади, завқланиб кулди. Авваллари англамаган ва тўймаган ҳисни у тўрт йиллик урушда кўрган шунча азобларидан сўнг оёғи остидаги, уни, унга ўхшаш миллионларча ўз қўшчиларини кутиб ҳансираётган дунёдаги ҳамма нарсалардан муқаддас бўлган, унинг аждодлари бир умр қидириб ўтган – урушсиз юртни кўрди..

„Нормат қотнинг устидан тўғри Читта чиқиб кетди. У Оқбўта оқсоқолдан насияга битта ҳўқиз сотиб олмоқчи эди. У ерда эски чавандоз ошналари билан валақлашиб қолиб, жуда кеч қайтди.

На қиш, на баҳор ҳисобланган илимилиқ кеча гўзал ва мафтункор эди. Қуёш ботиб кетган тарафда қирмизи бўлиб из қолган. Бу қирмизилик шу даражада ҳарир эди – ки, худди осмон деразасига бирор атайлаб қизғиш шоҳи парда илиб қўйгандай. Тун зим – зиё, осмон юлдузли эди. Қаердадир безовта бўлиб каклик сайдарди. Узоқ тоф орти қишлоқлардан итларнинг вовиллашлари эшитиларди. Нормат Қоратўшни сеќин ҳайдаб, тунга қулоқ солиб борар, елкасига оғирлик қилаёттан мильтигини дам у, дам буёғига олиб қўярди. Тунда қандайдир жимиirlаш товуши эшитилгандаи бўларди. Бу эриётган қорнинг шарпаси эди. Қоратўш туёғининг садоси тошлардан акс олиб қайтар, отгоҳ – гоҳ қулогини оддинга динг қилиб, бир пишқираварди – да, яна йўлида давом этарди. Нормат тун қўйнида файришшуурӣ ҳисга берилганди: унинг қўшиқ, айттиси келарди.

—И – и – им – и – и –..Ҳи – и – им – ҳи – ҳим – им, – хиргойи қиласи у. Унинг ҳозир бутун вужудини қувонч қамраган бўлса ҳам, хиргойиси ғамгин ва мўнгли эди. Хиргойиси думбиранинг нағоҳ чертилиб кетган торига ўхшарди. Унинг хиргойисида сўз йўқ, ғамгин, гуссали оҳанг тараларди. Юраги унга ер, баҳор ва ҳаёт ҳақида сўйлаб бермоқда эди.

У қишлоққа ярим кечаси кириб борди. Қишлоқда уни биринчи бўлиб Ўрин чўпоннинг ити кутиб олди. Қишлоққа кириб келаёттан шарпани сезиши билан ит қаттиқ ҳуриб, югуриб келди. Изидан бир қанча итлар қўшилиб ҳура бошлиди. Ўрин чўпоннинг каттакон, сарғиш ити ириллаганча

Қоратўшнинг йўлини тўсди. Бироқ қари от бунақа йўлтўсарларни кўп кўргани ва итни танигани учун йўлида бепарво давом этди. Шундан кейин бир гала ит отнинг орқасидан ҳура бошлиди.

—Тир – р... – Нормат узангидан тишилаган сарғиш итдан қўрқиб кетди.

—Саритой, ҳе, энанг ўлгур, танимаяпсанми!.. Саритой..

Саритой ўзининг отини эшишиб, узангини қўйиб юборди – ю, лекин орқага тисарилиб ҳура бошлиди.

—Саритой... Саритой.. бас қил, нима, кўзинг кўрми!...

Саритой отлиқ ўзларининг одами эканига ишонди шекилли, орқада қолиб, яна бир – икки бор ҳуриб қўйди. Унинг тинганини кўрган бошқа итлар ҳам орқада қолища.

Нормат Ўрин чўпоннинг ҳаётидан ўтиши билан уйнинг чироги ёниб турганини кўриб ҳайрон бўлди. Қортўшни Бийди момонинг отхонаси эшигига боғлаб, кўнгли бир нарсани сезгандай, отни ялонғочламай ҳам уй томон юрди. Назарида уйнинг эшиги очиқдек, ичкарида кимдир ўтиргандай туюлди – ю, ажабланиши баттар ошди. Катта – катта қадам ташлаб айвонгача борди ва уй ичида соchlари ёйилиб кетган, эгнига узун чопон кийган кампирнинг чироқ олдида ўтирганини кўриб қўрқиб кетди. Кампирнинг пичирлаёттани айвончага эшитилиб турар эди. Нормат эшиккача борди – ю, кампирнинг Бийди момо эканини кўриб, турган жойида қотиб қолди.

—Худоё балолардан қишлоғимизни ўзинг халос қил, бузуқиларди тезроқ қора ерга торт, одамларди меҳри оқибатли қил, имонсизлардинг жазосини ўзинг бер.. алҳамдиулоҳи раббил оламин, бирраҳматика дарҳамар раҳими.. вал..амин қасд қифонлар паст бўлсин, қирғин опкеганлар қирғиндан ҳалок бўлсин!..

Нормат шошиб қолди. Бу оддий намозга ўхшамасди. Бийди момонинг кўриниши бир ҳолатда эди.

—Амма! – бақириб юборди Нормат елкасидан милтиқни қўлига оларкан чўчинқираб. – Бу нима қилиқ?

Бийди момо чўчиб тушди – ю, ранги гезариб унга қаради. Сўнг шошиб ердаги оқ гарди рўмоли билан желагини бошига олиб, Норматта чақчайиб тикилди.

— Сизга нима бўлди, амма?! — деб сўради Нормат яна чинқириб. — Совмисиз?!

Бийди момо Норматнинг гапларига жавоб бермасдан, чироқнинг қаршисида туриб олди. Нормат ўша қунги жанжалдан кейин яна аммасига мазах бўлгиси, заҳар гапларни эшиттиси келмай, унга кўриниш бермай юрганди. У ҳозир, аммасини яна келинлари билан жанжаллашиб қолдими, деган фикрга борди.

— Худоё ўзинг кечир, — деди Бийди момо ўзига гапиргандай, кўзларини юмаб олиб. — Ҳаммамиз ожиз бандамиз, ўзинг бизларди кечир. — Юзига фотиҳа тортиб, кўзларини очди. Яна мазах қилаётгандай юзларини бужмайтирди. — Сени кутиб ўтирибман... Хотинжонингни ўйнаши келди... Сен яна уни қучоқламоқчи бўласан. Гўё ҳаммасини мен ўйлаб топгандай, бузигингдики яна қичиб қопти... Индамай сенинг очиқ эшигинга кириб кетди...

Бу гапларни у худди Норматнинг устидан кулаёгандай, ярим тантана, ярим масхара билан айтди. Нормат қўлидаги милтиқни сиқиб ушларкан, тўсатдан пайдо бўлган бу хабардан қалқиб кетиб:

— Ёлғон?! — деб вишиллади. Унинг кўзлари каттариб, юзига қон қўпчиди. Юрагида тоғдаги туйгулардан асар ҳам қолмай, ўрнини оғриқ, жуда улкан оғриқ эгаллади.

— Ёлғон?! — деди Бийди момо кўзлари олайиб, бирдан кулиб юборди. — Ха — ха — ха... ёлғо — о — он!.. Ҳали мен ёлғончи бўп қолиб, хотининг тоза бўп қолдими? Ҳа — ҳа, бор, ўзинг кўр... ёлғон бўлса... бор... ўша бузуқингни... яна ўйнаши билан қандай топишиб олганини кўр. Ҳозир ўйнаши хотинжонингни иштонини ечиб бўлди... Ҳа — ҳа, ҳа... авваласи қилигини қип ҳам бўлгандир... Мен роса етмиш уч кун пойладим. Йўлинни пойладим. Барибир келишини билардим... ҳар куни пойладим... Совуқларда музлаб бўлсаям пойладим. Ниҳоят, шубҳам тўғри чиқди. Биласанми, у ким... Айтмайман!.. Ўзинг бориб кўр... агар эркак бўлсанг ўлдир икковиниям... чавақлаб ташла! Болаламай йўқот... кўкрагингда озгина эркаклик гурури бўлса, ўлдир!

— Ўлдирман! — Ўкирди Нормат, Бийди момонинг ёқасидан шаппа ушлаб олиб бўға бошлади. — Қари шайтон... ўлдирман!..

— Менга дўқ қилганинг – ча бориб хотинингди этагини ёп! — Хириллаб шанғиллай бошлади Бийди момо. — Ўша хотининг қишлоқقا касофат келтирди. Ҳамма балога у сабабчи. Агар шу ҳолатда қўйса, яқинда бутун қишлоқни ер тортиб кетади.

— Ёлғон! — Нормат куч билан Бийди момонинг оғзини ёлиб ўшқирди. Бирдан миясида оғриқ туриб, терлай бошлади. — Агар шу мартаям ўшак сурган бўлсанг, келиб сен ялмогизни отаман!..

Бийди момони итариб ташлаб, талпанглаб чиқиб кетди. Бийди момо зарб билан бориб деворга урилди йиқилиб тушди. У ёттан ерида гурс – гурс этиб ташланаёттан икки хил қадам товушини эшишиб ётаркан, жонҳолатда бошини кўтариб, эшикка қараб бақирди:

— Ўлдир, ўлдир уларни, уругини йўқот бу дунёдан! Сўнг келиб, мени от, майли... мен бечора... бир қаровсиз кампирни от, майлига... Оҳу – уҳу – у ҳу! — Йўталиб, йиглаб юборди – да, мадорсизланиб, ўмгани билан гиламнинг устига ётиб қолди.

Анча вақтдан кейин қалтироғи босилгач, ниманидир эслагандай иргиб ўрнидан турди – да, ялангбош ҳолатда: «Вой, ўлай, ўлдирақ қўяди бу аҳмоқ чўлоқ», деган – ча Норматнинг изидан югуриб кетди. У довдираф чопар, кўзи ҳеч нарсани кўрмасди. У фақат тезроқ юришини ўйларди. Бироқ ўзининг хаётидан чиқаверишдаги тошга қоқилиб, кўкраги билан йиқилиб тушди – ю, боши тошга тегди, кўзидан ўт чақнади, бошини икки қўли билан қисиб ушлаган ҳолда ҳушидан кетди.

XVI

Анзират болаларини ухлатиб, печка ёқди. Катта пақирга сув қўйди. Ташқарига чиқиб, тогорани олиб кирди. Ўзига ҳам ўрин тўшаб, пишиллаб ухлаб қолган Ҳожарнинг пешонасидан ўпди – да, чаккасига секин шаппатираб эркалаб қўйди. Ҳожар бурни қуриллаб, сал жилмайиб ухларди. Унинг қошлари, ингичка ияги ва чўзиқ кичкина юзи Анзиратта ўхшар, қолган жойлари – бадқовоқлиги ва лўппидиги Норматнинг Анзират келин

бўлиб тушганда номаълум касалликдан ўлган опасига ухшарди.

— Қачон эсларинг киради сизларнинг,— деди у эрка оҳангда, тураётиб Холматнинг пешонасидан ўпаркан. — Пешонамга сизлардан бошқа суюнчиқ ёзилмаган шекилли...

Сўнг чопонини ўринга ташлаб, бошидаги қора шол рўмолни Ҳожарнинг устига ёпди—да, очиқ қолдирган эшикни ёпиш учун ўрнидан турди—ю, остоноада худди гуноҳкордай ҳижолатли жилмайиб турган, қўлида тўқима қамчи ушлаган, юзи сал—пал оқарган, бир оз озган, қовоқлари халта бўлиб қолган, қоракўл телпак, узун пўстин кийиб олган Мирзақулни кўриб, турган койида қотиб қолди.

— Мана, мен келдим,— деди Мирзақул пишиллаб, нима учун келганини ўзи ҳам билмаёттандек гуноҳкор оҳангда.

— Мана, келдим, Анзират.

Анзиратнинг оёғида дармон қуриб, ўтириб қолди ва Мирзақулга чўчиб, худди мушук чангалида қолган қуш боласидай илтижоли термилиб турди.

— Сенинг хаёлингта бошқа нарса келмасин, Анзират,— деди Мирзақул теллагини бошидан олиб. — Сен билан хўшлашгали келдим... Мен ҳам у ёқа кетяпман... Мени қадрлашмади. Анзират, қадримга етишмади... Ишлатиб, ишлатиб... Энди керак бўлмай қолганимда жўнатишяпти... Сенинг олдингдан ўтгани келдим... Ким билади... тирик қайтаманми, йўқми? Мендан рози бўл, энди...

— Нега келдингиз?!— Ваҳимали шивирлади Анзират, унинг тиззалари дириллай бошлаганди. — Нега келдингиз?.. Сизни деб чеккан шунча азобларим етмасмиди... бошимга ортган шунча савдоларингиз етмасмиди?..

Мирзақул ерга қаради ва бошига телпагини қайтадан кийди. Сўнг ниманидир айтмоқчи бўлиб тараффудланди—ю, лекин айтмай, индамай қолди. Унинг ҳозирги туришида илгариги савлатидан асар ҳам йўқ, аввалги гердайиш, ўзига зеб бериб гапириш ва доимо ўзининг мансабини эслатиб турадиган салобати қолмаган эди. Унинг кўзлари чўйкан, соқоллари ҳам аввалгидек қиртишлаб олинмаган, ўсиқ, палапартиш кийинган эди.

— Мен кўп ўйландим,— деди у мунгли ва муштипар товушда хириллаб, Анзиратта қарамасдан.— Кўп ўйландим... Хотин зотини эрмак деб ўйлардим олдин. Хоти зоти эркакка эрмак учун яратилган, деб ўйлар эдим. Умримда ҳамиша шундай қилиб келдим, Анзират, сени кўргунча шундай деб ўйлардим. Сени кўрган биринчи ойлари ҳам шундай деб ўйлардим... Дунёда ҳамма нарса эрмак, қўлингда пулинг, остингда отинг бўлса, маликаниям қўйнингга олишинг мумкин, деб ўйлар эдим. Сени кўрдим — у, ҳамма ўйларим чил — чил синди. Олдинлари хотин зотини аламдан, ўчакишиб эрмак қиласадим... Сен мен кўрган хотинларинг ичида бўлакчасан, Анзират... Сен ҳаммадан бўлакчасан, Анзират, сен ҳаммамиздан устун турасан... Агар рози бўлганингда сенга ўша пайтдаёқ уйланган, сени буйтиб хор қип қўймаган бўлардим.

Анзират ўзини йўлдан уриб, хўрлатиб ва ҳақоратлатиб, энди эса унинг олдига бўйин эгиб келгани ва ўзини ҳаммадан устун қўяёттани учун кўнгли тўлиб борар, алам, хўрлик унинг бўғзини куйдирмоқда эди.

— Кетинг, — деди Анзират ва деворга бошини тираб йиглаб юборди. — Кетинг... Мени тинч қўйинг, худо ёрмақасин сизни... Одамлар кўриб қолса нима дейди... Ақалми болаларимни ўйланг, уларни тирик етим қилманг...

— Агар урушдан омон қайтсан, сени ҳеч кимга хўрлатиб қўймайман. Мени деб чеккан азобларинг учун сени бошимда кўтариб юраман, Анзират. Мени деб ҳеч ким сенчалик азоб чекмаган... Ҳамма менга олдимда тиржайиб, изимдан қарғаган, хотинлар бирон нарса ундирысам, деб қийшанг—лаган, мендан кўпроқ нарса олишини ўйлашган... Сен эса... Агар урушда ўлиб—пўлиб кетсан, ҳамма дарров эсдан чиқариб юборади... фақат сен эслайсан, фақат сен азоб чекасан, биламан. Сенинг кўнглинг шундай... Мени фақат сен эслайсан...— Тез—тез гапира бошлади Мирзацул.

— Кетинг!— Шивирлади Анзират. — Кетинг...— Мирзацулга қарамай ҳўнграб йиглаб юборди. Бу хўрлик ва гина йиғиси эди. Қилган гуноҳи учун доимо кишилардан туртки еб келган, ҳақоратланган, хўрланган қалб шу бир оғиз ширин гап эшитиши билан эриб кетган эди. Унинг пу одам туфайли чеккан азобларидан, изтиробларидан

хўрлиги келар, ўпкаси тўлиб борар, ўзини босолмаётган эди, бу эркалик йигиси эди. Анзират бир неча ойдан бери биринчи марта чин кўнгилдан эркалик билан йигламоқда эди.

— Йиглама, — деди Мирзақул ва унинг аввалгидаи сочини силаш ва овутиш учун олдига борди. — Йиглама... Анзиратнинг қаршисига тиз чўқди. У ҳозир ҳамма нарсага тайёр эди. — Йиглама... Йиглама, биронтамиз ҳам сенинг кўз ёшингга арзимаймиз. Сени хўрлаганлар йигласин, мен йиглайнин, сен йиглама... Менинг ўпкамни тўлдирма, урушга кўнглим ғаш бўп кетмайин... Кулиб хўшлаш... Анзират... йиглама...

Анзират бу юмшоқ товушни эштиб, Мирзақулнинг юзига қаради. Мирзақулнинг кўзларида ҳижолат ва бошқа одамларницидан ўзгача, ўзи учун аталган меҳр кўриб, бирдан кўнгли юмшаб кетди. Кўзига Мирзақул жуда муштипар бўлиб кўринди. Ундан кўрган барча азобларини унуди ва йиглаган кўйи:

— Кетинг, мен сиздан розиман, кетинг... худо хайрингизни берсин, тезроқ кетинг... — деди ва деворга сяниб, йиглай бошлади.

Мирзақул серрайиб қараб турди — ю, бирдан ўзини унинг оёқларига ташлади.

— Мени кечирдингми?! Мени — я! — деди у Анзиратнинг оёғини қучоқлаб олиб. — Нега кечирдинг? Нега? Нега бошқаларга ўхшаб жар солмайсан? Нега мени қарфамайсан, нега менинг шармандамни чиқармайсан?! Нега менинг гўримга гишт қаламайсан? Нега?!! Шунда мен балким енгил торгтан, юрагим бундай ғаш бўлмаган бўларди...

— Вой, бу нимаси,— қўрқиб орқага тисланди Анзират.

— Бу нимаси? Кетинг, кетинг деяпман сизга, бундай

қилманг... Сиздан розиман, дедим — ку... Кетинг, оҳ, кетинг!..

— Хўп, хўп,— деди Мирзақул унинг оёғини қўйиб юбориб, ерда ётган теллагини қўлига олди. — Хўш... Кет десанг, кетаман... Ўл десанг, ўламан... Майли, хўш қол... Мен ўлиб кетсан, қарғаб юрма, рози бўл... рози...

У шартта изига бурилди ва бир қадам ҳам юрар — юрмас эшик зарб билан очилди — ю, қўлида милиқ туттам, эски, кири чиқиб кетган пахталигининг ёқаси осилиб, ички

кўйлаклари кўриниб турган, кўкиш аскарий телпагининг бир қулоқчини шалпайган, узоқ юргурган отдек ҳансирааб, кўзлари қизариб кеттан Нормат кириб келди. Уни кўриб Мирзақул орқага чекинди ва Анзират билан ёнма — ён туриб қолиб, унга қўрқув ҳамда ваҳима билан тикилди.

Нормат соchlари тўзиб, бир ҳолатда бўлиб ётган, ёлғиз чит кўйлакда деворга қапишиб турган Анзиратни кўргач, ҳаммасига тушунди.

— Ҳали сен эдингми?! — деди у ғазабдан овози бўғилгудек хириллаб. — Ҳали сен эдингми, менинг ҳаётимни булғаган, мени болаларимдан жудо қилган!.. Ҳали сен эдингми... ҳезалак!..

Мирзақул индамай бошини эгди. Унинг юзида ҳеч қандай ифода иўқ эди.

— Сен шунинг учун ҳам бизларни урушга жўнаттан экансан — да? — деди яна ёввойи товушда. Унинг кўзлари қизариб бораради, вужудида қалтироқ турган эди.— Бизни урушга жўнатиб, хотинларни бузиб, майшат қилмоқ — чи экансан — да, айғир!..

Мирзақул ўзини олиб қочишга улгурмади. Милтиқ қўндоғи чап биқинига зарб билан тегди — ю, у биқинини ушлаганча, Анзиратнинг оёғи остига йиқилди.

Анзират Норматта қўрқув билан тикилиб орқага тисланди. Бироқ Норматнинг кўзидағи ёввойи бир назарни англаб, бирдан тақдирига тан берди, кўзини ерга қадаганча ўтириб қолди.

Нормат унинг олдига бориб, лой ва балчиқда беланган қўли билан унинг иягидан кўтарди.

— Сени яна кечирмоқчи ҳам бўлман — а! — деди у алам билан бош сараклатиб, қутурган оҳангда. — Ҳа, майли, депман — а! Майли, адашибди, деб кечирмоқчи бўлман — а!.. Қанжик, мени харом... инг билан булғаган экансан — да... Мени мана бу харомтомоқ ҳезалакка алмаштиromoқчи экансан — да... қанжик!..

Анзират ҳўнграганчаси деворга ёпишиб қолди... Нормат партизанлар билан бир қишлоқни қутқаргандаги воҳеани: бир взвод фашистлар эрини боғлаб қўйиб, кўз олдида хотинини зўрлаб ўлдирганини, серсоқол деҳқоннинг номусдан жинни бўлиб қолганини эслади. Кўзига қон тўлди...

Бутун вужудида қалтироқ турди. У нафрат ва жирканиш аралаш тўрт йилдан бери бутун вужудини булгаб ётган манфур сўзни айтди.

— Фашист! — деди ярим хириллаб ва бу сўз тиф каби кўксини тилимлаб ташлади. — Фашист... сизлар фашистсизлар! — Алам аралаш шивирлади. — Яна нималардир дегиси, юрагини тўлдириб турган хўрлик ва нафратни яна бошқа тубанроқ сўз билан ифодалагиси келди. Бироқ, билган сўзларининг ичидан у бундан ҳам қабиҳ сўз топа олмади.— Фашистлар! — деди у ҳорғин, лекин кескин ва хирқироқ товушда. Сўнг миясида чақнаган ўтдан сесканиб кетиб, кўзи тиний бошлади. Кўз олдида туман пайдо бўлди. Туман тарқаб, у ўзини отмоқчи бўлиб келаётган сонсиз фашист аскарларини кўрди, қулоги остида яна ўқ овозлари, портлашлар эшитила бошлади. Таҳқирланган қалбида жирканиш туйди, лабининг икки чеккасида кўпик излари кўринди. У соғ оёгининг устига қўйиб милиқни ўқлади. Унинг бу ҳаракатини, кўрган Мирзақул ўрнидан иргиб турди. Оғриқнинг зўридан чап биқинини ушлаганча, юзи бужмайиб, эзилиб қолди ва бошини сал кўтариб:

— Нормат, эсингни йиг,— деди аллаҳсираган ҳолатда.

Нормат унинг товушини олисдан, минг йиллар наридан эшитаёттандек бўлди. У аллақачон ўйлаш қобилиятини йўқоттан эди. Унинг қўз олдида енгларини шимариб олган, уни отиш, уни ўлдириш, ҳаётини сўлдириш учун келаёттан, у уч йил урушган душман аскарларини кўрар, миясида бошланган портлаш ва ўқ товушлари томирларини кенгайтириб юборган, кўз олди чаңг—тўзонга тўлган эди.

Варанглаб отилган ўқдан Анзират чўчиб тусиб, унга даҳшат аралац кўзлари косасидан чиққудек, бақрайиб қаради.

Нормат Мирзақулнинг жон талвасасида иҳраб, тицирчилашини кузатаркан, кўнглининг бир чеккасида ёввойи хушнудлик уйғонди, милиқни маҳкам қисганча, кўзлари қизариб, узоқ югуриб, бирдан тўхтаган бўри каби ҳансирай бошлади, шу турили рақибини тилка — пора қилиб ташлаган ва яна тилка — пора қилишга тайёр турган ўзининг миллион ўйлар олдинги ёввойи аждодларига

жуда ўхшар эди. Авзойи ваҳимали тусга кирган, чакка томирлари бўртиб чиқсан, оғзининг икки чеккасида сарғиш, қуюқ кўпик кўпираётган эди. Салдан кейин унинг кўзи на миљтиқ овозидан уйгониб, юқ тахмони орқасида қўрқиб йиглаётган Холмат билан Ҳожарни, на кўзлари аллақачон сўниб бўлган Мирзақулни, на ўзига қўркув билан гужанак бўлиб тикилиб турган хотинини кўрарди. У аллақачон ўзини урушдаман деб ҳисоблар ва фақат қандай отишнигина ўйлар, бутун вужуди қалт – қалт титграй бошлаганди. У хотинига қўзичоқни кўрган оч бўридек йиртқич назар билан қаради – да, қаҳ – қаҳ уриб кулиб юборди. Тўхтаб – тўхтаб узоқ кулди. Унинг бу кулгиси соғлом одамнинг кулгиси эмасди, ваҳшиёна йиртқичнинг бўкиришига ўхшарди. Салдан кейин қишлоқ сукунатини бузиб иккинчи ўқ отилди. Кейин жимиб қолди. Ўқ овозидан безовта бўлган қишлоқ итлари ҳуришганча у ёқдан – бу ёқда югуря бошлашди.

Бийди момонинг отхонаси эшигига боғланган Қоратўш ҷўзиб – чўзиб, ғалати кишнаб қўйди. Итларнинг акиллашлари анчагача, тонг қип – қизил шоҳи пардасини осмон дарчасига туттунча тинмади... Ўқ овозидан ўзига келган Бийди момо ўрнидан иргиб турди – да, туртина – суртина Норматнинг уйига қараб югуря кетди. Пешонасидан оқаётган қон юзлари орқали секин кўйлагини ичига сизиб ўта бошлади. Бироқ ҳозир у ҳеч нарсани сезмас ва англамас эди. Унинг изидан уч – тўрт ит ҳуриб чопа бошлади. Бийди момо айвонга кираверишда яна бир йиқилиб тушди – ю, қаериdir қирсиллаб кетди. Жонҳолатда ўрнидан туриб, эшиккача борди. Хонада қонга беланиб ётган Анзират билан Мирзақулни, қўрқиб кетиб, бир – бирини қучоқлаб йиглаётган Холмат билан Ҳожарни кўриб, айвонга югуриб чиқди – да, ўзини деворга уриб бор овози билан хир – хирлаб, бақира бошлади:

— Одамлар!.. Қиёмат қойим бўлди. Нормат хотинини отиб қўйди. Одамлар!..

Унинг овози оқара бошлаган тонг қўйнига сингиб кетди.

Уч кундан кейин қишлоқда келган милиционерлар бутун ўтроқ қўнғирот уругидан Нормат полvonни ахтара бошлашди. Нормат полvonга яқин бўлган ҳамманинг уйи тинтиб

чиқилди. Фақат бир ҳафтадан кейингина Бухор қоялари остидан бўрилар ғажиб ташлаган, пешонаси ёрилган, қўллари синиб, панжалари мушт бўлиб тутилган жасадини топдилар.

* * *

...Ниҳоят қўнгирот элига баҳор кириб келди. У минг хил ноз, минг хил карашма билан уруш заҳматлари эзib ташлаган уруш одамларининг юрагига яшаш ва яшиш ишқини солди. Уларни эркалади, соchlарини силади, адирларни қип – қизил лолаларга тўлдириди, бутун борлиққа гўзаллик гиламини ёйди. Қирларни баҳт тиллари – майсалар қоплади. Жанжалкаш, асабий бўлиб қолган одамларнинг димогини эркалади, уларни қирларга етаклаб чиқди, кўзларидан ўпди.

Ёмғир бу йил хосиятли келишидан дарак бериб, тошларни, дараҳтларни аламидан чиққунча савалади, жилгаларга шўхлик қилиб, буралиб – буралиб оқди.

Баҳор қаровсиз қолган Норматнинг уйини ҳам эсдан чиқармади, унинг томига майсалар ундириди, айвонига қизғалдоқлар экди, дараҳтларини гулга кўмди, ариғида азобланиб, лойқаланиб оқди. Бузилиб кетаёзган ўчоқ бошида икки бойчечак ўсиб чиқди. Улар ҳеч ким эшитмас қилиб, «Баҳт, баҳт, баҳт», дея қўнгироқ чаҳдилар, ёмғир деразасига урилиб – урилиб йиглади, шамол айвонга йигилиб қолган хас – хусларни учириб, узоқ – узоқларга олиб кетди...

...Осмон юзини икки марта қора булат қопласа ҳам майборотнинг охирларига бориб кунлар исиб кетди. Катта дарёдан лойқа сув келмай қўйди. Дараҳтларнинг гуллари тўкилиб бўлди. Енгил ва илимилик шабада эса бошлади.

Саратоннинг бошларида, ўрик довуччалари сарғая бошлаганда, кўзлари ожиз бўлиб қолган Бийди момонинг катта келинидан бошқа терсоталиклар қотнинг устига кўчиб чиқишиди. Бийди момонинг катта келини қайнонасини ёлғиз ташламаслик ва уйнинг чирогини ўчирмаслик учун бу йил қишлоқда қолди. Кичик келин баҳорнинг охирларида қамашилик бир муаллим бола билан қочиб кетди.

Катта келин Бухор полвоннинг авлодини ёлгиз ўзи давом эттиришга аҳд қилди ва эрининг олишларда киядиган қора яктагини кийиб, белини маҳкам бояглаб, саккиз яшар ўғли билан уй суваши, ўтин териш ва сомон тўдалашга киришиб кетди.

Қотнинг устидаги буғдоилар саргайди. Улар тўргт йиллик ҳоргин сукунатини бузиб, қувноқ шовулладилар. Баҳт ва эзгулик, муҳаббат ва хаёт, меҳр ва оқибат ҳақида шивирлашиб, дунёдаги энг муқаддас куйни олтин қўнгироқлари билан чала бошладилар.

Т а м о м

МУНДАРИЖА

Ҳикоялар

Шамолни тутиб бўлмайди	3
Ялпиз ҳиди	14
Бевақт чалинган бонг	34
Очилмаган эшик	58
Ажр	73
Қисса	
Уруш одамлари	90

Агадий – бадиий нашр

НАЗАР ЭШОНҚУЛ

**ШАМОЛНИ
ТУТИБ БҮЛМАЙДИ**

Қисса ва ҳикоялар

*Муаллиф ушбу китобнинг чол этилишига яқиндан ёргам
Садриддин Қурбоновга ўз миннатдорчилигини билдиради.*

Босишга 01.01.2006 й.да рухсат этилди,
Бичими 84x108 1/32. Босма тобоги 10,71,
Шартли босма тобоги 6,375. Адади 700 нусха.
Баҳоси келишилган нархда. Буюртма № 1.